

॥ नमोत्थु णं समणस्स भगवओ महावीरस्स ॥
॥ सिद्धान्तमहोदधि श्रीमद्विजयप्रेमसूरीश्वरगुरुभ्यो नमः ॥

विषमपदटीप्पणसमलङ्कृतम्
श्री महानिशीथ सूत्रम्

सम्पादकः

पू. पं. श्री पद्मसेनविजयजी म. सा.

संशोधकः टीप्पणकारश्च

पू. पं. श्री कुलचन्द्रविजयजी म. सा.

प्रकाशक

श्री जैन संघ, पिन्डवाडा (राजस्थान)
शेठ कल्याणजी सौभागचन्द जैन पेढी - ३०७ ०२२

॥ नमोऽस्तु ते समणस्स भगवओ महावीरस्स ॥
॥ सिद्धान्तमहोदधि श्रीमद्विजयप्रेमसूरीश्वरगुरुभ्यो नमः ॥

विषमपदटीप्पणसमलङ्कृतम्
श्री महानिशीथ सूत्रम्

सम्पादकः

पू. पं. श्री पद्मसेनविजयजी म. सा.

संशोधकः टीप्पणकारश्च

पू. पं. श्री कुलचन्द्रविजयजी म. सा.

प्रकाशक

श्री जैन संघ, पिन्डवाडा (राजस्थान)
शेठ कल्याणजी सौभागचन्द जैन पेढी - ३०७ ०२२

પુનઃ પ્રકાશન : વિ. સં. ૨૦૧૩

પ્રાપ્તિસ્થાન

શ્રી જૈન સંઘ, પિંડવાડા (રાજ.)

શેઠ કલ્યાણજી સૌભાગચન્દ્રજી જૈન પેઢી
પિંડવાડા - ૩૦૭ ૦૨૨

દિવ્યદર્શન ટ્રસ્ટ

C/o. કુમારપાલ વિ. શાહ
૩૬, કલિકુંડ સોસાયટી
ધોલકા - ૩૮૭ ૮૧૦

મરતંકુમાર ચતુરદાસ શાહ
૮૬૮, કાલુશીની પોલ,
અહમદાબાદ - ૩૮૦ ૦૦૧.

મુદ્રક

દુંદુભી પ્રિન્ટર્સ

ફોન : ૦૭૯ - ૬૫૮ ૪૧ ૮૬

॥ શ્રી શંખેશ્વર પાર્શ્વનાથાય નમઃ ॥

॥ શ્રી પ્રેમ-ભુવનભાનુ-ધર્મધોષ ગુરુભ્યો નમઃ ॥

॥ ઐ નમઃ ॥

આમુખ

સિદ્ધ થતાં અનામી જીવના ઉપકારથી અનાદિનિગોદમાંથી બહાર નીકળેલો ભવ્ય જીવ અચરમાવર્તકાળના અનંતા પુદ્ગલપરાવર્તો ભટકવામાં પૂરા કરે છે. સહજમળના કારણે કર્મોનો વળગાડ જીવ પાસે જાતજાતનાં નાટકો કરાવે છે. એ અરસામાં જીવને સતાવતો સૌથી મોટો દોષ હોય છે મોહ. આ મોહને આધીન થયેલો જીવ ‘હું’ અને ‘મારું’ની અંધારી કોટડીમાં અથડાય છે. અને રાગ-દ્વેષ નામના જલ્લાદો દ્વારા વારંવાર કપાય છે. તે વખતે સૌથી વધુ સતાવે છે દેહાધ્યાસ - શરીરની મમતા. શરીરની મમતાના પરિણામે દરેક ભવનો આરંભ કરે છે આહારથી. આ સતત આહારની પ્રવૃત્તિ જાણે કે એની પ્રકૃતિ બની જાય છે, અને ઓળખાય છે આહારસંજ્ઞા તરીકે. એની સાથેસાથે ભય વગેરે સંજ્ઞાઓ પણ જોર પકડતી જાય છે.

બીજી બાજુ અજ્ઞાન અને અભિનિવેશના કારણે મિથ્યા દર્શન-મિથ્યા જ્ઞાન અને મિથ્યા આચરણ સંસારમાર્ગને લીલોછમ રાખે છે. મિથ્યાત્વ, અવિરતિ, પ્રમાદ, કપાય અને યોગ, કર્માશ્રવના આ આભ્યંતર કારણો પાંચ અનાચારરૂપે પ્રગટ થતાં રહે છે.

આમ ને આમ અચરમાવર્તકાળ પૂરો કરતો જીવ ચરમાવર્તમાં આવીને તથા ભવ્યત્વરૂપ સ્વભાવ, સારી ભવિતવ્યતા, કાળકૃત સહજમલદ્વાસની પ્રક્રિયા અનુકૂળ થયેલાં કર્મો, જાગૃત થયેલો શુભ પુરુષાર્થ અને અરિહંતના અનુગ્રહથી અપુનર્બંધક આદિ અવસ્થામાં ઔચિત્ય વ્યવહાર વગેરે શુભાચરણો આદરે છે.

અર્ધપુદ્ગલ પરાવર્તથી પણ કંઈક ઓછો કાળ બાકી રહે તે પછી જ જીવ સમ્યગ્દર્શન, સમ્યગ્જ્ઞાન અને સમ્યકચારિત્ર પામી શકે છે. મોહનીય કર્મના ક્ષયોપશમયુક્ત જ્ઞાનાવરણીય કર્મના ક્ષયોપશમના કારણે જિનાગમને સારી રીતે પામી શકે છે, સમજી શકે છે, સ્વીકારી શકે છે. આ જિનાગમો પણ તે-તે જીવની યોગ્યતાને અનુસારે ત્રણ વિભાગમાં વિભાજિત થઈ શકે : (૧) ચતુર્બિંધ સંધની દરેક વ્યક્તિ જે ભણી ન શકે, જેમ કે, નવકાર વગેરે (૨) યોગોદ્વાહી સાધુ કે સાધ્વી જ જેના અભ્યાસના અધિકારી બને, જેમકે આચારાંગ વગેરે (૩) યોગોદ્વાહી સુસાધુઓમાં પણ અમુક શાસ્ત્રદર્શિત પ્રિયધર્મ, દૃઢધર્મ વગેરે વિશિષ્ટ યોગ્યતાધારક જ જે સૂત્રોનો અભ્યાસ કરી પારગામી બની શકે, જેમ કે બૃહત્કલ્પભાષ્ય, વ્યવહારસૂત્ર, નિશીથચૂર્ણિ વગેરે. મહાનિશીથસૂત્ર પણ ત્રીજા

ભાગમાં આવે છે.

ઇલાયચીકુમાર દોરડા પર ચાલતો હતો. દોરડાની બેમાંથી એક પણ બાજુ જો વધુ ઝૂકી જાય તો પડવાનું અને મરવાનું થાય. હાથમાં બાંબુ રાખેલો, તેથી સમતુલા જાળવી શક્યા. બસ આ જ રીતે ઉત્સર્ગ-અપવાદ અંગે, નિશ્ચય-વ્યવહાર અંગે સમજવાનું છે. એક પણ બાજુ જો વધુ પડતો ઝોક આવ્યો તો સમજી લેવું કે આત્માનું ગુણસ્થાનકમાંથી પતન નિશ્ચિત છે. અપરિણત જીવો માત્ર ઉત્સર્ગ પર ભાર આપે છે, અને પોતે સેવેલા ઉત્સર્ગમાર્ગના અભિમાનમાં સકારણ અપવાદ સેવનારની નિંદા કરી ચારિત્રધર્મથી પોતે ચ્યૂત થાય છે, તો અતિપરિણત જીવો આવશ્યકપદે સેવેલા અપવાદને પ્રમાદ પર-વશ બની કાયમી બનાવી દેતા હોય છે. ધોરીમાર્ગમાં ક્યાંક રસ્તો તૂટી ગયો હોય, ખાડા પડી ગયા હોય, તો ડાઇવર્ઝનની જરૂર પડે, પણ ડાઇવર્ઝન ખાડા વગેરે પૂરા થાય એટલે તરત ધોરીમાર્ગને મળી જાય છે. માત્ર ઉત્સર્ગને પકડનારા અપરિણતો ધોરીમાર્ગનો એકવાર પકડેલો રસ્તો છોડવા તૈયાર થતાં નથી, પછી ભલેને રસ્તો તૂટી જવાના કારણે-ખાડાઓનાં કારણે પગ ભાંગી જાય, હાડકાં ખોખરાં થઈ જાય, અને પછી એ ખાડામાંથી બહાર આવવાની શક્યતા જ ન રહે. એમ અત્યંત આવશ્યક અવસરે પણ માત્ર ઉત્સર્ગને પકડી રાખવામાં આત્મવિરાધના-શાસનહીલનાના મોટા દોષો ઊભા થઈ જાય અને પરિણામે દુર્ગતિ ઊભી થાય. અપવાદમાર્ગીઓ એકવાર ડાઇવર્ઝનના નામે મૂળમાર્ગથી ફંટાઈ ગયા પછી એ દિશામાં જ ચાલીને ભૂલા પડે છે, દિશા ચૂકી જાય છે. એમ અતિપરિણત જીવો અપવાદના નામે ડાઇવર્ઝન લીધા પછી માત્ર અપવાદના માર્ગે જ ચાલતા રહી આત્મશુદ્ધિ-સંયમસાધનાના માર્ગથી વિમુખ બની સંસાર તરફ લઈ જનારી દિશા તરફ વહી જાય છે.

જેઓ પરિણત છે, તેઓ ઇલાયચીકુમાર જેવા છે. ઉત્સર્ગ-અપવાદના બેમાંથી એક પણ તરફ ઝૂકવાના પ્રસંગમાં જિનાગમરૂપી બાંબુને બરાબર ઉપયોગમાં લઈ સમતુલા જાળવી રાખે છે. અને સાધનાના માર્ગે સલામત વિચરી મુકામે પહોંચે છે. એ ડાઇવર્ઝનનો ઉપયોગ પણ ઈજા પામ્યા વગર શીઘ્ર મૂળમાર્ગને પકડી આગળ વધવા માટે જ કરે છે.

જે આવા પરિણત જીવો છે, તે જ ઉત્સર્ગસ્થાનો, અપવાદસ્થાનો અને પ્રાયશ્ચિત્તસ્થાનોને બતાવનારાં છેદસૂત્રો માટે અધિકારી છે. આવો પરિણત આત્મા જ પાપભીરુ છે, યોગોદ્વાહી છે, ગુરુઆજ્ઞા-નિશ્રામાં રહેલો છે. યોગ્યતા વિકસે ત્યાં સુધી રાહ જોવાની ધીરજવાળો છે, અને જિનવચન પર, સામાચારી પર, ગુરુપરંપરા પર, અને ગુરુવચન પર પૂર્ણ શ્રદ્ધાવાળો છે.

જેમ સિંહશનું દૂધ સોનાના પાત્રમાં જ ટકી શકે, તેમ છેદસૂત્રો યોગ્ય પાત્રમાં જ ટકી શકે. સાઇકલ ચલાવતાં આવડે એટલા માત્રથી એને કાર ચલાવવા ન આપી

શકાય, અને કાર ચલાવતાં આવડે એટલા માત્રથી એને પ્લેન ઉડાડવા ન સોંપી શકાય. તેમ થોડા અધકચરા જ્ઞાનથી અધૂરા ઘડાની જેમ છલકાતા જીવોને અતિ ગોપનીય છેદસૂત્રો આપી ન શકાય. કાચા ઘડામાં પાણી ભરવા જતાં પાણી તો ઢોળાઈ જવાનું જ, એ કાચો ઘડો પણ વિનાશ પામવાનો. એમ યોગ્યતા વિનાના જીવો છેદસૂત્રો ભણાવા કે જાતે વાંચવા બેસે તો સૂત્રનાશ તો થવાનો જ. એ જીવ પણ ઉત્સર્ગ-અપવાદના વિવેકને ન પારખી શકવાથી અને સૂત્રની સાચા ગુરુપરંપરાથી આવેલાં આમ્નાય-મંત્રસમાન ગુપ્ત રહસ્યોને પામી નહીં શકવાથી ઉન્મત્ત થઈ દુર્ગતિગામી થવાનો.

‘મહાનિશીથ’નો અર્થ જ છે - ઘોર અંધારામાં = અત્યંત ગુપ્ત રાખવા યોગ્ય સૂત્ર. આ સૂત્રનો ગુરુગમ અર્થ નહીં પામવાથી અને ‘અર્ધજરતીય’ ન્યાયથી અડધું પકડવાથી ઉન્માર્ગપ્રલાપી થયેલા પ્રતિમાલોપકોએ આ સૂત્રના આધારે કેવા કેવા લોચા માર્યા છે ? તે જોવા મહોપાધ્યાય યશોવિજયજીકૃત પ્રતિમાશતક ગ્રંથ જોવા જેવો છે. તેથી આ, જિનાગમનાં અત્યંત સારભૂત અને રહસ્યોથી ભરેલો ગ્રંથ જે-તેના હાથમાં ન આવે અને એની ગોપનીયતા-પવિત્રતા જળવાઈ રહે, તે અત્યંત ઇચ્છનીય છે.

ગ્રંથ પરિચય :

પૂર્વે આ મહાગ્રંથ આઠ અધ્યાયમાં વિભક્ત હતો. એમાં દરેક અધ્યાયના ક્રમશઃ ૦, ૮, ૧૬, ૧૬, ૧૨, ૪, ૬, ૨૦ ઉદ્દેશ હતા. એ પછી કાળપ્રભાવે ઘસારો પામેલા અને વેરવિખેર દશાને પામેલા આ ગ્રંથના ઉપલબ્ધ અંશોનું સંકલન સૂરિપુરંદર પૂજ્ય આચાર્યશ્રી હરિભદ્રસૂરિજીએ કર્યું. હાલ ઉદ્દેશ રહિત છ અધ્યાય અને બે ચૂલિકા ઉપલબ્ધ છે. આ કાલિક આગમના જોગમાં ૪૫ કાલગ્રહણ છે. આ આગાઢ જોગ આઉટવાણય છે અને ૪૫ દિવસ ઉપરાંત સાત વૃદ્ધિ દિન એમ બાવન દિવસના આંબેલથી આ જોગ થાય છે અને આ શ્રુત માટેની તપયોગ્યતા પ્રાપ્ત થાય છે.

વર્તમાન ઉપલબ્ધ આ ગ્રંથના છ અધ્યાય અને બે ચૂલિકામાં આવતા પદાર્થોની ઉપલક દૃષ્ટિએ વિગત આ છે -

(A) પ્રથમ શલ્યોદ્વરણ અધ્યયનમાં (૧) નિઃશલ્ય બનવા પર ખાસ ભાર મૂકવામાં આવ્યો છે. (૨) શુદ્ધ આલોચના વિચારથી માંડી અલગ-અલગ કઈ દશામાં જીવો કેવળજ્ઞાન પામ્યા તેનું સુંદર વિવરણ છે. (૩) કેવા-કેવા આલોચકો ખરેખર તો અનાલોચક જ અને સશલ્ય જ રહે છે તે બતાવ્યું છે. (૪) કેવી-કેવી શ્રમણીઓ ભાવ આલોચનાથી શુદ્ધ થઈ શકે અને મૂળથી જ આલોચના નહીં કરનારી કે તેવા-તેવા કયા મલિન ભાવોથી આલોચના કરનારી શ્રમણીઓ પાપશ્રમણી બની દુર્ગતિગામી બને છે તે સૂચિત કર્યું છે. (૫) શલ્યોદ્વાર કરનારની

પ્રશંસા અને શલ્યોદ્ધાર નહીં કરનારની અયોગ્યતાનો વિસ્તૃત નિર્દેશ કરી આ અધ્યયન પૂરું કર્યું છે.

(B) કર્મવિપાક નામના બીજા અધ્યયનમાં વિવિધ પ્રકારનાં પાપોને આચરી જીવે નાનાવિધ ભવોમાં સહેલાં આકરાં દુઃખોનું માર્મિક વર્ણન છે. વિશેષમાં મૈથુનદોષની સૂક્ષ્મ વિચારણા કરવામાં આવી છે. ક્યાંક, કેવી રીતે મૈથુનદોષ લાગી શકે ? તેની સાવધાની બતાવી છે. અને મૈથુનદોષથી અનંતકાયમાં વાસની સંભાવના બતાવી છે.

(C) કુશીલવર્ણનાત્મક તૃતીય અધ્યયનમાં મુખ્ય ધ્વનિ છે વિવિધ કુશીલોનું વર્ણન કરવાનો. એમાં પદમં નાણં તઓ દયા... પંક્તિને લઈ પ્રથમ જ્ઞાન કેમ ? એ પ્રશ્ન ઉઠાવી જ્ઞાનથી દયા અને દયાથી ઉત્તરોત્તર ગુણોની પ્રાપ્તિનો સુંદર ક્રમ બતાવ્યો છે. અને વજ્રસ્વામીએ ઉદ્ધાર કરેલી ચૂલા (ચાર પદ)થી યુક્ત નમસ્કાર મહામંત્રની ઉપધાનવિધિ બતાવી છે. એનાં જ દ્રવ્યસ્તવ-ભાવસ્તવનું વિવરણ મૂકી ભાવસ્તવની મહત્તા દર્શાવી છે. ભાવસ્તવ છકાયસંયમરૂપ હોવાથી ગૌરવભૂત છે. પંચમંગલ મહાશ્રુતસ્કંધ તરીકે ઓળખાતા આ મહામંત્રના દરેક પદના વિવરણમાં અરિહંતપદનું વિશિષ્ટ વિવરણ ખાસ મનનીય છે. શ્રુતનો જેટલો ભાગ અનુપલબ્ધ હોય, તે માટે પૂર્વશ્રુતધરોને દોષ ન આપવો. પણ ઉઘઈ વગેરે નાશક કારણો વિચારવાં અને જેટલું મળ્યું છે તેના પર અને તે આપણા સુધી પહોંચાડનાર શ્રુતધરો પર પૂર્ણ બહુમાનભાવ રાખવો. નમસ્કાર મહામંત્ર પછી ઈર્યાવહિયાસૂત્ર અભ્યાસપાત્ર છે. તથા ઈર્યાવહિયાસૂત્ર ક્યાં ક્યાં ઉપયોગી છે ? તેનો ઉલ્લેખ છે. પછી શકસ્તવ વગેરે ચૈત્યવંદન સૂત્રો ઉપધાનયોગ્ય બતાવ્યાં.

નમસ્કાર મહામંત્રનું મહિમાવર્ણન ધ્યાનાકર્ષક છે. અહીં જ ગોચરીના ૪૨ અને માંડલીના પાંચ દોષ અને આહારનાં ૬ કારણો પણ દર્શાવ્યાં છે. વિવિધ કુશીલોના વર્ણન સાથે આ અધ્યાય સમાપ્ત થાય છે.

(D) કુશીલસંસર્ગમાં સુમતિનું દૃષ્ટાંત હૃદયસ્પર્શી છે. જલચર મનુષ્યોનું વર્ણન છે. આ અંગેના વિવાદનો ખુલાસો પણ આ જ અધ્યયનના અંતે છે. પરપાખંડ અને નિન્દવની પ્રશંસા વગેરેમાં દોષો બતાવી પરમાધામી બનવાના કારણ તરીકે એ બતાવ્યું છે. કુશીલસંસર્ગી ચોથું અધ્યયન છે.

(E) ઉપનીયસાર નામના પાંચમા અધ્યયનમાં કયા ગચ્છમાં રહેવું અને કેવા ગચ્છમાં ન રહેવું - એની વાત છે. ગચ્છવાસની મહત્તાનું અને ગચ્છમર્યાદાની મહત્તાનું વૈવિધ્યસભર વર્ણન છે. ગુરુ કેવા હોય ? એનો ખુલાસો છે. શ્રીદુષ્પસહસૂરિ

અને વિષ્ણુશ્રી સાધ્વીનું વર્ણન છે. એમાં જ શ્રી શયંભવસૂરિએ મનકમુનિ હેતુ રચેલા શ્રી દસવૈકલિક ગ્રંથનો પણ નિર્દેશ છે. દીર્ઘ અતીત ચોવીસીમાં થયેલા સંવિગ્ન વજ્રસૂરિ તેના એક આરાધક અને ૪૮૮ વિરાધક શિષ્યો તથા ૨૦૦૦ આરાધક સાધ્વીઓનું વર્ણન છે. ચાર નિક્ષેપથી આચાર્યોની વિચારણા કરી ભાવાચાર્યની આજ્ઞાને જિનાજ્ઞાતુલ્ય બતાવી છે. શ્રીપ્રભુ સાધુનું દૃષ્ટાંત છે. તથા પ્રમાદ-મૈથુન અને ઉત્સર્ગ-અપવાદ માટે જિનવચનનું ઓઠું લઈ પોતાના પ્રમાદનો બચાવ કરવા જતાં અનંતભવ રખડેલા સાવઘાચાર્યનું દૃષ્ટાંત છે.

- (F) ગીતાર્થવિહાર નામના છઠ્ઠા અધ્યયનમાં શ્રુતનું માહાત્મ્ય દર્શાવ્યું છે. દસપૂર્વી અમાયાવી નંદીષેણ મુનિનું પતન કેમ થયું ? વગેરે વાત છે. માયાના વિષયમાં આસડનું દૃષ્ટાંત છે. માયાથી આલોચનાના દોષ બતાવી પ્રાયશ્ચિત્ત ક્યાં ? કેવી રીતે ? ક્યાં સ્થાનોથી લેવું ? ગુણકારી બને તેનો નિર્દેશ છે. મેઘમાળા સાધ્વીનું દૃષ્ટાંત છે. ગીતાર્થવચનની મહામૂલ્યતા અને અગીતાર્થ-વચનની ભયંકર અનર્થકારિતા બતાવી. શાસન-શ્રુત આદિના વિરોધી થવા અંગે ઈશ્વર (ગોશાલકનો ઘણા વખત પૂર્વનો ભવ) દૃષ્ટાંતભૂત છે. અગીતાર્થ રજ્જુ સાધ્વીએ ઉકાળેલા પાણી અંગે વિપરીત પ્રરૂપણા કરી. પછી પશ્ચાત્તાપ સાથે પ્રાયશ્ચિત્ત કરવા જાય છે ત્યારે કેવળીએ એને પ્રાયશ્ચિત્ત માટે અયોગ્ય બતાવી. આ મુદ્દાની વિચારણા ખાસ નોંધપાત્ર છે.

માયા આલોચના અંગે લક્ષ્મણ સાધ્વીનું દૃષ્ટાંત છે. એ ૮૦ ચોવીસી ભટકી, હવે આવતી ચોવીસીના પ્રથમ તીર્થંકરકાલે મોક્ષે જશે. તીર્થંકરોના ઉત્કૃષ્ટ પુણ્યપ્રભાવ વારંવાર ધ્યાન આપવાપાત્ર છે: મધુબિંદુ દૃષ્ટાંતભૂત વિષયલુબ્ધ લોકોની હાલત વૈરાગ્યપ્રેરક છે. ‘જે શક્ય હોય તે કરવું’ આ વચનમાં રહેલો દોષ બતાવ્યો છે. અને મહાપાપવચન તરીકે નવાજ્યું છે. ‘ઇચ્છા મુજબ કરો’ એ કહેવામાં દોષ બતાવ્યો. મોક્ષ જાણવા છતાં સંયમ-તપ-બ્રહ્મચર્યાદિ યોગોમાં અરિહંત અપ્રમત્ત રહે છે - એ મુદ્દો ખાસ નોંધી લેવા જેવો છે. કાચબાના દૃષ્ટાંતથી વિષયલોલુપ જીવોને માનવભવ કેવી રીતે દુર્લભ છે ? તેની વિચારણા કરી છે.

- (G) ચૂલિકા ૧ : ધર્મ આચરણ વિધિ દર્શન. ગુણયુક્ત જીવ જો સંયમ પ્રત્યે આદરભાવ અખંડ હોય, તો જ પ્રમાદાચરણની પ્રાયશ્ચિત્તથી વિશુદ્ધિ પામે છે. આ જીવ પ્રાયશ્ચિત્ત ઉપદેશનો અધિકારી છે. પ્રાયશ્ચિત્તસૂત્રના અધિકારીને જ તે સૂત્ર અપાય. જે-તેને આપવામાં આપનાર પણ દોષિત બને. દસ પ્રકારનાં પ્રાયશ્ચિત્તો માટેનું પ્રથમ સ્થાન છે રોજિંદી આવશ્યક ક્રિયાઓમાં થતી ગરબડો. કઈ ગરબડમાં કયું પ્રાયશ્ચિત્ત આવે તેની વિચારણામાં ગચ્છાધિપતિને પણ આવતાં પ્રાયશ્ચિત્તની

વાત છે. કેવા ગુરુ પાસે દીક્ષા લેવી વગેરે બાબતના વિમર્શમાં ઉપસંપદા વિચારણા પણ છે. ભગવાન મહાવીર સ્વામીના નિર્વાણથી સાધિક તેરસો વરસ પછી કુગુરુ થશે તેનો નિર્દેશ. એકાંત નિર્જરા નામક આ ચૂલિકામાં અંતે આલોચનાની ચાર નિક્ષેપાથી ચર્ચા છે.

(H) બીજી ચૂલિકામાં ઘણી આલોચના કરવા છતાં અને પ્રાયશ્ચિત્ત લેવા છતાં અશુદ્ધ રહેલા સુસદ્ધ સાધુનું દૃષ્ટાંત છે. આમાં જ અંતર્ગત બેઆબરુના ડરથી આલોચના છુપાવતી પૂર્વે રાજકુમારી અને પછી સાધ્વી બનેલી આર્યિકા (અન્યત્ર રુક્મી રાજકુમારી તરીકે પ્રસિદ્ધ)નું દૃષ્ટાંત છે. આ ચૂલિકામાં જયણાનું બતાવેલું મહત્ત્વ ખાસ ઉપયોગી છે.

શ્રી ગૌતમસ્વામીએ કરેલા પ્રશ્નોના ભગવાન મહાવીર સ્વામીએ આપેલા જવાબો... આ પદ્ધતિથી સંકલિત થયેલા આ છેદ-આગમગ્રંથમાં મુખ્યત્વે આલોચના-પ્રાયશ્ચિત્ત અંગેનાં રસપ્રદ દૃષ્ટાંતો છે. એ દૃષ્ટાંત અંતર્ગત જ શ્રી ગૌતમસ્વામીજી મહત્ત્વના દરેક મુદ્દા માટે પ્રશ્ન ઉઠાવે છે, અને પ્રભુ વીર એના સુંદર સ્પષ્ટીકરણ આપતા જવાબો આપે છે. એ ખૂબ જ પ્રકાશ આપે છે. ખરેખર, ક્યાં ભૂલ થઈ ? કેવી ભૂલ થઈ ? એનું પરિણામ શું આવ્યું ? અને એ પરિણામ માટે એ ભૂલ આટલી બધી જવાબદાર કેમ ? આ બધી બાબતોના ખુલાસા આંખ ખોલવા સમર્થ છે.

એમ કહી શકાય કે શ્રમણ અવસ્થામાં આહારાદિ નવ સંજ્ઞા કરતાં પણ ભારે મુશ્કેલી સર્જે છે લોકસંજ્ઞા. પ્રમાદાદિથી દોષ સેવાઈ જાય પછી એનું શુદ્ધ પ્રાયશ્ચિત્ત ન કરવા દેનાર મુખ્ય તત્ત્વ છે આ લોકસંજ્ઞા. ‘દુનિયા શું કહેશે ?’ ‘લોકોમાં માટું કેવું લાગશે ?’ ‘લોકોમાં મારી જામેલી આબરુનું શું થશે ?’ ‘અત્યાર સુધી જે બાબતમાં લોકો મને આદર્શ ગણે છે, એ જ બાબતમાં મારી ગરબડ જાણીને લોકો મને કેવો ગણશે ?’ ‘મારા ભક્તો-અનુયાયીઓ વગેરેમાં મારી છાપ કેવી પડશે ?....’ બસ આવી ને આવી ગણતરી સાધુ-સાધ્વીને સાચા શુદ્ધ થતાં અટકાવે છે. કદાચ આ જ કારણ હશે કે ઘોર પાપીઓ તરીકે પ્રસિદ્ધ થયેલાઓ સાચા પચ્ચાતાપ-પ્રાયશ્ચિત્ત કરી કર્મે શૂરામાંથી ધર્મે શૂરા બની જલદી કલ્યાણ પામી જાય છે, જ્યારે ધર્મના ધુરંધરો સંસારમાં રંખડતાં થઈ જાય છે, ઘોર પાપીને લોકસંજ્ઞા જે પ્રશ્ન ઊભો નથી કરી શકતી તે પ્રશ્ન ઉત્કૃષ્ટ ધર્મી માટે સર્જી શકે છે. પ્રાયઃ આ જ એક કારણસર જ્યારે શ્રી સાવધાચાર્યનું તીર્થંકર નામકર્મ જતું રહ્યું હોય, અને અનંતભવ વધી ગયા હોય, લક્ષ્મણ સાધ્વીને ૮૦ ચોવીસી સુધી ભવભ્રમણ કરવા પડ્યાં હોય અને રુક્મીને લાખ ભવ કષ્ટો સહેવાં પડ્યાં હોય, ત્યારે એનાથી ખરેખર ખૂબ જ સાવધ થવા જેવું છે.

ગુરુવચન-આચારમાં તફાવત જોવા જતાં ઈશ્વર જ્યારે ગોશાળો થતો હોય, અને જિનવચનના પરિણત જ્ઞાન વિના તત્કાલ જોવા-અનુભવવા માત્રથી કાર્ય-કારણભાવ જોડી જિનોક્ત આચારક્રિયામાં દોષ-નુકસાન બતાવનારી અગીતાર્થ રજજૂ સાધ્વી, પાછળથી પચ્યાત્તાપ થવા છતાં પ્રાયશ્ચિત્તની યોગ્યતા ન ધરાવતી હોય, કે સંયમયાત્રાનું કચૂંબર કરી જીવવિરાધનાપૂર્વક તીર્થયાત્રા કરવા જતાં શ્રી વજ્રસૂરિના ૪૯૯ શિષ્યો વિરાધક થતાં હોય ત્યારે આપણે બધાએ કેટલા બધા સાવધ-ગીતાર્થ અને સંવિગ્ન થવાની જરૂર છે ? તેનો બોધ કરી લેવાની જરૂર છે.

અત્યંત ગોપનીય અને સારભૂત આ મહાનિશીથ ગ્રંથ પ્રકાશિત કરી જાહેરમાં મૂકવો એમાં જિનાજ્ઞાભંગનો દોષ તો છે જ. જીવો પણ પોતાની તેવી અયોગ્યતાના કારણે તરવાને બદલે ડૂબી જાય તેવી પૂરી સંભાવના છે. તો બીજી બાજુ યોગ્ય-લાયક-ભવ્ય-સાધુ ભગવંતોને વર્તમાનમાં અને ભવિષ્યમાં સાધનાનો સરસ માર્ગ પ્રકાશતો અને ભવસમુદ્રમાં દીવાદાંડીની ગરજ સારતો આ ગ્રંથ અપ્રકાશિત રહીને વિનાશ ન પામે તે જોવું પણ જરૂરી છે. તેથી આ ગ્રંથની અલ્પ નકલો જ યોગ્યપાત્ર પાસે જ જાય, તેવી ગોઠવણ કરવાનો વિચાર કર્યો. મળતી પ્રતોમાં અનેક પાઠાંતરો-મતાંતરો જોતાં ઉચિત પાઠાંતરોને સ્થાન મળે અને ગ્રંથ શક્ય શુદ્ધ અને વધુ ઉપાદેય બને તે હેતુથી પંન્યાસ શ્રી કુલચંદ્રવિજયજી ગણિવરે એવાં પાઠાંતરો મેળવી ઉચિત પાઠાંતરોને આ નૂતન પ્રકાશનમાં સ્થાન આપ્યું છે. મેં એ પાઠાંતરોની ચકાસણી કરી છે. અમારા ક્ષયોપશમ મુજબ સત્ય પાઠની વધુ નજીક લાગતા પાઠોને મુખ્યરૂપતા આપી છે. અને પંન્યાસ શ્રી પદ્મસેનવિજય ગણિવરે સારી મહેનત કરી સંપાદન કર્યું છે. છતાં સંકલન-સંશોધન કે સંપાદન ક્ષેત્રે જે કંઈ કયાશ-અધુરાશ-અશુદ્ધિ- વીતરાગવચન વિરુદ્ધ રહી ગયું હોય તે બદલ અમે ત્રણેય ક્ષમાયાચના સાથે મિચ્છામિ દુઃક્ર્ડમ્ માંગીએ છીએ.

શ્રાવણ સુદ-૧૫

— આ. જયદોષસૂરિ

પિંડવાડા

શાસ્ત્રનિષ્ણાટ તપાગચ્છાધિપતિ
આચાર્ય શ્રી. વિનયનેમિસૂરીશ્વરજી
જ્ઞાનશાળા, અમદાવાદ-૧

अनुक्रमणिका

विषय	पृष्ठाङ्कः
१. सत्त्वुद्धरण नाम - प्रथम अध्ययन	१
२. कम्मविवाग नाम - द्वितीय अध्ययन	२४
३. कुसीललक्खण नाम - तृतीय अध्ययन	५७
४. चउत्थज्झयणं (सुमइकहा)	९६
५. नवणीयसार नाम - पञ्चम अध्ययन	११२
६. गीयत्थविहार नाम - षष्ठ अध्ययन	१५७
७. पच्छित्तसुत्तं नाम - सप्तम अध्ययन	२०२
८. बीइअ चूलिया - सुसढ अणगारकहा - अष्टम अध्ययन	२३५

श्री महानिशीथ सूत्रम्

: सलुद्धरणं नाम पढममज्झयणं :

ॐ नमो तित्थस्स । ॐ नमो अरहंताणं । सुयं मे आउसंतेणं
भगवया एवमक्खायं-इह खलु छउमत्थसंजमकिरियाए वट्टमाणे जेणं
केई साहू वा साहुणी वा से णं इमेणं परमतत्तसारसब्भूयत्थ-
पसाहगसुमहत्थातिसय-पवरवर-महानिशीहसुयखंधसुयाणुसारेणं तिविहं-
तिविहेणं ^१सव्वभावंतरंतरेहिं णं णीसल्ले भवित्ताणं आयहियट्ठाए
अच्चंतघोरवीरुग्गकट्ठतवसजमाणुट्ठाणेसुं सव्वपमायालंबणविप्पमुक्के अणु-
समयमहण्णिसमऽणालसत्ताए सययं अणिच्चिण्णेऽणण - परमसद्धा-
संवेग-वेरग्गमग्गए णिण्णियाणे अणिगूहियबल- विरियपुरिसक्कारपरक्कमे
अगिलाणीए वोसट्ठचत्तदेहे सुणिच्छिए एगग्गचित्ते अभिक्खणं
अभिरमिज्जा ॥१॥

णो णं रागदोसमोहविसयकसायनाणांलंबणाणेगप्पमायइट्ठिरस-
सायागारवरोद्दऽट्ठज्झाणविगहामिच्छत्ताऽविरइदुट्ठजोगअणाययणसेवणा-
कुसीलादिसंसग्गीपेसुण्णऽब्भक्खाण-कलह^२जातादिमयमच्छरामरिसममी-
कार-अहंकारादिअणेगभेयभिण्णतामसभावकलुसिएणं हियएणं हिंसा-
लियचोरिक्क-मेहुणपरिग्गहारंभसंकप्पादिगोयर-अज्झवसिए घोरप-
यंडमहारोद्दघणचिक्कणपावकम्ममललेवखव^३डिए असंवुडासवदारे
एक्कखणलवमुहुत्तणिमिसणिमिसद्धब्भंतंरंतरमवि ^४ससल्ले विरत्तेज्जा ॥२॥

तं जहा -

उवसंते सव्वभावेणं, विरत्ते य जया भवे ।

सव्वत्थ विसए आया रागेतरमोहवज्जिरे ॥१॥

१. 'सव्व भाव भावंतरंतरे हिं' इति क्वचिद् । २. जात्यादिमद इति । ३. डलयोः
साम्यात् कुपितो यदिवा स्वलित इति । ४. सशल्यो न क्षणमपि तिष्ठेदिति ।

तया संवेगमावण्णे, पारलोइयवत्तणिं ।
 १एगगेण्णेसती संमं, हा मओ कथ गच्छिहं ? ॥२॥
 को धम्मो को वओ णियमो, को तवो मेऽणुचिद्धिओ ।
 किं सीलं धारियं होज्जा को पुण दाणो पयच्छिओ ? ॥३॥
 जस्साणुभावओऽण्णत्थ, हीणमज्झुत्तमे कुले ।
 सग्गे वा मणुयलोए वा सोक्खं रिद्धिं लभेज्जऽहं ॥४॥
 अहवा २किंथ विसाएणं ? सव्वं जाणामि अत्तियं ।
 दुच्चरियं जारिसो वाऽहं, जे मे दोसा य जे गुणा ॥५॥
 घोरंधयारपायाले, गमिस्सेऽहमणुत्तरे ।
 जत्थ दुक्खसहस्साइं अणुभविस्सं चिरं बहू ॥६॥३॥
 एवं सव्व वियाणंते, धम्माधम्मं सुहासुहं ।
 अत्थेगे गोयमा ! पाणी, जे मोहाऽऽयहियं न चिद्धए ॥७॥
 जे याऽवाऽऽयहियं कुज्जा, कथई पारलोइयं ।
 मायाडंभेण तस्सावी, सयमवी तं न भावए ॥८॥
 आया सयमेव अत्ताणं, निउणं जाणे जहद्धियं ।
 आया चेव दुप्पत्तिज्जे, धम्ममवि य अत्तसब्बिखयं ॥९॥
 जं जस्साणुमयं हियए सो तं ठावेइ सुंदरपएसु ।
 सद्दूली नियतणए तारिस कूरेवि मन्नइ विसिद्धे ॥१०॥
 ३अत्तत्तीया समिच्चा सयलपाणिणो कप्पयंतऽप्पऽण्णं

१. एकाग्रः सन्नचिष्यतीति । २. किमत्रेति । ३. ये आत्मतप्तिका उदरम्भरिणस्ते सकलप्राणिनः सर्वान् जीवान् समेत्य संप्राप्य 'अयमात्मीयः अयमनात्मीयः' इति कल्पयन्तश्चरन्तीति योगः यदि वा ऽल्पमनल्पं वा कलुषं मनसि संयुज्य दुष्टां वःक्कायचेष्टामाचरन्ति । एवमत्यन्तपापः स्वकीयया दुश्चेष्टया जीवान् विक्षपन् विविधं व्रणयन्नपि कथयेत्, तथाहि-व्यपगत कलुषः पक्षपातं विमुच्याहमाचरितवान् तां निर्दोषां चेष्टाम् । एवम्भूतस्य कलुषितहृदयं दोषजालैर्नष्टमिति संभाव्यतेऽर्थः ।

दुष्टं वइकायचेष्टं मणसि य कलुसं जुञ्जयन्ते चरन्ते ।
 निद्वोसं तं च सिद्धे ववगयकलुसे पक्खवायं विमुच्चा,
 विक्खंतच्चंतपावे कलुसियहियं दोसजालेहिं णट्ठं ॥११॥
 परमत्थ-तत्तसिद्धं, सब्भूयत्थपसाहगं ।
 तब्भणियाणुट्ठाणेणं, जे आया रंजए सकं ॥१२॥
 तेसुत्तमं भवे धम्मं, उत्तमा तवसंपया ।
 उत्तमं सीलचारित्तं, उत्तमा य गती भवे ॥१३॥ युग्मम् ॥
 अत्थेगे गोयमा ! पाणी, जे एरिसमवि कोडिं गए ।
 ससल्ले चरती धम्मं, आयहियं नावबुज्झई ॥१४॥
 ससल्लो जइवि कट्ठुगं, घोरं वीरं तवं चरे ।
 दिव्वं वाससहस्संपि, ततोऽवी तं तस्स निष्फलं ॥१५॥
 सल्लंपि भन्नई पावं, जं नालोइयनिंदियं ।
 न गरहियं न पच्छित्तं, कयं जं जह य भाणियं ॥१६॥
 मायाडंभमऽकत्तव्वं, महापच्छन्नपावया ।
 १अयज्जमणायारं च, सल्लं कम्मट्ठसंगहो ॥१७॥
 असंजम-अहम्मं च, निसीलव्वतता वि य ।
 सकलुसत्तमसुद्धी य, सुकयनासो तहेव य ॥१८॥
 दुग्गइगमणऽणुत्तारं, दुक्खे सारीरमाणसे ।
 अव्वोच्छिन्ने य संसारे, विग्गोवणया महंतिया ॥१९॥
 केसिं विरुवरुवत्तं दारिद्वदोहग्गया ।
 हाहाभूयसवेयणया, परिभूयं च जीवियं ॥२०॥
 निग्घिण-नित्तिस-कूरत्तं, निद्वय-निक्खिवया वि य ।
 निल्लज्जत्त-गूढहियत्तं, वकं विवरीयचित्तया ॥२१॥

गगो दोसो य मोहो य मिच्छतं घणचिक्कणं ।
 संमग्गणासो तह य, एगेऽजस्सि^१त्तमेव य ॥२२॥
 आणाभंगमबोही य, ससल्लत्ता य भवे भवे ।
 एवमादी पावसल्लस्स, नामे एगट्ठिए बहू ॥२३॥
 जेणं सल्लियहिययस्स, एगस्सी बहु भवंतरे ।
 सव्वंगोवंगसंधीओ, पसल्लंति पुणो पुणो ॥२४॥
 से य दुविहे समक्खाए, सल्ले सुहुमे य बायरे ।
 एक्केक्के तिविहे णेए, घोरुग्गुग्गतरे तहा ॥२५॥
 घोरं चउव्विहा माया, घोरुग्गं माणसंजुया माया ।
 माया लोभो य कोहो य, घोरुग्गुग्गयरं मुणे ॥२६॥
 सुहुमवायरभेएणं, सप्पभेयं पिमं मुणी ।
 अइरा समुद्धरे खिप्पं, ससल्ले णो वसे खणं ॥२७॥
 खुड्डलगिति^२ अहिपोए, सिद्धत्थयतुल्ले सिही ।
 संपललो खयं णेइ, णरपुरे विज्झाडइ^३ ॥२८॥
 एवं तणुतणुयरं, पावसल्लमणुद्धियं ।
 भव-भवंतरकोडीओ, बहुसंतावपदं भवे ॥२९॥
 भयवं सुदुद्धरे एस, पावसल्ले^४दुहप्पए ।
 उद्धरिउंपि ण याणंती, बहवे जहमुद्धरिज्जइ ॥३०॥
 गोयम ! निम्मूलमुद्धरणं, निययमेतस्स भासियं ।
 सुदुद्धरस्ससावि सल्लस्स, सव्वंगोवंगभेदिणो ॥३१॥
 सम्मदंसणं पढमं, सम्मं नाणं बिइज्जियं ।
 तइयं च सम्मचारित्तं, एगभूयमिमं तिगं ॥३२॥

१. अयशस्वित्वमिति । २. खुड्डलगे वि पाठान्तरमिति । ३. नरयुक्तं पुरं व्याप्नोतीति ।

४. दुःखप्रदमिति ।

खेत्ती भूतेवि जे जित्ते, जे गूढेऽदंसणं गए ।
 जे अत्थीसुं ठिए केई, जेऽत्थिमब्भंतरं गए ॥३३॥
 सव्वंगोवंगं संखुत्ते, जे सव्वभंतरबाहिरे ।
 सल्लंति जेण सल्लंती, ते निम्मूले समुद्धरे ॥३४॥
 हयं नाणं कियाहीणं, हया अन्नाणओ किया ।
 पासंतो पंगुलो दह्ढो, धावमाणो य अंधओ ॥३५॥
 संजोगसिद्धीओ गोयमा/फलं, नहु एगचक्केण रहो पयाइ ।
 अंधो य पंगू य वणे समिच्चा, ते संपउत्ता नगरं पविट्ठा ॥३६॥
 नाणं पयासयं सोहओ तवो संजमो य गुत्तिकरो ।
 तिण्हंपि समाओगे गोयमा ! मोक्खो न अण्णहा तु ॥३७॥
 ता णीसल्ले भवित्ताणं, सव्वसल्लविवज्जिए ।
 जे धम्ममणुचेट्ठेज्जा, ^१सव्वभूयऽप्पकं पि वा ॥३८॥
 तस्स तं सफलं होज्जा, जम्मजंमंतरेसु वि ।
 विउला सम्पय-रिद्धी य, लभेज्जा सासयं सुहं ॥३९॥
 सल्लमुद्धरिउकामेणं, सुपसत्थे सोहणे दिणे ।
 तिहि-करण-मुहुत्त-नक्खत्ते, जोगे लग्गे ससीबले ॥४०॥
 कायव्वायंबिलक्खमणं, दस दिणे पंचमंगलं ।
 परिजवियव्वऽट्ठसयं सयहा, तदुवरिं अट्ठमं करे ॥४१॥
 अट्ठमभत्तेण पारित्ता, काउणायंबिलं तओ ।
 चेइय साहू य वंदित्ता, करिज्ज खंतमरिसियं ॥४२॥
 जे केई दुट्ठुं संलत्ते, जस्सुवरिं दुट्ठुं चित्तियं ।
 जस्स य दुट्ठुं कयं जेणं, पडिदुट्ठं वा कयं भवे ॥४३॥

तस्स सव्वस्स तिविहेणं, वाया मणसा य कम्मुणा ।

णीसल्लं सव्वभावेणं, दाउं मिच्छामि दुक्कडं ॥४४॥

पुणोवि वीयरगाणं, पडिमाओ चेइयालए ।

पत्तेयं संथुणे वंदे, एगगो भत्तिनिब्भरो ॥४५॥

वंदित्तु चेइए सम्मं, छट्ठंभत्तेणं परिजवे ।

इमं सुयदेवयं विज्जं, लक्खहा चेइयालए ॥४६॥

उवसंतो सव्वभावेणं, एगचित्तो सुनिच्छिओ ।

आउत्तो ^१अव्ववक्खित्तो, रागरइअरइवज्जिओ ॥४७॥

अउम्ण्अम्ओ कउट्ठ्अवउद्धईणअम् अउम्ण्अम्ओ
 प्अयआण्उस्आर्ईणम् अउम्ण्अम्ओ सअम्भइण्णसओईणअम्
 अउम्ण्अम्ओ खईर् आसवलद्धईणअम् अउम्ण्अम्ओ
 सव्वउसहिलद्धईणअम् अउम्ण्अम्ओ अक्खईणअम्अहआणस्-
 अलद्धईणअम् अउम्ण्अम्ओ भगवओ अरहओ महइ महावीर
 वद्धमाणस्स धम्मतित्थंकरस्स अउम्णम्ओ सव्वधम्मतित्थंकराणं
 अउम्णम्ओ सव्वसिद्धाणं अउम्णम्ओ सव्वसाहूणं अउम्णम्ओ भगवओ
 मइण्आणस्स अउम्णम्ओ भगवओ सुयण्आणस्स अउम्णम्ओ भगवओ
 अउहइण्आणस्स अउम्णम्ओ भगवओ मणपज्जवण्आणस्स अउम्णम्ओ
 भगवओ कएवलण्आणस्स अउम्णम्ओ भगवतीए सुयद्एव्अय्आए
 सिज्झउ मए स्आहिया एसा महाविज्जा अउम्णम्ओ भगवओ
 अउम्णम्ओ वअम् अउम्णम्ओ उअआम् अम् अअआ अउम् णम्ओ
 आउम् अभिवत्तिलक्खणं सम्मदंसणं अउम् णम्ओ अट्ठआरस्-
 असूर्लअम्गसहस्साहिट्ठियस्स णईस्अम्गण्णइण्णइयआण णईसल्ल
 णईमयसल्लगतण सरअण्ण सव्वदुक्खणिम्महणे परमनिव्वुईकारिस्स णं
 पवयणस्स परमपवित्तुत्तमस्से ति ॥४॥

एसा विज्ञा सिद्धंतिएहिं अक्खरेहिं लिहिया, एसा य सिद्धंतिया
लिवी अमुणियसमयसब्भावागं सुयधरेहिं ण पण्णवेयव्वा तहय
कुसीलाणं च ॥५॥

इमाए पवरविज्ञाए, सब्बहा उ अत्ताणगं ।

अहिमंतेउण सोविज्ञा, खंतो दंतो जिइंदिओ ॥४८॥

णवरं सुहासुहं सम्मं, सुविणगं समवधारए ।

जं तत्थ सुविणगे पासे, तारिसगं तं तहा भवे ॥४९॥

जइ णं सुंदरगं पासे, सुमिणगं तो इमं महा ।

परमत्थतत्थसारत्थं, सल्लुद्धरणं मुणेत्तुणं ॥५०॥

देज्ञा आलोयणं सुद्धं, अट्ठमयट्ठाणविरहिओ ।

रंजंतो धम्मतिथयरे, सिद्धे लोग्गसंठिए ॥५१॥

आलोएत्ताण णीसल्लं, सामण्णेण पुणो वि य ।

वंदिता चेइए साहू, विहिपुव्वेण खमावए ॥५२॥

खामित्ता पावसल्लस्स, निम्मूलुद्धरणं पुणो ।

करेज्ञा विहिपुव्वेण, रंजंतो ससुरासुरं जगं ॥५३॥

एवं होउण निस्सल्लो, सब्बभावेण पुणरवि ।

विहिपुव्वं चेइए वंदे, खामे साहम्मिए तहा ॥५४॥

नवरं जेण समं ^१वुच्छो, जेहिं सद्धिं पविहरिओ ।

खरफरुसं चोइओ जेहिं, सयं वा जो य चोइओ ॥५५॥

जोऽवि य कज्जमकज्जे वा, भणिओ खरफरुसनिट्ठुरं ।

पडिभणियं जेण वी किंचि, सो जइ जीवइ जइ मओ ॥५६॥

खमियव्वो सब्बभावेण, जीवंतो जत्थ चिट्ठई ।

तत्थ गंतूण विणएण, मओऽवी साहुसक्खियं ॥५७॥

एवं खामणमरिसाणं काउं, तिहुयणस्स वि भावओ ।
 सुद्धो मणवइकाएहिं, एयं घोसिज्ज निच्छओ ॥५८॥
 “खमावेमि अहं सव्वे, सव्वे जीवा खमंतु मे ।
 मित्ती मे सव्वभूएसुं, वेरं मज्झं ण केणई ॥५९॥
 खमामिहंपि सव्वेसिं, सव्वभावेण सव्वहा ।
 भवे भवेसुवि जंतूणं, वाया मणसा य कम्मुणा” ॥६०॥
 एवं घोसित्तुं वंदिज्जा चेइय, साहू विहीयओ^१ ।
 गुरुस्सावि विहीपुव्वं, खामणमरिसामणं करे ॥६१॥
 खमावेत्तुं गुरुं सम्मं, ^२नाणमहिमं ससत्तिओ ।
 काऊणं वंदिऊणं च, विहिपुव्वेणं पुणोऽविय ॥६२॥
 परमत्थतत्तसारत्थं, सल्लुद्धरणमिमं मुणे ।
 मुणेत्ता तहमालोए जह आलोयंतो चेव, उप्पए केवलं नाणं ॥६३॥
 दिन्नेरिसभावत्थेहिं, नीसल्ला आलोयणा ।
 जेणालोयमाणेण चेव, उप्पन्नं तत्थेव केवलं ॥६४॥
 केसिं चि साहेमो नामे, महासत्ताण गोयमा ।
 जेहिं भावेणालोयंतेहिं, केवलनाणमुप्पाइयं ॥६५॥
 हाहा दुट्ठु कडे साहू, हाहा दुट्ठु विचिंतिरे ।
 हाहा दुट्ठु भाणिरे साहू, हाहा दूट्ठुमणुमते ॥६६॥
 संवेगालोयगे तहय, भावालोयण केवली ।
 पयखेव-केवली चेव, मुहणंतगकेवली तहा ॥६७॥
 पच्छित्तकेवली सम्मं, महावेरग्गकेवली ।
 आलोयणा केवली तह य, हाऽहं पावित्ति केवली ॥६८॥

उस्सुत्तुम्मग्गपन्नवए, हाहा अणायार-केवली ।
 सावज्जं न करेमिति, अक्खंडियसीलकेवली ॥ ६९॥
 तवसंजमवयसंरक्खे, निंदणे गरिहणे तहा ।
 सव्वतो सील-संरक्खे, कोडीपच्छित्ते वि य ॥ ७०॥
 निप्परिकम्मे अकंडुयणे, अणिमिसच्छी य केवली ।
 एगपासित्त दो पहेरे, मूणव्वय-केवली तहा ॥ ७१॥
 न सक्को काउं सामन्नं, अणसणे ठामि केवली ।
 नवकारकेवली तह य, निच्चालोयण केवली ॥ ७२॥
 निस्सल्लकेवली तह य, सल्लुद्धरणकेवली ।
 धन्नोमिति^१ सपुन्नो, सताहंपि किन्न केवली ॥ ७३॥
 ससल्लोऽहं न पारेमि, ^२चलकट्ठपय केवली ।
 पक्खसुद्धाभिहाणे य, चाउम्मासी य केवली ॥ ७४॥
 संवच्छरमहपच्छित्ते, हा चल जीविते तहा ।
 अणिच्चे खणविद्धंसी, मणुयत्ते केवली तहा ॥ ७५॥
 आलोयनिंदवंदियए, घोरपच्छित्तदुक्करे ।
 लक्खोवसग्गपच्छित्ते, समहियासण केवली ॥ ७६॥
 हत्थोसरणनिवासे य, अट्ठकवलासि केवली ।
 एगसित्थगपच्छित्ते, ^३दस वा से केवली तहा ॥ ७७॥
 पच्छित्ताढवगे चेव, पच्छित्तद्धकय-केवली ।
 पच्छित्तपरिसमत्ती य, अट्ठसउक्कोस-केवली ॥ ७८॥

१. 'संपुन्नो' पाठान्तरमिति । २. आलोचनाहस्य काष्ठां-दिशां प्रति पदमपि चलन् पदमात्रं वा केवलीति संभाव्यते । ३. द्वित्राणि यावद् दश सिक्खानीति ।

न सुद्धीवि न पच्छित्ता, ता वरं खिप्पकेवली ।
 एगं काउण पच्छित्तं, बीयं न भवै जह चेव केवली ॥७९॥
 तं नायरामि पच्छित्तं, जेणागच्छइ केवली ।
 तं चायरामि जेण तवं, सफलं होइ केवली ॥८०॥
 किं पच्छित्तं चरंतोऽहं, चिट्ठं णो तव-केवली ।
 जिणाणमाणं ण लंघेऽहं, पाणपरिच्चयण-केवली ॥८१॥
 अन्नं होही सरीरं मे, नो बोही चेव केवली ।
 सुलद्धमिणं सरीरेणं, पावणिद्दहणं केवली ॥८२॥
 अणाइपावकम्ममलं, निद्धोवेमीह केवली ।
 बीयं तं नं समायरिअं, पमाया केवली तहा ॥८३॥
 १दे दे ! खवउ सरीरं मे, निज्जरा भवउ केवली ।
 सरीरस्स संजमं सारं, निक्कलंकं तु केवली ॥८४॥
 मणसा वि खंडिए सीले, पाणे ण धरामि केवली ।
 एवं वइकायजोगेणं, सीलं रक्खे अहं केवली ॥८५॥
 एवमाई अणादीया, कालाओणंते मुणी ।
 केई आलोयणा ! सिद्धे, पच्छित्ता केई गोयमा ! ॥८६॥
 खंता दंता विमुत्ता य, जिइंदी सच्चभासिणो ।
 छक्काय-समारंभाओ विरत्ते तिविहेण उ ॥८७॥
 २तिदंडासवसंविरिया य इत्थिकहासंगवज्जिया ।
 इत्थीसंलावविरया य, अगोवंगऽणिरिक्खणा ॥८८॥
 निम्ममत्ता सरीरे वि, अप्पडिबद्धा महायसा ।
 भीया छीछी गब्भवसहीणं, बहुदुक्खाओ भवाओ तहा ॥८९॥

तो एरिसेणं भावेणं, दायव्वा आलोयणा ।
 पच्छित्तं पिय कायव्वं, तहा जहा चेव एहिं कयं ॥९०॥
 न पुणो तहा आलोएयव्वं, मायाडंभेण केणई ।
 जह आलोएमाणाणं, चेव संसारवुड्ढी भवे ॥९१॥
 अणंतेऽणाइकालाउ, अत्तकम्मेहिं दुम्मई ।
 बहु विकप्पकल्लोले, आलोएंते वी अहो गए ॥९२॥
 गोयम ! केसिंचि नामाई, साहिमो तं निबोधय ।
 जेसालोयणपच्छित्ते, भावदोसिक्ककलुसिए ॥९३॥
 ससल्ले घोरमहं दुक्खं, दुरहिआसं सुदूस्सहं ।
 अणुहवंते वि चिट्ठंति, पावकम्मे नराहमे ॥९४॥
 गुरुगासंजमे नाम, साहू निद्धंधसे तहा ।
 दिट्ठीवायाकुसीले य, मणकुसीले तहेव य ॥९५॥
 सुहुमालोयगे तहय, परववएसालोयगे तहा ।
 किं किं वालोयगा तह य, ण किंचालोयगे तहा ॥९६॥
 अकयालोयणे चेव, जणरंजवणे तहां ।
 नाहं काहामि पच्छित्तं, ^१छम्मालोयणमेव य ॥९७॥
 मायादंभपवंची य, पुरकडतवचरण कहे ।
 पच्छित्तं नत्थि मे किंचि, न कयालोयणुच्चरे ॥९८॥
 आसण्णाऽऽलोयणक्खाइ, लहु लहुपच्छित्तजायगे ।
 अम्हाणालोइयं चेट्ठे मुहबंधालोयगे तहा ॥९९॥
 गुरुपच्छित्ताहमसक्के य, गिलाणालंबणं कहे ।
^२आरभडालोयगे साहू, सुण्णासुण्णी तहेव य ॥१००॥

१. मायापूर्वकमालोचनमिति । २. नट इव कृत्रिमाऽऽलोचको यदिवा 'आरडालोयगे' इति पाठान्तरमाश्रित्याऽऽराटिं कुर्वन् विलपन् वा प्रदर्शनमेव कुर्वाण इति ।

निच्छिन्नेवि य पच्छित्ते, न काहं वुद्धिजायगे ।
 रंजवणमेत्त लोगाणं, वायापच्छित्ते तहा ॥१०१॥
 पडिवज्जणपच्छित्ते, चिरयाल पवेसगे तहा ।
 अणुणुद्वियपायच्छित्ते, अणुभणियऽण्णहायरे^१ तहा ॥१०२॥
 आउट्ठीय महापावे, कंदप्पा दप्पे तहा ।
 अजयणा सेवणे तह य^२ सुयसुयपच्छित्ते तहा ॥१०३॥
 दिट्ठपोत्थयपच्छित्ते, सयं पच्छित्तकप्पगे ।
 एवइयं इत्थ पच्छित्तं, पुव्वालोइयमणुस्सरे ॥१०४॥
 जाईमयसंकिए चेव, कुलमयसंकिए तहा ।
 जातिकुलोभयमयासंके, सुतलाभेस्सरियसंकिए तहा ॥१०५॥
 तवोमया संकिए चेव, पंडिच्चमयसंकिए तहा ।
 सक्कारमयलुद्धे य, गारवसंदूसिए तहा ॥१०६॥
 अपुज्जो वावि हं जंमे, एगजम्मेव चिंतगे ।
 पाविट्ठाणपि पावतरे, सकलुसचित्तालोयगे ॥१०७॥
 पर कहावगे चेव, अविणयालोयगे तहा ।
 अविही आलोयगे साहू, एवमादी दुरप्पणो ॥१०८॥
 अणंतंऽणाइकालेणं, गोयमा ! अत्तदुक्खिया ।
 अहो अहो जाव सत्तमियं, भावदोसेक्कओ गए ॥१०९॥
 गोयमऽणंतं चिट्ठंति जे, अणादिए ससल्लिए ।
 नियभावदोससल्लाणं, भुंजंतं विरसं फलं ॥११०॥
 चिट्ठइस्संति अज्जावि, तेण सल्लेण सल्लिए ।
 अणंतं पि अणागयं कालं, तम्हा सल्लं न
 धारए -खणं मुणित्ति बेमि ॥१११॥

गोयम ! समणीण णो संखा जाओ निक्कलुसनीसल्ल-
विसुद्धसुनिम्मलवयणमाणसाओ अज्झप्पविसोहीए आलोइत्ताण सुपरिफुडं
नीसकं निखिलं ^१ निरवयवं नियदुच्चरियमाइयं सव्वंपि भादसल्लं अहारिहं
तवोकम्मं पायच्छित्तमणुचरित्ताणं निद्धोयपावकम्ममललेवकलंकाओ
उप्पन्नदिक्खवरकेवलणाणाओ महानुभागाओ महायसाओ महासत्तसंपन्नाओ
सुगहियनामधेयाओ अणंतुत्तमसोक्ख-मोक्खं पत्ताओ ॥६॥

कासिं च गोयमा ! नामे, पुन्नभागाण साहिमो ।

जासिमालोयमाणीणं, उप्पण्णं समणीण केवलं ॥११२॥

हाहाहा पावकम्माहं, प्रावा पावमती अहं ।

पाविट्ठाणंपि पावयरा, हाहाहा दुट्ठ चिंतिमो ॥११३॥

हाहाहा इत्थिभावं मे, ताविह जंमे उवट्ठियं ।

तहावी ण घोरवीरुगं, कट्ठं तवसंजमं ^२ धरं ॥११४॥

अणंतपावरासीओ संमिलियाओ जया भवे ।

तइया इत्थित्तणं लब्भेऽसुद्धं पावाण कम्माण ॥११५॥

एगत्थ पिंडीभूताणं, समुदयं ^३ तणुत्तं ।

तह करेमि जह न पुणो, इत्थीऽहं होमि केवली ॥११६॥ युग्मम् ॥

दिट्ठिए वि न खंडामि, सीलं हं समणिकेवली ॥११७॥

हा हा मणेण मे किंपि, अट्ठदुहट्ठं चिंतियं

तमालोइत्ता लहुं सुद्धि, गिण्हेऽहं समणिकेवली ॥११८॥

दट्ठूण मज्झ लावण्णं, रुवं कंतिं दित्तिं सिरिं ।

^४ मा णरपयंगाहमा जंतु, खयमणसणसमणी य केवली ॥११९॥

१. 'निरावयवं' पाठान्तरमिति । २. 'चरं' पाठान्तरमिति । ३. तणु ता पाठान्तरमिति ।

४. मा क्षयं यान्तु नरपतङ्गाऽधमा इति ।

वातं मोत्तूण नो अन्नो, निच्छयं मह तणुंछिवे ।

छक्कायसमारंभं न करेऽहं समणि केवली ॥१२०॥

पोग्गलकक्खोरुगुज्झंतं, णाहिजहणंतरे तहा ।

जणणीए वि ण दंसेमि, सुसंगुत्तंगोवंगा समणी य केवली ॥१२१॥

बहुभवंतरकोडीओ, घोरं गब्भपरंपरं ।

परियट्ठंतीए सुलद्धं मे, णाणं चारित्तसंजुयं ॥१२२॥

माणुसजम्मं ससंमत्तं, पावकम्मक्खयं करं ।

ता सव्वं भावसल्लं, आलोएमि खणे खणे ॥१२३॥

पायच्छित्तमणुडामि, बीयं तं न समारंभं ।

जेणागच्छइ पच्छित्तं, वाया मणसा य कम्मुणा ॥१२४॥

पुढविदगागणिवाऊहरियकायं तहेव य ।

बीयकायसमारंभं, बितिचउपंचिंदियाण य ॥१२५॥

मुसाणुंपि न भासेमि, 'ससरक्खं'पि अदिन्नयं ।

न गिण्हं 'सुमिणंतेवि, ण पत्थं मणसा वि मेहुणं ॥१२६॥

परिग्गहं न काहामि, मुलुत्तर-गुणस्खलणं तहा ।

मयभयकसायदंडेसुं, गुत्तीसमितिदिएसु य ॥१२७॥

तह अट्टारससीलंगसहस्साहिड्डिय-तणू ।

सज्झायज्झाणजोगेसुं, अभिरमं समणिकेवली ॥१२८॥

तेलुक्करक्खणक्खंभधम्मतित्थंकरेण जं ।

तमहं लिंगं धरेमाणा, जइवि हु जंतं निवीलित्तं ॥१२९॥

मज्झोमज्झीय दो खंडा, फालिज्जामि तहेव य ।
अह पक्खिप्पामि दित्तिगिं, अहवा छिज्जे चई सिरं ॥१३०॥
तोऽवीऽहं नियमवयभगं, सीलचारित्तखंडणं ।
मणसा वी एक्कजम्मकए, ण कुणं समणिकेवली ॥१३१॥ त्रिकम् ॥
खरुट्टसाणजाईसुं, सरागा हिंडिया अहं ।
विकम्मं पि समायरियं, अणंते भवभवंतरे ॥१३२-१३३॥
तमेव खरकम्ममहं, ^१पव्वज्जापड्डिया कुणं ।
घोरंधयारपायाला जेणं णो णीहरं पुणो ॥१३४॥
बे दियहे माणुसं जम्मं, तं च बहुदुक्खभायणं ।
अणिच्चं खणविद्धंसी, बहुदंडं दोससंकरं ॥१३५॥
तत्थावि इत्थी संजाया, सयलतेलोक्कनिंदिया ।
तहा वि पाविउं धम्मं, णिव्विग्घमणंतराइयं ॥१३६॥
ताहं तं न विराहेमि, पावदोसेण केणई ।
सिंगाररागसविगारं, साहिलासं न चिट्ठिमो ॥१३७॥
पसंताए वि दिट्ठीए, मोत्तुं धम्मोवएसगं ।
अन्नं पुरिसं न निज्झायं, नालवं समणिकेवली ॥१३८॥
तं तारिसं महापावं, काउं अक्कहणीययं ।
तं सल्लमवि उप्पन्नं, जहदत्तालोयणसमणि केवली ॥१३९॥
एमादि अणंतसमणीओ, दाउं सुद्धालोयणं निसल्ला ।
केवलं पप्प सिद्धाओ, अनादिकालेण गोयमा ! ॥१४०॥
खंता-दंता-विमुत्ताओ, जिइंदिआओ सच्चभाणिरीओ ।
छक्कायसमारंभा, विरया तिविहेण उ ॥१४१॥

तिदंडासवसंवुत्ता, पुरिसकहासंगवज्जिया ।

पुरिससंलावविरयाओ, पुरिसंगोवंगऽनिरिक्खणा ॥१४२॥

निम्ममत्ताउ ससरीरे, अप्पडिबद्धाउ महायसा ।

भीया छी छी गब्भवसहीणं, बहुदुक्खाउ भवसंसरणा उ
तहा ॥१४३॥

ता एरिसेणं भावेणं, दायव्वा आलोयणा ।

पायच्छित्तं पि कायव्वं, तह जह एयाहि समणीहिं कयं ॥१४४॥

ण उण तह आलोएयव्वं, मायादंभेण केणई ।

जह आलोयणमाणीणं पावकम्मवुद्धी भवे ॥१४५॥

अणंताणाइकालेणं, मायादंभछम्मदोसेणं ।

कवडालोयणं काउँ, समणीओ ससल्लाओ ।

आभिओगपरंपरेणं, छट्ठियं पुढविं गया ॥१४६॥

कासिंचि गोयमा ! नामे साहिमो तं निबोधय ।

जाओ आलोयमाणाओ भावदोसेण सुद्धतरंगं

पावकम्ममलखवलिय ॥१४६-अ ॥

तवसंजमसीलंगाणं, णीसल्लत्तं पसंसियं ।

तं परमभावविसोहीए, विणा खणद्धंपि नो भवे ॥१४७॥

तो गोयमा ! केसिमित्थीणं, चित्तविसोही सुनिम्मला ।

भवंतरेवि नो होही, जेण निसल्लया भवे ॥१४८॥

छट्ठट्ठमदसमदुवालसेहिं सुक्खंति के वि समणीओ ।

तह वि य सरागभावं, णालोयंती ण छट्ठंति ॥१४९॥

बहुविहविकप्पकल्लोलमालाउक्कलिगाहिणं ।

वियरंतं तेण लक्खिज्जा, दुरवगाहमणसागरं ॥१५०॥

ते कहमालोयणं ^१देतु, जासि चित्तं पि नो वसे ।
 सल्लं जो ताणमुद्धरण, स वंदणीओ खणे खणे ॥१५१॥
 असिणेहपीइपुव्वेण, धम्मसद्धुल्लासावियं ।
 सीलंग-गुणट्ठाणेसु, उत्तमेसुं धरेइ जो ॥१५२॥
 इत्थीबहुबंधणा विमुक्कं, गिहकलत्तादिचारगा ।
 सुविसुद्ध-सुनिम्मल-चित्तं, णीसल्लं सो महायसो ॥१५३॥
 दट्ठव्वो वंदणीओ य, देविंदाणं स उत्तमो ।
^२दीणकयत्थी सव्वपरिभूय, विरइट्ठाणे जो उत्तमे धरे ॥१५४॥
 णालोएमि अहं समणी, ^३दे कहं किंचि साहुणी ।
 बहुदोसं न कहं समणी, जं दिट्ठं समणीहिं तं कहे ॥१५५॥
 असावज्जकहा समणी, बहुआलंबणा कहा ।
^४पमायखामगा समणी, पाविट्ठा ^५बलमोडीकहा ॥१५६॥
 लोगविरुद्धकहा तह य, परववएसालोयणी ।
 सुयपच्छित्ता तह य, ^६जायादीमयसंकिया ॥१५७॥
 मूसागारऽभीरुया चेव, गारवतियदूसिया तहा ।
 एवमादिअणेगभावदोसवसगा पावसल्लेहिं पूरिया ॥१५८॥
 अणंताअणंतेणं कालसमएण, गोयमा ! अइक्कंतेणं ।
 अणंताओ समणीओ, बहुदुक्खावसहं गया ॥१५९॥
 गोयम ! अणंताओ चिट्ठंति, जाऽणादीसल्लसल्लिया ।
 भावदोसेक्कसल्लेहिं भुंजमाणीओ कडुविरसं घोरुग्गुगतरं फलं ॥१६०॥

१. 'देतु' पाठान्तरमिति । २. अपरिभूतेन दीनाः कृताः स्त्रियो येन स तथेति ।
३. आमंत्रणे पादपूर्ती वेति । ४. प्रमादेन संयमदेहापेक्षया क्षामका दुर्बलेति ।
५. बलात्कारकथेति कथ्यते यथेति । ६. जात्यादिमदशङ्कितेति ।

चिद्विस्संति अज्जावि, तेहिं सल्लेहिं सल्लिया ।

अणंतं पि अणागयं फलं, तम्हा सल्लं सुहुममवि समणी णो धारेज्जा
खणंति ॥१६१॥

धगधगधगस्स पज्जलिए, जालामालाउले दढं ।

हुयवहे वि महाभीमे, ससरीरं डज्झए सुहं ॥१६२॥

पयलित्तिंगाररासीए^१, एगसि झंपं पुणो जले ।

^२घल्लितो गिरितो सरियं, जं मरिज्जितं पि सुक्करं ॥१६३॥

खंडियखंडिय, सहत्थेहिं, एक्केक्कमंगावयवं ।

जं होमिज्जइ अग्गीए, अणुदियहं पि सुक्करं ॥१६४॥

खरफरुसतिक्खकरवत्तदंतेहिं फालाविउं ।

लोणूससज्जियाखारं, जं घत्तावेउं पि ससरीरे अच्चंतसुक्करं ।

जीवंतो सयमवी सक्कं, खल्लं उत्तारिऊण य ॥१६५॥

जवखारहलिदादिहिं, जं आलिं पे नियं तणु-

मेयंपि सुकरं छिंदेऊणं सहत्थेणं जो घत्ते सीसं नियं ॥१६६॥

एयंपि ^३सुक्करमनीहं, दुक्करं तवसंजमं ।

नीसल्लं जेण तं भणियं, सल्लो य नियदुक्खिओ ॥१६७॥

मायादंभेण पच्छन्नो, तं पायडिउं ण सक्कए ।

राया दुच्चरियं पुच्छे, अह साहह देह सव्वस्सं ॥१६८॥

सव्वस्सं पि ^४पएज्जाउ, नो नियदुच्चरियं कहे ।

राया दुच्चरियं पुच्छे, साह पुहइं पि देमि ते ॥१६९॥

पुहइं रज्जं तणं मन्ने, नो नियदुच्चरियं कहे ।

राया जीयं निक्कितामि, अह नियदुच्चरियं कह ॥१७०॥

१. प्रज्वलदङ्गारराशाविति । २. क्षिप्यमाण इति । ३. चर्मति । ४. निस्पृहमिति 'मलीहं'
पाठान्तरं चेति । ५. प्रदद्यादिति ।

पाणेहिं पि खयं जंतो, नियदुच्चरियं कहेइ नो ।
 सव्वस्सहरणं च रज्जं च पाणे वि परिच्चाएसु णं ॥१७१॥
 मया वि जंति पायाले, निषदुच्चरियं कहेति नो ।
 जे ^१पावाहम्मबुद्धीया, काउरिसा एगजंमिणो ।
 ते गोवंति सदुच्चरियं, नो सप्पुरिसा महामती ॥१७२॥
 सप्पुरिसा ते ण वुच्चंति, जे ^२दाणवईह दुज्जणे ।
 सप्पुरिसा णवरि ते भणिया, जे निसल्ला तवे रया ॥१७३॥
 आया अणिच्छमाणोऽवी, पावसल्लेहिं गोयमा !
 णिमिसद्धाणंतगुणिएहिं, पुरिज्जे ^३नियदुक्खिया ॥१७४॥
 ताइं च ज्ञाणसज्झायघोरतवसंजमेण य ।
 निदंभेण अमाएणं, तक्खणं जो समुद्धरे ॥१७५॥
 आलोएत्ताण णीसल्लं, निदिउं गरहिउं दढं ।
 तह चरई पायच्छित्तं, जह सल्लाणमंतं करे ॥१७६॥
 अन्नजम्मपहुत्ताणं खेतीभूयाण वी दढं ।
 णिमिसद्धखणमुहुत्तेणं, आजम्मेणेव निच्छिओ ॥१७७॥ युग्मम् ॥
 सो सुहडो सो य पुरिसो, सो तवस्सी स पंडिओ ।
 खंतो दंतो विमुत्तो य सहलं तस्सेव जीवियं ॥१७८॥
 सूरु य सो सलाहो य, दडुव्वो य खणे खणे ।
 जो सुद्धालोयणं देंतो, नियदुच्चरियं कहे फुडं ॥१७९॥ युग्मम् ॥
 अत्थेणे गोयमा ! पाणी, जे सल्लं अद्धउद्धियं ।
 माया लज्जा भया मोहा, ^४असकारा हियए धरे ॥१८०॥

१. 'पावा हस्सबुद्धिया' पाठान्तरमिति । २. इह-लोके दानपतिर्दुर्जन इति ।
 ३. निजकेन पापेन दुःखिता यदिवा नित्यदुःखिता इति । ४. अयशःकीर्तिकरा
 इति ।

तं तस्स गुरुतरं दुक्खं, झीणसत्तस्स संजणे ।
 स चिंते अन्नाणदोसाओ, णोद्धरं दुक्खिज्झिहं किल ॥१८१॥
 एगधारो दुधारो वा, लोहसल्लो अणुद्धिओ ।
 सल्ले ^१गत्थाम जंमेगं, अहवा ^२मंसीभवेइ सो ॥१८२॥
 पावसल्लो पुणासंख, तिक्खधारो सुदारुणो ।
 बहुभवंतरे सव्वंगे, भिंदे कुलिसो गिरी जहा ॥१८३॥
 अत्थेगे गोयमा ! पाणी, जे भवसयसाहस्सिए ।
 सज्झायज्झाणजोगेण, घोरतवसंजमेण य ॥१८४॥
 सल्लाइं उद्धरेऊणं, ^३विरया ता दुक्खकेसओ ।
 पमाया विउणतिउणेहिं, पूरिज्जंती पुणो वि य ॥१८५॥
 जम्मंतरेसु बहुएसु, तवसा निह्दुह्कम्मणो ।
 सलुद्धरणस्स सामत्थं, भवंती कहवि जं पुणो ॥१८६॥
 तं सामग्गिं लभित्ताणं, जे पमायवसं गए ।
 ते मुसिए सव्वभावेणं, कल्लाणाणं भवे भवे ॥१८७॥
 अत्थेगे गोयमा ! पाणी, जे पमायवसं गए ।
 चरंते वी तवं घोरं, सल्लं गोवेति सव्वहा ॥१८८॥
 णेयं तत्थ वियाणंति, जहा किमन्हेहिं गोविंय ?
 जं पंचलोगपालऽप्पा, पंचेदियाणं च न गोविंयं ॥१८९॥
 पंचमहालोगपालेहिं, अप्पा पंचेदिएहि य ।
 एक्कारसेहिं एतेहिं, जं दिट्ठं ससुरासुरेणं जगेण वी ॥१९०॥

१. ग्रथ्यामो ग्रथ्यामो वा जन्मनि-एकस्मिन्निति । २. 'संसीभवेइमो' पाठान्तरमाश्रित्य
 तत् शल्मम् अंशी-अवयवीभूतं भवेदिति । ३. 'विरयाला' पाठान्तरमिति ।

ता गोयम ! भावदोसेणं, आया वंचिज्जइ परं ।
 जेणं चउगइसंसारे, हिंडइ सोक्खेहि वंचिओ ॥१९१॥
 एवं नाऊण कायव्वं, निच्छियदढ्हिययधीरिया ।
 महउत्तिमसत्तकुंतेणं, भिंदेयव्वा मायारक्खसी ॥१९२॥
 बहवे अज्जवभावेणं, निम्महिऊण अणेगहा ।
 विणयातीअंकुसेण पुणो, माणगइदं वसीकरे ॥१९३॥
 मद्दवमुसलेण ता चूरे, ^१वसियरियं, जाव दुरओ ।
 दड्ढुणं कोहलोहाहीमयरे निंदे संघडे ॥१९४॥
 कोहो य माणो य अणिग्गहीया, माया य लोभो य पवड्ढमाणा ।
 चत्तारि एए कसिणा कसाया, ^२पोयंति सल्ले सुदुरुद्धरे बहं ॥१९५॥
 उवसमेण हणे कोहं, माणं मद्दवया जिणे ।
 मायं चऽज्जवभावेणं, लोभं संतुड्ढिए जिणे ॥१९६॥
 एवं निज्जियकसाए जे, सत्तभयट्ठाणविरहिए ।
 अट्ठमयविप्पमुक्के य, देज्जा सुद्धमालोयणं ॥१९७॥
 सुपरिफुडं जहावत्तं, सव्वं ^३नियदुक्कियं कहे ।
 णीसंके य असंखुद्धे, निब्बीए गुरुसंतियं ॥१९८॥
 भूणे मुद्धए गोवाले, जह पलवे उज्जु-पद्धरं ।
 अवि उप्पन्नं तहा सव्वं, आलोयव्वं जहड्ढियं ॥१९९॥
 जं पायाले पविसित्ता, अंतरजलमंतरेइ वा ।
 कयमह रातोऽंधकारे वा, जणणीए वि समं भवे ॥२००॥

१. वशीकृतमीति । २. 'बहुं' इतिस्थाने कचित् 'पहुं' इति पाठान्तरमाश्रित्य प्रभुं-जीवं प्रोतयन्ति यदिव 'पायंति' इति पाठान्तरं प्रतीत्य पालयन्ति तीक्ष्णीकुर्वन्ति वेति । ३. दुष्कृतं दुष्क्रियां वेति ।

तं जहवत्तं कहेयव्वं, सव्वमण्णं पि णिक्खिलं ।
 नियदुक्किय सुक्कियमादी, आलोयंतेहिं गुरुयणे ॥२०१॥
 गुरु वि तिथ्ययरभणियं, जं पच्छित्तं तहिं कहे ।
 नीसल्लीभवति तं काउं, जइ परिहरइ असंजमं ॥२०२॥
 असंजमं भन्नई पावं, तं पावमणेगहा मुणे ।
 हिंसा असच्चं चोरिक्कं, मेहुणं तह परिग्गहं ॥२०३॥
 सद्दाइंदियकसाए य, मणवइतणुदंडे तहा ।
 एते पावे अछडुंतो, णीसल्लो णो य णं भवे ॥२०४॥
 हिंसा पुढवादिछब्भेया, अहवा णवदसचोदसहा उ ।
 अहवा अणेगहा णेया, कायभेदतरेहि णं ॥२०५॥
 हिओवदेसं पमोत्तूण, सव्वुत्तमपारमत्थियं ।
 तत्तधम्मस्स ^१सव्वं अण्णं, मुसावायं अणेगहा ॥२०६॥
 उग्गमउप्पायणेसणया, बायालीसाए तह य ।
 पंचेहिं दोसेहिं दूसियं, जं भडोवगरणपाणमाहरं ।
 नवकोडीहिं असुद्धं, परिभुंजंते भवे तेणो ॥२०७॥
 दिव्वं कामरईसुहं, तिविहं तिविहेण अहव उरालं ।
 मणसा अज्झवसंतो, अंबभयारी मुणेयव्वो ॥२०८॥
 नववंभचेरगुत्ती विराहए जो य साहु समणी वा ।
 दिट्ठिमहवा सरागं, पउंजमाणो अइयरे बंभं ॥२०९॥
 गणणा पमाणअइरित्तं, धम्मोवगरणं पिय ।
 परिग्गहं वियाणेज्जा तह य मुच्छा जहिं च वत्थुहिं ॥२१०॥
 दुट्ठपसत्थजोगेहिं परिणामं भवइ दारुणं ।
 तप्परिणामझवसाएणं हिंसा तणुमवि आरंभमसमियत्तणं तहा
 ॥२११॥

सकसायकूरभावेणं, जा वाणी कुलुसिया भवे ।
 सावज्जवइदोसेसुं, जा पुट्ठा तं मुसा मुणे ॥२१२॥
 ससरक्खमवि अविदिण्णं, जं गिण्हे तं चोरिक्कयं ।
 मेहुणं करकम्मेणं, सद्दादीण वियारणे ॥२१३॥
 परिग्गहं जहिं मुच्छा, लोहो कंखा ममत्तयं ॥
 अणुणोयरियमाकंठं, भुंजे राईभोयणं ॥२१४॥
 सदस्साणिट्ठ-इयरस्स, रुवरसगंधफरिसस्स वा ।
 ण रागं ण प्पदोसं वा, गच्छेज्जा उ खणं मुणी ॥२१५॥
 कसायस्स चउ चउक्कस्स, मणसि विज्झावणं करे ।
 दुट्ठे मणोवईकायादंडे णो णं पउंजए ॥२१६॥
 अफासुपाणपरिभोगं, बीयकायसंघट्टणं ।
 अछड्डेतो इमे पावे, णो णं णीसल्लो भवे ॥२१७॥
 एएसिं महंतपावाणं, देहत्य जाव कत्थई ।
 एक्कं पि चिट्ठए सुहुमं णीसल्लो ताव णो भवे ॥ ॥२१८॥
 तम्हा आलोयणं दाउं, पायच्छित्तं करेऊणं ।
 निखिलं तव-संजमं धम्मं निसल्लमणुचिट्ठियव्वयं ॥२१९॥
 एयं निक्कवडं निदंभं, निसल्लं काउं तवं ।
 जत्थ जत्थोववज्जेज्जा, देवेसु माणुसेसु वा ॥२२०॥
 तत्थ तत्थुत्तमा जाई, उत्तमा रिद्धि संपया ।
 लभेज्जा उत्तमं रुवं, सोहग्गं जई णं नो सिज्झिज्जा तब्भवेत्ति बेमि
 ॥२२१॥

महानिशीहसुयक्खंधस्स पढमं अज्झयणं सल्लुद्धरणं नाम । एयस्स
 य कुलिहियदोसो न दायव्वो सुयहरेहिं, किंतु जो चेव एयस्स

पुव्वायरिसो आसि तत्थेव कत्थई सिलोगो, कत्थई सिलोगद्धं, कत्थई पयक्खरं, कत्थई अक्खर-पंतिया, कत्थई पत्तगपुड्डियं, कत्थई एग बे तिन्नि पत्तगाणि एवमाइ बहुगंथं परिगलियंति ॥७॥



कम्मविवाग—वागरणं नाम बीयज्झयणं (पढमो उद्देशो)

निम्मूलुद्धियसल्लेणं, सव्वभावेण गोयमा !

झाणे पविसेत्तु सम्मेयं, पच्चक्खं पासियव्वयं ॥१॥

जे सण्णी जे वि यासन्नी, भव्वाभव्वा उ जे जगे ।

सुहत्थी तिरियमुट्ठाहं, इहमिहाडेति दसदिसिं ॥२॥

असन्नी दुविहे णेए, वियलिंदी एगिंदिए ।

वियले किमिकुंथुमच्छादी, पुढवादी एगिंदिए ॥३॥

पसुपक्खीमिगा सण्णी, नेरइया मणुयाऽमरा ।

भव्वाभव्वावि अत्थेसुं ^१नीरए उभयवज्जिए ॥४॥

^२धम्मत्ता जंति छायाए वियलिंदी सिसिराऽऽयवं ।

होही सोक्खं किलऽम्हाणं, ता दुक्खं तत्थ वी भवे ॥५॥

सुकुमालंगगत्ताओ, खणदाहं सिसिरं खणं ।

न इमं न इमं अहियासेउं, सक्कं णं एवमादियं ॥६॥

मेहुणसंकप्परागाओ, मोहा अण्णाणदोसओ ।

पुढवादीसु गएगिंदी, ण याणंती दुक्खं सुहं ॥७॥

परिव्वत्तंतेऽणंतेवि, काले बेइंदियत्तणं ।

केई जीवा ण पावेंती, केई पुणोऽणादिया विय ॥८॥

सीउण्हवायविज्झडिया, मियपसुपक्खीसिरीसिवा ।

सिमिणंते वि न लब्भंते ते णिमिसद्धंभंतरं सुहं ॥९॥

१. नीरजस्कः - सिद्ध इति । २. धर्मात्ता इति ।

खरफरुसतिक्खकरवत्ताइएहिं, फालिज्जंता खणेखणे ।
 निवसंति नारया नरए, तेसिं सोक्खं कुओ भवे ? ॥१०॥
 सुरलोए अमरया सरिसा, सव्वेसिं तत्थिमं दुहं ।
 उवइठ्ठे वाहणत्ताए, एगो अण्णो तमारुहे ॥११॥
 समतुल्ले पाणिपादेणं, हाहा मे अत्तवेरिणा ।
 मायादंभेण धिद्धिद्धि परितप्पेहं आयवंचिओ ॥१२॥
 सुहेसी किसि-कमंतं, सेवा वाणिज्जसिप्पयं ।
 कुव्वंताऽहन्निसं मणुया, धुप्पंते एसिं कुओ सुहं ? ॥१३॥
 परघरसिरीए दिट्ठाए, एगे डज्झंति बालिसे ।
 अन्ने अपहुप्पमाणीए, अन्ने खीणाए लच्छीए ॥१४॥
 पुन्नेहिं वड्डमाणेहिं, जसकित्ती लच्छी य वड्डई ।
 पुन्नेहिं हायमाणेहिं, जस कित्ती लच्छी य खीयई ॥१५॥
 वाससाहस्सियं केई, मन्नंते एगदिणं पुणो ।
 कालं गमेति दुक्खेहिं, मणुया पुन्नेहिं उज्झिया ॥१६॥
 संखेवत्थमिमं भणियं, सव्वेसिं जगजंतुणं ।
 दुक्खं माणुसजाईणं, गोयमा ! जं तं निबोधय ॥१७॥
 जमणुसमयमणुभवन्ताणं, सयहा^१ उव्वेवियाण वि ।
 निव्विन्नाणं पि दुक्खेहिं, वेरग्गं न तहा वि भवे ॥१८॥
 दुविहं समासओ^२ मुणसु, दुक्खं सारीरमाणसं ।
 घोरं पंचडमहरोद्धं, तिविहं एक्केकं भवे ॥१९॥
 घोरं जाण मुहत्तंतं घोरपयंडंति समयवीसामं ।
 घोरं पयंडमहारोद्धं, अणुसमयमविस्सामगं मुणे ॥२०॥

घोरं मणुस्सजाईणं घोरपयंडं मुणे तिरिच्छासु ।
 घोरं पयंडमहारोहं, नारयजीवाण गोयमा ! ॥२१॥
 माणसं तिविहं जाणे, जहन्नमज्झुत्तमं दुहं ।
 नत्थि जहन्नं तिरिच्छाणं, दुहमुक्कोसं तु नारयं ॥२२॥
 जं तं जहन्नगं दुक्खं, माणसं तं दुहा मुणे ।
 सुहुमवायरभेएणं, निव्विभागे इतरे दुवे ॥२३॥
 समुच्छिमेसुं मणुएसुं सुहुमं देवेसु बायरं ।
 चवणकाले महिद्धीणं, आजम्मं आभिओगाण उ ॥२४॥
 सारीरं नत्थि देवाणं, दुक्खेणं माणसेण उ ।
 अइबलियं ^१वज्जिमं हिययं, सयखंडं जं न वी फुडे ॥२५॥
 णिव्विभागे य जे भणिए, दोन्नि मज्झुत्तमे दुहे ।
 मणुयाणं ते समक्खाए, गब्भवक्कंतियाण उ ॥२६॥
 असंखेयाउमणुयाणं, दुक्खं जाणे विमज्झिमं ।
 संखेआउमणुस्साणं तु, दुक्खं चेवुक्कोसगं ॥२७॥
 असोक्खं वेयणा बाहा, पीडा दुक्खमणिव्वुई ।
 अणराममरई केसं, एवमादी एगड्डिया बहू ॥२८॥



अह बिइओ उद्देसो

सारीरेयर भेदं ति, जं भणियं तं पवक्खई ।
 सारीरं गोयमा ! दुक्खं, सुपरिफुडं तमवधारय ॥२९॥
 वालग्गकोडीलक्खमयं, भागमित्तं छिवे मुहा ।
^२अथिरअणण्णपदेससरं, कुंथुमणहवित्तिं खणं ॥३०॥
 तेणवि करकत्तिसल्लेउं, हिययमुद्धसए तणू ।
 सीयंती अंगमंगाई गुरु, उवेइ सव्वसरीरस्सब्भंतरं,
 कंपे थरथरस्स य ॥३१॥

कुंथुफरिसियमेत्तस्स, जं सलसलसले तणुं ।
 तमवसं भिन्नसव्वंगे, कलयलडज्झंतमाणसे ॥३२॥
 चिंतितो हा किं किमेयं, बाहे गुरुपीडाकरं ?
 दीहुण्हमुक्कनीसासे, दुक्खं दुक्खेण नित्थरे ॥३३॥
 किमेयं ? कियचिरं बाहे ? कियचिरेणेव णिट्ठिही ?
 कहं वाऽहं विमुच्चीसं ? इमाउ दुक्खसंकडा ॥३४॥
 गच्छं चेद्वं सुवं उद्वं, धावं गासं पलामि उ ।
 कंडुगयं ? किं व पक्खोडं ? किं वा इत्थं करेमिऽहं ? ॥३५॥
 एवं तिवग्गवावारं चिच्चोरुदुक्खसंकडे ।
 पविट्ठो बाढं संखेज्जा, आवलियाओ किलिस्सिउं ॥३६॥
 मुणे हुं कडुयमेस ^१कंडूये, अण्णहा णो उवस्समे ।
 ता एयज्झवसाएणं गोयम ! निसुणेसु जं करे ॥३७॥
 अह तं कुंथुं वावाए, जइ णो अन्नत्थ गयं भवे ।
 कंडूयमाणोऽह भित्तादी, अणुघसमाणो ^२किलम्मए ॥३८॥
 जइ वावाएज्ज तं कुंथुं कंडूयमाणो व इयरहा ।
 तो तं अइरोद्वज्झाणंमि, पविट्ठं णिच्छयओ मुणे ॥३९॥
 अह किलामेतओ भयणा, रोद्वज्झाणेयरस्स उ ।
 कंडुयमाणस्स उण देहं, सुद्धमद्वज्झाणं मुणे ॥४०॥
 समज्जे रोद्वज्झाणद्वो, उक्कोसं नारगाउयं ।
 दुभगित्थीपंडतेरिच्छं, अद्वज्झाणा समज्जिणे ॥४१॥
 कुंथुपदफरिसजणियाओ, दुक्खाओ उवसमिच्छया ।
 एत्थ ^३हल्लफलीभूते, जमवत्थंतरं वए ॥४२॥

विवण्णमुहलावण्णे, अइदीणे विमणदुम्पणे ।
 सुण्णे वुण्णे य मूढदिसे मंददरदीहनिस्ससे ॥४३॥
 अविस्सामदुक्खहेऊहिं, असुहं तेरिच्छनारयं ।
 कम्मं निब्बन्धइत्ताणं, भमिही भवपरंपरं ॥४४॥
 एवं खओवसमाओ, तं कुंथुवइयरजं दुहं ।
 कह कहवि बहुकिलेसेणं, जइ खणमेक्कं तु उवसमे ॥४५॥
 ता महकिलेसमुत्तिन्नं, सुहियं से अत्ताणयं ।
 मन्नंतो पमुइओ हिट्ठो, सत्थचितो विचिट्ठई ॥४६॥
 चिंतई किल निव्वुओमि अहं निदलियं दुक्खंपि मे ।
 कंडुयणादीहिं सयमेव, न मुणे एवं जहा मए ॥४७॥
 रोद्धज्झाणगएणं इहं, अट्ठज्झाणे तहेव य ।
 संवग्गइत्ता उ तं दुक्खं, अणंताणंतगुणं कडं ॥४८॥ युग्मम् ॥
 जं वाणुसमयमणवरयं, जहा राई तहा दिणं ।
 दुहमेवाणुभवमाणस्स, वीसामो नो भवेज्ज मो ॥४९॥
 खणंपि नरयतिरिएसुं, सागरोवमसंखया ।
 रसरस विलिज्जए हिययं, जं ^१चायण्णंताण वि ॥५०॥
 अहवा किं कुंथुजणियाउ, मुक्को सो दुक्खसंकडा ।
 खीणट्ठकम्मसरिसा मो^२, भवेज्ज ^३जणुमेत्तेणेव उ ॥५१॥
 कुंथुमुवलक्खणं इहइं, सव्वं पच्चक्खं दुक्खदं ।
 अणुभवमाणो वि जं पाणी, ण याणंती तेण वक्खई ॥५२॥
 अन्नेवि उ गुरुयरे, दुक्खे सव्वेसिं संसारिणं ।
 सामन्ने गोयमा ! ता किं, तस्स तेणोदए गए ? ॥५३॥

१. आकर्णयतामपीति 'वाइत्थं तत्ताण वि' पाठान्तरमिति । २. 'परिणामो' पाठान्तरमिति ।

३. एतज्जन्यनैवेति ।

हण मरह जं अन्नजम्मेसुं, वाया वि उ केइ भाणिरे ।
 तमवीह जं फलं देज्जा, पावं कम्मं ^१पवुज्झयं ॥५४॥
 तस्सुदया बहुभवग्गहणे, जत्थ जत्थोववज्झइ ।
 तत्थ तत्थ स हम्मंतो, मारिज्जंतो भमे सया ॥५५॥
 जे पुण अंगउवंगं वा, अक्खि कण्णं च णासियं ।
 कडिअट्ठिपट्ठिभंगं वा, कीडपयंग्गाइपाणिणं ॥५६॥
 कयं वा कारियं वावि, कज्जंतं वाऽह अणुमयं ।
 तस्सुदय ^२चक्कनालिवहे, पीलीही सो तिले जहा ॥५७॥
 ण इक्कं णो दुवे तिण्णि, वीसं तीसं न यावि य ।
 संखेज्जे वा भवग्गहणे, लभते दुक्खपरंपरं ॥५८॥
 असूयमुसाऽनिट्ठवयणं, जं पमायअन्नाण दोसओ ।
 कंदप्पनाहवाएणं अभिनिवेसेण वा पुरो ॥५९॥
 भणियं भणावियं वावि, भन्नमाणं च अणुमयं ।
 कोहा लोहा भया हासा, तस्सुदया एयं भवे ॥६०॥
 मूगो पूइमुहो मुखो, कल्लविलल्लो भवे भवे ।
 विहलवाणी ^३सुयट्ठो वि, सव्वत्थऽब्भक्खणं लभे ॥६१॥
 अवितहभणियं न तं सच्चं, अलियवयणं पि नालियं ।
 जं छज्जीवनिकायहियं, निदोसं सच्चं तयं ॥६२॥
 एवं चोरिक्का निप्फलं सव्वं, कम्मरंभं किसादियं ।
 लद्धत्थस्सा वि भवे हाणी, अन्नजम्मकया इहं ॥६३॥



अह तइओ उद्देसो ।

एवं मेहुणदोसेणं, वेदिता थावरत्तणं ।
 केसिणमणंतकालाउ, माणुसजोणी समागया ॥६४॥

दुक्खं जरंति आहारं, अहियं सित्थं पि भुंजियं ।
 पीडं करेइ तेसिं तु, तण्हा बाहे खणे खणे ॥६५॥
 अद्धाणमरणं तेसिं, बहुजप्पं ^१कट्ठासणं ।
^२थाणुव्वालं णिविन्नाणं, निट्ठाए जंति णो ^३वणिं ॥६६॥
 एवं परिग्गहारंभदोसेणं नरगाउयं ।
 तेत्तीससागरुक्कोसं, वेइत्ता इह समागया ॥६७॥
 छुहाए पीडिजंति, भुत्तभुत्तुत्तरेऽविय ।
 चंरताऽहन्निसं तित्तिं, नो गच्छंती पसवे जहा ॥६८॥
 कोहादीणं तु दोसेणं, घोरमासीविसत्तणं ।
 वेइत्ता नारयं भूओ, रोद्धा मिच्छा भवंति ते ॥६९॥
 सढकूडकवडनियडीए, डंभाओ ^४सुवइरं गुरुं ।
 वेइत्ता चित्ततेरिच्छं, माणुसजोणिं समागया ॥७०॥
 केई बहुवाहिरोगाणं, दुक्खसोगाणं भायणं ।
 दरिदकलहमभिभूया, खिसणिज्जा भवंतिहं ॥७१॥
 तक्कम्मोदयदोसेणं, निच्चं पज्जलियबोदिणं ।
 ईसाविसायजालाहिं, धग धग धग धगस्स ॥७२॥
 जंमं पि गोयमा ! बोले बहुदुहसंधुक्कियाण य ।
 तेसिं दुच्चरियदोसो, कस्स रुसंतु ते इह ? ॥७३॥
 एवं वयनियमभंगेणं, सीलस्स उ खंडणेण वा ।
 असंजमपवत्तणया, उस्सुत्तमग्गायरणेण हि ॥७४॥
 णेगेहिं वितहायरणेहिं, पमायासेवणाहिं^५ य ।

१. कट्टेनाऽशनप्राप्तिरिति । २. स्थाणुरिवातीव निर्विज्ञानमिति । ३. निद्रायामपि शान्तिं न यान्तीत्यर्थं संभाव्यते । ४. 'सुइरं' ५. 'सेवणेहिं' पाठान्तरे ।

मणेणं अहवा वायाए, अहवा काएण कथई ।

कयकारगाणुमएहिं वा, पमायासेवणेहिं य ॥७५॥

तिविहेणमणिंदियमगरहियमणालोइयमपडिक्कंतमकयपायच्छित्तमवि-
सुद्धासयदोसओ ससल्ले आमगब्भेसुं पच्चिय पच्चिय अणंतसो वियलंते
दुतियचउपंचल्लहं मासाणं असंबल्लट्ठीकरसिरचरणल्लवी ॥१॥

लद्धेवि माणुसे जम्मे, कुट्ठादीवाहिसंजुए ।

जीवंते चेव किमिएहिं, खजंति मच्छियाहि य,

अणुदियहं खंडखंडेहिं, सडहडस्स सडे तणु ॥७६॥

एवमादीदुक्खाभिभूए, लज्जणिज्जे खिसणिज्जे,

निंदणिज्जे गरहणिज्जे, उव्वेवणिज्जे अपरिभोगे,

नियसुहिसयणबंधवाणंपि भवंती ते दुरप्पणो ॥७७॥

अज्झवसायविसेसं तं पडुच्च केइ तारिसं ।

अकामनिज्जराए उ, भूयपिसायत्तणं लभते ॥७८॥

तप्पुव्वसल्ल-दोसेणं, बहुभवंतरत्थाइणा ।

अज्झवसायविसेसं तं, पडुच्चा केइ तारिसं ॥७९॥

दससुवि दिसासु ^१उद्धद्धो, निच्चदूरप्पए^२ दढं ।

^३णिरुत्थल्लनिरुस्सासो, निराहारमपाणिए ॥८०॥

सपिंडियंगमंगो य, मोहमदिराए ^४घम्मरिए ।

अदिट्ठुग्गमणअत्थमणे, भवे पुढवीए गोलयाकिमी ॥८१॥

भवकायट्ठितीए वेइत्ता, तं तेहिं किमियत्तणं ।

जइ कहवि लहंति मणुयत्तं, तओ ते हुंति णपुंसगे ॥८२॥

१. वञ्चितो यदिवा निषिद्धो निव्यं दुरात्मेति । २. 'दुरप्पिए' पाठान्तरमाश्रित्य दूरं प्रियं यस्य स इति । ३. निर्वस्वश्च निरुच्छ्वासश्चेति । ४. मत्त आप्मातो वेति ।

अज्झवसायविसेसं तं, पवहंते अइकूरघोररुद्धं ।
 तारिसं ^१वमहसंधुक्किया, मरितुं जम्मं जंति वणस्सइं ॥८३॥
 वणस्सइं गए जीवे उद्धपाए अहोमुहे ।
 विचिट्ठंति अणंतयं कालं, नो लभे बेइदियत्तणं ॥८४॥
 भवकायट्ठितीए वेएत्ता, तमेगबितिचउरिंदियत्तणं ।
 तं पुव्वसल्लदोसेणं, तेरिच्छेसूववज्जिउं ॥८५॥
 जइ णं भवे महामच्छे, पक्खीवसह-सीहादओ ।
 अज्झवसायविसेसं तं, पडुच्च अच्चंतकूरयरं ॥८६॥
 कृणिममाहारत्ताए, पंचेंदियवहेण य ।
 अहो अहो पविस्संति, जाव पुढवी उ सत्तमा ॥८७॥
 तं तारिसं महाघोरं, दुक्खमणुभविउं चिरं ।
 पुणोवि कूरतिरिएसु, उववज्जिय नरयं वए ॥८८॥
 एवं नरयतिरिच्छेसुं, परियट्ठंतो विचिट्ठई ।
 वासकोडीएवि नो सक्का कहिउं, जं तं दुक्खं अणुभवमाणगे ॥८९॥
 अह खरुट्ठबइल्लेसुं, भवेज्जा तब्भवंतरे ।
 सगडायट्ठण भरुव्वहणखुत्तण्हसीयायवं ॥९०॥
 वहवंधणंकणं डहणं णासाभेदणिल्लंछणं तहा
^२जमताराईहिं कुच्चाहिं कुच्चिजंताण य,
 जहा राई तहा दियहं, सव्वद्धा उ सदारुणं ॥९१॥
 एवमादीदुक्खसंघट्ठं, अणुहवंति चिरेण उ ।
 पाणे ^३पयहिंति कहकहवि, अट्ठज्झाणदुहट्ठिए ॥९२॥

१. मन्मथसंधुक्षिता इति । २. यमलेन सहवर्तिबलिवर्देन सह रश्मिभिर्यदिवा आरायुक्तैः -
 लोहशलाकायुक्तैः कूर्वकाकारैश्चर्मदवरकमयैश्च प्राजनकैः प्रेर्यमाणानामिति ।
 ३. प्रजहतीति ।

अज्झवसायविसेसं तं पडुच्च केइ कहकहवि लब्भंते माणुसत्तणं ।
तप्पुव्वसल्लदोसेणं, माणुसत्तेवि आगया ॥९३॥
भवन्ति जम्मदारिदा, वाही-खस-पाम-परिगया ।
एवं अदिट्ठकल्लाणे, सव्वजणस्स सिरिं हाइउं^१ ॥९४॥
संतप्पंते दढं मणसा, अकयतवे णिहणं वए ।
अज्झवसायविसेसं तं पडुच्चा केइ तारिसं ॥९५॥
पुणोवि पुढविमाईसुं, भमन्ती ते दुत्तिचउरोपंचेदिणेषु वा ।
तं तारिसं महादुक्खं, सुरुद्धं घोरदारुणं ॥९६॥
चउगइसंसारकंतारे, अणुभवमाणे सुदूसहं ।
भवकायट्ठितीए हिंडंते सव्वजोणीसु गोयमा ! ॥९७॥
चिड्ढंति संसरेमाणा जम्मजरामरण-वहुवाहि-वेयणारोग-सोगदा-
लिदकलहब्भक्खाणसंताव-गब्भवासादि-दुक्खसंधुक्किए । तप्पुव्वसल्ल-
दोसेणं निच्चाणंद-महूसवधाम-जोग्ग-अट्टारससीलंग-सहस्साहिट्ठियस्स
सव्वासुहपावकम्मट्टरासिनिद्वहण-अहिंसा-लक्खण-समण-धम्मस्स बोहिं
णो पावेति ते ॥९८॥

अज्झवसायविसेसं तं पडुच्चा केइ तारिसं ।
पोग्गलपरियट्ठलक्खेसुं बोहिं कह कह वि पावए ॥९८॥
एवं सुदुल्लहं बोहिं, सव्वदुक्खखयंकरं ।
लद्धूणं जे पमाएज्जा, ^२तंतहुत्तं सो पुणो वए ॥९९॥
तासुं तासुं च जोणीसुं, पुव्वुत्तेण कमेण उ ।
पंथेणं तेणई चेव, दुक्खे ते चेव अणुभवे ॥१००॥
एवं भवकायट्ठितीए, सव्वभावेहिं पोग्गले ।
सव्वे सपज्जवे लोए, सव्ववन्नंतरे हि य ॥१०१॥

१. हापयित्वेति । २. तांतः - खेदः स च संसारभ्रमणरूपस्तदभि, 'तयहुत्तं'
पाठान्तरमाश्रित्य पुद्गलपरावर्ता-भिमुखमिति ।

गंधत्ताए रसत्ताए फासत्ताए संठाणत्ताए ।

परिणामेत्ता सरीरेणं, बोहिं पाविज्ज वा ण वा ॥१०२॥

एवं वयनियमभंगं, जे कज्जमाणमुवेक्खए ।

अह सीलं खडिज्जंतं अहवा संजमविराहणं ॥१०३॥

उम्मग्गपवत्तणं वावि, उस्सुत्तायरणंपि वा ।

सोऽविय अणंतरुत्तेण, कमेणं चउगई भमे ॥१०४॥

रुसउ तुसउ परो मा वा, विसं वा परियत्तओ^१ ।

भासियव्वा हिया भासा, सपक्खगुणकारिया ॥१०५॥

एवं लब्धामवि बोहिं, जइ णं नो भवइ निम्मला ।

ता संवुडासवदारे पगइठिइपएसाणुभावियबंधो

नो ^२हासो नो य निज्जरे ॥१०६॥

एमादी-घोरकम्मट्टजालेणं कसियाण भो ।

सव्वेसिमवि सत्ताणं, कुओ दुक्खविमोयणं ? ॥१०७॥

पुत्विं दुक्कयदुच्चिण्णाणं दुप्पडिक्कंताणं निययकम्माणं ण अवेइयाण-
मोक्खो घोरतवेण अज्झोसियाण वा ।३।

अणुसमयं वज्झए कम्मं, णत्थि अबंधो उ पाणिणो ।

मोत्तुं सिद्धे अजोगी य, सेलेसीसंठिए तहा ॥१०८॥

सुहं सुहज्जवसाएणं, असुहं दुट्ठज्जवसायओ ।

तिव्वयरेणं तु तिव्वयरं, मंदं मंदेण संचिणे ॥१०९॥

सव्वेसिं पावकम्माणं एगीभूयाणं जेत्तियं रासिं भवे तमसंखगुणं
वयतवसंजमचारित्तखंडणविराहणेणं उस्सुत्तमग्गपन्नवण-पवत्तण-
आयरणोवेक्खणेण य समज्जिणे ।४।

'अपरिमाणगुरुतुंगा, महंता घणनिरंतरा ।
 पावरासी खयं गच्छे, जहा तं सव्वोवाएहिमायरे ॥११०॥ छ ॥
 आसवदारे निरुंभित्ता, अप्पमादी भवे जया ।
 'बंधे सप्पं बहुं वेदे, जई सम्मत्तं सुनिम्मलं ॥१११॥
 आसवदारे निरुंभेत्ता, आणं नो खंडए जया ।
 दंसणनाणचरित्तसुं, उज्जुत्तो जो दढं भवे ॥११२॥
 तया वेए खणं बंधे, पोराणं सव्वं खवे ।
 अणुइण्णमवि उईरित्ता, निज्जियघोरपरिसहो ॥११३॥
 आसवदारे निरुंभित्ता, सव्वासायणविरहिओ ।
 सज्झायज्झाणजोगेसुं, घोरवीरतवे रओ ॥११४॥
 पालिज्जा संजमं कसिणं, वाया मणसा उ कम्मुणा ।
 जया तया ण बंधिज्जा, उक्कोसमणंतं च निज्जरे ॥११५॥
 सव्वावस्सगमुज्जुत्तो, सव्वालंबण विरहिओ ।
 विमुक्को सव्वसंगेहिं, सबज्झब्भंतरेहि य ॥११६॥
 गयरागदोसमोहे य, निन्नियाणे भवे जया ।
 नियत्तो विसयतत्तीए, भीए गब्भपरंपरा ॥११७॥
 आसवदारे निरुंभित्ता, खंतादी-धंमे ठिए ।
 सुक्कज्झाणं समारुहिय, सेलेसिं पडिवज्जए ॥११८॥
 तया न बंधए किंचि, चिरबद्धं असेसंपि
 निद्वहिय ज्ञाणजोगअग्गीए भसमी करे दढं ॥११९॥
 लहुपंचक्खरुग्गिरणमित्तेण कालेण भवोवग्गाहियं ।

एवं सजीववीरियसामत्था, परंपरण गोयमा ।
 पविमुक्ककम्ममलकवया^१, समएणं जंति पाणिणो ॥११९-अ॥
 सासयसोक्खमणाबाहं, रोगजरमरणविरहियं ।
 अदिदुदुक्खदारिदं, निच्चाणंदं सिवालयं ॥१२०॥
 अत्थेगे गोयमा ! पाणी, जे ^२एयमणुपवेसिय ।
 आसवदारनिरोहादी, इयरहेय सोक्खं चरे ॥१२१॥
 ता जाव कसिणडुकंमाणि, घोरतवसंजमेण उ ।
 णो णिदुहे सुहं ताव, नत्थि सिविणेऽवि पाणिणं ॥१२२॥
 दुक्खमेवमविस्सामं, सव्वेसिं जगजंतूणं ।
 एक्कं समयं न समभावे, जं सम्मं अहियासियं^३ तरे^४ ॥१२३॥
 थेवमवि थेवतरं, थेवयरस्सावि थेवयं ।
 जेणं गोयमा ! ता पेच्छ, कुंथू तस्सेव य तणू ॥१२४॥
 पायतलेसु न तस्सावि, तेसिमेगदेसं 'सुण ।
 फरिसंतो कुंथू जेणं चरई कस्सइ सरीरगे ॥१२५॥
 कुंथुणं सयसहस्सेणं, तोलियं णो पलं भवे ।
 एगस्स कित्तियं गत्तं ?, किं वा तुल्लं भवेज्ज से ? ॥१२६॥
 तस्स य पाययलदेसेणं, तस्स फरिसिओ तमवत्थंतरं ।
 पुव्वुत्तं गोयमा ! गच्छे, पाणी तो णं इमं सुणे ॥१२७॥
 भमंतसंचरंतो य, हिंडि नो मइले तणू ।
 न करे कुंथू खयं ताणं, ण^५यावासीय चिरं वसे ॥१२८॥

१. कवचादिति । २. एतदाश्रवनिरोधादिकमनुप्रविश्य इतरत् - हेयं सांसारिकं सौख्यं
 चरेद् यदिव 'एयं मणुए विषं' पाठान्तरमाश्रित्यैतदाश्रवनिरोधादिकं मनुते विषमिति ।
 ३. 'अहियासितुं' पाठान्तरमिति । ४. शक्नोतीति । ५. 'मुण' पाठान्तरमिति ।
 ६. न चाऽप्यासित्वेति ।

अह चिद्वे खणमेगं तु, बीयं नो परिवसे खणं ।

अह बीयंपि ^१विरत्तेज्जा, ता ^२बुज्जेयं तु गोयमा ! ॥१२९॥

रागेणं नो पओसेणं, मच्छरेणं न केणई ।

न यावि पुव्ववेरेणं, खेड्डातो ^३कामकारओ ॥१३०॥

कुंथू कस्सइ देहिस्स, आरुहेइ खणं तणुं ।

वियलिंदी भूण पाणे वा, जलंतग्गि वावी विसे ॥१३१॥

न चित्ते तं जहा मेस, पुव्ववेरीऽहवा सुही ।

ता किंची खेम पावं वा, संजणेमि एयस्सऽहं ॥१३२॥

पुव्वकडपावकम्मस्स, विरसे भुंजंतो फले ।

तिरिउट्ठाहदिसाणुदिसं, कुंथू हिंडे वराय से ॥१३३॥

चरंतेवमबाहाए, सारीरं दुक्खमाणसं ।

कुंथूवि दूसहं जत्ते, रोद्धट्ठज्झाणवट्ठणं ॥१३४॥

ता उ सल्लमारंभेत्ताण, मणजोगण्णयरेण वा ।

समयावलियमुहुत्तं वा, सहसा तस्स विवागयं ॥१३५॥

कह सहिहं बहुभवग्गहणे, दुहमणुसमयमहण्णिसं ।

घोरपयंडं व महारोद्धं ? हाहाऽऽकंदपरायणा ॥१३६॥

नारयतिरिच्छजोणीसु, अत्ताणासरणाऽविय ।

एगागी ससरीरेणं, असहाया कडु विरसं घणं ॥१३७॥

असिवण-वेयरणी-जंते, करवत्ते कूडसामलिं ।

कुंभी-वायसा-सीह, एमादी नारए दुहे ॥१३८॥

णात्थंकण वहबंधे य, ^४पलुक्कंतविकत्तणं ।

सगडाकट्ठण भरुव्वहणं, जमला य तण्हा छुहा ॥१३९॥

खरखुरचमढणसत्थग्गी ^१खोभणभंजणमाइए ।
 परयत्ताऽवसणित्तिसे, दुक्खे तेरिच्छे तहा ॥१४०॥
 कुंथूपयफरिसजणियंपि, दुक्खं नऽहियासिउं तरे ।
 ता तं महदुक्खसंघट्टं, कह नित्थिरिहि ^३सुदारुणं ? ॥१४१॥
 नारयतेरिच्छदुक्खाउ, कुंथूजणियाउ अंतरं ।
 मंदरगिरि अणंत गुणियस्स, परमाणुस्सावि नो घडे ॥१४२॥
 चिरयाले संमुहं ^३पाणी, कंखंतो आसाए निव्वुओ ।
 भवे दुक्खमईयंपि, सरंतोऽच्चंतदुक्खिओ ॥१४३॥
 बहु-दुक्ख-संकडेट्ठेत्थं ^४आवया-लक्खपरिगए ।
 संसारे परिवसे पाणी, अयडे महुबिंदु जहा ॥१४४॥
 पंत्थापत्थं अयाणंते, कज्जाकज्जं हियाऽहियं ।
 सव्वो सिव्व-मसेव्वं च, चरणिज्जाचरणिज्जं तहा ॥१४५॥
 एवइयं वइयरं सोच्चा, दुक्खस्संतगवेसिणो ।
 इत्थीपरिग्गहारंभे, चेच्चा घोरं तवं चरे ॥१४६॥
 ठियाऽऽसणत्था सयिया परंमुही, सुयलंकरिया वा । अनलंकिया वा ।
 निरिक्खमाणा पमया हि दुब्बलं, मणुस्समालेहगयावि करिसई ॥१४७॥
 चित्तभित्तिं न निज्झाए, नारिं वा सुअलंकियं ।
 भक्खरं पिव दट्ठूणं, दिट्ठिं पडिसमाहरे ॥१४८॥
 हत्थपायपडिच्छिन्नं, कन्ननासोड्ढवियप्पियं ।
 सडमाणी कुट्टवाहीए, तमवित्थीयं दुरयरेणं बंभयारी विवज्जए ॥१४९॥
 थेरभज्जा य जा इत्थी, पच्चंगुब्भडजोव्वणा ।
 जुन्नकुमारिं पउत्थवइयं, बालविहवं तहेव य ॥१५०॥

१. 'खोभणंजणमाइए' पाठान्तरमिति । २. 'नित्थिरिह' पाठान्तरमिति । ३. 'संमुहं'
 पाठान्तरमिति यदिवा 'से सुहं' इति सभाव्यते पाठः । ४. संकटेऽत्रेत्यमिति ।

अंतेउरवासिणीं चेव, ^१सपरपासंडसंसियं ।

दिक्खियं साहुणीं वावी, वेसं तहय नपुंसगं ॥१५१॥

कण्ह गोणिं खरिं चेव, वडवं अविलं अविं तथा ।

सिप्पित्थिं पंसुलिं वावि, जंमरोगमहिलं तथा ॥१५२॥

^२चिरेसंसड्ढमचेलिक्कं, एमादी पावित्थिओ ।

पगमंती जत्थ रयणीए, अह पइरिक्के दिणस्स वा ॥१५३॥

तं वसहियं संनिवेसं वा, सव्वोवाएहिं सव्वहा ।

दुरयरं सुदूरदूरेणं, बंभयारी विवज्जए ॥१५४॥

एएसिं सद्धिं संलावं, अद्धाणं वावि गोयमा !

अन्नासु वावि इत्थीसु, खणद्धं पि विवज्जए ॥१५५॥

से भयवं ! किमित्थीयं, णो णं ^३णिज्झाएज्जा ? गोयमा ! णो णं णिज्झाएज्जा, से भयवं ! किं सुणियत्थवत्थालंकरियविहूसियं इत्थीयं नो णं निज्झाएज्जा उयाहुणं ^४विणियंसणिं ?, गोयमा ! उभयहावि णं णो णं णिज्झाएज्जा, से भयवं ! किमित्थीयं नो आलवेज्जा ?, गोयमा ! नो णं आलवेज्जा, से भयवं ! किमित्थीसु सद्धिं खणद्धमवि णो संवसेज्जा ? गोयमा ! नो णं संवसिज्जा, से भयवं ! किमित्थीसु सद्धिं नो अद्धाणं पडिवज्जेज्जा ? गोयमा ! एगे बंभयारी एगित्थीए सद्धिं नो पडिवज्जेज्जा ।६।

से भयवं ! केणं अट्ठेणं एवं वुच्चइ - जहा णं नो इत्थीणं निज्झाएज्जा नो णमालवेज्जा नो णं तीए सद्धिं परिवसेज्जा नो णं अद्धाणं पडिवज्जेज्जा ?, गोयमा ! सव्वप्पयारेहिं णं सव्वित्थीयं अट्ठत्थं “मउक्कडत्ताए रागेणं संधुक्किज्जमाणी कामग्गीए संपलित्ता सहावओ चेव

१. ‘सपरपासंडसंसियं’ पाठान्तरमाश्रित्य स्वपरपाषण्डमर्मिकां मर्मज्ञामिति । २. सवसनां निर्वसनां वेति । ३. विलोकयेदिति ४. निर्वसनामिति । ५. मदोत्कटतयेति ।

विसएहिं बाहिज्जइ, तओ सव्वप्पयारेहिं णं सव्वित्थियं अच्चत्थं
मउक्कडत्ताए रागेण संधुक्किज्जमाणी काम्मगीए सहावओ चेव विसएहिं
बाहिज्जमाणी अणुसमयं सव्वदिसिविदिसासुं णं सव्वत्थ विसए पत्थिज्जा ।
जाव णं सव्वत्थ विसए पत्थेज्जा ताव णं सव्वपयारेहिं णं सव्वहा पुरिसं
संकप्पेज्जा, जाव णं पुरिसं संकप्पेज्जा, जाव णं सोइंदिओवओगत्ताए
चक्खुरिंदिओवओगत्ताए रसणिंदिओवओगत्ताए घाणिंदिओवओगत्ताए
फासिंदिओवओगत्ताए जत्थ णं केई पुरिसे कंतरुवेइ वा अकंतरुवेइ वा
पडुपन्नजोव्वणेइ वा अपडुपन्नजोव्वणेइ वा गयजोव्वणेइ वा दिट्ठपुव्वेइ
वा अदिट्ठपुव्वेइ वा इट्ठिमंतेइ वा अणिट्ठिमंतेइ वा इट्ठिपत्तेइ वा
अणिट्ठिपत्तेइ वा विसयाउरेइ वा निव्विन्नकामभोगेइ वा उद्धयबोंदीएइ
वा अणुद्धयबोंदीएइ वा महासत्तेइ वा हीणसत्तेइ वा महापुरिसेइ वा
कापुरिसेइ वा समणेइ वा माहणेइ वा अन्नयरेइ वा
निंदियाहमहीणजाइए वा तत्थ णं ईहापोहवीमंसं पउंजित्ताणं जाव णं
संजोगसंपत्तिं जाएज्जा जाव णं संजोगसंपत्तिं परिकप्पे ताव णं से चित्ते
संखुद्धे भवेज्जा, जाव णं से चित्ते संखुद्धे भवेज्जा ताव णं से चित्ते
विसंवएज्जा, जाव णं से चित्ते विसंवएज्जा ताव णं से देहे ^१सेएण
अद्धासेज्जा ताव णं से दरविदरे इहपरलोगावाए पम्हुसेज्जा, जाव णं से
दरविदरे इहपरलोगावाए पम्हुसेज्जा ताव णं चेच्चा लज्जं भयं अयसं
अकित्तिं मेरं उच्चट्ठाणाओ णीयट्ठाणं ठाएज्जा, जाव णं उच्चट्ठाणाओ
नीयट्ठाणं ठाएज्जा ताव णं वच्चेज्जा असंखेज्जाओ समयावलियाओ, जाव
णं ^२निज्जंति असंखेज्जाओ समयावलियाओ, ताव णं जं पढमसमयाओ
कम्मट्ठियं तं बीयसमयं पडुच्च तइयादियाणं समयाणं संखेज्जं असंखेज्जं
अणंतं वा अणुक्कमसो कम्मठिइं संचिणिज्जा, जाव णं अणुक्कमसो
अणंतकम्मट्ठिइं संचिणिइ ताव णं असंखेज्जाइ

१. स्वेदेनाऽध्यासीत-आश्रयेत यदिवा 'मएणं' इति पाठान्तरमाश्रित्य मदेनेति । २. 'णीयंति'
णिइंति इति पाठान्तरे एकार्थिक इति ।

अवसप्पिणीओसप्पिणीकोडिलक्खाइं जावइएणं कालेणं परिवत्तंति तावइयं कालं दोसुं चेव निरयतिरिच्छासु गतीसुं उक्कोसट्ठिइयं कम्मं आसंकलेज्जा, जाव णं उक्कोसठितियं कम्ममासंकलेज्जा ताव णं से विवण्णजुत्ति-विवण्णकंतिविचलियलायण्णसिरीयं निन्नद्वदित्तितेयं बोंदी भवेज्जा, जाव णं चुयकंतिलावण्णसिरीयं णित्तेय-बोंदी भवेज्जा ताव णं से सीइज्जा फरिसिंदिए, जाव णं सीएज्जा फरिसिंदिए ताव णं सव्वहा विवहेज्जा सव्वत्थ चक्खुरागे, जाव णं सव्वत्थ विवहेज्जा चक्खुरागे ताव णं रागारुणे नयणजुयले भवेज्जा, जाव णं रागारुणे नयणजुयले भवेज्जा ताव णं रागंधत्ताए ण गणेज्जा सुमहंतगुरुदोसे वयभंगे न गणेज्जा सुमहंतगुरुदोसे नियमभंगे न गणेज्जा सुमहंतघोरपावकम्मसमायरणं सीलखंडणं न गणेज्जा सुमहंतसव्वगुरुपावकम्मसमायरणं संजमविराहणं न गणेज्जा घोरंधयारपरलोगदुक्खभयं न गणेज्जा आयई न गणेज्जा सकम्मगुण-ट्ठाणगं न गणेज्जा ससुरासुरस्सावि णं जगस्स अलंघणिज्जं आणं न गणेज्जा अणंतहुत्तो चुलसीइजोणिलक्खपरिवत्तगब्भपरंपरं अलद्धणिमिसद्धसोक्खं चउगइसंसारदुक्खं ण पासिज्जा जं पासणिज्जं, पासिज्जा णं जं अपासणिज्जं, सव्वजणसमूहमज्झसंनिविट्ठुट्ठिया णिवन्नचंक्रमिय निरिक्खज्जमाणी वा दीप्पंतकिरणजालदसदिसीपया-सियतवंततेयरासी सूरीएवि तहावि णं पासेज्जा सुन्नंधयारे सव्वे दिसाभाए, जाव णं रागंधत्ताए ण गणेज्जा सुमहल्लगुरुदोसवयभंगे नियमभंगे सीलखंडणे संयमविराहणे परलोगभाए आणाभंगाइक्कमे अणंतसंसार-भाए, पासेज्जा अपासणिज्जे, सव्वजणपयडदिणयरे वि णं मन्नेज्जा सुन्नंधयारे सव्वे दिसाभाए ताव णं भवेज्जा अच्चंतनिब्भट्ठसोहग्गाइसाए, विच्छाए रागारुणपंडुरे दुदंसणिज्जे अणिरिक्खणिज्जे वयणकमले भवेज्जा, जावं च णं अच्चंतनिब्भट्ठ जाव भवेज्जा ताव णं फुरुफुरेज्जा सणियं सणियं ^१पोंइ-पुडंनियंबवच्छोरुह^२बाहुलइउरुकंठपएसे, जाव णं फुरुफुरेति पोंइ-

पुडनियंब-वच्छोरुहबाहुलइउरुकंठप्पएसे ताव णं ^१मोद्वायमाणी
 अंगपालियाहिं निरुवलक्खे वा सोवलक्खे वा भंजेज्जा सव्वंगोवंगे, जाव
 णं मोद्वायमाणी अंगपालियाहिं भंजेज्जा सव्वंगोवंगे ताव णं
 मयणसरसन्निवाएणं जज्जरियसंभिन्ने सव्व-रोमकुवे तणू भवेज्जा जाव णं
 मयणसरसन्निवाएणं विद्धंसिए बोंदी भवेज्जा ताव णं तहा परिणमेज्जा
 तणू जहा णं मणगं पयलंति धातूओ, जाव णं मणगं पयलंति धातूओ
 ताव णं अच्चत्थं बाहिज्जंति पोग्गलनियंबोरुबाहुलइयाओ, जाव णं
 अच्चत्थं बाहिज्जइ नियंबे ताव णं दुक्खेणं धरेज्जा गत्तयट्ठिं, जाव णं
 दुक्खेणं धरेज्जा गत्तयट्ठिं ताव णं से णोवलक्खेज्जा अत्तीयं सरीरावत्थं,
 जाव णं णोवलक्खेज्जा अत्तीयं सरीरावत्थं ताव णं दुवालसेहिं समएहिं
 दरनिच्चिट्ठं भवे बोंदी, जाव णं दुवालसेहिं दरनिच्चिट्ठे भवे बोंदि ताव णं
 पडिखलेज्जा से ऊसासनीसासे, जाव णं पडिखलेज्जा ऊसासनीसासे
 ताव णं मंदं मंदं ऊससेज्जा मंदं मंदं नीससेज्जा, जाव णं एयाइं इतियाइं
 भावंतरं अवत्थंतराइं विहारेज्जा ताव णं जहा गहग्घत्थे केइ पुरिसेइ वा
 इत्थिएइ वा विसंतुलाए पिसायाए भारतीए असंबद्धं संलवियं विसंतुलं
 तं अच्चंतं उल्लविज्जा एवं सिया णं इत्थीयं, विसमावत्तमोहण-
 मम्मणुल्लावेणं^२ पुरिसे दिट्ठपुव्वेइ वा अदिट्ठपुव्वेइ वा कंलरुवेइ वा
 अकंतरुवेइ वा गयजोव्वणेइ वा पडुप्पन्नजोव्वणेइ वा महासत्तेइ वा
 हीणसत्तेइ वा सप्पुरिसेइ वा कापुरिसेइ वा इट्ठिमंतेइ वा अणिट्ठिमंतेइ
 वा ^३विसओद्धएवा निवित्तकामभोगेइ वा समणेइ वा जाव णं अन्नयरे
 वा केइ निंदियाहमहीणजाइए वा अज्झत्थेणं ससज्झसेणं आमंतेमाणी
 उल्लावेज्जा, जाव णं संखेज्जभेदभिन्नेणं सरागेणं सरेणं दिट्ठीएइ वा पुरिसे
 उल्लावेज्जा निज्झाएज्जा ताव णं जं तं असंखेज्जाइं अवसप्पिणी उस्सप्पिणी-
 कोडिलक्खाइं दोसुं नरयतिरिच्छासु गतीसुं उक्कोसट्ठितीयं कम्मं

१. रममाणाऽङ्गपालिकाभिः धात्रीभिर्यदिवाऽऽलिङ्गनिकाभिरिति । २. 'मम्मणाल्लावेणं'
 पाठान्तरमिति । ३. विषयोद्धत इति 'विसयाउरेइ वा' पाठान्तरमिति ।

आसंकलियं आसि ओ तं निबंधिज्जा, नो णं बद्धपुट्ठं करेज्जा, सेऽवि णं जं समयं पुरिसस्स णं सरीरावयवफरिसणाभिमुहं भवेज्जा णो णं फरिसेज्जा तं समयं चेव तं कम्मट्ठिइं बद्ध-पुट्ठं करेज्जा, नो णं बद्धपुट्ठनिकायंति ।७।

एयावसरम्मि उ गोयमा ! संजोगेण संजुज्जेज्जा, सेऽवि णं संजोए पुरिसायत्ते, पुरिसेऽवि णं जे णं ण संजुज्जे से धन्ने जे णं संजुज्जे से अधण्णे ।८।

से भयवं ! केणं अट्ठेणं एवं वुच्चइ जहा पुरिसे वि णं जे णं न संजुज्जे से धन्ने जे णं संजुज्जे से णं अधन्ने ? गोयमा ! जे णं से तीए इत्थीए पावाए बद्धपुट्ठकम्मट्ठिइं चिड्डइ से णं पुरिससंगेणं निकाइज्जइ, तेणं तु बद्धपुट्ठनिकाइएणं कम्मेणं सा वराई तं तारिसं अज्झवसायं पडुच्चा एगिंदियत्ताए पुढवादीसुं गया समाणी अणंत-कालपरियट्ठेणवि णं णो पावेज्जा बेइदियत्तणं । एवं कहंकहवि बहुकेसेण अणंतकालाओ एगिंदियत्तणं खविय बेइंदियत्तं एवं तेइंदियत्तं चउरिंदियत्तमवि केसेणं वेयइत्ता पंचेदियत्तणं आगया समाणी दुब्भगित्थियं पंडतेरिच्छं वेयमाणी हाहाभूयकट्ठसरणा सिविणेवि अदिट्ठसोक्खा निच्चं संतावुव्वेविया सुहिसयणबंधवविवज्जिया आजम्मं कुच्छणिज्जं गरहणिज्जं निंदणिज्जं खिसणिज्जं बहुकम्मंतेहिं अणेगचाडुसएहिं लद्धोदरभरणा सव्वलोगपरिभूया चउगईए संसरेज्जा । अन्नं च णं गोयमा ! जावइयं तीए पावइत्थीए बद्धपुट्ठनिकाइयं कम्मट्ठिइयं समज्जियं तावइयं इत्थियं अभिलसिउकामे पुरिसे उक्किट्ठुक्किट्ठयरं अणंतं कम्मट्ठिइं बद्धपुट्ठनिकाइयं समज्जिणिज्जा । एतेणं अट्ठेणं गोयमा ! एवं वुच्चइ जहा णं पुरिसेऽवि णं जे णं नो संजुज्जे से णं धन्ने जे णं संजुज्जे से णं अधन्ने ।९।

भयवं ! केस णं पुरिसेस णं पुच्छा जाव णं धन्नं वयासी ? गोयमा ! छव्विहे पुरिसे नेये, तं जहा -

अहमाहमे, अहमे, विमज्झिमे, उत्तमे, उत्तमुत्तमे, सव्वुत्तमे ।१०।

१. तत्थ णं जे सव्वुत्तमे पुरिसे से णं पच्चंगुब्भडजोव्वणसव्वुत्तम-
रुवलावण्णकंतिकलियाएवि इत्थीए नियंबारुढो वाससयंपि चिट्ठिञ्जा णो
णं मणसावि तं इत्थियं अभिलसेञ्जा । ११ ।

२. जे णं तु से उत्तमुत्तमे से णं जइ कहवि ^१तुडितिहाएणं
मणसा समयमेकं अभिलसे तहावि बीयसमए मणं संनिरुभिय अत्ताणं
निंदेञ्जा गरहेञ्जा, न पुणो बीएणं तज्जमे इत्थियं मणसा वि उ
अभिलसेञ्जा ।

३. जे णं से उत्तमे पुरिसे से णं जइ कहवि, खणं मुहुत्तं वा
इत्थियं कामिज्जमाणिं पेक्खिञ्जा तओ मणसा अभिलसेञ्जा जाव णं जामं
वा अद्धजामं वा णो णं इत्थीए समं ^२विकम्मं समायरेञ्जा । १२ ।

जइ णं बंभयारी कयपच्चक्खाणाभिग्गहे, अहा णं नो बंभयारी नो
कयपच्चक्खाणाभिग्गहे तो णं नियकलत्ते भयणा, ण उणं तिव्वेसु
कामेसुं अभिलासी भविञ्जा, तस्स एयस्स णं गोयमा ! अत्थि बंधे, किं
तु अणंतसंसारियत्तणं नो निबंधिञ्जा । १३ ।

४. जे णं से विमज्झिमे से णं नियकलत्तेण सद्धिं ^३वियंमं
समायरेञ्जा, णो णं परकलत्तेणं, एसे य णं जइ पच्छा उग्गबंभयारी नो
भवेञ्जा तो णं अज्झवसायविसेसं तं तारिसमंगीकाउणं
अणंतसंसारियत्तणे भयणा, जओ णं जे केई अभिगयजीवाइपयत्थे
भव्वसत्ते आगमाणुसारेणं सुसाहूणं धम्मोवट्ठंभदानाई
दाणसीलतवभावणामइए चउव्विहे धम्मखंधे समणुट्ठेञ्जा से णं जइ
कहवि नियमवयभंगं न करेञ्जा तओ णं सायपरंपरणं
सुमाणुसत्तसुदेवत्ताए जाव णं अपरिवडियसम्मत्ते निसग्गेण वा
अभिगमेण वा जाव अट्टारससीलंगसहस्सधारी भवित्ताणं
निरुद्धासवदारे विहुयरयमले पावयं कम्मं खवेत्ताणं सिज्झिञ्जा । १४ ।

१. त्रुटिशब्दः अल्पकालवाची तस्यापि त्रिभागेनेति । २. वैथुनमिति ।

५. जे य णं से अहमे से णं सपरदारासत्तमाणसे अणुसमयं कूरज्झवसायज्झवसियचित्ते हिंसारंभपरिग्गहाइसु अभिरए भवेज्जा !

६. तहा णं जे य से अहमाहमे से णं महापावकम्मे सव्वाओ इत्थीओ वाया मणसा य कंमुणा तिविहं तिविहेणं अणुसमयमभिलसेज्जा तहा अद्यंतकूरज्झवसायअज्झवसिए हिंसारंभपरिग्गहासत्ते कालं गमेज्जा एएसिं दोण्हं पि णं गोयमा ! अणंतसंसारियत्तणं णेयं । १५।

भयवं ! जे णं से अहमे जेऽविं णं से अहमाहमे पुरिसे तेसिं च दोण्हं पि अणंतसंसारियत्तणं समक्खायं तो णं एगे अहमे एगे अहमाहमे एतेसिं दोण्हं पि पुरिसावत्थाणं के पइविसेसे ? गोयमा ! जे णं से अहमपुरिसे से णं जइवि उ सपरदारासत्तमाणसे कूरज्झवसायज्झवसिए हिंसारंभपरिग्गहासत्तचित्ते तहावि णं दिक्खियाहिं साहुणीहिं अन्नयरासुं (हिं) च सीलसरक्खणपोसहोववास-निरयाहिं दुक्खियाहिं गारत्थीहिं वा सद्धि आवडियपिल्लियाणंतिएवि समाणे णो य ^१वियंममायरेज्जा । जे य णं से अहमाहमे पुरिसे से णं नियजणणिपभिई जाव णं दिक्खियाहिं साहुणीहिं पि समं वियंमं समायरिज्जा, तेणं चेव से महप्पावकम्मे सव्वाहमाहमे समक्खाए, से णं गोयमा ! पइविसेसे, तहा य जे णं से अहमपुरिसे से णं अणंतेणं कालेणं बोहिं पावेज्जा, जे य उण से अहमाहमे महापावकारी दिक्खियाहिं पि साहुणीहिं पि समं ^१चियमंसं समायरिज्जा से णं अणंतहुत्तो वि अणंतसंसारमाहिं डिऊणं पि बोहिं नो पावेज्जा, एस णं गोयमा ! बितिए पइविसेसे । १६।

तथ णं जे से सव्वुत्तमे से णं छउमत्थवीयरगे णेये, जे णं तु से उत्तमुत्तमे से णं अणिट्ठिपत्तपभितीए जाव णं ^२उवसामगे वा खवए ताव णं निओयणीए^३ जे णं च से उत्तमे से णं अप्पमत्तसंजए णेए, एवमेएसिं निरुवणा कुज्जा । १७।

जे उण मिच्छदिट्ठी भविरुणं उग्गबंभयारी भवेज्जा
 हिसारंभपरिग्गहाईणं विरए से णं मिच्छदिट्ठी चेव णेण णो णं सम्मदिट्ठी ।
 तेसिं च णं अविइयजीवाइपयत्थसब्भावाणं गोयमा ! नो णं उत्तमत्ते
 अभिनंदणिज्जे पसंसणिज्जे वा भवइ जओ णं अणंतरभविए दिव्वोरालिए
 विसए पत्थेज्जा । अन्नं च कयादी ते दिव्वित्थियादओ ^१संविक्खिया
 तओ णं बंभव्वयाओ परिभंसिज्जा णियाणकडे वा हवेज्जा । १८।

जे य णं से विमज्झिमे से णं तारिसमज्झवसायमंगीकिच्चा णं
 विरयाविरए दट्ठव्वे । १९।

तहा णं जे से अहमे तहा जे णं से अहमाहमे तेसिं तु एगंतेणं
 जहा इत्थीसुं तहा णं नेए जाव णं कम्मट्ठिइयं समज्जेज्जा, णवरं पुरिसस्स
 णं ^२संविक्खणगेसुं वच्छरुहोवरितलपक्खएसुं लिंगे य अहिययरं
 रागमुप्पज्जे, एवं एते चेव छ पुरिसविभागे । २०।

कासिं च इत्थीणं गोयमा ! भव्वत्तं सम्पत्तदढत्तं च अंगीकाऊणं
 जाव णं सव्वुत्तमे पुरिसविभागे ताव णं चिंतणिज्जे, नो णं
 सव्वेसिमित्थीणं । २१।

एवं तु गोयमा ! जीए इत्थीए तिकालं पुरिससंजोगसंपत्ती ण
 संजाया अहा णं पुरिससंजोगसंपत्तीएवि साहीणाए जाव णं तेरसमे
 चोदसमे पन्नरसमे णं च समए णं पुरिसेणं सद्धिं ण संजुत्ता णो
^३वियंमं समायरियं से णं जहा धणकट्ठतणदारुसमिद्धे केइ गामेइ वा
 नगरेइ वा रत्तेइ वा संपलित्ते चंडानिलसंधुक्खिए पयलित्ताण २
 णिडज्झिय २ चिरेणं उवसमेज्जा एवं तु णं गोयमा ! से इत्थीकामग्गी
 संपलित्ता समाणी णिडज्झिय २ सभय-चउक्केणं उवसमेज्जा । एवं
 इगवीसइमे वावीसइमे जाव णं सत्ततीसइमे समए, जहा णं पदीवसिहा

वावन्ना पुणरवि सयं वा तहाविहेणं चुन्नजोगेणं वा पयलेज्जा एवं सा इत्थी पुरिसदंसणेण वा पुरिसालावगकरिसणेण^१ वा मंदेणं कंदप्पेणं कामग्गीए पुणरवि उप्पयलेज्जा । २२ ।

एत्थं च गोयमा ! जमित्थियं भएण वा लज्जाए वा कुलंकुसेण वा जाव णं धम्मसद्धाए वा तं वेयणं अहियासेज्जा नो णं वियंमं समायरिज्जा से णं धन्ना से णं पुन्ना से य णं वंदा से णं पुज्जा से णं दट्ठव्वा से णं सव्वलक्खणा से णं सव्वकल्लाणकारया से णं सव्वुत्तममंगलनिही से णं सुयदेवया से णं सरस्सती से णं ^२अंबहुंडी से णं अच्चुया से णं इंदाणी से णं परमपवित्तुत्तमा सिद्धी मुत्ती सासया सिवगइत्ति । २३ ।

जमित्थियं तं वेयणं नो अहियासेज्जा वियंमं वा समायरेज्जा से णं अधन्ना से णं अपुण्णा से णं अवंदा से णं अपुज्जा से णं अदट्ठव्वा से णं अलक्खणा से णं भग्गलक्खणा से णं सव्व-अमंगल-अकल्लाण- भायणा से णं भट्ठसीला से णं भट्ठायारा से णं परिभट्ठचारित्ता से णं निंदणीया से णं गरहणीया से णं खिसणिज्जा से णं कुच्छणिच्चा से णं पावा से णं पावपावा से णं महापावपावा से णं अपवित्तत्ति । एवं तु गोयमा ! चडुलत्ताए भीरुत्ताए कायरत्ताए लोलत्ताए उम्मायओ वा दप्पओ वा कंदप्पओ वा अणप्पवसओ वा आउट्टियाए वा जमित्थियं संजमाओ परिभस्सिय दूरद्धाणे वा गामे वा नगरे वा रायहाणीए वा वेसग्गहणं अच्छड्डिइय पुरिसेण सद्धिं वियंमं समायरेज्जा भुज्जो २ पुरिसं कामेज्ज वा रमेज्ज वा । अहा णं तमेव ^३दोयत्थियं कज्जमिइ ^४परिकप्पेत्ताणं ^५तमाइंचेज्जा, तं चेव आइंचमाणी ^६पस्सिया णं उम्मायओ वा दप्पओ वा कंदप्पओ वा अणप्पवसओ वा आउट्टियाए वा केइ आयरिएइ वा

१. 'सवणेण' पाठान्तरमिति । २. देवीविशेष इति । २अ. दौत्यस्त्रीकं कार्यमिति ।

३. परिकल्पयेति । ४. तामाक्रमेतेति । ५. दृष्ट्वेति ।

सामन्नसंजएइ वा रायसंसिएइ वा वायलद्धिजुत्तेइ वा तवोलद्धिजुत्तेइ वा जोगचुन्नलद्धिजुत्तेइ वा विन्नाणलद्धिजुत्तेइ वा जुगप्पहाणेइ वा पवयणप्पभावगेइ वा तमित्थियं अन्नं वा रामेज्ज वा कामेज्ज वा अभिलसेज्ज वा भुंजेज्ज वा परिभुंजेज्ज वा जाव णं वियंमं वा समायरेज्जा से णं दुरंतपंतलक्खणे अहन्ने अवंदे अदट्ठव्वे अपवित्ते अपसत्थे अकल्लाणे अमंगल्ले निंदणिज्जे गरहणिज्जे खिसणिज्जे कुच्छणिज्जे से णं पावे से णं पावपावे से णं महापावे से णं महापावपावे से णं भट्ठसीले से णं भट्ठायारे से णं निब्भट्ठचारित्ते महापावकम्मकारी, जया णं पायच्छित्तमब्भुट्ठिज्जा तओ णं मंदरतुंगेणं वड्ढेणं सरीरेण उत्तमेणं संघयणेणं उत्तमेणं पोरुसेणं उत्तमेणं सत्तेणं उत्तमेणं ^१तत्तपरिन्नत्तेणं उत्तमेणं वीरियसामत्थेणं उत्तमेणं संवेगेणं उत्तमाए धम्मसद्धाए उत्तमेणं आउक्खएणं तं पायच्छित्तमणुचरेज्जा । तेणं तु गोयमा ! साहूणं महाणुभागाणं अट्टारस परिहारट्ठाणाइं णव बंभचेरगुत्तीओ वागरिज्जंति । २४।

से भयवं ! किं पच्छित्तेणं सुज्झेज्जा ? गोयमा ! अत्थेगे जे णं सुज्झेज्जा, अत्थेगे जे णं नो सुज्झेज्जा । से भयवं ! के णं अट्ठेणं एवं वुच्चइ- जहा णं गोयमा ! अत्थेगे जे णं सुज्झेज्जा अत्थेगे जे णं णो सुज्झेज्जा गोयमा ! अत्थेगे जे णं नियडीपहाणे सट्ठसीले वंकसमायारे से णं ससल्ले आलोइत्ताणं ससल्ले चेव पायच्छित्तमणुचरेज्जा, से णं अविमुद्धसकलुसासए णो सुज्झेज्जा, अत्थेगे जे णं ^२ उज्जुपद्धरसरलसहावे जहावत्तं णीसल्लं नीसकं सुपरिफुडं आलोइत्ताणं जहोवड्ढं चेव पायच्छित्तमणुचेट्ठिज्जा से णं निम्मलनिक्कलुस विमुद्धासए विमुज्झेज्जा, एतेणं अट्ठेणं एवं वुच्चइ जहा णं गोयमा ! अत्थेगे जे णं सुज्झेज्जा अत्थेगे जे णं नो सुज्झेज्जा । २५।

तहा णं गोयमा ! इत्थी य णाम पुरिसाणमहम्माणं सव्वपावकम्माणं ^३वसुहारा, तमरयपंकखाणी, सोग्गइमग्गस्स णं

१, 'तत्तपरिणीणेणं' पाठान्तरमिति । २. ऋजुप्राध्वरसरलस्वभाव इति । ३. भूमिरिति ।

अगला, नरयावयारस्स णं समोयरणवत्तणी, अभुमयं विसकंदलिं, अणगियं चडुलिं, अभोयणं विसूइयं, अणामियं वाहिं, अवेयणं मुच्छं, अणोवसगिं मारिं, अणियलिं गुत्तिं, अरज्जुए पासे, अहेउए मच्चु, तहा य णं गोयमा ! इत्थिसंभोगे पुरिसाणं मणसावि णं अचिंतणिज्जे अणज्झवसणिज्जे अपत्थणिज्जे ^१अणीहणिज्जे अवियप्पणिज्जे असंकप्पणिज्जे अणभिलसणिज्जे असंभरणिज्जे तिविहंतिविहेणंति, जओ णं इत्थीणं नाम पुरिसस्स णं गोयमा ! सव्वप्पगारेसुं पि दुस्साहियं विज्जंपिव दोसुप्पायणं ^२संरंभसंजणगंपिव अपुट्ठधम्मं, खलियचारितं पिव अणालोइयं अणिंदियं अगरहियं अकयपायच्छित्तज्झवसायं पडुच्च अणंतसंसारपरियट्ठणं दुक्खसंदोहं कयपायश्चित्तविसोहिं पिव पुणो असंजमायरणं महंतपावकम्मसंचयं, हिंसंपिव सयलतेलोक्कनिंदियं अदिट्ठपरलोगपच्चवायं, घोरंधयारणरयवासो इव णिरंतराणेग-दुक्खनिहित्ति ।

अंगपच्चंगसंठाणं, चारुल्लवियपेहियं ।

इत्थीणं तं न निज्झाए, कामरागविवट्ठणं ॥१५६॥

तहा य इत्थीओ नाम गोयमा ! पलयकालरयणीमिव सव्वकालं तमोवलित्ताओ भवंति, विज्जु इव खणदिट्ठनट्ठपेम्माओ भवंति, सरणागयघायगो इव एकजंमियाओ, ^३तक्खणपसूयजीवंत-मुद्ध-नियसिसु-भक्खीओ इव महापावकम्माओ भवंति, खरपवणुच्चालियलवणोदहीवेला इव बहुविहविकप्पकल्लोलमालाहिं खणंपि एगत्थ असंठियमाणसाओ भवंति, सयंभुरमणोदहीमिव दुरवगाहकइतवाओ भवंति, पवणो इव चडुलसहावाओ भवंति, अग्गी इव सव्वभक्खाओ, वाऊ इव सव्वफरिसाओ, तक्करो इव

१. असृहणीय इति । २. 'सारंभसंजणगंपिव पुणो असंजमायरणं अपुट्ठ.' पाठान्तरमिति ।
३. सर्पिण्य इवेति ।

परत्थलोलाओ, साणो इव दाणमेत्तमिस्तीओ, मच्छो इव
 हव्वपरिचत्तनेहाओ, एवमाइअणेगदोसलक्खपडिपुण्णसव्वंगो-
 वंगसम्भितरबाहिराणं महापावकम्माणं अविणयविसमंजरीणं
^१तत्थुप्पन्नअणत्थ-^२गच्छपसूईणं इत्थीणं अणवरयनिज्झरंत-
 दुग्गंधासुईचिलीणं^३कुच्छणिज्जनिंदणिज्जखिसणिज्जसव्वंगोवंगाणं सम्भंत-
 रबाहिराणं परमत्थओ महासत्ताणं निविन्नकामभोगाणं गोयमा !
 सव्वुत्तमुत्तमपुरिसाणं के नाम सयन्ने सुविन्नायधम्माहम्मे खणमवि
 अभिलासं गच्छिज्जा ? ॥२६॥

जासिं च णं अभिलसिउकामे पुरिसे तज्जोणिसंमुच्छिमपंचेंदियाणं
 एक्कपसंगेणं चेव णवण्हं सयसहस्साणं णियमा उ उद्दवगे भवेज्जा, ते य
 अच्चंतसुहुमत्ताउ मंसचक्खुणो ण पासिया ॥२७॥

एएणं अट्ठेणं एवं वुच्चइ जहा णं गोयमा ! णो इत्थीयं आलवेज्जा
 नो संलवेज्जा नो उल्लवेज्जा नो इत्थीणं अंगोवंगाइं सणिरिक्खेज्जा जाव णं
 नो इत्थीए सद्धि एगे बंभयारी अब्बाणं पडिवज्जेज्जा ॥२८॥

से भयवं ! किमित्थीए संलावुल्लावंगोवंगनिरिक्खणं वज्जेज्जा उयाहु
 मेहुणं ? गोयमा ! उभयमवि । से भयवं ! किमित्थिसंजोगसमायरणे
 मेहुणे परिवज्जिया उयाहु णं बहुविहेसुं सचित्ताचित्तवत्थुविसएसु
 मेहुणपरिणामे तिविहंतिविहेणं मणोवइकायजोगेणं सव्वहा सव्वकालं
 जावज्जीवाएत्ति, ? गोयमा ! सव्वं सव्वहा विवज्जिज्जा ॥२९॥

से भयवं ! जे णं केई साहू वा साहूणी वा मेहुणमासेविज्जा से णं
 वंदेज्जा ? गोयमा ! जे णं केई साहू वा साहूणी वा मेहुणं सयमेव
 अप्पणा सेवेज्ज वा परेहिं उवइसेत्तुं सेवाविज्जा वा सेविज्जमाणं
 समणुजाणिज्जा ज्ञा दिव्वं वा माणुसं वा तिरिक्खजोणियं वा जाव णं

१. यत्रोत्पन्नस्तत्रानर्थसमुदायप्रसूतिर्याभ्यस्तास्तथातासां प्राकृतत्वात् पदव्यत्यय इति ।

२. 'गत्थ.' पाठान्तरं । ३. मलमूत्रमिति ।

करक्कम्माइं सचित्ताचित्तवत्थुविसयं वा विविहज्झवसाएणं
कारिमाकारिमोवगरणेणं मणसा वा वयसा वा काएण वा से णं समणे
वा समणी वा दुरंतपंतलक्खणे अदट्ठव्वे अमग्गसमायारे महापावकम्मे
णो णं वंदिज्जा णो णं वंदाविज्जा नो णं वंदिज्जमाणं वा समणुजाणेज्जा
तिविहंतिविहेणं जाव णं विसोहिकालंति । से भयवं ! जे वंदेज्जा से किं
लभेज्जा ? गोयमा ! जे तं वंदेज्जा से अट्टारसण्हं सीलंगसहस्सधारीणं
महाणुभागाणं तित्थयरादीणं महती आसायणं कुज्जा, जे णं
तित्थयरादीणं आसायणं कुज्जा से णं अज्झावसायं पडुच्चा जाव णं
अणंतसंसारियत्तणं लभेज्जा ।३०।

१विप्पहिच्चित्थियं सम्मं, सब्बहा मेहुणंपि य ।

अत्थेगे गोयमा ! पाणी, जे णो चयइ परिग्गहं ॥१५७॥

जावइयं गोयमा ! तस्स, सचित्ताचित्तोभयत्तणं ।

पभूयं वाऽणु जीवस्स, भवेज्जा उ परिग्गहं ॥१५८॥

तावइएणं तु सो पाणी, ससंगो मोक्खसाहणं ।

णाणाइतिगं ण आराहे, तम्हा वज्जे परिग्गहं ॥१५९॥

अत्थेगे गोयमा ! पाणी, जे पयहिन्ता परिग्गहं ।

आरंभं नो विवज्जेज्जा, २जंचीयं भवपरंपरा ॥१६०॥

आरंभे पत्थियस्सेगवियलजीवस्स वइयरे ।

संघट्टणाइयं कम्मं, जं बद्धं गोयमा ! मुणे ३ ॥१६१॥

एगे बेइंदिए जीवे एगं समयं अणिच्छमाणे बलाभिओगेणं हत्थेण
वा पाएण वा अन्नयरेण वा सलागाइउवगरणजाएणं जे केई पाणी
अगाढं संघट्टिज्ज वा संघट्टावेज्ज वा संघट्टिज्जमाणं वा अगाढं परेहिं

समणुजाणेज्जा से णं गोयमा ! जया तं कम्मं उदयं गच्छेज्जा तया णं
महया केसेणं छम्मासेणं वेदिज्जा, गाढं दुवालसहिं संवच्छरेहिं, तमेव
अगाढं परियावेज्जा वाससहस्सेणं, गाढं दसहिं वासलक्खेणं, किलामिज्जा
तमेव अगाढं वाससहस्सेहिं गाढं दसहिं वासलक्खेहिं, अहा णं उद्वेज्जा
तओ वासकोडीए एवं तिचउपंचिंदिएसु दट्ठव्वं ।३१।

सुहुमस्स पुढविजीवस्स, जत्थेगस्स विराहणं ।

अप्पारंभं तयं बेति, गोयमा सव्वकेवली ॥१६२॥

सुहुमस्स पुढविजीवस्स, वावत्ती जत्थ संभवे ।

महारंभं तयं बेति, गोयमा ! सव्वकेवली ॥१६३॥

एवं तु संमिलंतेहिं, ^१कम्मक्करडेहिं गोयमा !

से ^२सोढ्ढभे अणंतेहिं जे आरंभे पवत्तए ॥१६४॥

आरंभे वट्ठमाणस्स, बद्धपुट्टनिकाइयं ।

कम्मं बद्धं भवे जम्हा, तम्हाऽऽरंभं विवज्जए ॥१६५॥

पुढवाइअजीवकायंता, सव्वभावेहिं सव्वहा ।

आरंभा जे नियट्ठेज्जा, से अइरा जम्मजरामरणसव्वदारिदुक्खाणं
विमुच्चइ ॥१६६॥ ति

अत्थेगे गोयमा ! पाणी ! जे एयं परिबुज्झिउं ।

एगंतसुहतल्लिच्छे, ण लभे सम्मग्गवत्तणिं ॥१६७॥

जीवे संमग्गमोइन्ने, घोरवीरतवं चरे ।

अचयंतो इमे पंच, कुज्जा सव्वं निरत्थयं ॥१६८॥

कुसीलोसन्नपासथे, सच्छंदे सबले तथा ।
 दिट्ठीएवि इमे पंच, गोयमा ! न निरिक्खए ॥१६९॥
 सव्वन्नुदेसियं मग्गं, सव्वदुक्खप्पणासगं ।
 सायागारवगरुए, अन्नहा भणिउमुज्झए ॥१७०॥
 पयमक्खरंपि जो एगं, सव्वन्नूहिं पवेदियं ।
 न रोएज्जऽन्नहा भासे, मिच्छदिट्ठी स निच्छियं ॥१७१॥
 एवं नाऊण संसगिं, दरिसणालावसंथवं ।
 संवासं च हियाकंखी, सव्वोवाएहिं वज्जए ॥१७२॥
 भयवं निब्भट्ठसीलाणं, दरिसणं तंपि निच्छसि ।
 पच्छित्तं वागरेसी य, इति उभयं न जुज्जए ? ॥१७३॥
 गोयमा ! भट्ठसीलाणं, दुत्तरे संसारसागरे ।
 धुवं तमणुकंपित्ता, पायच्छित्ते पदरिसिए ॥१७४॥
 भयवं ! किं पायच्छित्तेण, छिंदिज्जा नारगाउयं ? ।
 अणुचरिऊण पच्छित्तं, बहवे दुग्गइं गए ॥१७५॥
 गोयमा ! जे समज्जेज्जा, अणंतसंसारियत्तणं ।
 पच्छित्तेणं धुवं तंपि, छिंदे किं पुणो नरयाउयं ? ॥१७६॥
 पायच्छित्तस्स भुवणेऽत्थ, नासज्झं किंचि विज्जए ।
 बोहिलाभं पमोत्तूणं, हारियं तं न लब्भए ॥१७७॥
 तं चाउकायपरिभोगे, तेउकायस्स निच्छियं ।
 अबोहिलाभियं कम्मं, वज्जए मेहुणेण य ॥१७८॥

मेहुणं आउकायं च, तेउकायं तहेव य ।

तम्हा तओवि जत्तेणं, वज्जेज्जा संजइंदिए ॥१७९॥

से भयवं ! गारत्थीणं, सव्वमेवं पवत्तइ ।

तो जइ अवोही भवेज्ज एसु तओ सिक्खागुणाणुव्वयधरणं तु
निष्फलं ॥१८०॥

गोयमा ! दुविहे पहे अक्खाए, सुसमणे अ सुसावए ।

महव्वयधरे पढमे, बीएऽणुव्वयधारए ॥१८१॥

तिविहं तिविहेणं समणेहिं, सव्वसावज्जमुज्झियं ।

जावज्जीवं वयं घोरं, पडिवज्झियं मोक्खसाहणं ॥१८२॥

दुविहेगविहं व तिविहं वा, थूलं सावज्जमुज्झियं ।

उद्दिट्ठकालियं तु वयं देसेण न ^१संवसे गारत्थीहिं ॥१८३॥

तहेव तिविहं तिविहेणं, इच्छारंभपरिग्गहं ।

वोसिरंति अणगारे, जिणलिंगं तु धरंति ते ॥१८४॥

इयरे उ णं अणुज्झित्ता, इच्छारंभपरिग्गहं ।

सदाराभिरए स गिही, जिणलिंगं तू पूयए ण धारयंति ॥१८५॥

तो गोयमेगदेसस्स, पडिक्कंते गारत्थे भवे ।

तं वयमणुपालयंताणं, नो सिं आसायणं भवे ॥१८६॥

जे पुण सव्वस्स पडिक्कंते धारे पंचमहव्वए ।

जिणलिंगं तु समुव्वहइ, तं तिगं नो विवज्जए ॥१८७॥

तो महयासायणं तेसिं, इत्थिऽग्गीआउसेवणे ।

अणंतनाणी जिणे जम्हा, एयं मणसावि णऽभिलसे ॥१८८॥

ता गोयमा ! सहियएणं, एवं वीमंसिउं दढं ॥
 विभावय जइ बंधिज्जा, गिहिणो ^१उ अबोहिलाभियं ॥१८९॥
 संजए पुण निबंधिज्जा, एयाहिं हेऊहिं य ।
 आणाइक्कम वयभंगा, तह उम्मग्गपवत्तणा ॥१९०॥
 मेहुणं चाउकायं च तेउकायं तहेव य ।
 हवइ तम्हा तितयंति, जत्तेणं वज्जेज्जा सव्वहा मुणी ॥१९१॥
 जे चरंते व पच्छितं, मणेणं संकिलिस्सए ।
 जह भणियं वाऽह णाणुट्ठे निरयं सो तेण वच्चई ॥१९२॥
 भयवं ! मंदसद्धेहिं, पायच्छित्तं न कीरई ।
 अह काहंति किलिड्डमणे ताऽणुकंपं विरुज्झए ? ॥१९३॥
 नारायादीहिं संगामे, गोयमा सल्लिए नरे ।
 सल्लुद्धरणे भवे दुक्खं नाणुकंपा विरुज्झए ॥१९४॥
 एवं संसारसंगामे, अंगोवंगंत-बाहिरं ।
 भावसल्लुद्धरित्ताणं, अणुकंपा अणोवमा ॥१९५॥
 भयवं ! सल्लंमि देहत्ये, दुक्खिए होति पाणिणो ।
 जं समयं निप्पिडे सल्लं, तक्खणा सो सुही भवे ॥१९६॥
 एवं तित्थयरे सिद्धे, साहू धम्मं विवंचिउं ।
 जं अकज्जं कयं तेणं, निसिरिएणं सुही भवे ॥१९७॥
 पायच्छित्तेण को तत्थ, कारिएणं गुणो भवे ?
 जेणं थेवस्स वी देसि, दुक्करं दुरणुच्चरं ॥१९८॥
 उद्धरिउं गोयमा ! सल्लं, वणभंगे जाव णो कये ।
 वणपिंडीपट्टबंधं च, ताव णो किं परुज्झए ? ॥१९९॥

भावसल्लस्स वणपिंडीपट्टभूओ इमो भवे ।
 पच्छित्तो दुक्खरोहंपि, पाववणं खिप्पं परोहए ॥२००॥
 भयवं ! किमणुविज्जंते, सुव्वंते जाणिए इ वा ?
 सोहेइ सव्वपावाइं, पच्छित्ते सव्वन्नुदेसिए ? ॥२०१॥
^१सुसाऊ सीयले उदगे, गोयमा ! जाव णो पिए ।
 णरे गिम्हे वियाणंते, ताव तण्हा ण उवसमे ॥२०२॥
 एवं जाणित्तु पच्छित्तं, असढभावे ण जा चरे ।
 ताव तस्स तयं पावं, वट्ठए उ ण हायए ॥२०३॥
 भयवं ! किं तं वट्ठेज्जा, जं पमादेण कथई ।
 आगयं ? पुणो आउत्तस्स, तेत्तियं किं न ठायए ? ॥२०४॥
 गोयमा ! जह पमाएणं, ऽनिच्छंतो अहिडंकिए ।
 आउत्तस्स जहा पच्छा विसं, वट्ठे तह चेव पावणं ॥२०५॥
 भयवं ! जे बिदिय-परमत्थे, सव्वपच्छित्तजाणगे ।
 ते किं परेसिं साहंति, नियमकज्जं जहट्ठियं ? ॥२०६॥
 गोयमा ! मंततंतेहिं, दियहे जो कोडिमुट्ठवे ।
 सेवि दट्ठे विणिच्चिट्ठे, धारियल्लेहिं भल्लिए ॥२०७॥
 एवं सीलुज्जले साहू, पच्छित्तं तु दढव्वए ।
^२अन्नेसिं निउणलद्धट्ठं सोहे, ससीसं व ण्हावीओ^३ जह त्ति ॥२०८॥
 महानिसीयसुयक्खंधस्सकम्मविवागवागरणं नाम बीयमज्झयणं ॥२॥
 एएसिं तु दोण्हं अज्झयणाणं विहीपुव्वगेणं सव्वसामन्नं वायणंति ।



अथ तइयं अज्झयणं

‘अओ परं चउक्कन्नं, सुमहत्थाइसयं परं ।
आणाए सद्देहेयव्वं, सुत्तत्थं जं जहड्डियं ॥१॥
जे उग्घाडं परुवेज्जा, देज्जा ^१वऽसुजोगस्स उ ।
वाएज्ज अबंभचारी वा, अविहीए अणुद्धिद्विपि वा ॥२॥
उम्मायं व लभेज्जा रोगायकं च पाउणे दीहं ।
भंसेज्ज संजमाओ स मरणंते वा णयावि आराहे ॥३॥
एत्थं तु जं विही पुव्वं, पढमज्झयणे परुवियं ।
तीए चेव विही एवं, वाएज्जा सेसाणिमं विहिं ॥४॥
वीयज्झयणेंऽबिले पंच, नवुद्देसा तहिं भवे ।
तइए सोलस उद्देसा, अट्ठ तत्थेवं अंबिले ॥५॥
जं तइए तं चउत्थेऽवि, पंचमवि छायंबिले ।
छट्ठे दो सत्तमे तिन्नि, अट्ठमे आयंबिले दस ॥६॥
अणिक्खित्त-भत्तपाणेण, संघट्टेणं इमं महा-
निसीहवरं सुयक्खंधं, वोढव्वं च आउत्तगपाणगेणंति ॥७॥
गंभीरस्स महामइणो उज्जुयस्स तवोगुणे ।
सुपरिक्खियस्स कालेणं, ^२सयमज्झेगस्स वायणं ॥८॥
खेत्तसोहीए निच्चं तु, उवउत्तो भविया जया ।
तया वाएज्ज एयं तु अन्नहा उ छलिज्जइ ॥९॥

१. ‘व अजोगस्स’ पाठान्तरमिति । २. शतमध्ये एकस्येति ।

संगोवंगसुयस्सेयं, णीसंदं तत्तं परं ।

महानिहिच्च अविहिण्णं, गिण्हंतेणं छलिज्जण्णं ॥१०॥

अहवा सव्वाइं सेयाणं, बहुविग्घाइं भवन्ति उ ।

सेयाणं परं सेयं, सुयक्खंधं निव्विग्घं

जे धन्ने पुन्ने महाणुभागे से वाइया ॥११॥

से भयवं ! केरिसं तेसिं कुसीलादीण लक्खणं ?

सम्मं विन्नाय जेणं तु, सव्वहा ते विवज्जण्णं ॥१२॥

गोयमा ! सामन्नओ तेसिं, लक्खणमेयं निबोधय ।

जं नच्चा तेसिं संसग्गी, सव्वहा परिवज्जण्णं ॥१३॥

कुसीले ताव ^१दुस्सयहा, ओसन्ने दुविहे मुणे ।

पसत्थ-नाणमादीणं, सबले बावीसतीविहे ॥१४॥

तत्थ जे ते उ दुसयहाउ, वोच्छं ते ताव गोयमा !

कुसीले जेसिं संसग्गीदोसेणं भस्सई मुणी खणे^२ ॥१५॥

तत्थ कुसीले ताव समासओ दुविहे णेए -

परंपरकुसीले यऽपरंपरकुसीले य,

तत्थ णं जे ते परंपरकुसीले ते दुविहे णेए -

सत्तट्ठगुरुपरंपरकुसीले एगदुतिगुरुपरंपरकुसीले य ।१।

जेवि य ते अपरंपरकुसीले ते वि उ दुविहे णेए आगमओ
णोआगमओ य ।२।

तथ आगमओ गुरुपरंपरिएणं आवलियाए ण केई कुसीले आसी उ ते चेव कुसीले भवन्ति ।३।

नोआगमओ अणेग विहा, तं जहा - णाणकुसीले दंसण-कुसीले चारित्तकुसीले तवकुसीले वीरिअकुसीले ।४।

तथं णं जे से नाणकुसीले से णं तिविहे णेए - पसत्थापसत्थ-नाणकुसीले अपसत्थ-नाण-कुसीले सुपसत्थनाणकुसीले ।५।

तथ जे से पसत्थापसत्थनाणकुसीले से दुविहे णेए आगमओ नो-आगमणो य । तथ आगमओ विहंगनाणीपन्नवियपसत्थाऽ-पसत्थपयत्थजाल-अञ्जयणऽज्झावणकुसीले, नो आगमओ अणेगहा पसत्थापसत्थ-परपासंडसत्थजालाहिज्जणऽज्झावण-^१वायणाणुपेहण-कुसीले ।६।

तथ जे ते अपसत्थनाणकुसीले ते एगूणतीसइविहे दट्ठव्वे, तं जहा -

सावज्जवायविज्जामंततंत-पउंजण-कुसीले ।१। विज्जामंत-तंतहिज्जणकुसीले ।२। वत्थुविज्जापउंजणाहिज्जणकुसीले गहरिक्खचार-जोइससत्थपउंजणाहिज्जणकुसीले ।३। निमित्तलक्खणपउंजणाहिज्जणकुसीले ।४। सउणलक्खणपउंजणाहिज्जण-कुसीले ।५। हत्थिसिक्खापउंजणा-हिज्जण-कुसीले ।६। धणुव्वेयपउंजणाहिज्जणकुसीले ।७। गंधव्वेय-पउंजणा-हिज्जणकुसीले ।८। पुरिसित्थीलक्खण- पउंजणज्झावण कुसीले ।९। कामसत्थपउंजणाहिज्जण-कुसीले ।१०।

कुहुगिंदजालसत्थ-पउंजणाहिज्जण-कुसीले ।११। आलेक्खविज्जा-हिज्जण-कुसीले ।१२। लेप्पकम्म-विज्जाहिज्जण-कुसीले ।१३।

१. 'वायणापेहणकुं' पाठान्तरमिति ।

वमण-विरेयण-बहुवेल्लिंदजालसमुद्धरणकढण-काढणवणस्सइवल्लि-
मोडण-तच्छणाइ-बहुदोस-विज्जगसत्थपउंजणा-हिज्जणज्झावण-कुसीले
१७४। एवं जाणवंजणा १७५। जोगचुन्न १७६। ^१वन्नधाउव्वाय १७७।
रायदंडणीई १७८। सत्थऽसणिपव्व १७९। अग्घकंड १८०। रयणपरिक्खा
१२१। रसवेहसत्थ १२२। अमच्चसिक्खा १२३। गूढमंततंत १२४। कालदेस
१२५। संधिविगगहोवएस १२६। सत्थ १२७। मम्म १२८। जाणववहार १२९।
निरुवणत्थसत्थ- पउंजणाहिज्जण- अपसत्थनाणकुसीले ।

एवमेएसिं चेव पावसुयाणं वायणापेहणापरावत्तणा-अणुसंधणा-
सवणायन्नणअपसत्थ- नाणकुसीले ।७।

तत्थ जे य ते सुपसत्थनाण-कुसीले तेवि य दुविहे णेए -
आगमओ णोआगमओ य, तत्थ आगमओ सुपसत्थं पंचप्पयारं णाणं
आसायंते सुपसत्थ-नाणधरे वा आसायंते सुपसत्थनाणकुसीले ।८।

नो आगमओ य सुपसत्थनाणकुसीले अट्ठहा णेए, तं जहा-अकालेणं
सुपसत्थनाणहिज्जज्झावणकुसीले । अविणएणं सुपसत्थनाणाहिज्जण-
ज्झावणाकुसीले । अबहुमाणेणं सुपसत्थनाणाहिज्जणकुसीले ।
अणोवहाणेणं सुपसत्थ- नाणाहिज्जणज्झावण-कुसीले । जस्स य सयासे
सुपसत्थं सुत्तत्थोभयमहीयं तं निण्हवणसुपसत्थनाणकुसीले ।
सरवंजणहीणक्खरियच्चक्खरियहिज्जणज्झावण-सुपसत्थनाणकुसीले ।
विवरीयसुत्तत्थोभयाहिज्जणज्झावणसुपसत्थनाणकुसीले । संदिद्ध-
सुत्तत्थोभयाहिज्जणज्झावण-सुपसत्थनाण-कुसीले । तत्थ एएसिं अट्ठहंपि
पयाणं गोयमा ! जे केइ अणोवहाणेणं सुपसत्थं णाणमहीयंति अज्झावयंति
वा अहीयंते इ वा अज्झावयंते इ वा समणुजाणंति ते णं महापावकम्मे
महतीं सुपसत्थनाणस्साऽऽसायणं पकुव्वंति ।९।

से भयवं ! जइ एवं ता किं पंचमंगलस्स णं उवहाणं कायव्वं ?

१. धातूत्यादो धातुवादो वेति ।

गोयमा ! पढमं नाणं तओ दया, दयाए य सव्वजगजीवपाण-
भूयसत्ताणं अत्तसम-दरिसित्तं, सव्वजगजीवपाणभूयसत्ताणं
अत्तसमदंसणाओ य तेसिं चेव संघट्ठणपरियावण-किला-
वणोद्दावणाइदुक्खुप्पायण-भय-विवज्जणं । तओ अणासवो, अणासवाओ
य संवुडासवदारत्तं, संवुडासवदारत्तेणं च ^१दमो पसमो, तओ य
समसत्तुमित्तपक्खया, समसत्तुमित्तपक्खयाए य अरागदोसत्तं, तओ य
अकोहया अमाणया अमायया अलोभया, अकोहमाणमायालोभयाए य
अकसायत्तं, तओ य सम्मत्तं, सम्मत्ताओ य जीवाइ पयत्थपरिन्नाणं,
तओ सव्वत्थ अपडिबद्धत्तं, सव्वत्थाऽपडिबद्धत्तेण य
अन्नाणमोहमिच्छत्तकखयं, तओ विवेगो, विवेगाओ य
हेयउवाएवत्थुवियालणेगंतबद्ध-लक्खत्तं, तओ य अहियपरिच्चाओ
हियायरणे य अच्चंतमब्भुज्जमो, तओ य परमपवित्तुत्तमखंतादिदसविह-
अहिंसालक्खणधम्माणुद्वाणिक्ककरणकारवणासत्तचित्तया, तओ य खंता-
दिदसविहअहिंसा-लक्खणधम्माणुद्वाणिक्ककरणकारावणासत्तचित्तयाए य
सव्वुत्तमा खंती सव्वुत्तमं मिउत्तं सव्वुत्तमं अज्जवभावत्तं सव्वुत्तमं
सबज्झब्भंतरसव्वसंगपरिच्चागं सव्वुत्तमं सबज्झब्भंतर दुवालसविहं
अच्चंत घोरवीरुगकट्टतवचरणाणुद्वाणाभिरमणं सव्वुत्तमं सत्तरसविहक-
सिणसंजमाणुद्वाणपरिपालणेक्कबद्धलक्खत्तं सव्वुत्तमं सच्चुगिरणं
छक्कायहियं अणिगूहियबलवीरियपुरिसक्कारपरक्कमपरितोलणं च सव्वुत्तम-
सज्झायज्झाण-सलिलेण पावकम्ममललेवपक्खालणंति सव्वुत्तमुत्तमं
आकिंचणं सव्वुत्तमुत्तमं परमपवित्तुत्तम-सव्वभाव-भावंतरेहिं णं
सुविसुद्धसव्वदोसविप्पमुक्कणवगुत्तीसणाह-अट्टारसपरिहारद्वाण-परिवेढिय-
सुदुद्धर-घोरबंभवय-धारणंति, १९०। तओ एएसिं चेव
सव्वुत्तमखंतीमद्ववअज्जवमुत्तीतवसंजमसच्चसोय-आकिंचणसुदुद्धरबंभ-
वयधारणसमुद्वाणेणं च सव्वसमारंभविवज्जणं १९१। तओ

य-पुढवि-दगागणि-वाउ-वणफ्फई-बि-ति-चउ-पंचिंदियाणं तहेव
अजीवकायसंरंभसमारंभारंभाणं च मणोवइकायतिणं तिविहं तिविहेणं
सोइंदियादिसंवरण-आहारादिसन्नाविप्पजढत्ताए वोसिरणं, १९२।

तओ य अट्टारससीलंगसहस्स धारित्तं अमलिय-
अट्टारससीलंगसहस्स-धारणेणं च अखलिय-अखंडिय-
अमलिय-अविराहियसुट्ठुगुग्गयर-विचित्ताभिग्गहनिव्वाहणं १९३।

तओ य सुरमणुयतिरिच्छोईरियघोर-परिसहोवसग्गाहियासणं
१संमकरणेणं, तओ य अहोरायाइपडिमासुं महापयत्तं १९४।

तओ निप्पडिकम्मसरीरया निप्पडिकम्मसरीरगत्ताए य सुक्कज्झाणे
निष्पकंपत्तं, तओ य अणाइभवपरंपरसंचिय-असेसकम्मट्टरासिखयं
अणंतनान- दंसणधारित्तं च चउगइभवचारगाओ निप्फेडं
सव्वदुक्खविमोक्खं मोक्खगमणं च, १९५।

तथ अदिट्ठजम्म-जरामरणाणिट्ठ-संपओगिट्ठ-विओयसंतावुव्वेग-
अयसऽभक्खाणमहावाहिवेयणा-रोगसोग-दारिद्र-दुक्ख-भय- वेमणस्सत्तं
१९६। तओ अ एगंतियं अच्चंतियं सिवमयलमक्खयं धुवं परमसासयं
निरंतरं सव्वुत्तमसोक्खंति, ता सव्वमेवेयं नाणाओ पवत्तेज्जा । ता
गोयमा ! एगंतिय-अच्चंतिय-परमसासतधुवनिरंतर- सव्वुत्तम-
सोक्खकंखुणा पढमयरमेव तावायरेणं सामाइयमाइयं
लोगविंदुसारपज्जवसाणं दुवालसंगं सुयनाणं कालंबिलादिजहुत्तविहिणो-
वहाणेणं हिंसादियं च तिविहंतिविहेण पडिक्कंतेण य
सरवंजणमत्ताविंदुपयक्खराणूणं पयच्छेदघोसबद्धयाणुपुव्विपुव्वा-
णुपुव्विअणाणुपुव्वीए सुविसुद्धं अचोरिक्काय पण^१एगत्तेणेणं सुविन्नेयं, तं
च गोयमा ! अणिहणऽणोरपार^२सुविच्छिन्नचरमोयहिं पिव य

१. सम्यक् समतया वेति । २. इन्द्रियपञ्चकैकत्वेनेति । ३. क्वचित् 'सुवित्थिण्ण' इति ।

सुदुरवगाहं सयलसोक्खपरमहेउभूयं च, तस्स य सयलसोक्खहेउभूयाओ न इट्ठदेवयानमोक्कारविरहिए केई पारं गच्छेज्जा, इट्ठदेवयाणं च नमोक्कारं पंचमंगलमेव गोयमा !, णो णमन्नंति, ता णियमओ पंचमंगलस्सेव पढमं ताव विणओवहाणं कायव्वंति । ११ ।

से भयवं ! कयराए विहीए पंचमंगलस्स णं विणओवहाणं कायव्वं ? गोयमा ! इमाए विहीए पंचमंगलस्स णं विणओवहाणं कायव्वं, तं जहा-सुपसत्थे चेव सोहणे तिहिकरणमुहुत्त-नक्खत्तजोगलगससीबले विप्पमुक्कजायाइमया-संकेण संजायसद्धासंवेंग-सुतिव्वतरमहंतुल्लसंत-सुहज्झवसायाणुगयभत्तीबहुमाणपुव्वं णिण्णियाणं दुवालसभत्तट्टिएणं चेइयालए जंतुविरहिओगासे भत्तिभरनिब्भ-रुद्धुसिय-ससीसरोमावलीपप्फुल्लवयणसयवत्तपसत्तसोमथिरदिट्ठीणवणव-संवेंगसमुच्छलंत-संजाय-बहलघणनिरंतर-अंचितपरमसुहपरिणामविसे-सुल्लासियसजीववीरियाणुसमय-विवट्ठंतपमोयसुविसुद्धसुनिम्मल-विमल-थिरदढयरंतकरणेणं खित्तिणिहियजाणुणामिउत्तमंगकरकमलमउल-सोहंजलि-पुडेणं सिरिउसभाइपवरवरधम्मतिथयरपडिमाबिंबविणिवे-सियणयण-माणसेगगगतगयज्झवसाएणं समयण्णुदढचरित्ता-दिगुणसंपओववेय-गुरु-सदत्थाणुट्ठाणकरणेक्कबद्धलक्खत्तऽवाहिय-गुरुवयणविणिग्गयं विणयादिबहुमाणपरिओसाणुकंपोवलद्धं अणेग-सोगसंतावुव्वेग-महावाहिवेयणाघोरदुक्खदारिद्रकिलेसरोगजम्मजरामर-णगब्भवासनिवासाइदुट्ठसावगा^१ऽगाहभीमभवोदहितरंडगभूयं इणमो सयलागममज्झवत्तग्गस्स मिच्छत्तदोसोवहयविसिद्धबुद्धीपरिकप्पिय-कुभणियअघडमाणअसेसहेउदिट्ठंतजुत्तीविद्धंसणिक्कपच्चलपोढस्स पंच-मंगलमहासुयक्खंधस्स पंचज्झयणेगचूलापरिक्खित्तस्स पवरपवयण-देवयाहिट्ठियस्स तिपदपरिच्छिन्नेगालावगसत्तक्खरपरिमाणं अणंतगमपञ्जवत्थपसाहगं सव्वमहामंतपवरविज्जाणं परमबीयभूयं 'नमो

अरहंताणं'ति पढमज्झयणं अहिज्जेयव्वं, तद्वियहे य आयंबिलेणं पारेयव्वं । तहेव बीयदिणे अणेगाइसयगुणसंपओववेयं अणंतरभणियत्थपसाहगं अणंतरुत्तेणेव कमेणं दुपयपरिच्छिन्नेगालावग-पंचक्खरपरिमाणं 'नमो सिद्धाणं' ति बीयज्झयणं अहिज्जेयव्वं, तद्वियहे य आयंबिलेण पारेयव्वं । एवं अणंतरभणिण्णेव कमेणं अणंतरुत्तत्थपसाहगं तिपदपरिच्छिन्नेगालावगं सत्तक्खरपरिमाणं 'नमो आयरियाणं' ति तइयमज्झयणं आयंबिलेणं अहिज्जेयव्वं । तहा अणंतरुत्तत्थपसाहगं तिपयपरिच्छिन्नेगालावगं सत्तक्खरपरिमाणं 'नमो उवज्झायाणं' ति चउत्थमज्झयणं चउत्थदिने आयंबिलेनेव । तहेव अनंतरभणिअत्थपसाहगं पंचपयपरिच्छिन्नेगालावग-नवक्खर- परिमाणं 'णमो लोए सव्वसाहूणं'ति पंचममज्झयणं पंचमदिणे आयंबिलेण । तहेव तयत्थाणुगामियं एक्कारसपयपरिच्छिन्नतियाला- वगतित्तीसक्खरपरिमाणं 'एसो पंचनमोक्कारो, सव्वपावप्पणासणो । मंगलाणं च सव्वेसिं, पढमं हवइ मंगलमितिचूलंति छट्ठसत्तमट्ठमदिणे तेणेव कमविभागेणं आयबिलेहिं अहिज्जेयव्वं । एवमेयं पंचमगलमहासुयक्खंधं सरवन्नपयसहियं पयक्खरबिंदुमत्ताविसुद्धं गुरुगुणोववेयगुरुवइद्धं कसिणमहिज्जित्ताणं तहा कायव्वं जहा पुव्वाणुपुव्वीए पच्छाणुपुव्वीए अणाणुपुव्वीए जीहग्गे तरेज्जा । तओ तेणेवाणंतरभणियतिहिकरणमुहुत्तनक्खत्तजोगलग्गससीबल-जंतुविरहिओगासचेइया-लगाइकमेणं अट्ठमभत्तेणं समणुजाणाविऊणं गोयमा ! महया पबंधेण सुपरिफुडं णिउणं असंदिद्धं सुत्तत्थं अणेगहा सोऊणावधारेयव्वं । एयाए विहीए पंचमंगलस्स णं गोयमा ! विणओवहाणो कायव्वो । १२।

से भयवं ! किमेयस्स अचिंतचिंतामणिकप्पभूयस्स णं पंचमंगलमहासुयक्खंधस्स सुत्तत्थं पन्नतं ? गोयमा ! एमाइयं एयस्स अचिंतचिंतामणिकप्पभूयस्स णं पंचमंगलमहासुयक्खंधस्स णं सुत्तत्थं पण्णत्तं, तं जहा- जे णं एसा पंचमंगलमहासुयक्खंधे से णं

सयलागमंतरावत्ती तिलतेलकमलमयरंदव्व सव्वलोए पंचथिकायमिव जहत्थकिरियाणुरायसब्भूयगुणकित्तणे जहिच्छियफलपसाहगे चेव परमथुइवाए । से य परमथुई केसिं कायव्वा ? सव्वजगुत्तमाणं ! सव्वजगुत्तममुत्तमे य जे केई भूए जे केई भविंसु जे केइ भविस्संति ते सव्वे चेव, अरहंतादओ चेव, णो णमन्नेत्ति, ते य पंचहा अरहंते सिद्धे आयरिए उवज्झाए साहवो य ।

तत्थ एएसिं चेव गब्भत्थसब्भावो इमो तंजहा- सनरामरासुरस्स णं सव्वस्सेव जगस्स अट्ठमहापाडिहेराइपूयाइसओवलक्खियं अणणसरिसमचित्तमप्पमेयकेवलाहिट्ठियं पवरुत्तमं अरहंतित्ति अरहंता, असेस कम्मक्खएणं निद्वह्भवंकुरताओ न पुणेह भवंति जंमंति उववज्जंति वा अरुहंता वा, णिम्महियनिहयनिद्वलियविलूय- निद्ववियअभिभूयसुदुज्जयासेस-अट्ठपयारकम्मरिउत्ताओ वा अरिहंते इ वा, एवमेते अणेगहा पन्नविज्जंति परुविज्जंति आघविज्जंति पट्ठविज्जंति दंसिज्जंति उवदंसिज्जंति ।

तहा सिद्धाणि परमाणंदमहूसव-महकल्लाणनिरुवमसोक्खाणि णिप्पकंपसुक्कज्झाणाइअचित्तसत्ति-सामत्थओ सजीववीरिएणं जोगनिरोहाइणा महापयत्तेणित्ति सिद्धा, अट्ठप्पयारकम्मक्खएण वा सिद्धं सज्झमेतेसिंति सिद्धा, सिंय ज्ञायमेसिमिति वा सिद्धा, सिद्धे निट्ठिए पहीणे सयलपओयणवायकयंबमेतेसिमिति सिद्धा, एवमेते इत्थीपुरुषनपुंससलिंगऽण्णलिंगिहिलिंगपत्तेय-बुद्धबोहिय जाव णं कम्मक्खय सिद्धा य भेएहिं णं अणेगहा पन्नविज्जंति ।

तहा अट्ठारससीलंगसहस्साहिट्ठियतणू छत्तीसइविहमायारं जहट्ठियमगिलाए अहन्निसाणुसमयं आयरंतित्ति पवत्तयंतित्ति आयरिया, परमप्पणो य हियमायरंतित्ति आयरिया, भव्वसत्तस्स सीसगणाणं वा हियमायरंति आयरिया, पाणपरिच्चाएऽवि उ पुढवादीणं समारंभं नायरंति णारभंति नाणुजाणंति वा आयरिया, सुमहावरद्धेऽवि ण

कस्सई मणसावि पावमायरंति वा आयरिया, एवमेते णामठवणादीहिं अणेगहा पन्नविज्जंति ।

तहा सुसंवुडासवदारे मणोवयकायजोगत्तउवउत्ते विहिणासर-
वंजणमत्ता - विंदुपयक्खरविसुद्ध - दुवालसंग - सुयना- णज्झयणज्झा-
वणेणं परमप्पणो अ मोकखोवायं ज्ञायंतित्ति उवज्झाए, थिग्परिचिय-
मणंतगमपज्जवत्थेहिं वा दुवालसंगं सुयनाणं चिंतंति अणुसरंति
एगग्गमाणसा ज्ञायंतित्ति वा उवज्झाए, एवमेतेहिं अणेगहा पन्नविज्जंति ।

तहा अच्चंतकड्डउग्गुग्गयर- घोरतवचरणाइ अणेगवयनियमो-
ववासनाणाभिग्गहविसेससंजमपरिवालण-सम्मंपरीसहोवसग्गाहियासणेणं
सव्व-दुक्खविमोक्खं मोक्खं साहयंतित्ति साहवो ।

अयमेव इमाए चूलाए भाविज्जइ- एतेसिं नमोक्कारो । एसो
पंचनमोक्कारो किं करेज्जा ? सव्वं पावं-नाणावरणीयादिकम्मविसेसं तं
पयरिसेणं दिसोदिसं णासयइ सव्वपावप्पणासणो, एस चूलाए पढमो
उद्देसओ, एसो पंचनमोक्कारो सव्वपावप्पणासणो किं विहेउ ?,
मंगो-निव्वाणसुहसाहणेक्खमो सम्मदंसणाइआराहओ अहिंसालक्खणो
धम्मो तं मे लाएज्जति मंगलं । ममं भवाओ संसाराओ गलेज्जा-तारेज्जा
वा मंगलं, बद्धपुट्टनिकाइयट्ठप्पगारकम्मरासिं मे गालिज्जा
विलिज्जवेज्जति वा मंगलं । एएसिं मंगलाणं अन्नेसिं च मंगलाणं
सव्वेसिं किं ? पढमं-आदीए अरहंताणं थुई चेव हवइ मंगलं, इति एस
समासत्थो, वित्थरत्थं तु इमं तंजहा—

तेणं कालेणं तेणं समएणं गोयमा ! जे केई पुव्वं वा वन्निय-सदत्थे
अरंहेत भगवंते धम्मतिथ्यगरे भवेज्जा से णं परमपुज्जाणंपि पुज्जयरे
भवेज्जा, जओ णं ते सव्वेऽवि एयलक्खणसमन्निए भवेज्जा,
तंजहा-अचिंतअप्पमेयनिरुवमाणण्ण- सरिसपवरवरुत्तमगुणो-

१. 'विलेजे' क्वचित् पाठान्तरमिति ।

हाहिद्वियत्तेणं तिहंपि लोगाणं संजणिय-गरुय- महंतमाणंसाणंदे, तहा
य जंमंतरसंचिय - गरुयपुण्णपब्भार - संविदत्ततिथयरनामकम्मोदणं
दीहरगिम्हायवसंताव- किलंतसिहिउलाणं व पढमपाउसधाराभरवरिसं-
तघणसंघायमिव परमहिओवएसपयाणाइणा घणरागदोसमोह-
मिच्छत्ताविरइपमायदुड्ढकिलिद्वज्झवसायाइसमज्जियासुह- घोरपावकम्माय-
वसंतावस्स णिण्णासगे भव्वसत्ताणं अणेगजम्मंतरसंविदत्त-
गुरुयपुत्रपब्भाराइसयबलेणं समज्जियाउलबलवीरिएसरिय सत्तपरक्कमा-
हिद्वियतणू सुकंतदित्तचारुपायंगुड्ढगरुवाइसएणं सयलगहनक्खत्तचंद-
पंतीणं सूरिए इव पयंडप्पयावदसदिसपयासविप्फुरंतकिरणपब्भारेणं
णियतेयसा विच्छायगे सयलग्गविज्जाहरणरामरी^१णं सदेवदाणविंदाणं
सुरलोगाणं सोहग्गकंतिदित्तिलावन्नरुवसमुदयसिरीए साहावियकम्मक्खय-
जणियदिव्वकयपवरनिरुवमाणन्नसरिसविसेसाइसयाइसयलकला-
कलावविच्छड्डुपरिदंसणेणं भवणवइवाणमंतरजोइसवेमाणियाहमिंद-
सइंदच्छारासकिन्नरणरविज्जाहरस्स ससुरासुरस्सावि णं जगस्स अहो ३
अज्ज अदिट्ठपुव्वं दिट्ठमम्हेहिं इणमो सविसेसाउलमहंताचिंतपरमच्छेरय-
संदोहं समग्गलमेवेगड्डसमुइयं दिट्ठंति तक्खणउपपन्नघणनिरंतर-
बहलमप्पमेयऽचिंतअंतोसहरिसपीयाणुरायवसपवियंभंताणुसमय-अहिण-
वाहिनवपरिणामविसेसत्तेणं महमहंति जंपिरपरोप्पराणं
विसायमुवगयहहहह धीधिरत्थु अधन्ना अपुन्ना वयमिइणिंदिर-
अत्ताणगमणंतरसंखुहियहिययमुच्छिर सुलद्धवेयणसुपुण्णसिद्धिलियसगत्त-
आउंटण-पसारणा-उंमेसनिंमेसाइसारीरियवावारमुक्ककेवलं अणोवल-
क्खक्खलंतमंदमंददीहहुंकारविमिस्समुक्कदीहउण्हवहलनी- सासेगत्तेणं
अइअभिनिविट्ठबुद्धी सुणिच्छियमणस्स णं जगस्स, किं पुण तं
तवमणुचिट्ठेमो जेणेरिसं पवरिद्धिं लभिज्जति, तग्गयमणस्स णं दंसणा चेव
णियणियवच्छत्थलनिहिज्जंत^२करयलुप्पाइयमहंत-माणसचमक्कारे, ता
गोयमा ! णं — एवमाइअणंतगुणगणाहिद्वियसरीराणं तेसिं

सुगहियनामधेज्जाणं अरहंताणं भगवंताणं धम्मतिथ्यगराणं संतिए
 गुणगणोहरयणसंदोहसंधाए अहन्निसाणुसमयं जीहासहस्सेणंपि वागरंतो
 सुरवईवि अन्नयरे वा केई चउनाणी महाइसई य छउमत्थे
 सयंभुरमणोयहिस्स व वासकोडीहिंपि णो पारं गच्छेज्जा, जओ णं
 अपरिमियगुणरयणे गोयमा ! अरहंते भगवंते धम्मतिथ्यगरे भवंति, ता
 किमित्थं भन्नउ ? जत्थ य णं तिलोगनाहाणं जगगुरुणं भुवणेक्कबंधूणं
 तेलोक्कलगणखंभपवरधम्मतिथ्यंकराणं केई सुरिंदाइपायं-
 गुट्ठग्गाएगदेसाओ अणेगगुणगणालंकरियाओ भत्तिभरनिब्भरिकरसियाणं
 सव्वेसिंपि वा ^१पुरीसाणं अणेगभवंतरसंचिय अणिट्ठुट्ठुट्ठकम्मरासि
 जणियदोगच्च - दोमणस्सादिसयलदुक्खदारिद्द - किलेसजम्मजरामरण-
 रोगसोग-संतावुव्वेयवाहिवेयणाईण खयट्ठाए एगगुणस्साणंतभागमेगं
 भणमाणाणं जमगसमगमेव दिणयरकरेइ वा अणेगगुणगणोहे जीहग्गे
 विफुरंति ताइं च न सक्का सिंदावि देवगणा समकालं भाणिऊणं, किं
 पुण अकेवली मंसचक्खुणो ?, ता गोयमा ! णं एस इत्थं परमत्थे
 वियाण्यव्वो, जहा णं जइ तित्थगराणं संतिए गुणगणोहे तित्थयरे चेव
 वायरंति, ण उण अन्ने, जओ णं सातिसया तेसिं भारती, अहवा
 गोयमा ! किमित्थ पभूयवागरणेणं ? सारत्थं भन्नए ॥१३॥

तंजहा- नामंपि सयलकम्मट्ठमलकलंकंकेहिं विप्पमुक्काणं ।

तियसिंदच्चियचलणाण जिणवरिंदाण जो सरइ ॥१६॥

तिविहकरणोवउत्तो खणे खणे सीलसंजमुज्जुत्तो ।

अविराहियवयनियमो सोऽवि हु अइरेण सिज्जेज्जा ॥१७॥

जो पुण दुहउव्विग्गो सुहतण्हालू अलिव्व कमलवणे ।

थयथुइमंगल जयसद्दवावडो ^२झणझणे किंचि ॥१८॥

१. 'सुरीसाणं' इति पाठान्तरं तु चिन्त्यमिति । २. 'रुणरुणे' पाठान्तरमिति ।

भक्तिभरनिष्करो जिणवरिंदपायारविंदजुगपुरओ ।

भूमि निद्विविसिरो कयंजली वावडो चरित्तहो ॥१९॥

एकंपि गुणं हियए धरेइ संकाइसुद्धसम्मत्तो ।

अक्खंडियवयनियमो तित्थयरत्ताए सो सिज्जे ॥२०॥

जेसिं च णं सुगहियनामग्गहणाणं तित्थयराणं गोयमा ! एस
जगपायडमहच्छेरयभूए भुवणस्सवि पयडपायडे महंताइसयपवियंभो, तं
जहा -

खीणट्ठपायकम्मा मुक्का बहुदुक्खगब्भवसहीणं !

पुणरवि अपत्त केवल-मणपज्जवणाणचरिमतणू ॥२१॥

^१महजोइणो विविहदुक्ख-मयरभवसागरस्स उव्विग्गा ।

दट्ठूणऽरहाइसए भवहुत्तमणा खणं जंति ॥२२॥ युग्मम् ॥

अहवा चिट्ठउ ताव सेसवागरणं गोयमा ! एवं चेव धम्मतित्थंगरेति
नाम सन्निहियं पवरक्खरुव्वहणं तेसिमेव सुगहियनामधिज्जाणं भूवणेक्कबंधूणं
अरहंताणं भगवंताणं जिणवरिंदाणं धम्मतित्थंकराणं छज्जे, ण अन्नेसिं, जओ
य णेगजंमंतरऽ^२भत्थमोहोवसमसंवेगनिव्वेयणुकंपा^३अत्थित्ताभि-
वत्तीसलक्खणपवरसम्मदंसणुल्लसंत-विरियाणिगूहिय उग्ग- कट्ठघोर-
दुक्करतव-निरंतरज्जियउत्तुंग-पुत्तखंधसमुदय-महपब्भारसंविदत्त- उत्तमप-
वरपवित्त विस्सकसिणबंधुणा-हसामि- साल-अणंत-कालवत्त-
भवभावणच्छिन्नपावबंधणेक्कअविइज्ज-तित्थ-यर-नाम-कम्मगोयणिसियसु-
कंतदित्त-चारुरुवदंसदिसिपयास-निरुवमट्ठ-लक्खणसहस्स-मंडियजगुत्त-
मुत्तमसिरी-निवास-वासवाइ-देवमणुयदिट्ठ-मेत्त-तक्खणंत-करणलाइय-
चमक्कनयणमाणसाउल-महंत-विम्हयपमोय-कारय असेस कसिण पावकम्म-
मलकलंक-विप्पमुक्क-समचउरंसपवर-पढमवज्जरि-सहनाराय-संघयणा-
हिट्ठियपरमपवित्तुत्तममुत्तिधरे, ^४ते चेव भगवंते महायसे महासत्ते

महाणुभागे परमिद्धी सद्धम्मतित्थंकरे भवंति ।१४।

अन्नं च-

सयलनरामरतियसिंदसुंदरीरुवकंतिलावन्नं ।

सव्वंपि होज्ज जइ एगरासि संपिण्डियं कहवि ॥२३॥

तं च जिणजलणंगुट्ठग्गकोडिदेसेगलक्खभागस्स ।

संनिज्जेवि न सोहइ जह ^१छारउडं कंचणगिरिस्स ॥२४॥ ॥युग्मम्॥

अहवा नाऊण गुणंतराई अन्नेसिं ऊण सव्वत्थ ।

तित्थयरगुणाणमणंतभागमलब्भंतमन्नत्थ ॥२५॥

जं तिहुयणंपि सयलं एगीहोऊण ^२मुब्भमेगदिसं ।

भागे गुणाहिओऽम्हं तित्थयरे परमपुज्जेत्ति ॥२६॥

तेच्चिय अच्चे वंदे पूए आराहे गइ मइ सरन्ने य ।

जम्हा तम्हा ते चेव भावओ णमह धम्मतित्थयरे ॥२७॥

लोगेवि गामपुरनगर-विसय-जणवयसमग्गभरहस्स ।

जो जित्थियस्स सामी तस्साणत्तिं ते करेत्ति ॥२८॥

नवरं गामाहिवई सुट्ठु सुतुट्ठे एकगाममज्झाओ ।

किं देज्ज ? जस्स ^३नियगे तेलोए एत्तियं पुच्चं ॥२९॥

चक्कहरो लीलाए सुट्ठु सुथेवंपि देइ बहुमन्ने जमगण्णं ।

तेण य कमागय गुरुदरिद्वनामं स नासेइ सयलबंधुवग्गस्सत्ति ॥३०॥

सामंतो चक्कहरं चक्कहरो सुरवइत्तणं कंखे ।

१. भस्मकूटमिति । २. तिष्ठेदिति । ३. 'नियगं छेलाए तत्तियं छेलाए तत्तियं पुच्छं' पाठान्तरमिति

इंदो तित्थयरत्तं तित्थयरे उण जगस्सा वि जहिच्छियसुहफलए
॥३१॥

तम्हा जं इंदेही वि कंखिज्जइ एगबद्धलक्खेहिं ।

अइसाणुरागहियएहिं उत्तमं तं न संदेहो ॥३२॥

ता सयल देवदाणवगहरिक्खसुरिंद-चंद-मादीणं ।

तित्थयरे पुज्जयरे ते छिय पावं पणासंति ॥३३॥

तेसि य तिलोगमहियाण धम्मतित्थंकराण जगगुरुणं ।

भावच्चणदव्वच्चणभेदेण दुहच्चणं भणियं ॥३४॥

भावच्चण चारित्ताणुद्वाणकडुग्गघोरतवचरणं ।

दव्वच्चण विरयाविरयसीलपूयासक्कारंदाणादी ॥३५॥

ता गोयमा ! णं एसेऽत्थ परमत्थे तं जहा -

भावच्चणमुग्गविहारया य दव्वच्चणं तु जिणपूया ।

पढमा जईण दोन्निवि गिहीण पढमच्चिय पसत्था ॥३६॥

एत्थं च गोयमा ! केई अमुणिय-समय-सब्भावे ओसन्नविहारी
णियवासिणो अदिट्ठपरलोगपच्चवाए सयंमती इड्डिरिस्साय-
गारवाइमुच्छिए रागदोसमोहाहंकारममीकाराइसु पडिबद्धे
कसिणसंजमसद्धम्म-परंमुंहे निद्वयनित्तिसनिग्घिण-अकलुणनिक्खिवे
पावायरणेक्क-अभिनिविट्ठुबुद्धी एगंतेणं अइचंडरोद्दकुराभिग्गहिए
मिच्छद्दिट्ठिणो कयसव्वसावज्जजोगपच्चक्खाणे विप्पमुक्कासेससंगारंभ-
परिग्गहे तिविहंतिविहेणं पडिवन्नसामाइए य दव्वत्ताए, न भावत्ताए,
नाममेत्तमुंडे अणगारे महव्वयधारी समणेऽवि भवित्ताणं एवं मन्नमाणे
सव्वहा उम्मगं पवत्तंति, जहा किल अम्हे अरहंताणं भगवंताणं

गंधमल्ल-पदीवसंमज्जणोवलेवणविचित्तवत्थबलिधूवाइएहिं पूयासक्कारेहिं
अणुदियहमब्भच्चणं पकुब्वाणा तित्थुच्छप्पणं करेमो, तं च णो णं तहत्ति
गोयमा ! तं वायाएवि णो णं तहत्ति समणुजाणेज्जा ।

से भयवं ! केणं अट्ठेणं एवं वुच्चइ-जहा णं तं च णो णं तहत्ति
समणुजाणेज्जा ? गोयमा ! तयत्थाणुसारेणं असंजमबाहुल्लेणं च थूलं
कम्मसिक्कं थूलकम्मसवाओ य अज्झवसायं पडुच्च
थूलद्वारसुहायुहकसुपयडीबंधो सव्वसावज्जविरयाणं च वयभंगो,
वयभंगेण च आणाइक्कमे, आणाइक्कमेणं तु उम्मग्गगामित्तं,
उम्मग्गगामित्तेणं च सम्मग्गविप्पलोवणं उम्मग्गपवत्तणं,
सम्मग्गविप्पलोवणेणं च जईणं महती आसायणा, तओ अ
अणंतसंसाराहिंउणं, एएणं अट्ठेणं गोयमा ! एवं वुच्चइ जहा णं गोयमा !
णो णं तं तहत्ति समणुजाणेज्जा । १५।

दव्वत्थवाओ भावत्थवं तु दव्वत्थओ बहुगुणो भावओ तम्हा ।

अबुहजणे बुद्धीयं छक्कायहियं तु गोयमाऽणुट्ठे ॥३७॥

अकसिणपवत्तगाणं विरयाविरयाण एस खलु जुत्तो ।

जे कसिणसंजमविऊ पुप्फादीयं न कप्पए तेसिं तु ॥३८॥

किं मन्ने गोयमा ! एस, ^१बत्तीसिंदाणुचिट्ठिए ।

जम्हा-तम्हा उ उभयंपि, अणुट्ठेज्जेत्थं ^२नु बुज्झसी ॥३९॥

विणिओगमेवं तं तेसिं, भावत्थवासंभवो तहा ।

भावच्चणा य उत्तमयं, दसन्नभद्देण पायडे ॥४०॥

जहेव दसन्नभदेण, उयाहरणं तदेव य ।

चक्रहरभाणुससिदत्तदमगादीहिं, विणिदिसे ॥४१॥

पुच्छंतो गोयमा ! ताव, जं सुरिदेहिं भत्तीओ

सव्विहिए अणणसमे, पूयासक्कारे य कए ॥४२॥

ता किं तं सव्वसावज्जं तिविहं विरएहिं ऽणुद्वियं ?

उयाहु सव्वथामेसुं, सव्वहा अविरएसु उ ॥४३॥

णणु भयवं ! सुरवरिदेहिं, सव्वथामेसु सव्वहा

अविरएहिं सुभत्तीए, पूयासक्कारे कए ॥४४॥

ता जइ एवं तओ बुज्झ, गोयमेमं नीसेसयं,

देसविरय अविरयाणं तु, विणिओगमुभयत्थवि ॥४५॥

सयमेव सव्वतित्थंकरेहिं जं गोयमा ! समायरियं

कसिणट्ठकम्मस्खयकारयं तु भावत्थयमणुद्वे ॥४६॥

भवभीओ गमागमजंतुफरिसणाईपमद्वणं जत्थ ।

सपर-हिओवरयाणं ण मणंपि पवत्तए तत्थ ॥४७॥

ता सपर-हिओवरएहिं - सव्वहा ऽ^१णेषियव्वं विसेसं ।

जं परमसारभूयं विसेसवंतं च अणुद्वेयं ॥४८॥

ता परमसारभूयं विसेसवंतं च साहुवग्गस्स

एगंतहियं पत्थं सुहावहं एयपरमत्थं ॥४९॥

तंजहा-मेरुत्तुंग मणिगणमंडिएक्क-कंचणमए परमरंमे ।

नयणमणाणंदयरे पभूय विन्नाणसाइसए ॥५०॥

सुसुलिङ्ग-विसिङ्गसुलङ्गदसुविभक्तसुद्वसुणिवेसे ।

^१बहु सिंघयत्तघंटाधयाउले पवरतोरणसणाहे ॥५१॥

सुविसाल-सुविथिन्ने पए पए पिच्छियव्वयसिरीए ।

मघमघमघेत्तडज्झंत अगरुकप्पूरचंदणामोए ॥५२॥

बहुविहविचित्त बहुपुप्फमाइपूयारुहे सुपूए य ।

णिच्चपणच्चिरणाडयसयाउले ^२महुरमुरवसद्दाले ॥५३॥

कुदंतरासयजणसयसमाउले जिण-कहाखित्तचित्ते ।

पकहंतकहगणच्चंतच्छत्त-गंधव्वतूर-निग्घोसे ॥५४॥

एमादिगुणोवेए पए पए सव्वमेइणीवट्टे ।

नियभूयविट्ठत्तपुत्तज्जिण नायागएण अत्थेण ॥५५॥

^३कंचणमणिसोमाणे थंभसहस्सूसिए सुवण्णतले ।

जो कारवेज्ज जिणहरे तओ वि तवसंजमो अणंतगुणोत्ति ॥५६॥

तवसंजमेण बहुभवसमज्जियं पावकम्ममललेवं ।

निद्धोविऊण अइरा अणंतसोक्खं वए मोक्खं ॥५७॥

काउंपि जिणाययणेहिं मंडियं सव्वमेइणीवट्टं ।

दाणाइचउक्केणं सुद्ववि गच्छेज्ज अच्चुयं

ण परओ गोयम ! गिहित्ति । ॥५८॥

जइ ता लवसत्तसुरविमाणवासीवि परिवडंति सुरा ।

सेसं चित्तिजंतं संसारे सासयं कयरं ? ॥५९॥

१. बहुचिह्नछत्रघण्टाध्वजाकुलमिति । २. मुरजशब्दाल इति ३. काञ्चनमणिसोपानमिति ।

कह तं भन्नइ सुखं सुचिरेणवि जत्थ दुक्खमल्लियइ ।
 जं च मरणावसाणे सुथेवकालीय-तुच्छं तु ? ॥६०॥
 सव्वेण वि कालेण जं सयलनरामराण हवइ सुहं ।
 तं न घडइ सयमणुभूय-मोक्ख-सुखस्स-अणंतभागेवि ॥६१॥
 संसारिय-सोक्खाणं सुमहंताणंपि गोयमा ! नेगे ।
 मज्झे दुक्खसहस्से घोरपयंडे णनु हुंति ॥६२॥
 ताइं च सायवेओयएण ण याणंति मंदबुद्धीए ।
 मणिकणगसेलमयलोढगंगली^१जह व वणिधूया ॥६३॥
 मोक्खसुहस्स उवम्मं सदेवमणुयासुरे जगे इत्थं ।
 तो भाणिउं ण सक्का नगरगुणे जहेव य पुलिंदो ॥६४॥
 कह तं भन्नइ ^२पुत्रं सुचिरेणवि जस्स दीसए अंतं ।
 जं च विरसावसाणं जं संसाराणुबंधि च ? ॥६५॥
 तं सुरविमाण-विहवं चिंतियचवणं च देवलोगाओ ।
 अइबलियं चिय हिययं जं नवि ^३सयसिक्करं जाइ ॥६६॥
 नरएसु जाइं अइदुस्सहाइं दुक्खाइं परमतिक्खाइं ।
 को वन्नेइ ताइं जीवंतो वास कोडिंपि ॥६७॥
 ता गोयम ! दसविहधम्म-घोरतवसंजमाणुट्ठाणस्स ।
 भावत्थवमिति नामं तेणेव लभेज्ज अक्खयं सोक्खंति ॥६८॥

नारग-भवतिरियभवे अमरभवे सुस्वइत्तणे वावि ।
 नो तं लब्भइ गोयम ! जत्थ व तत्थ व मणुयजम्मे ॥६९॥
 सुमहच्चंतपहीणेसु संजमावरणनामधेज्जेसु ।
 ताहे गोयम ! पाणी भावत्थयजोग्गयमुवेइ ॥७०॥
 जम्मंतरसंचिय-गरुयपुन्नपब्भारसंविट्ठेणं ।
 माणुसजंमेण विणा णो लब्भइ उत्तमं धम्मं ॥७१॥
 जस्साणुभावओ सुचरियस्स निस्सल्लदंभरहियस्स ।
 लब्भइ अउलमणंतं अक्खय-सोक्खं तिलोयग्गे ॥७२॥
 तं बहुभवसंचियतुंग-पावकम्मट्टरासिडहणट्ठं ।
 लद्धं माणुसजम्मं विवेगमाईहिं संजुत्तं ॥७३॥
 जो न कुणइ अत्तहियं सुयाणुसारेण आसवनिरोहं ।
 छत्तीगसीलंगसहस्सधारणेणं तु अपमत्ते ॥७४॥
 सो दीहरअव्वोच्छिन्नघोरदुक्खग्गिदावपज्जलिओ ।
 उव्वेवियसंतत्तो अणंतहुत्तो सुबहुकालं ॥७५॥
 दुग्गंधामेज्जचिलीणखारपित्तोज्ज^१सिंभपडहत्थे^२ ।
 वसाजलुसपूयदुद्दिणचिलिच्चिले^३रुहिरचिक्खल्ले ॥७६॥
 कढकढकढंत चलचलचलस्सढलढलढलस्स रज्जंतो ।
 संपिंडियंगमंगो जोणी जोणी वसे गब्भे ।
 एक्केक्क गव्भवासेसु, ^४जंतियंगो पुणरवि भमेज्जा ॥७७॥

१. ओज्जशब्दो मलिनार्थ इति । २. पूर्ण इति । ३. आर्द्र इति । ४. यन्त्रिताङ्ग इति ।

ता संतावुव्वेयगजम्मजरामरण गब्भवासाइं ।
 संसारिय-दुक्खाणं विचित्तरुवाण भीएणं ॥७८॥
 भावत्थवाणुभावं असेसभवभयखयंकरं नाउं ।
 तत्थेव महता उज्जमेण दढमच्चंतं पयइयव्वं^१ ॥७९॥ ॥ युग्मम् ॥
 इय विज्जाहर-किन्नरनरेण ससुरासुरेण वि जगेण ।
 संथुव्वंते दुविहत्थवेहिं ते तिहुयणुक्कोसे
 गोयमा ! धम्मतिथ्यंकरे जिणे अरिहंतेत्ति, ॥८०॥
 अह तारिसेवि इट्ठीपवित्थरे सयलतिहुयणाउलिए ।
 साहीणे जगबंद्धू मणसावि ण जे खणं लुद्धे ॥८१॥
 तेसिं परमीसरियं रुवसिरीवण्णबलपमाणं च ।
 सामत्थं जसकित्ती सुरलोगचुए जहेव अवयरिए ॥८२॥
 जह काऊणऽन्नभवे उग्गतवं देवलोगमणुपत्ते ॥८२अ॥
 तिथ्यरनामकम्मं जह बद्धं एगाइवीसइथामेसु
 जह सम्मतं पत्तं सामन्नाराहणा य अन्नभवे । ॥८३॥
 जह तिसलाओ^२ सिद्धत्थघरिणी चोदसमहासुमिणलंभं
 जह सुर हिगंध पक्खेव गब्भवसहीए असुहमवहरणं ॥८४॥
 जह सुरनाहो अंगुडुपव्वणसियं^३ महंतभत्तीए
 अमयाहारं भत्तीए देइ संथुणइ जाव य पसूओ ॥८५॥
 जह जायकम्मविणिओगकारियाओ दिसिकुमारीओ
 सव्वं नियकत्तव्वं निव्वत्तंती जहेव भत्तीए ॥८६॥

वत्तीससुरवरिंदा गुरुयपमोएण सव्वरिद्धीए
 रोमंचकंचुपुलइयभत्तिब्भरमाइयसगत्ता^१ ॥८७॥
 मन्नंते सकयत्थं जंमं अम्हाण मेरुगिरिसिहरे
 होही खणमप्फालियसूसरगंभीरदुंदुहिनिग्घोसा ॥८८॥
 जयसद्दमुहलमंगलकयंजली जह य खीरसलिलेणं
 बहुसुरहिगंधवासियकंचणमणितुंगकलसेहिं ॥८९॥
 जम्माहिसेयमहिमं करेति जह जिणवरो गिरिं चाले ॥८९अ॥
 जह इंदं वायरणं भयवं वायरइ अट्ठवरिसो वि ।
 जह गमइ कुमारत्तं^२ परिणे बोहिंति जह व लोगंतिया देवा ॥९०॥
 जह वयनिकखमणमहं करेति सव्वे सुरासुरा मुइया ।
 जह अहियासे घोरे परीसहे दिव्वमाणुसतिरिच्छे ॥९१॥
 जह घणघाइचउक्कं कम्मं डहइ घोरतवझाणजोग-अग्गीए ।
 लोगालोगपयासं उप्पाए जह व केवलं नाणं ॥९२॥
 केवलमहिमं पुणरिव काऊणं जह सुरासुराईया ।
 पुच्छंति संसए धम्मणीइतवचरणमाईए ॥९३॥
 जह व कहेइ जिणिंदो सुरकयसीहासणोवविट्ठो य ॥९३अ॥
 तं चउविहदेवनिकायनिम्मियं, जह पवरसमवसरणं,
 तुरियं करेति देवा, जं रिद्धीए जगं तुलइ ॥९४॥

जत्थ समोसरिओ सो भुवणेक्कगुरु महायसो अरहा ।
अट्टमहपाडिहेरयसुचिंधियं वहइ य तित्थयं नामं ॥९५॥
जह निदलइ असेसं मिच्छत्तं चिक्कणंपि भव्वाणं ।
पडिबोहिऊण मग्गे ठवेइ जह गणहरा दिक्खं ॥९६॥
गिण्हंति महामइणो सुत्तं गंथंति जह व य जिणिंदो ।
भासे कसिणं अत्थं अणंतगमपज्जवेहिं तु ॥९७॥
जह सिज्झइ जगनाहो महिमं निव्वाणनामियं जह य ।
सव्वेवि सुरवरिंदा असंभवे तहवि मोच्चंति ॥९८॥
सोगत्ता पगलंतंसु-धोयगंडयल-सरसइ-पवाहं ।
कलुणं विलावसद्धं हा सामि ! कया अणाहत्ति ॥९९॥
जह सुरहिगंधगब्भीणमहंत-गोसीसचंदणदुमाणं ।
कट्ठेहिं विहिपुव्वं सक्कारं सुरवरा सव्वे ॥१००॥
काऊणं सोगत्ता सुन्ने दसदिसिपहे पलोयंता ।
जह खीरसागरे जिणवराणं अट्ठी पक्खालिऊणं च ॥१०१॥
सुरलोए नेऊणं आलिपेंऊण पवरचंदणरसेणं ।
मंदारपारियाययसयवत्त-सहस्सपत्तेहिं ॥१०२॥
जह अच्चेऊण सुरा नियनिय भवणेसु जह व य थुणंति,
तं सव्वं महया वित्थरेणं अरहंतचरियाभिहाणे ।
अणंतकडदसाणं तं, मज्झाउ कसिणं विन्नेयं ॥१०३॥

एत्थं पुण जं पगयं तं मोत्तुं जइ भणेज्ज तावेयं ।

हवइ असंबद्धरुयं^१ गंथस्स य वित्थरमणंतं ॥१०४॥

एयंपि अपत्थावे सुमहंतं कारणं समुवइस्स ।

जं वागरियं तं जाण भव्वसत्ताणऽणुग्गहट्ठाए ॥१०५॥

जह वा जत्तो जत्तो भक्खिज्जइ मोयगो सुसंकरिओ ।

तत्तो तत्तोवि जणे अइगुरुयं माणसं पीइं ॥१०६॥

एवमिह अपत्थावेवि भत्तिभरनिब्भराण परिओसं ।

जणयइ गुरुयं जिणगुण गहणेक्करसक्खित्तचित्ताणं ॥१०७॥

एयं तु जं पंचमंगल-महासुयक्खंधस्स वक्खाणं तं महया पबंधेणं
अणंतगमपज्जवेहिं सुत्तस्स य^२ पिहभूयाहिं निज्जुत्तीभासचुण्णीहिं जहेव
अणंतनाणदंसणधरेहिं तित्थयरेहिं वक्खाणियं तहेव समासाओ
वक्खाणिज्जंतं आसि । अहऽन्नया कालपरिहाणिदोसेणं ताओ
निज्जुत्तीभासचुन्नीओ वोच्छिन्नाओ ॥१६॥

इओ य वच्चंतेणं कालसमएणं महिट्ठीपत्ते पयाणुसारी वइरसामी
नाम दुवालसंगसुयहरे समुप्पन्ने, तेणेयं पंचमंगलमहासुयक्खंधस्स
उद्धारो मूलसुत्तस्स मज्झे लिहिओ, मूलसुत्तं पुण सुत्तत्ताए गणहरेहिं
अत्थत्ताए अरहंतेहिं भगवंतेहिं धम्मतित्थगरेहिं तिलोगमहिएहिं
वीरजिणिंदेहिं पन्नवियंति एस बुद्धसंपयाओ ॥१७॥

एत्थ य जत्थ जत्थ पयंपएणाणुलग्गं सुत्तालावगं न संपज्जइ
तत्थ तत्थ सुयहरेहिं कुलिहियदोसो न दायव्वोत्ति, किंतु जो सो
एयस्स अचिंत-चिंतामणिकप्पभूयस्स महानिशीहसुयक्खंधस्स पुव्वायरिसो

आसी तहिं चेव खंडाखंडीए उद्देहियाइएहिं हेऊहिं बहवे पत्त-
परिसडिया तहावि अच्चंतसुमहत्थाइसयंति इमं महानिसीहसुयकखंधं
कसिणपवयणस्स परमसारभूयं परं तत्तं महत्थंति कलिऊणं
पवयणवच्छल्लत्तणेणं बहुभव्वसत्तोवयारियं च काउं तहा य
आयहियड्डयाए आयरियहरिभद्देणं जं तत्थायरिसे दिट्ठं तं सव्वं
समतीए साहिऊणं लिहियंति, अन्नेहिंपि सिद्धसेण-
दिवाकरवुद्धवाइजकखसेणदेवगुत्तजसवद्धण-खमासमण-सीसरविगुत्तणे-
मिचंद-जिणदास- गणि-खमगसच्चरिसि-पमुहेहिं जुगप्पहाणसुयहरेहिं
बहुमन्नियमिणंति । १९८।

से भयवं ! एवं जहुत्तविणओवहाणेणं
पंचमंगलमहासुयकखंधमहिज्झित्ताणं पुव्वाणुपुव्वीए पच्छाणुपुव्वीए
अणाणुपुव्वीए सरवंजणमत्ता बिंदु-पयक्खर-विसुद्धं थिरपरिचियं
काऊणं महया पबंधेणं सुत्तत्थं च विन्नाय तओ य णं किमहिज्जेज्जा ?,
गोयमा ! ईरियावहियं, से भयवं ! केणं अट्ठेणं एवं वुच्चइ- जहा णं
पंचमंगलमहासुयकखंध-महिज्झित्ताणं पुणो ईरियावहियं अहीए ? गोयमा !
जे एस आया से णं जया गमणागमणाइपरिणामपरिणए
अणेगजीवपाणभूयसत्ताणं अणोवउत्तपमत्ते संघट्टणअवदावण-किलामणं
काऊणं अणालोइय अपडिक्कंते चेव असेसकम्मक्खयड्डयाए किंचि
चिइवंदणसज्झायज्झाणाइएसु अभिरमेज्जा तया से एगचित्ता समाही
भवेज्जा ण वा, जओ णं गमणागमणाइअणेगअन्नवावार-
परिणामासत्तचित्तयाए केई पाणी तमेव भावंतरमच्छड्डिय
अट्ठदुहट्टज्झवसिए कंचिकालं खणं विरत्तेज्जा^१ ताहे तं तस्स फलेणं
विसंवएज्जा, जया उण कंहिंचि अन्नाण-मोह-पमाय-दोसेण सहसा
एगिंदियादीणं संघट्टणं परियावणं वा कयं भवेज्जा तया य पच्छा

हाहाहा दुदुकयमम्हेहिं ति घणरामदोसमोह-मिच्छत्त-अन्नाणंधेहिं
 अदिद्वपरलोगपच्चवाएहिं कूरकम्मनिग्घिणेहिंति परमसंवेगमावन्ने
 सुपरिफुडं आलोइत्ताणं निंदित्ताणं गरहित्ताणं पायच्छित्तमणुचरित्ताणं
 णीसल्ले अणाउलचित्ते असुहकम्मक्खयट्ठा किंचि आयहियं चिइवंदणाइ
 अणुट्टेज्जा तया तयट्टे चेव उवउत्ते से भवेज्जा, जया णं से तयत्थे
 उवउत्ते भवेज्जा तया तस्स णं परमेगग्गचित्तसमाही हवेज्जा, तया चेव
 सव्वजगजीवपाणभूयसत्ताणं जहिद्वफलसंपत्ती भवेज्जा, ता गोयमा ! णं
 अपडिक्कंताए ईरियावहियाए न कप्पइ चेव काउं किंचि
 चेइयवंदणसज्झायाइयं ^१फलासायमभिकंखुगाणं, एएणं अट्टेणं गोयमा !
 एवं वुच्चइ जहा णं गोयमा ! ससुत्तत्थोभयं पंचमंगलं थिरपरिचियं
 काऊणं तओ ईरियावहियं अज्झीए । १९।

‘से भयवं ! कयराए विहीए तमिरियावहियमहीए ? ,

गोयमा ! जहा णं पंचमंगलमहासुयक्खंधं । २०।

से भयवमिरियावहियमहिज्जित्ताणं तओ किमहिज्जे ? , गोयमा !
 सक्कत्थयाइयं चेइयवंदणविहाणं, णवरं सक्कत्थयं एगेणऽड्डमेण वत्तीसाए
 आयंबिलेहिं, ^२अरहंतत्थयं एगेण चउत्थेणं ^३पंचहिं आयंबिलेहिं,
 चउवीसत्थयं एगेणं छट्ठेणं एगेण चउत्थेणं पणुवीसाए आयंबिलेहिं,
^४णाणत्थयं एगेणं चउत्थेणं पंचहिं आयंबिलेहिं, एवं सरवंजणमत्ताबिंदु
 पयच्छेयपयक्खरविसुद्धं अवच्चांमेलियं अहिज्जित्ताणं गोयमा ! तओ
 कसिणं सुत्तत्थं विन्नेयं, जत्थ य संदेहं भवेज्जा तं पुणो २ वीमंसिय
 णीसंकमवधारेऊण णीसंदेहं करिज्जा । २१।

एवं सुत्तत्थोभयत्तगं चिइवंदणाइविहाणं अहिज्जेत्ता णं तओ
 सुपसत्थे सोहणे तिहिकरणमुहुत्तनक्खत्तजोगलग्गससीबले जहासत्तीए

१. फलास्वादमिति । २. अरिहंतचेइयाणं सूत्रमिति । ३. ‘तिहिं’ पाठान्तरमिति ।

४. श्रुतस्तवमिति ।

जगगुरुणं संपादयपूओवयारेणं पडिलाहियसाहुवग्गेण य
 भत्तिभरनिब्भरेणं ^१रोमंचकंचुयपुलइज्जमाणतणू सहरिसविसट्ठ-
 वयणारविन्देणं सद्धासंवेग-विवेगपरमवेरग्गमूलं विणिहयघणराग-
 दोसमोहमिच्छत्तमलकलंकेण सुविसुद्धसुनिम्मल-विमल-सुभसुभयरऽणु-
 समयसमुल्लसंतसुपसत्थऽज्झवसायगएणं भुवणगुरुजिणइंदपडिमाविणि-
 वेसियणयणमाणसेणं अणण्णमाणसेगग्ग- चित्तयाए धन्नोऽहं पुत्रोऽहंति
 जिणवंदणाइसहलीकयजम्मोत्ति इइ मन्नमाणेणं विरइयकरकमलंजलिणा
 हरियतणबीयजंतुविरहीयभूमीए निहिओभय- जाणुणा सुपरिफुडसुविइ-
 यणीसंकीकयजहत्थसुत्तत्थोभयं पए पए भावेमाणेणं
 दढवरित्तसमयन्नुअप्पमायाइअणेगगुणसंपओववेएणं गुरुणा सद्धिं
 साहुसाहुणीसाहम्मियअसेसबंधुपरिवग्गपरियरिणं चेव पढमं चेइए
 वंदियव्वे, तयणंतरं च गुणइढे य साहुणो तहा साहंमिय जणस्स णं
 जहासत्तीए पणिवायजाएणं सुमहग्घयमउयचोक्ख-वत्थ-पयाणाइणा वा
 महासंमाणो कायव्वो, एयावसरंमि सुविइयसमयसारेणं गुरुणा पबंधेणं
 अक्खेवनिक्खेवाइएहिं पबंधेहिं संसारनिव्वेयजणणिं सद्धासंवेगुप्पायगं
 धम्मदेसणं कायव्वं ।२२।

तओ परमसद्धासंवेगपरं नाऊणं आजम्माभिग्गहं च दायव्वं, जहा
 णं सहलीकयसुलद्धमणुयभवा भो भो देवाणुप्पिया ! तए अज्जप्पभिइए
 जावज्जीवं तिकालियं अणुदिणं ^२अणुत्तावलेगग्गचित्तेणं चेइए वंदेयव्वे,
 इणमेव भो मणुयत्ताउ असुइअसासयखणभंगुराओ सारं ति, तत्थ
 पुव्वण्हे ताव उदगपाणं न कायव्वं जाव चेइए साहू य ण वंदिए, तहा
 मज्झण्हे ताव असणकिरियं न कायव्वं जाव चेइए ण वंदिए, तहा
 अवरण्हे चेव तहा कायव्वं जहा अवंदिएहिं चेइएहिं णो
 सज्झायालमइक्कमेज्जा ।२३।

एवं चाभिग्गहबंधं काऊणं जावज्जीवाए, ताहे य गोयमा ! इमाए

१. 'रोमकंचुपु पाठान्तरमिति २. अत्वस्येति ।

चेव विज्ञाए अहिमंतियाओ सत्त गंधमुट्ठीओ तस्सुत्तमंगे नित्थारगपारगो भवेज्जासित्ति उच्चारेमाणेणं गुरुणा खेत्तव्वाओ, अउम्णमउ भगवओ अरहओ सूइज्जउ मए भगवती महाविज्जूआ वूर्इए महआवूर्इए जयूअवूर्इए सूएणवूर्इए वद्धमआणवूर्इए जयूए वूइजयूए जयूअंतए अपरूआज्जए सूवूआहा, उपचारो चउत्थभत्तेणं साहिज्जइ, एयाए विज्ञाए सव्वगओ नित्थारगपारगो होइ, उवट्ठावणाए वा गणिस्स अणुन्नाए वा सत्त वारा परिजवेयव्वा नित्थारगपारगो होइ, उत्तिमट्ठपडिवण्णे वा अभिमंतिज्जइ आराहगो भवइ, विग्घविणायगा उवसमंति, सूरुो संगामे पविसंतो अपराजिओ भवइ, कप्पसमत्तीए मंगलवहणी खेमवहणी हवइ । २४।

तहा साहुसाहुणीसमणोवास- गसड्ढिगाऽसेसाऽऽसन्नसाहम्मियजण- चउव्विहेणंपि समणसंघेणं नित्थारगपारगो भवेज्जा, धन्नो सपुन्नसलक्खणोऽसि तुमंति उच्चारेमाणेणं गंधमुट्ठीओ घेत्तव्वाओ, तओ जगगुरुणं जिणिंदाणं पूएगदेसाओ गंधड्ढामिलाणसियमल्लदामं गहाय सहत्थेणोभयखंधेसुमारोवयमाणेणं गुरुणा णीसंदेहमेवं भाणियव्वं जहा भो भो जम्मंतरसंचिय- गरुयपुन्नपब्भार सुलद्धसुविट्तसुसहलमणुयजम्म ! देवाणुप्पिया ! ठइयं च णरयतिरियगइदारं तुज्झंति, अबंधगो य अयसऽकित्तीनीयागोत्तकम्मविसेसाणं तुमंति, भवंतरगयस्सावि उ ण दुलहो तुज्झ पंचनमोक्कारो, भाविजम्मंतरेसु पंचनमोक्कारपभावओ य जत्थ जत्थोववज्जिज्जा, तत्थ तत्थुत्तमा जाई उत्तमं च कुलरुवारोग्गसंपयंति, एयं ते निच्छइओ भवेज्जा । अन्नं च पंचनमोक्कारपभावओ ण भवइ दासत्तं, ण दारिद्वदोहग्गहीण-जोणियत्तं, ण विगलिंदियत्तंति, किं बहुएणं ? गोयमा ! जे केई एयाए विहीए पंचनमोक्कारादिसुयणाणमहिज्जित्ताणं तयत्थाणुसारेणं पयओ सव्वावस्सगाइणिच्चाणुट्ठणिज्जेसु अट्ठारससीलंगसहस्सेसुं अभिरमेज्जा से णं सरागत्ताए जइ णं ण निव्वुडे तओ गेवेज्जणुत्तरादीसु चिरमभिरमेऊणेह उत्तमकूलप्पसूर्इ उक्किट्ठलट्ठसव्वंगसुंदरत्तं सव्वकलापत्तइजण-

मणाणंदयारियत्तणं^१ च पाविऊणं सुरिदोवमाए रिद्धीए एगंतेणं च दयाणुकंपापरे निव्विन्नकामभोगे सद्धम्ममणुद्देऊणं विहुयरयमले सिज्जेज्झा । २५।

से भयवं ! किं जहा पंचमंगलं तद्वा सामाइयाइयमसेसंपि सुयनाणमहिज्जिणेयव्वं ? गोयमा ! तहा चेव विणओवहाणेण-महीएयव्वं, णवरं अहिज्जिणिउकामेहिं अट्ठविहं चेव नाणायारं सव्वपयत्तेणं कालादी रक्खिज्जा, अन्नहा, महयाऽऽसायणत्ति, अन्नं च दुवालसंगस्स सुयनाणस्स पढमचरिमजामअहन्निसमज्झयणज्झावणं पंचमंगलस्स^१असोलसद्धजामियं च अन्नं च पंचमंगलं कयसामाइए वा अकयसामाइए वा अहीए सामाइयमाइयं तु सुयं चत्तारंभपरिग्गहे जावज्जीवकयसामाइए अहिज्जिणइ, ण उण सारंभपरिग्गहे अकयसामाइए, ^२तहा पंचमंगलस्स आलावगे २ आयंबिलं तहा सक्कथवाइसु वि, दुवालसंगस्स पुण सुयनाणस्स उद्देसगज्झयणेसु । २६।

से भयवं ! सुदुक्करं पंचमंगलमहासुयक्खंधस्स विणओवहाणं पन्नत्तं, महती य एसा णियंतणा कहं बालेहिं कज्जइ ?, गोयमा ! जे णं केई ण इच्छेज्जा एयं नियंतणं अविणओवहाणेणं चेव पंचमंगलाइ सुयनाणं अहिज्जिणे अज्झावेइ वा अज्झावयमाणस्स वा अणुन्नं वा पयाइ से णं ण भविज्जा पियधम्म, ण हवेज्जा दढधम्म, ण भवेज्जा भत्तीजुए, हीलिज्जा सुत्तं, हीलिज्जा अत्थं, हीलिज्जा सुत्तत्थउभये, हीलिज्जा गुरुं, जे णं हीलिज्जा सुत्तत्थोभए जाव णं गुरुं से णं आसाएज्जा अतीताणागयवट्ठमाणे तित्थयरे, आसाइज्जा आयरियउवज्झायसाहूणो, जे णं आसाइज्जा सुयणाणमरिहंतसिद्धसाहू से तस्स णं सुदीहयालमणंतसंसारसागरमाहिडेमाणस्स तासु तासु संवुडवियडासु चुलसीइलक्ख-परिसंखाणासु सीओसिणमिस्स-जोणीसु

तिमिसंधयारदुग्गंधाऽमिज्झ^१ - चिलीण^२ - खारमुत्तोज्झ - सिंभपड^३-
 हत्थवसाजलुलपूयदुद्धिण^४-चिलिचिल्लरुहिस-चिक्खल्लदुद्धंसण-जंबालपंकवी-
 भच्छघोरगव्भवासेसु कढकढकढेंतचलचलचलस्सटलटलटलस्स
 रज्जंतसंपि- डियंगमंगस्स सुइरं नियंतणा, जे उण एयं विहिं फासेज्जा नो
 णं मणयंपि अइयरेज्जा जहुत्तविहाणेणं चेव पंचमंगलपभिइसुयनाणंस्स
 विणओवहाणं करेज्जा से णं गोयमा ! नो हीलिज्जा सुत्तं, णो हीलिज्जा
 अत्थं, णो हीलिज्जा सुत्तत्थोभाए, से णं नो आसाइज्जा तिकालभावी
 तित्थकरे णो आसाइज्जा तिलोगसिहरवासी विहुयरयमले सिद्धे, णो
 आसाइज्जा आयरियउवज्झायसाहूणो, सुद्धुयरं चेव भवेज्जा पियधम्म
 दढधम्म भत्तीजुत्ते एगंतेणं भवेज्जा सुत्तत्थाणुरंजियमाणसे
 सद्धासंवेगमावन्नो, से एस णं ण लभेज्जा पुणो २ भवचारगे
 गव्भवासाइयं अणेगहा जंतणंति ।२७।

णवरं गोयमा ! जे णं बाले जाव अविन्नायपुन्नपावाणं विसेसे ताव णं
 से पंचमंगलस्स णं गोयमा ! एगंतेणं अओगे^५, ण तस्स
 पंचमंगलमहासुयक्खंधस्स एगमवि आलावगं दायव्वं, जओ
 अणाइभवंतरसमज्जियासुहकम्मरासिदहणद्धमिणं लभेत्ताणं न बाले
 सम्ममाराहेज्जा लहुत्तं च ^६आणेई, ता तस्स केवलं धम्मकहाए गोयमा !
 भत्ती समुप्पाइज्झइ, तओ नाऊणं पियधम्मं दढधम्मं भत्तिजुत्तं ताहे जावइयं
 पच्चक्खाणं निव्वाहेउं समत्थो भवइ तावइयं कारवेज्झइ, राइभोयणं च
 दुविहतिविहचउव्विहेण वा जहासत्तीए पच्चक्खाविज्झइ ।२८।

ता गोयमा ! णं पणयालाए नमोक्कारसहियाणं चउत्थं, चउवीसाए
 पोरुसीहिं, बारसहिं पुरिमड्ढेहिं, दसहिं अवड्ढेहिं, तिहिं निव्वीइएहिं,
 चउहिं एगट्ठाणगेहिं, दोहिं आयंबिलेहिं, एगेणं सुद्धच्छायंबिलेणं

१. अशुचिरिति । २. मलिन इति । ३. पूर्ण इति । ४. आद्र इति । ५. 'गे'
 पाठान्तरमिति । ६. 'जणेइ, पाठान्तरमिति ।

अव्वावारत्ताए रोद्वृज्झाणविगहाविरहियस्स सज्झाणएगगचित्तस्स गोयमा ! एगमेवायंबिलं मासखमणं विसेसेज्जा, तओ य जावइयं तवोवहाणं वीसमंतो करेज्जा तावइयं अणुगणेऊणं जाहे जाणेज्जा जहा णं एत्तियमित्तेणं तवोवहाणेणं पंचमंगलस्स जोगीभूओ ताहे आउत्तो पढेज्जा, ण अन्नहत्ति । २९।

से भयवं ! पभूयं कालाइकमं एयं, जइ कयाइ अवंतराले पंचत्तमुवगच्छेज्जा तओ नमोक्कारविरहिए कहमुत्तिमट्ठं साहेज्जा ? गोयमा ! जं समयं चेव सुत्तोवयारनिमित्तेणं असढभावत्ताए जहासत्तीए किंचि तवमारभेज्जा तं समयमेव तदहीयसुत्तत्थोभयं दट्ठव्वं, जओ णं सो तं पंच-नमोक्कारं सुत्तत्थोभयं ण अविहीए गिण्हे, किंतु तहा गेण्हे जहा भवंतरेसुं पि ण विष्णणस्से, एयज्झवसायत्ताए आराहगो भवेज्जा । ३०।

से भयवं ? जेण पुणं अन्नेसिमहीयमाणाणं सुयावरणक्ख-ओवसमेण कण्णहाडित्तणेणं पंचमंगलमहीयं भवेज्जा सेऽविय किं तवोवहाणं करेज्जा ? गोयमा ! करेज्जा, से भयवं ! केणं अट्ठेय्यं ! गोयमा ! सुलभवोहिलाभनिमित्तेणं । एवं ^१चेयाइं अकुव्वमाणे णाणकुसीले णेए । ३१।

तहा गोयमा ! णं पव्वज्जादिवसप्पभिईए जहुत्तविणओवहाणेणं जे केई साहू वा साहूणी वा अपुव्वनाणगहणं न कुज्जा तस्सासइं विराहियं सुत्तत्थोभयं, सरमाणे एगगचित्ते पढमचरमपोरिसीसु दिया राओ य णाणुगुणेज्जा से णं गोयमा ! णाणकुसीले णेए ।

से भयवं ! जस्स अइगुरुयनाणावरणोदएणं अहंनिसं ^२पहोसेमाणस्स संवच्छरेणावि सिलोगद्धमवि णो थिरपरिचियं भवेज्जा से किं कुज्जा ? गोयमा ! तेणावि जावज्जीवाभिगगहेणं सज्झाय-सीलाणं वेयावच्चं तहा अणुदिणं अड्ढाइज्जे सहस्से पंचमंगलाणं सुत्तत्थोभए

सरमाणेगग्गमाणसे प्होसिञ्जा ।

से भयवं ! केणं अट्टेणं ? गोयमा ! जे भिक्खू जावज्जीवाभिग्गहेणं चाउक्कालियं वायणाइ जहासत्तीए सज्झायं न करेञ्जा से णं णाणकुसीले णेए । ३२ ।

अन्नं च- जे केई जावज्जीवाभिग्गहेण अपुव्वं नाणाहिगमं करेञ्जा तस्सासत्तीए पुव्वाहियं गुणेञ्जा, तस्सावियासत्तीए पंचमंगलाणं अड्ढाइञ्जे सहस्से परावत्ते सेवि आराहगे तं च नाणावरणं खवेत्ताणं तित्थयरे इ वा गणहरे इ वा भवेत्ता णं सिज्जेञ्जा । ३३ ।

से भयवं ! केण अट्टेणं एवं वुच्चइ जहा णं चाउक्कालियं सज्झायं कायव्वं ? गोयमा !

‘मणवयण कायगुत्तो नाणावरणं खवेइ अणुसमयं ।

सज्झाए वट्ठंतो खणे खणे जाइ वेरग्गं ॥१०८॥

उड्ढमहे तिरियंमि य जोइसवेमाणिया य सिद्धी य ।

सव्वो लोगालोगो सज्झायविउस्स ^१पच्चक्खं ॥१०९॥

दुवालसविहंमिवि तवे सब्भितरबाहिरे कुसलदिट्ठे ।

णवि अत्थि ण वि य होही सज्झायसमं तवो-कम्मं ॥११०॥

एगदुतिमासक्खमणं संवच्छरमवि य अणसिओ होञ्जा ।

सज्झाय-झाणरहिओ एगोवासफलं पि ण लभेञ्जा ॥१११॥

उग्गमउपायणएसणाहिं सुद्धं तु निच्च भुंजंतो ।

जइ तिविहेणाउत्तो अणुसमय-भवेञ्ज सज्झाए ॥११२॥

ता तं गोयम ! एगग्गमाणसत्तं ण उवमिउं सक्का ।

संवच्छरखवणेणवि जेण तहिं णिज्जराऽणंता ॥११३॥

पंचसमिओ तिगुत्तो खंतो दंतो य निज्जरापेही ।

एगग्गमाणसो जो करेज्ज सज्झायं सो मुणी भन्ने ॥११४॥

जो वागरे पसत्थं सुयनाणं जो सुणेइ सुद्धभावो ।

ठइयासवदारत्तं तक्कालं गोयमा ! दोण्हं ॥११५॥

एगंपि जो ^१दुहत्तं सत्तं पडिबोहिउं ठवइ मग्गे ।

ससुरासुरंमि वि जगे तेणेह घोसिओ अमाघाओ ॥११६॥

धाउपहाणो कंचणभावं न य गच्छई कियाहीणो ।

एवं भव्वोवि जिणोवएसहीणो न बुज्जेज्जा ॥११७॥

गयरागदोसमोहा धम्मकहं जे करेति समयन्नू ।

अणुदियहमवीसंता सव्वप्पावाण मुच्चंति ॥११८॥

निसुणंति अ भयणिज्जं, एगंतं निज्जरं कहंताणं ।

जइ अन्नहा ण सुत्तं अत्थं वा किंचि वाएज्जा ॥११९॥

एएणं अट्ठेणं गोयमा ! एवं वुच्चइ जहा णं जावज्जीवं
अभिग्गहेणं चाउक्कालियं सज्झायं कायव्वंति, तहा अ गोयमा !
जे भिक्खू विहीए सुपसत्थनाणमहिज्जेऊण नाणमयं करेज्जा से वि
नाणकुसीले, एवमाइनाणकुसीले अणेगहा पन्नविज्जंति । ३४।

से भयवं ! कतरे ते दंसणकुसीले ? गोयमा ! ते दंसणकुसीले दुविहे
नेए आगमओ णोआगमओ अ, तत्थ आगमओ सम्मदंसणं संकंते^१
कंखंते^२ विदुगुच्छंते^३ दिट्ठीमोहं^४ गच्छंते अणोववूहाए^५ परिवडियधम्म-
सद्धा-सामन्नमुज्झिउकामाणं अथिरीकरणेणं^६ साहम्मियाणं अवच्छल्ल-
तणेणं^७ अप्पभावणाए,^८ एतेहिं अट्ठहिं थाणंतरेहिं कुसीले णेए । ३५।

णोआगमओ य दंसणकुसीले अणेगहा तंजहा- चक्खुकुसीले
घाणकुसीले सवणकुसीले जिब्भाकुसीले सरीरकुसीले । तत्थ

चक्खुकुसीले तिविहे णेए, तंजहा- पसत्थचक्खुकुसीले पसत्थापसत्थचक्खुकुसीले अपसत्थचक्खुकुसीले । तत्थ जे केइ पसत्थं उसभादितित्थयरविबं पुरओ चक्खुगोयरड्डिअं तमेव पासेमाणे अण्णं किंपि मणसा अपसत्थमज्झवसे से णं पसत्थचक्खुकुसीले, तहा जे पसत्थापसत्थचक्खुकुसीले तित्थयरविबं हियएणं अच्छीहिं अन्नं किंपि पेहिज्जा से णं पसत्थापसत्थचक्खुकुसीले, तहा पसत्थापसत्थाइं दव्वाइं, कागवगढं* कतित्तिरमयूराइं सुकंतदित्तिथियं वा दड्ढूणं तयहुत्तं चक्खुं विसज्जे से वि पसत्थापसत्थ चक्खुकुसीले, तहा अपसत्थचक्खुकुसीले तिसड्ढेहिं पयारेहिं अपसत्था सरागा चक्खूत्ति ।

से भयवं ! कयरे ते अपसत्थे तिसड्ढी चक्खुभेए ? गोयमा ! इमे तं जहा ^१सब्भुकडक्खा, तारा, मंदा, मंदालसा, वंका, विवंका, कुसीला, ^२अद्धिक्खिया, काणिक्खिया, भामिया १० उब्भामिया, चलिया, वलिया, चलवलिया, अब्हुम्मिल्ला, मिलिमिला, माणुसा, पासवा, पक्खा, सरीसिवा २० असंता, अपसंता, अथिरा, बहुविगारा, साणुरागा, रागोईरणी, रागजन्ना, ^३मयुप्पायणी, मयणी, मोहणी ३० वम्मोहणी, ^४भउईरणी, भयजन्ना, भयंकरी, हिययभेइणी, संसयावहरणी, चित्तचमक्कुप्पायणी, णिबद्धा, अणिबद्धा, गया ४० आगया, गयागया, गयगयपच्चागया, निद्धाडणी, अहिलसणी, अरइकरा, रइकरा, दीणा, दयावणा, सूराधीरा ५० हणणी, मारणी, तावणी, संतावणी, कुद्धा-पकुद्धा, घोरा-महाघोरा, चंडा, रुद्धा सुरुद्धा, हा हा भूयसरणा ६० रुक्खा ६१ सणिद्धा ६२ रुक्खसणिद्धत्ति ६३

महिलाणं चलणंगुडुकोडिणहकरणसुविलिहियदिन्नालत्तगायं^५ च णहमणिकिरणनिबद्धसक्कचावं कुम्मुन्नयं चलणं संमग्गनिमग्गवट्ठगूढजाणुं जंघापिहुलकडियडभोगजहणणियं व-णाही-थण-गुज्झंतर-कट्ठा^६ भूयलट्ठी-

१. सभूकटाक्षेति । २. अर्थेक्षेतेति । ३. मदोत्पादनीति । ४. भयोदीरणीति ।

५. गात्रमिति संभाव्यते । * 'ढं' पाठान्तरमिति । ६. 'कच्छा' इति स्यात्तर्हि कक्षेति ।

ओ अहरोद्ध-दसणपंती कन्ननासनयणजुयलभमुहानिलाडसिररुहसी-
मंत^१यामोडयपेढतिलगकुंडलकवोलकजलतमालकलावहारकडिसुत्तगणेउर-
बाहुरक्खगमणिरयणकडगकंकण-मुद्धियाइसुकंत-दित्ताभरण-दुगुल्लव-सण-
नेवत्था कामगिसंधुक्खणी निरयतिरियगइसुं अणंतदुक्ख- दायगा एस
साहिलाससरागदिट्ठित्ति एस चक्खुकुसीले । ३६।

तहा घाणकुसीले जे केई सुरहिगंधेसु संगं गच्छइ दुरहिगंधे दुगुंछे
से णं घाणकुसीले,

तहा सवणकुसीले दुविहे णेए पसत्थे अप्पसत्थे य । तत्थ जे भिक्खू
अप्पसत्थाइं कामरागसंधुक्खणुद्धीवणुज्जालण-पज्जालणसंदीवणाइं
गंधव्वनद्धधणुव्वेयहत्थिसिक्खाकामरतीसत्थाणि गंधाणि सोऊणं
णालोएज्जा जाव णं णो पायच्छित्तमणुचरेज्जा से णं अपसत्थसवणकुसीले
णेए । तहा जे भिक्खू पसत्थाइं सिद्धंताचरियपुराणधम्मकहाओ य अन्नाइं
च गन्थसत्थाइं सुणेत्ता णं न किंचि आयहियं अणुद्धे^२ णाणमयं च करेइ से
णं पसत्थसवणकुसीले णेए ।

तहा जिब्भाकुसीले से णं अणेगहा तंजहा - तित्तकडुय-
कसायमहुरंबिललवणाइं रसाइं आसायंते अदिट्ठासुयाइं इह-पर-लोगो-
भय^३विरुद्धाइं सदोसाइं मयारजयारुद्धारणाइं अयसऽभक्खाणा-
संताभिओगाइं वा भणंते असमयन्नू धम्मदेसणा-पवत्तणेण य
जिब्भाकुसीले णेए ।

से भयवं ! किं भासाएवि भासियाए कुसीलत्तं भवति ? , गोयमा !
भवइ । से भयवं । जइ एवं ताव धम्मदेसणं न कायव्वं ? गोयमा !

सावज्जऽणवज्जाणं वयणाणं जो न जाणइ विसेसं ।

वुत्तुपि तस्स न खमं किमंग पुण देसणं काउं ? ॥१२०॥ । ३७।

तहा सरीरकुसीले दुविहे णेए- चेट्ठाकुसीले विभूसाकुसीले य, तत्थ

१. 'आमोडग' कुसुमैः केशवन्धविशेष इति । २. ज्ञानमदमिति ।

३. अश्लीलभाषणमिति ।

जे भिक्खू एयं किमिकुलनिलयं सउणसाणाइभत्तं
 सडणपडणविद्धंसणधम्मं असुइं असासयं असारं सरीरगं आहारादीहिं
 णिच्चं चेद्वेज्जा णो णं इणमो भवसयसुलद्धनाणदंसणाइसमन्निएणं सरीरेणं
 अच्चंतघोरवीरुग्गकड्ढघोरतवसंजममणुद्वेज्जा से णं चेद्वाकुसीले । तहा जे
 णं विभूसाकुसीले सेऽवि अणेगहा, तं
 जहा-तेल्लाब्भंगणविमद्वणसंबाहणसिणाणुव्वद्वणपरिहसण-तंबोल-धूवण-
 वासण-दसणुग्घसण-^१असमालहण-पुप्फोमालण केस-समारण-^१सोवाहण
 दुवियड्ढगइभणिरहसिर-उवविद्वुड्डिय-^२सन्निवन्नेक्खिय-विभूसावत्ति-
 सविगार-णीयंसणुत्तरीयपाउरण-दंडगगहणमाई सरीर-विभूसा-कुसीले
 णेए, एते य पवयणउड्डाहपरे दुरंतपंतलक्खणे अदड्व्वे
 महापावकम्मकारी विभूसाकुसीले भवन्ति, गए दंसण कुसीले । ३८।

तहा चारित्त कुसीले अणेगहा मूलगुणउत्तरगुणेषु, तत्थ मूलगुणा
 पंच-महव्वयाणि राइभोयणच्छद्वाणि, तेसुं जे पमत्ते भवेज्जा, तत्थ
 पाणाइवायं पुढवीदगागणिमारुयवणप्फइवित्तिचउपंचिंदियाईणं
 संघट्टणपरियावण-किलामणोद्वणे मुसावायं सुहुमं बायरं च, तत्थ
 सुहुमं ^३‘पयला उल्ला मरुए’ एवमादी, बादरो कन्नालीगादि ।
 अदिन्नादाणं सुहुमं बादरं च, तत्थ सुहुमं तणडगलच्छारमल्लगादीणं
 गहणे, बायरं हिरण्णसुवण्णादीण । मेहुणं दिव्वोराणियं
 मणोवयकायकरण- कारावणाणुमइभेदेण अट्टारसहा, तहा करकम्मादी
 सचित्ताचित्तभेदेणं, णवगुत्तीविराहणेण वा, विभूसावत्तिएण वा ।
 परिग्गहं सुहुमं बायरं च तत्थ सुहुमं कप्पड्ढगरक्खणममत्तो बादरं
 हिरण्णमादीण गहणे धारणे वा । राई भोयणं दियागहियं दियाभुत्तं,

१. सोपानदिति । २. सन्निषण्णेक्षितमिति । ३. पयलासि किं दिवा ? ण पयलामि,
 उल्ले किं वच्चसि वासंते ? ण गच्छे, तथा मरुए-भुजंति मरुआ, अह्णे वि तत्थ
 गच्छामो । ते साहु उग्गाहियभायणा भणन्ति-कहिं ते मरुया भुजंति ? तेण भणियं
 णणु सब्वगेहेहिंति । १अ. विलेपनमिति ।

राओ गहियं दिया भुत्तं (दिया गहियं राईभुत्तं) एवमादि । उत्तरगुणा

पिंडस्स जा विसोही समितीओ भावणा तवो दुविहो ।

पडिमा अभिग्गहावि य उत्तरगुणमो वियाणाहि ॥१२१॥

तत्थ पिंडविसोही -

सोलस उग्गमदोसा सोलस उप्पायणा य दोसा उ ।

दस एसणाए दोसा संजोयणमाइ पंचेव ॥१२२॥

तत्थ उग्गमदोसा -

आहाकम्मुद्देसियपूर्वकम्मे य मीसजाये य ।

ठवणा पाहुडियाए पाओयर कीय पामिच्चे ॥१२३॥

परियट्टिए अभिहडे उब्भिन्ने मालोहडे इय ।

अच्छिज्जे अणिसट्ठे अज्झोयरए य सोलसमे ॥१२४॥

इमे उपायणादोसा -

धाई दुई निमित्ते आजीव वणीमगे तिगिच्छाए ।

कोहे माणे माया लोभे य हंवति दस एए ॥१२५॥

पुव्विपच्छासंथव विज्झामंते य चुण्णजोगे य ।

उप्पायणा य दोसा सोलसमे मूलकम्मे य ॥१२६॥

एसणादोसा -

संकिंय-मक्खिय-निक्खित्तपिहियसाहरियदायगुम्मीसे ।

अपरिणयलित्तछड्डिय एसणदोसा दस हवंति ॥१२७॥

तत्थुग्गमदोसे गिहत्थसमुत्थे, उप्पायणादोसे साहुसमुत्थे,
एसणादोसे उभयसमुत्थे, संजोयणा पमाणे इंगाल धूम कारणे पंच
मंडलीयदोसे भवंति । तत्थ संजोयणा उवगरण-भत्तपाणसब्भंत-

रबहिभेएणं ।

पमाणं -

‘बत्तीसं किर कवले आहारो कुच्छिपूरओ भणिओ ।

रागेण सइंगालं दोसेण सधूमगंति नायव्वं ॥१२८॥

कारणं - ‘वेयण वेयावच्चे इरियट्ठाए य संजमट्ठाए ।

तह पाणवत्तियाए छट्ठं पुण धम्मचिंताए ॥१२९॥

नत्थि छुहाए सरिसिया वियणा भुंजिज्ज तप्पसमणट्ठा ।

‘छाओ वेयावच्चं ण तरइ काउं अओ भुंजे ॥१३०॥

इरियंपि न सोहिस्सं पेहाइयं च संजमं काउं ।

थामो वा परिहायइ गुणणऽणुप्पेहासु य असत्तो ॥१३१॥

पिंड विसोही गया ।

इयाणिं समितीओ पंच तंजहा -

ईरियासमिई भासासमिई एसणासमिई आदाण-
भंडमत्तनिक्खेवेणासमिई उच्चारपासवणखेलसिंघाणजल्लपारिट्ठा-
वणिआसमिई । तहा गुत्तीओ तिन्नि-मणगुत्ती वयगुत्ती कायगुत्ती ।

तहा भावणाओ दुवालस तंजहा- अणिच्चत्तभावणा असरणभावणा
एगत्तभावणा अन्नत्तभावणा असुइभावणा विचित्तसंसारभावणा
कम्मासवभावणा संवरभावणा विनिज्जरभावणा लोगवित्थरभावणा धम्मं
सुयक्खायं सुपन्नत्तं तित्थयरेहिति तत्तचिंता भावणा बोहीसुदुल्लभा
जम्मंतरकोडीहिवित्ति भावणा, एवमादि थाणंतरेसुं जे पमायं कुञ्जा से
णं चारित्तकुसीले णेए । ३९।

तहा तवकुसीले दुविहे णे बज्झ-तवकुसीले अब्भितरतवकुसीले य ।
तत्थ जे केई विचित्तअणसणऊणोदरियावित्तीसंखेवणरसपरिच्चाय-

कायकिलेससंलीणयत्ति छट्ठाणेषुं न उज्जमेज्जा से णं वज्झतवकुसीले ।
तहा जे केई विचित्तपच्छित्तविणयवेयावच्च-सज्झायझाणउस्सग्गंमि
चेएसुं^१ छट्ठाणेषुं न उज्जमेज्जा से णं अब्भितरतवकुसीले ।४०।
तहा पडिमाओ बारस तंजहा -

^२‘मासादी सत्तंता एगदुगतिग सत्तराइदिण तिन्नि ।

अहराती एगराती भिक्खूपडिमाण बारसगं ।।१३२॥

तहा अभिग्गहा-दव्वओ खेत्तओ कालओ भावओ, तत्थ दव्वे
कुम्मासाइयं दव्वं गहेयव्वं, खेत्तओ गामे बहिं वा गामस्स, कालओ
पढमपोरिसीमाईसु, भावओ कोहमाइसंपन्नो जं देहिइ तं गहिस्सामि ।
एवं उत्तरगुणा संखेवओ समत्ता । समत्तो य संखेवेणं चरित्तायारो ।
तवायारोऽवि संखेवेणेहंतरगओ ।

तहा वीरियायारो एएसु चेव जा अहाणी । एएसुं पंचसु
आयाराइयारेसुं जं आउट्टियाए दप्पओ पमायओ कप्पेण वा अजयणाए
वा जयणाए वा पडिसेवियं तं तहेवालोइत्ताणं जं मग्गविऊ गुरु
उवइसंति तं तहा पायच्छित्तं नाणुचरेइ । एवं अट्टारसण्हं
सीलंगसहस्साणं जं जत्थ पए पमत्ते भवेज्जा से णं तेणं तेणं
पमायदोसेणं कुसीले णेए ।४१।

तहा ओसन्नेसु जाणे, ^३णित्थ लिहिज्जइ । पासत्थे णाणमादीणं
सच्छंदे उस्सुत्तमग्गगामी सबले णेत्थं लिहिज्जति, गंथवित्थरभयाओ ।
भगवया उण एत्थं पत्थावे कुसीलादी महापबंधेणं पन्नविए, एत्थं च जा
जा कत्थई अण्णणवायणा सा सुमुणियसमयसारेहिंतो ^४पउंजेयव्वा,
जओ मूलादरिसे चेव बहुगंथं विप्पणइ तहिं च जत्थ २ संबंधाणुलगं

१. चैतेष्विति २. मासाद्याः सप्तान्ताः सप्त ततः प्रथमा द्वितीया तृतीया च प्रत्येकं
सप्तरात्रिकी तत एकादशी अहोरात्रिकी द्वादशी चैकरात्रिकीति । ३. नात्र ग्रन्थ इति ।
‘णित्थं’ नैवं-नाऽनेनप्रकरणेति । ४. प्रयोजितव्या यथा युक्ता स्यादिति ।
‘पसोएयव्वा’ प्रश्नोत्तरव्या तथा ‘पओसेयव्वा’ इति पाठान्तरं तु चिन्त्यमिति ।

गंथं संबज्झइ तत्थ तत्थ बहुएहिं सुयहरेहिं संमिलिऊणं
संगोवंगदुवालसंगाओ सुयसमुदाओ अन्नमन्नअंगउवंगसुयक्खंध-
अज्झयणुद्देसगाणं समुच्चिणिऊण किंचि किंचि संबज्झमाणं एत्थं
लिहियंति, ण उण सकव्वं कयंति ।४२।

पंचेए सुमहापावे, जे ण वज्जेज्ज गोयमा !

संलावादीहिं कुसीलादी, भमिही सो सुमती जहा ॥१३३॥

भव कायठितिए संसारे, ^१घोर-दुक्खसमोत्थओ ।

अलहंतो दसविहे धम्मे, बोहिमहिंसाइलक्खणे ॥१३४॥

एत्थं तु कीर-दिट्ठंतं, संसग्गीगुण दोसओ ।^१

रिसिभिल्लासमवासेणं, णिप्फण्णं गोयमा ! ^२सुणे ॥१३५॥

तम्हा कुसीलसंसग्गी, सव्वोवाएहिं गोयमा !

वज्जिज्जाऽऽयहियाकंखी, अंडजदिट्ठंतजाणगे ॥१३६॥



अथ चउत्थज्झयणं (सुमइ कहा)

से णं भयवं कहं पुण तेण सुमइणा कुसीलसंसग्गी कया आसी उ
जीए अ एयारिसे अइदारुणे अवसाणे समक्खाए जेण भवकायट्ठिईए
अणोरपारं भवसायरं भमिही से वराए दुक्खसंतत्ते अलभंते
सव्वण्णुवएसिए अहिंसालक्खणे खंतादिदसविहे धम्मे बोहिंति ?
गोयमा ! णं इमे तंजहा - अत्थि इहेव भारहे वासे मगहा नाम
जणवओ, तत्थ कुसत्थलं नाम पुरं, तंमि य उवलद्धपुत्रपावे
सुमुणियजीवाजीवादिपयत्थे सुमइणाइलणामधेजे दुवे सहोयरे महड्ढीए
सड्ढगे अहेसि । अहऽन्नया अंतरायकम्मोदएणं वियलियं विहवं तेसिं,
ण उण सत्तपरक्कमंति । एवं तु अचलियसत्तपरक्कमाणं तेसिं अच्चंतं
परलोगभीरुणं विरयकूडकवडालियाणं पडिवन्नजहोवइड्डाणा-

१. घोरदुःखैः समवस्तुतः छन्न इति । २. 'मु' पाठान्तरं ।

इचउक्खंधउवासगधम्माणं अपिसुणामच्छरीणं अमायावीणं, किं बहुणा ? गोयमा ! ते उवासगा णं आवसहा गुणरयणाणं, पभवा खंतीए, निवासे सुयणमेत्तीणं, एवं तेसिं बहुवासरवन्नणिज्जगुणरयणाणंपि जाहे असुहकम्मोदएणं ण पहुप्पए संपया ताहे ण पहुप्पंति अट्ठाहियामहिमादओ इट्ठदेवयाणं जहिच्छिए पूयासक्कारे साहम्मियसंमाणो बंधुयणसंववहारे य ।१।

अहऽन्नया अचलंतेसु अतिहिसक्कारेसु, अपूरिज्जमाणेसु पणइयणमणोरहेसुं, विहडंतेसु य सुहिसयणमित्तबंधव-कलत्तपुत्तण-तुयगणेसु, विसायमुवगएहिं गोयमा ! चिंतियं तेहिं सड्ढगेहिं, तंजहा -

‘जा विहवो ता पुरिसस्स होइ आणापडिच्छओ लोओ ।

गलिउदयं घणं विज्जुलावि दूरं परिच्चयइ ॥१॥

एवं च चिंतिऊण परोप्परं भणिउमारद्धे, तत्थ पढमो -

पुरिसेण माणधणवज्जिएण परिहीणभागधेज्जेणं ।

ते देसा गंतव्वा जत्थ ^१सवासा ण दीसंति ॥२॥

तहा बीओ -

‘जस्स धणं तस्स जणो जस्सऽत्थो तस्स बंधवा वहवे ।

धणरहिओ उ मणूसो होइ समो दासपेसेहिं ॥३॥

अह एवमपरोप्परं संजोज्जेइ, संजोज्जेऊण गोयमा ! कयं देसपरिच्चायनिच्छयं तेहिं ति जहा वच्चामो देसंतरं ति, तत्थ णं कयाई पुजंति चिरचिंतिए मणोरहे, हवइ पव्वज्जाए सह संजोगो, जइ दिव्वो बहु मन्नेज्जा, जाव णं उज्जिऊणं तं कमागयं कुसत्थलं पडिपन्नं विदेसगमणं ।२।

अहऽन्नया अणुपहेणं गच्छमाणेहिं-दिद्धा तेहिं पंच साहुणो छट्ठं समणोवासगंति, तओ भणियं णाइलेण जहा भो भो सुमती ! भद्दमुह ! पेच्छ केरिसो साहुसत्थो ? ता एणं चेव साहुसत्थेणं गच्छामो, जइ पुणो वि नूणं गंतव्व, तेण भणियं - एवं होउ त्ति, तओ संमिलिया तत्थ सत्थे, जाव णं पयाणगमेगं वहंति ताव णं भणिओ सुमती णाइलेणं, जहा णं भद्दमुह ! मए हरिवंसतिलयमरगयच्छविणो सुगहियनामधेज्जस्स बावीसइमत्तिथगरस्स णं अरिद्धिनेमिनामस्स पायमूले सुहनिसण्णेणं एवमवधारियं आसी जहा जे एवंविहे अणगाररुवे भवंति ते य कुसीले, जे य कुसीले ते दिद्धीएवि निरिक्खिउं न कप्पंति, ता एते साहुणो तारिसे, मणागं न कप्पए एतेसिं समं अम्हाण गमणसंसग्गी, ता वयंतु एते, अम्हे अप्पसत्थेण चेव वइस्सामो, न कीरइ तित्थयरवयणस्सातिक्रमो, जओ णं ससुरासुरस्सावि जगस्स अलंघणिज्जा तित्थयरवाणी । अन्नं च जाव एतेहिं समं गम्मइ ताव णं चिट्ठउ ताव दरिसणं, आलावादी णियमा भवंति, ता किमम्हेहिं तित्थयरवाणिं उल्लंघित्ताणं गंतव्वं ? एवं तमणुभाविऊणं तं सुमतिं हत्थे गहाय निव्वडिओ नाइलो साहुसत्थाओ ।३।

निविद्धो य चक्खुविसोहीए फासुग-भूपएसे, तओ भणियं सुमइणा, जहा -

गुरुणो ^१मायावित्तस्स जेद्धभाया तहेव भइणीणं ।

जत्थुत्तरं न दिज्जइ हा देव ! भणामि किं तत्थ ? ॥४॥

^२आएसेऽवि इमाणं पमाणपुव्वं तहत्ति नायव्वं ।

मंगुलममंगुलं वा तत्थ विचारो न कायव्वो ॥५॥

णवरं एत्थ य मे दायव्वं अज्जमुत्तरमिमस्स ।

खरफरुस-कक्कसाणिट्ठदुट्ठनिट्ठुरसरेहिं तु ॥६॥

१. पित्रोरिति । २. 'आएसमवीमाणं' पाठान्तरमिति ।

अहवा कह उच्छलउ जीहा मे जेदुभाउणो पुरओ ?

जस्सुच्छंगे विणियंसणोऽह *रमिओऽसुइविलित्तो ॥७॥

अहवा कीस ण लज्जइ एस सयं चेव एव पभणंतो ?

जं नु कुसीले एते दिट्ठीएऽवी ण दट्ठव्वे साहुणोत्ति ॥८॥

जाव न एवइयं वायरे ताव णं इंगियागारकुसलेणं मुणियं
णाइलेणं, जहा णं अलियकसाइओ एस मणगं सुमती, ता किमहं
पडिभणामित्ति चिंतितुं समाढत्तो । जहा -

‘कज्जेण विणा अकंडे एस पकुविओ हु ताव संचिट्ठे ।

संपइ अणुणिज्जंतो ण याणिमो किं च बहु●मन्ने ? ॥९॥

ता किं अणुणेमिमिणं उयाहु वोलउ ^१खणद्धतालं वा ।

जेणुवसमियकसाओ पडिवज्जइ तं तहा सव्वं ॥१०॥

अहवा पत्थावमिणं एयस्सवि संसयं अवहरेमि ।

एस ण याणइ भदं जाव विसेसं ण परिकहियं ॥११॥

त्ति चित्तेऊणं भणिउमाढत्तो -

नो देमि तुब्भ दोसं ण यावि कालस्स देमि दोसमहं ।

जं हियबुद्धीए सहोयरावि भणिया पकुप्पंति ॥१२॥

जीवाणं चिय एत्थं दोसं कम्मट्ठजालकसियाणं ।

जे चउगइनिप्फिडिणं हिओवएसं न बुज्झंति ॥१३॥

घणरागदोस -कुग्गह-मोह-मिच्छत्तखवलियमणाणं ।

भाइ विसं कालउडं ^२हिओवएसामइ⁺पइन्नं ॥१४॥ ति,

* ‘हं’ पाठान्तरमिति । ● ‘व’ बहु पाठान्तरमिति । १. क्षणार्धकाल इत्यर्थ संभाव्यत इति ।
२. प्राकृतत्वेन पदव्यत्ययात् प्रदत्तहितोपदेशामृतमिति । + ‘य’ पाठान्तरं ।

एवमायन्निऊण तओ भणियं सुमइणा, जहा तुमं चेव सच्चवादी
 भणसु एयाइं, णवरं ण जुत्तमेयं जं साहूणं अवन्नवायं भासिज्जइ, अन्नं
 तु किं तं न पेच्छसि तुमं एएसिं महाणुभागाणं चिट्ठियं ? छट्ठइम-
 दसम-दुवालस-मास-खमणाईहिं आहारग्गहणं ^१गिम्हासुयावणट्ठा
 वीरासण-उक्कुडुयासणनाणाभिग्गह-धारणेणं च कट्ठतवोऽणुचरणेणं च
^२पसुक्खं मंससोणियंति, महाउवासगो सि तुमं महाभासासमिती विइया
 तए, जेणेरिसगुणोवउत्ताणंपि महाणुभागाणं साहूणं कुसीलत्ति नामं
 संकप्पियंति । तओ भणियं नाइलेणं - जहा मा वच्छ ! तुमं एतेणं
 परिओसमुवयासु, जहा अहयं ^३आसवारेण परिमुसिओ-
 अकामनिज्जराएवि किंचि कम्मखयं भवइ, किं पुण जं बालतवेणं ?
 ता एते बालतवस्सिणो दट्ठव्वे, जओ णं किं किंचि
 उस्सुत्तमग्गयारित्तमेएसिं न पइसे^४ ? अन्नं च-वच्छ सुमइ ! णत्थि
 ममं इमाणोवरिं कोवि सुहुमोवि मणसा वि उ पओसो
 जेणाहमेएसिं दोसगहणं करेमि, किंतु मए भगवओ तित्थयरस्स
 सगासे एरिसमवधारियं जहा कुसीले अदट्ठव्वे, ताहे भणियं
 सुमइणा, जहा जारिसो तुमं निब्बुद्धीओ तारिसो सोवि तित्थयरो
 जेण तुज्झमेयं वायरियंति, तओ एवं भणमाणस्स सहत्थेणं “झंपियं
 मुहकुहरं सुमइस्स णाइलेणं, भणिओ य जहा भद्दमुह ! मा
 जगेक्कगुरुणो तित्थयरस्सासायणं कुणसु, मए पुण भणसु
 जहिच्छियं, नाहं ते किंचि पडिभणामि, तओ भणियं सुमइणा,
 जहा जइ एतेवि साहुणो कुसीला ता एत्थ जगे ण कोई
 सुसीलो अत्थि, तओ भणियं णाइलेणं, जहा भद्दमुह ! सुमइ !
 इत्थं जयालंघणिज्जवक्कस्स भगवओ वयणमायरेयव्वं जं

१. ‘गिम्हायवणट्ठाण’ गिम्हायाव- णट्ठाण वेति पाठान्तरमिति । २. प्रशुष्कमिति । ३. ‘आसवारेणं
 परामुसिओऽन्न’ इति पाठान्तरम् । अत्रार्थः आ प्रातःकालात् विचारितवानहमिति । ४.
 प्रविशेदिति । ५. आच्छादितमिति ।

१चऽत्थक्क्रियाए न विसंवएज्जा, णो णं बालतवस्सीण चेद्धियं, जओ णं जिणइंदवयणेण नियमओ ताव कुसीले इमे दीसंति, पव्वज्जाए पुण गंधंपि णो दीसए एसिं, जेणं पिच्छ २ तावेयस्स साहुणो बिइज्जयं मुहणंतगं दीसइ ता एस ताव अहिगपरिग्गहदोसेणं कुसीलो, ण एयं साहूण भगवयाऽऽइदं जमहियपरिग्गहवि धारणं करे, ता वच्छ ! हीणसत्तेहिं नो एसेवं मणसाऽज्झवसे जहा जइ ममेयं मुहणंतगं विप्पणस्सिहिइ ता बीयं कथं कहां पावेज्जा ? नो एवं चिंतेइ मूढो जहा अहिगाणुवओगोवहीधारणेणं मज्झं परिग्गहवयस्स भंगं होही, अहवा किं संजमेऽभिरओ एस मुहणंतगाइसंजमोवओगधम्मोवगरणेण वीसीएज्जा ? नियमओ ण विसाए*, णवरमत्ताणयं हीणसत्तोऽहमिइ पायडे उम्मग्गायरणं च पयंसेइ, पवयणं च मइलेइत्ति ।

एसो उ ण पेच्छसि सामन्नचत्तो, एएणं कल्लं तीए विणियंसणाइ इत्थीए अंगयट्ठिं निज्झाइऊण जं नालोइयं पडिक्कंतं तं किं तए ण विन्नायं ? एस उ ण पिच्छसि परुढविप्फोडगविन्हियाणणो ? एतेणं संपयं चेव लोयट्ठाए सहत्थेणमदिन्नछारगहणं कयं, तएवि दिट्ठमेयंति । एसो उ ण पेच्छसि संघाडिए कल्ले एएणं अणुग्गए सूरिए उट्ठेह वच्चाओ उग्गयं सूरियंति तया विहसियमिणं । एसो उ पेच्छसीमेसिं जिट्ठसेहो एसो अज्ज रयणीए अणोवउत्तो पसुत्तो विज्जुक्काए फुसिओ, ण एतेणं कप्पगहणं कयं तहा पभाए हरियतणं वासाकप्पंचलेणं संघट्टियं, तहा बाहिरोदगस्स णं परिभोगं कयं, बीयकायस्सोप्परेणं परिसक्किओ, अविहीए एस खारथंडिलाओ महरं थंडिलं संकमिओ, तहा पहपडिवन्नेणं साहुणा कमसयाइक्कमे ईरियं २पडिक्कमियव्वं ।

तहा चरेयव्वं, तहा चिट्ठेयव्वं, तहा भासेयव्वं, तहा सएयव्वं, जहा छक्कायमइगयाणं जीवाणं सुहुमवायरपज्जतापज्जत-

१. अर्थक्रियया न विसंवदेदिति । २. योगान्तरारिष्युणेति शेषः संभाव्यते । * विसीए, पाठान्तरमिति ।

गमागमसव्वजीवपाणभूयसत्ताणं संघट्टणपरियावणकिलामणोद्वणं वा ण भवेज्जा । ता एतेसिं एवइयाणं एयस्स एक्कमवि ण एत्थं दीसए जं पुण मुहणंतगं पडिलेहमाणो अज्ज मए एस चोइओ जहा एरिसं पडिलेहणं करेसि जेण वाउक्कायं फडफडस्स संघट्टेज्जा । ^१सरियं च पडिलेहणाए संतियं कारणं ति । जस्सेरिसं जयणं एरिसं सोवओगं बहु काहिसि संजमं ण संदेहं जस्सेरिसमाउत्तत्तणं तुज्झंति । एत्थं च तएऽहं विणिवारिओ जहा णं मूगो ठाहि, ण अम्हाणं साहूहिं समं किंचि भणेयव्वं कप्पे । ता किमेयं तं विसुमरियं ? ता भद्दमुह ! एएण समं संजमत्थाणंतराणं एगमवि णो परिरक्खियं । ता किमेस साहू भन्नेज्जा जस्सेरिसं पमत्तत्तणं ? ण एस साहू जस्सेरिसं ^२णिद्धम्मसंपलत्तणं । भद्दमुह ! पेच्छ २ सुणो इव णित्तिसो छक्कायनिमद्दणो कहाभिरमे एसो ? अहवा वरं सूणो जस्स णं सुसुहुममवि नियमवयभंगं णो भवेज्जा । एसो उ नियमभंगं करेमाणो केणं उवमेज्जा ? ता वच्छ सुमइ भद्दमुह ! ण एरिसकत्तव्वायरणाओ भवंति साहू । एतेहिं च कत्तव्वेहिं तित्थयरवयणं सरेमाणो को एतेसिं वंदणगमवि करेज्जा ?

अन्नं च - एएसिं संसग्गेणं कयाई अम्हाणंपि चरणकरणेसु सिढिलत्तं भवेज्जा जेणं पुणो २ आहिंडेमो घोरं भवपरंपरं । तओ भणियं सुमइणा, जहा जइ एए कुसीले जइ वा सुसीले तहावि मए गंतव्व एएहिं समं जाव एएहिं समं पव्वज्जा कायव्वा । जं पुणं तुमं करेसि तमेव धम्मं, णवरं को अज्ज तं समायरिउं सक्का ? ता मुयसु करं, मए एतेहिं समं गंतव्वं जाव णं णो दूरं वयंति ते साहुणोत्ति । तओ भणियं णाइलेणं भद्दमुह ! सुमइ णो कल्लाणं एतेहिं समं गच्छमाणस्स तुज्झंति, अहयं च तुब्भं हियवयणं भणामि । एवं ठिए

जं चेव बहुगुणं तमेवाणुसेवय, णाहं ^१तए दुक्खेणं धरेमि ।

अह अन्नया अणेगोवाएहिंषि निवारिज्जंतो ण ठिओ । गओ सो मंदभग्गो सुमती गोयमा ! पव्वइओ य । अह अन्नया वच्चंतेणं मासपंचगेणं आगओ महारोखो दुवालससंवखरिओ दुब्भिकखो । तओ ते साहुणो तक्कालदोसेणं अणालोइयपडिक्कंता मरिऊणोववन्ना^२ भूयजक्खरक्खसपिसायादीणं वाणमंतरदेवाणं वाहणत्ताए । तओ चविऊणं मिच्छजातीए कुणिमाहारकूरज्जवसायदोसओ सत्तमाए । तओ उव्वट्ठिऊणं तइयाए चउवीसीगाए सम्मत्तं पावेहिंति । तओ य सम्मत्तलंभभवाओ तइयभवे चउरो सिज्झिहिंति, एगो ण सिज्झिहिइ जो सो पंचमगो सव्वजेट्ठो, जओ णं सो एगंतमिच्छदिट्ठी अभव्वो य । से भयवं ! जे णं से सुमती से भव्वे उयाहु अभव्वे ?, गोयमा ! भव्वे । से भयवं ! जइ णं भव्वे ता णं मए समाणे कहिं समुप्पन्ने ? गोयमा ! परमाहम्मियासुरेसुं । ४।

से भयवं । किं भव्वे परमाहम्मियासुरेसु समुप्पज्जइ ? गोयमा ! जे केई घणरागदोसमोहमिच्छत्तोदएणं ^३सुववसियंपि परमहिओवएसं अवमन्नेत्ताणं दुवालसंगं च सुयनाणमप्यमाणीकरिय अयाणित्ता य समयसब्भावं अणायारं पसंसियाणं तमेव उच्छप्पेज्जा जहा सुमइणा उच्छप्पियं 'न भवन्ति एए कुसीले साहुणो, अहाणं एएऽवि कुसीले तो एत्थं जगे न कोई सुसीलो अत्थि निच्छियं मए एतेहिं समं पव्वज्जा कायव्वा तहा जारिसो तं निब्बुद्धीओ तारिसो सोऽवि तित्थयरो' ति एव्मं उच्चारमाणेणं से णं गोयमा ! महंतंपि तवमणुट्ठेमाणे परमाहम्मियासुरेसुं उववज्जेज्जा । से भयवं ! परमाहम्मियासुरदेवाणं उव्वट्ठे समाणे से सुमती कहिं उववज्जेज्जा ? गोयमा ! तेणं मंदभागेणं अणायारपसंसुच्छप्पणं करे- माणेणं सम्मगपणासणं अभिणंदियं, तक्कम्मदोसेणं अणंतसंसारियत्तणमज्जियं, तो केत्तिए उववाए तस्स ।

१. 'ते' पाठान्तरमिति । २. 'न्ने' पाठान्तरं । ३. सुनिश्चितमपीति ।

साहेजा ? जस्स णं अणेगपोगलपरियट्टेसुवि णत्थि चउगइसंसाराओ अवसाणंति तहावि संखेवओ सुणसु गोयमा !

इणमेव जंबूदीवदीवं परिक्खिविऊणं ठिए जे एस लवणजलही एयस्स णं जं थामं सिंधूमहानदी पविट्ठा तप्पएसाओ दाहिणेणं दिसाभाएणं पणपन्नाए जोयणेसुं वेइयाए मज्झंतरं अत्थि पडिसंतावदायगं नाम अद्धतेरसजोयणपमाणं हत्थिकुंभायारं थलं । तस्स य लवणजलोवरेणं अद्धुट्ठजोयणाणि उस्सेहो । तहिं च णं अच्चंतघोरतिमिसंधयाराओ-घडियालगसंठाणाओ ^१सीयालीसं गुहाओ । तासुं च णं ^२जुगं जुगेणं निरंतरे जलयारिणो मणुया परिवसंति । ते य वज्जरिसहनारायणसंधयणे महाबलपरक्कमे अद्धतेरसरयणीपमाणेणं संखेज्ज-वासाऊ महुमज्जमंसप्पिए सहावओ इत्थीलोले परमदुवन्न-सुउमालअणिट्ठखररुसियतणू ^३मायंगवइकयमुहे सीहघोरदिट्ठी कयंतभीसणे ^४अदावियपट्ठी असणिव्व निट्ठुरपहारी दप्पुद्धरे य भवंति । ^५तेसिं ति जाओ अंतरंडगगोलियाओ ताओ गहाय चमरीणं संतिएहिं सेयपुच्छवालेहिं गुंथिऊणं जे केई उभयकन्नेसु निबंधिऊण महग्घुत्तमजच्चरयणत्थी सागरमणुपविसेज्जा से णं जलहत्थि-महिस-गोहिग-मयर-महामच्छ-तंतुसुंसुमारपभितीहिं दुट्ठसावतेहिं ^६अभेसिए चेव सव्वंपि सागरजलं आहिंडिऊण जहिच्छाए जच्चरयणसंगहं करिय अहवसरीरे आगच्छे । ताणं च अंतरंडगोलियाण संबंधेण ते वराए गोयमा ! अणोवमं सुघोरं दारुणं दुक्खं पुव्वज्जियरोद्वकम्मवसगा अणुभवन्ति । से भयवं ! केणं अट्ठेणं ? गोयमा ! तेसिं जीवमाणेणं कोसमज्झे ताओ गोलियाओ गहेउं जे जया उण ते घेप्पंति तया बहुविहाहिं नियंतणाहिं महया साहसेणं

१. सप्तचत्वारिंशदिति । २. प्रतियुगमिति । ३. चाण्डालस्येव विकृतमुखा विकृतमेव वैकृतमिति । ४. अदर्शितपृष्ठा इति । ५. तेषामिति-वक्ष्यमाणप्रकारेणेति ।

६. 'अभिसिए' 'अभिए' च पाठान्तरमिति ।

सन्नद्ध-बद्ध-करवाल-कुंत-चक्काइपहरणाऽऽडोवेहिं बहुसूरधीरपुरिसेहिं बुद्धिपुव्वगेणं ^१सजीवियडोलाए धेप्पंति । तेसिं च धिप्पमाणाणं जाइं सारीरमाणसाइं दुक्खाइं भवंति ताइं सव्वेसु नारयदुक्खेसु जइ परं उवमेज्जा ।

से भयवं ! को उण ताओ अंतरंडगोलियाउ गेण्हिज्जा ? गोयमा ! तत्थेव लवणसमुद्दे अत्थि रयणदीवं नाम अंतरदीवं । तस्सेव पडिसंतावदायगाओ थलाओ एगतीसाए जोयणसएहिं तं निवासिणो मणुया ।

भयवं ! कयरेणं पओगेणं ? खेत्तसभावसिद्धेणं पुव्वपुरिससिद्धेणं च विहाणेणं ।

से भयवं ! कयरे उण से पुव्वपुरिससिद्धे विही तेसिं ति ? गोयमा ! तहियं रयणदीवे अत्थि वीसएगुणवीसअट्टारसदसट्ठसत्तधणूपमाणाइं घरट्ठसंठाणाइं वर-वइर-सिला-संपुडाइं, ताइं च विघाडेऊणं ते रयणदीवनिवासिणो मणुया पुव्वपुरुष-सिद्धखेत्तसहावसिद्धेणं चेव जोगेणं पभूयमच्छिया महूए ^२अब्भंतरेउं अच्चंतलेवाडाइं काऊणं तओ तेसिं पक्कमंसखंडाणि बहूणि जच्चमहुमज्जभंडगाणि पक्खिवंति । तओ एयाइं करिय सुरुंददीहमहदुमकट्ठेहिं ^३आरुंभेत्ताणं सुसाउपोराणमज्ज-मच्छिगामहुओ य पडिपुन्ने बहुए लाउगे गहाय पडिसंतावदाय-गथलमागच्छंति । जाव णं तत्थागए समाणे ते गुहावासिणो मणुया पेच्छंति ताव णं तेसिं रयणदीवगणिवासिमणुयाणं वहाय पडिधावंति । तओ ते तेसिं महुपडिपुन्नं लाउगं पयच्छिऊणं ^४अब्भत्थपओगेणं तं कट्ठजाणं ^५जइणयरवेगं दुवं खेविऊणं रयणदीवाभिमुहे वच्चंति । इयरे

१. स्वजीवितदोलया-स्वजीवितपणेनेति । २. अन्तः क्षिप्रवेति । ३. आरुन्ध्यति ।

४. अभ्यस्तप्रयोगेणेति ५. जयितरवेगं द्रुतं प्रेर्यति ।

य णं तं महुमांसादीयं पुणो सुदुयरं तेसिं पिट्ठीए ^१(विक्खिरमाणा) धावन्ति । ताहे गोयमा ! जाव ण अच्चासन्ने भवन्ति ताव णं सुसाउमहुगंधदव्वसक्कारियपोराणमज्जं लाउगमेगं पमुत्तूण पुणो वि जइणयरवेगेणं रयणदीवहुत्तो वच्चन्ति । इयरे य तं सुसाउमहुगंधदव्वसक्कारियं पोराणमज्जमासाइयं, पुणो ^२सुदक्खयरे तेसिं पिट्ठीए धावन्ति । पुणो वि तेसिं महुपडिपुन्नलाउगमेगं मुंचन्ति ।

एवं ते गोयमा ! महुमज्जलोलिए संपलग्गे तावाणयन्ति जाव णं तं घरट्ठसंठाणे वइरसिलासंपुडे । ता जाव णं तावइयं भूभागं ^३संपरावन्ति ताव णं जमेवासन्नं वइरसिलासंपुडं जंभायमाणपुरिसमुहागारं विहाडियं चिद्धइ । तत्थेव जाइं महुमज्जपडिपुन्नाइं समुद्धरियाइं सेसलाउगाइं ताइं तेसिं पिच्छमाणाणं ते तत्थ मोत्तूणं नियनियनिलएसु वच्चन्ति । इयरे य महुमज्जलोलिए जाव णं तत्थ पविसन्ति ताव णं गोयमा ! जे ते पुव्वमुक्के पक्कमंसखंडे जे य ते महुमज्ज पडिपुन्ने भंडगे जं च महूए चेवालित्तं सव्वं तं सिलासंपुडं पेक्खन्ति ताव णं तेसिं महंतं परिओसं, महंतं तुट्ठीं, महंतं पमोदं भवइ । एवं तेसिं महुमज्जपक्कमंसं परिभुंजेमाणाणं जाव णं गच्छन्ति सत्तट्ठ-दसपंचेव वा दिणाणि ताव णं ते रयणदीव निवासी मणुया एगे सन्नद्धसाउहकरग्गा तं वइरसिलं ^४वेढिऊणं सत्तट्ठपंतीहिं णं ठन्ति, अन्ने तं घरट्ठसिलासंपुडमायलित्ताणं एगट्ठं मेलन्ति, तंमि य मेलिज्जमाणे गोयमा ! जइ णं कहिंचि ^५तुडित्तिभागओ तेसिं एकस्स दोण्हंपि वा णिप्फेडं भवेज्जा तओ तेसिं रयणदीवनिवासिमणुयाणं ^६सविडवि-पासाय-मंदिरस्सवउप्पायणं, तक्खणा चेव तेसिं हत्था संघारकालं भवेज्जा । एवं तु गोयमा ! तेसिं तेणं वज्जसिलाघरट्ठसंपुडेणं गिलियाणंपि तहियं चेव जाव णं सव्वट्ठिए

१. क्वचित् पाठे दृश्यते । २. सुदक्षतरा इति । ३. संप्राप्नुवन्तीति । ४. संपुटं वेष्टयित्वा स्थगयन्तीति । ५. कालस्य सूक्ष्मांशेनेति । ६. प्रासाद एव मन्दिरमिति सवुक्षप्रासादमन्दिरस्योत्पादनं भवेदिति शेषः ।

दलिऊणं ण संपीसिए सुकुमालिया य ताव णं तेसिं णो पाणाइकमं भवेज्जा । ते य अट्ठी वइरमिव दुद्ले । तेसिं तु तत्थ य वइरसिलासंपुडं^१ कण्हगगोणगेहिं आउत्तमादरेणं अरहट्टघरट्टखरसण्हिग^२-चक्रमिव परिमंडलं^३ भमालियं ताव णं खंडंति जाव णं संवच्छरं । ताहे तं तारिसं अच्चंतघोरदारुणं सारीरमाणसं महादुक्खसन्निवायं समणुभवेमाणानं पाणाइकमं भवेइ । तहावि ते तेसिं अट्ठीओ णो फुडंति, नो दोफले भवंति, णो संदलिज्जंति, णो विदलिज्जंति, णो पघरिसंति, नवरं जाइं काइवि संधि संधाणबंधणाइं ताइं सब्वाइं विच्छुडेत्ताणं विजज्जरीभवंति,

तओ णं इयरुवलघरट्टस्सेव परिसवियं चुण्णमिव किंचि अंगुलाइयं अट्ठिखंडं दट्ठूणं ते रयणदीवगे परिओसमुव्वहंते सिल्लासपुडाइं^४ उच्चियाडिऊणं ताओ अंतरंडगोलियाओ गहाय जे तत्थ^५ तुच्छहणे ते अणेगरित्थसंघाएणं विक्किणंति । एतेणं विहाणेणं गोयमा ! ते रयणदीवनिवासिणो मणुया ताओ अंतरंडगोलियाओ गेण्हंति ।

से भयवं ! कहं ते वराए तं तारिसं अच्चंतघोरदारुणसुदुस्सहं दुक्खनियरं विसहमाणे निराहारपाणगे संवच्छरं जाव पाणे वि धारयंति ? गोयमा ! सकयकम्माणुभावाओ । सेसं तु पण्हवागरणवृद्धवि-वरणादवसेयं । ५।

से भयवं ! तओऽवी मए समाणे से सुमती जीवे कहिं उववायं लभेज्जा ? गोयमा ! तत्थेव पडिसंतावदायगथले, तेणेव कमेणं सत्त भवंतरे, तओवि दुट्ठसाणे, तओवि^६ कण्हे तओ वि वाणमंतरे, तओवि लिंबत्ताए वणस्सईए, तओ वि मणुएसुं इत्थित्ताए, तओ वि

१. कृष्णबलीवर्देरायुक्तमिति २. खरपाषाणादिकं श्लक्ष्णीकारणं चक्रमिवेति ।

३. भ्रमयित्वेति । 'भमाडिय पाठान्तर मिति । ४. उद्धाट्येति । ५. तुच्छधना दरिद्रा इति । ६. महिष इत्यर्थं संभाव्यत इति ।

छट्टीए, तओ वि मणयत्ताए कुट्टी, तओ वि वाणमंतरे, तओ वि महाकाए
 जूहाहिवती ^१गए, तओवि मरिऊणं मेहुणासत्ते अणंतवणप्फतीए, तओ
 वि अणंतकालाओ मणुएसु संजाए, तओ वि मणुए महानेमिक्की, तओ
 वि सत्तमाए तओवि महामच्छे चरिमोयहिंमि, तओ सत्तमाए, तओवि
 गोणे, तओवि मणुए, तओवि ^२विडव-कोइलियं, तओवि जलोयं,
 तओवि महामच्छे, तओवि तंदुलमच्छे, तओवि सत्तमाए, तओवि
 रासहे, तओवि साणे, तओवि किमी, तओवि ददुरे, तओवि तेउकाए,
 तओवि कुंथू, तओवि महुरे, तओवि चडए, तओवि उद्देहियं,
 तओवि वणप्फईए, तओवि अणंतकालाओ मणुएसु इत्थीरयणं,
 तओवि छट्टाए, तओ ^३कणेरु, तओ वेसामंडियं नाम पट्टणं,
 तत्थोवज्झायगेहासन्ने लिंबत्तेण वणस्सई, तओवि मणुएसुं खुज्जित्थी,
 तओवि मणुयत्ताए पंडगे, तओवि मणुयत्तेणं दुग्गए, तओवि दमए
 तओवि पुढवादीसुं भवकायड्डिईए पत्तेयं तओ मणुए, तओ
 बालवतस्सी, तओ वाणमंतरे, तओवि पुरोहीए, तओवि सत्तमाए,
 तओवि मच्छे, तओवि सत्तमाए, तओवि गोणे, तओवि मणुए
 महासम्महिट्ठी अविरए चक्कहरे, तओ पढमाए, तओवि इब्भे, तओवि
 समणे अणगारे, तओवि अणुत्तरसुरे, तओवि चक्कहरे महासंघयणे
 भवित्ताणं निव्विन्नकामभोगे जहोवइड्डं संपुत्रं संजमं काऊण गोयमा !
 से णं सुमइजीवे पडिनिव्वुडेज्जा ।६।

तहा य जे भिक्खू वा भिक्खुणी वा परपासंडीणं पसंसं करेज्जा जे
 यावि णं णिण्हगाणं पसंसं करेज्जा जे णं निण्हगाणं अणुकूलं भासेज्जा
 जे णं निण्हगाणं आययणं पवेसेज्जा जे णं निण्हगाणं गंथसत्थपयक्खरं
 वा परुवेज्जा जे णं निण्हगाणं संतिए कायकिलेसाइए तवे इ वा संजमे
 इ वा नाणे इ वा विन्नाणे इ वा सुए इ वा पंडिच्चे इ वा

अभिमुहमुद्धपरिसामज्जगए सलाहेज्जा सेऽविय णं परमाहम्मिएसु
उववज्जेज्जा जहा सुमती ।७।

से भयवं ! तेणं सुमइजीवेणं तक्कालं समणत्तणं अणुपालियं तथा
वि एवविहेहिं नारयतिरियनरामरविचित्तोववाएहिं एवइयं संसाराहिंणं ?
गोयमा ! णं जं आगमबाहाए लिंगगहणं कीरइ तं डंभमेव केवलं
सुदीहसंसारहेउभूयं, णो णं तं ^१परियायं लिक्खइ, तेणेव संजमं दुक्करं
मन्ने । अन्नं च समणत्ताए से य पढमे संजमपए जं
^२कुसीलसंसङ्गीणिरिहणं अहा णं णो णिरिहरे ता संजममेव ण ठाएज्जा,
ता तेणं सुमइणा तमेवायरियं, तमेव पसंसियं, तमेव उस्सप्पियं, तमेव
सलाहियं, तमेवाणुद्धियंति । एयं च सुत्तमइक्कमित्ताणं एत्थं पए जहा
सुमती तथा अन्नेसिमवि सुंदर-विउरसुदंसण-सेहरणीलभद-सभोमेय-
खगगधारि-तेणग-समण-दुद्धंतदेवरक्खिय-मुणिणामादीणं को संखाणं
करेज्जा ? ता एयमद्धं विइत्ताणं कुसीलसंभोगे सव्वहा वज्जणीए ।८।

से भयवं ! किं ते साहुणो तस्स णं णाइलसइढगस्स छंदेणं
कुसीले उयाहु आगमजुत्तीए ? गोयमा ! कहं सइढगस्स वरायस्सेरिसो
सामत्थो ? जेणं तु सच्छंदताए महाणुभावाण सुसाहूणं अवन्नवायं
भासे, तेणं सइढगेणं हरिवंसतिलयमरगयच्छविणो
बावीसइमधम्मतिथयरअरिद्धनेमिनामस्स सयासे वंदणवत्तियाए गएणं
आयारंगं अणंतगमपज्जवेहिं पन्नविज्जमाणं समवधारियं, तत्थ य छत्तीस-
आयारे पन्नविज्जंति, तेसिं च णं जे केइ साहू वा साहूणी वा
अन्नयरमायारमइक्कमेज्जा से णं गारत्थीहिं उवमेयं, अहऽन्नहा समणुद्धे
वाऽऽयरेज्जा वा पण्णविज्जा वा तओ णं अणंतसंसारी भवेज्जा, ता
गोयमा ! जे णं तु मुहणंतगं अहिगं परिग्गहियं तस्स ताव
पंचममहव्वयस्स भंगो, जे णं तु इत्थीए अंगोवंगाइं णिज्झाइऊण

१. 'परियायं संजमे लिक्खइ' इवचित् पाठान्तरमिति । २. कुसीलसंसर्गतो निस्सरणमिति ।

णालोइयं तेणं तु बंभचेरगुत्ती विराहिया, तव्विराहणेणं जहा एगदेसदड्ढो पडो दड्ढो भन्नइ तथा चउत्थमहव्वयं भग्गं, जेणं य सहत्थेणुप्पाइऊणादिन्ना भूर्इ पडिसाहिया तेणं तु तइयमहव्वयं भग्गं, जेण य अणुग्गओ सूरिओ उग्गओ भणिओ तस्स य बीयवयं भग्गं, जेण उण अफासुगोदगेण अच्छीणि पहीयाणि तहा अविहीए पहथंडिल्लणं संकमणं कयं बीयकायं च अक्कंतं वासाकप्पस्स अंचलगेणं हरियं संघट्टियं विज्जूए फुसिओ मुहणंतगेण अजयणाए फडफडस्स वाउकायमुदीरियं तेणं तु पढमवयं भग्गं, तब्भंगे पंचण्हंपि महव्वयाणं भंगो कओ, ता गोयमा ! आगमजुत्तीए एते कुसीला साहूणो, जो णं उत्तरगुणाणं पि भंगं ण इट्ठं, किं पुण जं मूलगुणाणं ?

से भयवं ! ता एयणाएणं वियारिउणं महव्वए घेत्तव्वे ?, गोयमा ! इमे अट्ठे समट्ठे ।

से भयवं ! केणं अट्ठेणं ? गोयमा ! सुसमणेइ वा सुसावएइ वा, ण तइयं भेयंतरं, अहवा जहोवइट्ठं सुसमणत्तमणुपालिया अहा णं जहोवइट्ठं सुसावगत्तमणुपालिया, णो सभणो समणत्तमइयरेज्जा, नो सावए सावयत्तमइयरेज्जा, निरइयारं वयं पसंसे, तमेव य समणुट्ठे, णवरं जे समणधम्मसे से णं अच्चंतघोरदुच्चरे तेणं असेसकम्मक्खयं, जहन्नेणंपि अट्ठभवब्भंतरे मोक्खो, इयरेणं तु सुद्धेणं देवगइं सुमाणुसत्तं वा सायपरंपरेणं मोक्खो, नवरं पुणोवि तं संजमाओ, ता जे से समणधम्मसे से अ वियारे सुवियारे ^१पणवियारे तहत्तिमणुपालिया, उवासगाणं पुण सहस्साणि विधाणे जो जं परिवाले तस्साइयारं च ण भवे तमेव गिण्हे ।९।

से भयवं ! सो उण णाइलसड्ढगो कहिं समुप्पन्नो ? गोयमा ! सिद्धीए ।

१. पञ्चमहाव्रतविषयकविचारवान् यदिवा 'पुण्णवियारे' पाठान्तरं प्रतीत्य पुर्णो विचारो विमर्शो यदिषयकः स श्रमण धर्म इति । क्वचित् 'पण्ण' इत्यपि ।

से भयवं कंहं ?, गोयमा ! तेणं महाणुभागेणं तेसिं 'कुसीलाणं
णिउट्टेऊणं तीए चेव बहुसावयतरुसंडसंकुलाए घोरकंताराडईए
सव्वपावकलिमलकलंकविप्पमुक्कं तिथयरवयणं परमहियं सुदुल्लहं
भवसएसुपित्ति कलिऊणं अच्चंत-विसुद्धासएणं फासुयदेसंमि
निप्पडिकम्मं निरइयारं पडिवन्नं पायवोवगमणमणसणंति, अह अन्नया
तेणेव पएसेणं विहरमाणो समागओ तिथयरो अरिद्धनेमी तस्स य
अणुगहट्टाए तेण य अचलियसत्तो भव्वसत्तोत्ति काऊणं,
उत्तिमट्टपसाहणी कया साइसया देसणा, तमायन्नमाणो
सजलजलहरनिनायदेवदुंदुहीनिग्घोसं तिथयरभारइं सुहज्जवसायपरो
आरुढो खवगसेढीए अउव्वकरणेणं, अंतगडकेवली जाओ, एतेणं
अट्टेणं एवं वुच्चइ जहा णं गोयमा ! सिद्धीए, ता गोयमा !
कुसीलसंसग्गीए विप्पहियाए एवइयं अंतरं भवइत्ति । १०।

महानिसीहस्स चउत्थमज्झयणं ॥

अत्र चतुर्थाध्ययने बहवः सैद्धांतिकाः केचिदालापकान्न सम्यक्
श्रद्धधत्वेव, तैरश्रद्धधानैरस्माकमपि न सम्यक् श्रद्धधानं इत्याह हरिभद्रसूरिः,
न पुनः सर्वमेवेदं चतुर्थाध्ययनं, अन्यानि वा अध्ययनानि, अस्यैव
कतिपयैः परिमितैरालापकैरश्रद्धधानमित्यर्थः, यत् स्थानसमवायजीवा-
भिगमप्रज्ञापनादिषु न कथंचिदिदमाचख्ये यथा प्रतिसंतापकस्थलमस्ति,
तद्गुहावासिनस्तु मनुजास्तेषु च परमाधार्मिकाणां पुनः पुनः सप्ताष्टवारान्
यावदुपपातः तेषां च तैर्दारुणैर्वज्रशिलाघरट्टसंपुटैर्गिलितानां
परिपीड्यमानानामपि संवत्सरं यावत्प्राणव्यापत्तिर्न भवतीति, वृद्धवादस्तु
पुनर्यथा तावदिदमार्थं सूत्रं, विकृतिर्न तावदत्र प्रविष्टा, प्रभूताश्चात्र श्रुतस्कंधे
अर्थाः सुष्ट्वतिशयेन सातिशयानि गणधरोक्तानि चेह वचनानि, तदेवं
स्थिते न किंचिदाशंकनीयं । ११।



अथ नवनीयसार नाम पंचमज्झयणं

एवं कुसीलसंसर्गि, सव्वोवाएहिं ^१पयहिउं ।

उम्मग्गपट्टियं गच्छं, जे वासे लिंगजीविणं ॥१॥

से णं निविग्घमकिलिद्धं, सामन्नं संजमं तवं ।

ण लभेज्जा तेसि याभावे^२, मोक्खे दूरयरं ठिए ॥२॥

अत्थेगे गोयमा ! पाणी, जे ते उम्मग्गपट्टियं ।

गच्छं संवासइत्ताणं, भमती भवपरंपरं ॥३॥

जामद्धजामं दिणपक्खं, मासं संवच्छरंपि वा ।

सम्मग्गपट्टिए गच्छे, संवसमाणस्स गोयमा ! ॥४॥

लीलायऽलसमाणस्स, निरुच्छाहस्स धीमणं ।

^३पेक्खोविक्खीए ^४अन्नेसिं, महाणुभागाणं साहुणं ॥५॥

उज्जमं सव्वथामेसु, घोरवीरतवाइयं ।

^५ईसक्खासंकभयलज्जा, तस्स वीरियं समुच्छले ॥६॥

वीरिएणं तु जीवस्स, समुच्छलिएण गोयमा !

जंमंतरकए पावे, पाणी हियएण निट्ठवे ॥७॥

तम्हा निउणं निभालेउं, गच्छं सम्मग्गपट्टियं ।

निवसेज्ज तत्थ आजम्मं, गोयमा ! संजए मुणी ॥८॥

से भयवं ! कयरे णं से गच्छे जे णं वासेज्जा ? एवं तु गच्छस्स
पुच्छा जाव णं वयासी ? गोयमा ! जत्थ णं समसत्तुमित्तपक्खे

१. 'पयहिउं' पाठान्तरमाश्रित्य प्रहायेति । २. तेषां चाऽभाव इति । ३. प्रेक्षया चोपेक्षया -
सामीप्येनेक्षणेन च प्रवृत्ता स्यात् स्वर्था यया सा प्रेक्षोपेक्षी तया भाषायां देखादेखीती ।

४. अन्नेसुं पा. । ५. ईर्षाऽऽख्याशङ्काभयलज्जात इति ।

अद्यंतसुनिम्मलविसुद्धंतकरणे आसायणाभीरु सपरोवयारमब्भुञ्जए
 अद्यंतं छज्जीवनिकायवच्छले सव्वालंबणविप्पमुक्के अद्यंतमपमादी
 सविसेसचेतियसमयसब्भावे रोद्धट्टज्झाणविप्पमुक्के सव्वत्थ
 अणिगूहियबलवीरियपुरिसकारपरक्कमे एगंतेण संजईकप्पपरिभोगविरए
 एगंतेण धम्मंतरायभीरु एगंतेण 'सत्तरुई' एगंतेण इत्थिकहा-भत्त-
 कहा-तेणकहा-रायकहा-जणवयकहा-परिभट्टायारकहा एवं तिन्नि-तिय-
 अट्टारस-बत्तीसं विचित्तसप्पभेयसव्वविगहाविप्पमुक्के एगंतेण जहासत्तीए
 अट्टारसण्हं सीलंगसहस्साणं आराहगे सयलमहत्तिसाणुसमयमगिलाए
 जहोवइट्ठमग्गपरुवए बहुगुणकलिए मग्गट्टिए सपरोवयारमब्भुञ्जए
 अखलियसीले महायसे महासत्ते महाणुभागे नाणदंसण-चरणगुणोववेए
 गणी ।१।

से भयवं ! किमेस वासेज्जा ?, गोयमा ! अत्थेगे जे णं वासेज्जा
 अत्थेगे जे णं णो वासेज्जा, से भयवं ! केणं अट्टेणं एवं वुच्चइ जहा णं
 गोयमा ! अत्थेगे जे णं वासेज्जा अत्थेगे जे णं नो वासेज्जा ? गोयमा !
 अत्थेगे जे णं आणाए ठिए अत्थेगे जे णं आणाविराहगे, जे णं
 आणाठिए से णं सम्मदंसणनाणचरित्तराहगे, जे णं
 सम्मदंसणनागचरित्तराहगे से णं गोयमा ! अद्यंतविऊ सुपद्धरकंडुञ्जए
 मोक्खमग्गे, जे य उण आणाविराहगे से णं अणंताणुबंधी कोहे से णं
 अणंताणुबंधी माणे से णं अणंताणुबंधी कइयवे से णं अणंताणुबंधी
 लोभे, जे णं अणंताणुबंधीकोहकसायचउक्के से णं घणराग-
 दोसमोहमिच्छतपुंजे, जे णं घणरागदोसमोहमिच्छतपुंजे से णं
 अणुत्तरघोरसंसारसमुद्दे जे णं अणुत्तरघोरसंसारसमुद्दे, से णं पुणो २
 जंमे पुणो २ जरा पुणो २ मच्चू जे णं पुणो २ जम्मजरामरणे से णं
 पुणो २ बहुभवंतरपरावत्ते जे णं पुणो २ बहुभवंतरपरावत्ते से णं पुणो
 चुलसीइजोणिलक्खमाहिंडणं, जे णं पुणो २ चुलसीइजोणि-

लक्खमाहिंङणं से णं पुणो २ सुदूसहे घोस्तिमिसंधयारे रुहिरच्चिलिच्चिले
 वसापूयवंतपित्तसिंभचिक्खल्लदुग्गंधासुइचिलीणजंबालकेय^१किव्विसखरंट-
 पडिपुत्ते अणिट्ठउव्वियणिज्जअइघोरचंडमहारोहदुक्खदारुणे गब्भपरं-
 परापवेसे जे णं पुणो २ दारुणे गब्भपरंपरापवेसे से णं दुक्खे से णं
 केसे से णं रोगायंके से णं सोगसंतावुव्वेयगे जे णं दुक्खकेसरोगायंके-
 सोगसंतावुव्वेयगे से णं अणिव्वुत्ती जे णं अणिव्वुत्ती से णं
 जहिट्ठमणोरहाणं असंपत्ती जे णं जहिट्ठमणोरहाणं असंपत्ती से णं ताव
 पंचप्पयार-अंतरायकम्मोदए जत्थ पंचप्पयार-अंतरायकम्मोदए तत्थ णं
 सव्वदुक्खाणं अगगणीभूए पढमे ताव दारिद्रे जे णं दारिद्रे से णं
 अयसब्भक्खाण-अकित्तिकलंकरासीणं मेलावगागमे, जे णं
 अयसब्भक्खाणअकित्तिकलंकरासीणं मेलावगागमे से णं
 सयलजणलज्जणिज्जे निंदणिज्जे गरहणिज्जे खिसणिज्जे दुग्गुच्छणिज्जे
 सव्वपरिभूए जीविए जे णं सव्वपरिभूए जीविए से णं
 सम्मदंसणनानाणचरित्ताइगुणेहिं सुदूरयरेणं विप्पमुक्के चेव मणुयजम्मे
 अन्नहा वा सव्वपरिभूए चेव ण भवेज्जा, जे णं
 सम्मदंसणनानाणचरित्ताइगुणेहिं सुदूरयरेणं विप्पमुक्के चेव, ^२निलवो से णं
 अणिरुद्धासवदारत्ते चेव, जे णं अणिरुद्धासवदारत्ते चेव से णं
 बहलथूलपावकम्माययणे जे णं बहलथूलपावकम्माययणे से णं बंधे से
 णं बंदी से णं गुत्ती से णं चारगे से णं सव्वमकल्लाणममंगलजाले
 दुव्विमोक्खे कक्खडघणबद्धपुट्टनिकाइए कम्मगंठी जे णं
 कक्खडघणबद्धपुट्टनिकाइयकम्मगंठी से णं एगिंदियत्ताए वेइंदियत्ताए
 तेइंदियत्ताए चउरिंदियत्ताए पंचिंदियत्ताए नारयतिरिच्छकुमाणुसेसु
 अणेगविहं सारीरमाणसं दुक्खमणुभवमाणे णं वेइयव्वे, एएणं अट्ठेणं

१. केतं गृहं यदिवा 'केस' पाठान्तर मिति । २, निरवकाशो विविधारम्भसमारम्भेषु
 प्रवृत्तत्वात् यदिवा 'निसवे' इति पाठान्तरमाश्रित्य कञ्चन न शृणोतीति निश्चवाः
 संभाव्यते ।

गोयमा ! एवं वुच्चइ जहा अत्थेगे जे णं वासेज्जा अत्थेगे जे णं नो वासेज्जा ।२।

से भयवं ! किं मिच्छत्तेणं उच्छाइए केइ गच्छे भवेज्जा ? गोयमा ! जे णं से आणाविराहगे गच्छे भवेज्जा से णं निच्छयओ चेव मिच्छत्तेणं उच्छाइए गच्छे भवेज्जा, से भयवं ! कयरा उण सा आणा जीए ठिए गच्छे आराहगे भवेज्जा ? गोयमा ! संखाइएहिं थाणंतरेहिं गच्छस्स णं आणा पन्नत्ता जीए ठिए गच्छे आराहगे भवेज्जा ।३।

से भयवं ! किं तेसिं संखातीताणं गच्छमेराथाणंतराणं अत्थि केइ अन्नयरे थाणंतरे जे णं उस्सग्गेण वा अववाएण वा कहवि पमायदोसेणं असई अइक्कमेज्जा, अइक्कंतेण वा आराहगे भवेज्जा ? गोयमा ! णिच्छयाओ नत्थि ।

से भयवं ! केणं अट्ठेणं एवं वुच्चइ जहा णं निच्छयओ नत्थि ? गोयमा ! तित्थयरे णं ताव तित्थयरे तित्थे पुण चाउवन्ने समणसंघे, से णं गच्छेसु पइड्डिए, गच्छेसुवि णं सम्मदंसणनाणचरित्ते पइड्डिए, ते य सम्मदंसणनाणचरित्ते परमपुज्जाणं पुज्जयरे परमसरण्णाणं सरण्णे परमसेव्वाणं सेव्वयरे, ताइं च जत्थ णं गच्छे अन्नयरे ठाणे कत्थइ विराहिज्जंति से णं गच्छे सम्मग्गपणासए उम्मग्गदेसए, जे णं गच्छे सम्मग्गपणासए उम्मग्गदेसए से णं निच्छयओ चेव अणाराहगे, एएणं अट्ठेणं गोयमा ! एवं वुच्चइ जहा णं संखादीयाणं गच्छमेराठाणंतराणं जे णं गच्छे एगमन्नयरट्ठाणं अइक्कमेज्जा से णं एगंतेणं चेव अणाराहगे ।४।

से भयवं ! केवइयं कालं जाव गच्छस्स णं मेरा पन्नविया ? केवइयं कालं जाव णं गच्छस्स मेरा णाइक्कमेयव्वा ? गोयमा ! जाव णं महायसे महासत्ते महाणुभागे दुप्पसहे णं अणगारे ताव णं गच्छमेरा पन्नविया जाव णं महायसे महासत्ते महाणुभागे दुप्पसहे अणगारे ताव णं गच्छमेरा नाइक्कमेयव्वा ।५।

से भयवं ! कयरेहिं णं लिंगेहिं वड्कमियमेरं आसायणा-बहुलं
 उम्मग्ग-पड्डियं गच्छं वियाणेज्जा ? गोयमा ! जे असंठवियं सच्छंदयारिं
 अमुणियसमयसब्भावं लिंगोवजीविं पीढफलगपडिबद्धं
 अफासुबाहिरपाणगपरिभोइं अमुणियसत्तमंडलीधम्मं सव्वावस्स-
 गकालाइक्कमयारिं आवस्सगहाणिकरं ऊणाइरित्तावस्सगपवत्तं गणणाप-
 माणऊणाइरित्तरयहरणपत्तदंडगमुहणंतगाइउवगरणधारिं गुरुवगरण-
 परिभोइं उत्तरगुणविराहगं गिहत्थच्छंदाणुवित्ताइसम्माण-पवित्तं
 पुढवीदगागणिवाऊवणप्फईवीयकायतसपाणवित्तिचउपंचेदियाणं कारणे
 वा अकारणे वा असती पमायदोसाओ संघट्टणादीसुं अदिट्ठदोसं
 आरंभपरिग्गहपवित्तं अदिन्नालोयणं विगहासीलं अकालयारिं
 अविहिसंगहियउवगहिय-अपरिक्खियपव्वाविओवट्ठावियअसिक्खविय-
 दसविहविणयसामायारिं लिंगिणं इड्ढि-रससायागारव-जायाइमय-
 चउक्कसाय-ममकार-अहंकार-कलि-कलहझंझाडमर-रोद्धट्टज्झाणोवगयं
 अठाविय-बहु-मयहरं देदेहित्तिनिच्छोडियकरं बहुदिवसकयलोयं
 विज्जामंततंतजोगजाणाहिज्जणिक्कबद्धकक्खं अवूढमूलजोग-णिओगं
 दुक्कालाइआलंबणमासज्ज अकप्पकीयगाइ- परिभुंजणसीलं जं किंचि
 रोगायंकमालंविय तिगिच्छाहिणंदणसीलं जंकिंचि रोगायंकमासीय दिया
 तुयट्टणसीलं कुसील-संभासणाणुवित्तिकरणसीलं अगीयत्थ-
 मुहविणिग्गय^१अणेगदोसपायडिढवयणाणुट्ठा- णसीलं असि-धणु-
 खग्ग-गंडीव-कुंत-चक्काइपररणपरिग्गहियाहिंडणसीलं साहुवेसुज्झिय-
 अन्नवेसपरिवत्तकयाहिंडणसीलं एवं जाव णं अब्हुट्ठाओ पयकोडीओ
 ताव णं गोयमा ! असंठवियं चेव गच्छं वायरेज्जा । ६।

तहा अण्णे इमे बहुप्पगारे लिंगे गच्छस्स णं गोयमा ! समासओ
 पन्नविज्जंति ।

एते य णं एयारिसे णं गुरुगुणे विन्नेए तं जहा गुरु ताव
सव्वजगजीवपाणभूयसत्ताणं माया भवइ, किं पुण जं गच्छस्स ? से णं
सीसगणाणं एगंतेणं हियं मियं पत्थं इहपरलोगसुहावहं आगमाणुसारेणं
हिओवएसं पयाइ, से णं देविंदनरिंदरिद्धीलंभाणंपि पवरुत्तमे
गुरुवएसप्पयाणलंभे, तं चाणुकंपाए परमदुक्खिए जम्मजरामरणादीहिं
णं इमे भव्वसत्ता कहं णु णाम सिवसुहं पावंतित्तिकाऊणं गुरुवएसं
पयाइ, णो णं वसणाहिभूए जहा णं गहग्घत्थे उम्मत्ते, ^१अत्थिए इ वा
जहा णं मम इमेणं हिओवएसपयाणेणं अमुगड्डलाभं भवेज्जा, णो णं
गोयमा ! गुरु सीसाणं निस्साए संसारमुत्तरेज्जा, णो णं परक्कएहिं
सव्वसुहासुहेहिं कस्सइ संबद्धं अत्थि ।७।

‘ता गोयम ! एत्थ एवं ठियंमि जइ दढचरित्तगीयत्थो ।

गुरुगुणकलिए य गुरु भणेज्ज असइं इमं वयणं ॥९॥

मिण गोणसंगुलीए गणेहि वा दंतचक्कलाइं से ।

तं तहमेव करेज्जा कज्जं तु तमेव जाणंति ॥१०॥

आगमविऊ कयाई सेयं कायं भणिज्ज आयरिया ।

तं तह सद्दहियव्वं भवियव्वं कारणेण तहिं ॥११॥

जो गेण्हइ गुरुवयणं भन्नंतं भावओ पसन्नमणो ।

ओसहमिव पिज्जंतं तं तस्स सुहावहं होइ ॥१२॥

पुत्तेहिं चोइया ^२पुरकएहिं सिरिभायणं भवियसत्ता ।

गुरुमागमेसिभद्दा देवयमिव पज्जुवासंति ॥१३॥

बहुसोक्खसयसहस्साण दायगा मोयगा दुहसयाणं ।

आयरिया फुडमेयं केसि पएसीय ते हेऊ ॥१४॥

नरयगइगमणपरिहत्थए कए तह पएसिणा रत्ता ।
 अमरविमाणं पत्तं तं आयरिप्पभावेणं ॥१५॥
 धम्मइएहिं अइसुमहुरेहिं कारणगुणोवणीएहिं ।
 पल्हायंतो हिययं सीसं चोइज्ज आयरिओ ॥१६॥
 एत्थं चायरिआणं पणपन्नं होंति कोडिलक्खाओ ।
 कोडी सहस्से कोडी सए य तह एत्तिए चेव ॥१७॥
 एतेहिं मज्जाओ एगे निव्वुडइ गुणगणाइन्ने ।
 सव्वुत्तमभंगेणं तित्थयरस्साऽणुसरिस गुरु ॥१८॥
 सेऽविय गोयमा ! ^१देयवयण ^२सूरित्थणा य सेसाइं ।
 तं तह आराहेज्जा जह तित्थयरे चउव्वीसं ॥१९॥
 सव्वमवी एत्थ पए दुवालसंगं सुयं तु भणियव्वं ।
 भवइ तहावि मिणमो समाससारं परं भन्ने ॥२०॥
 तं जूहा - मुणिणो संघं तित्थं गण पवयण मोक्खमग्ग एगद्धा ।
 दंसणनाणचरित्ते घोरुग्गतवं चेव गच्छणामे य ॥२१॥
 पयलंति जत्थ धगधगधगस्स गुरुणावि चोइए सीसे ।
 रागदोसेणं अह अणुसएणं तं गोयम ! ण गच्छं ॥२२॥
 गच्छं महाणुभागं तत्थ वसंताण निज्जरा विउला ।
 सारण वारण चोयणमादीहिं ण दोसपडिवत्ती ॥२३॥
 गुरुणो छंदणुवत्ते सुविणीए जियपरीसहे धीरे ।
 णवि थद्धे णवि लुद्धे णवि गारविए न विगहसीले ॥२४॥

खंते दंते मुत्ते गुत्ते वेरग्गमग्गमल्लीणे ।
 दसविहसामायारी आवस्सगसंजमुज्जुत्ते ॥२५॥
 खरफरुसकक्कसाणिट्ठदुट्ठनिट्ठुर-गिराए सयहुत्तं ।
 निब्बच्चण निद्धाडणमादीहिं न जे पओसंति ॥२६॥
 जे य ण अकित्तिजणए णाजस-जणए णऽकज्जकारी य ।
 न य पवयणुड्ढाहकरे कंठगयपाणसेसे वि ॥२७॥
 सज्झायझाणनिरए घोरतवच्चरणसोसियसरीरे ।
 गयकोहमाणकइयव-दुरुज्झियरागदोसे य ॥२८॥
 विणओवयारकुसले ^१सोलसविहवयण-भासणे कुसले ।
 गिरवज्जवयणभणिरे ण य बहुभणिरे ण पुणऽभणिरे ॥२९॥
 गुरुणा कज्जमकज्जे खरकक्कसफरुसनिट्ठुरमणिट्ठं ।
 भणिए तहत्ति इच्छं भणंति सीसे तयं गच्छं ॥३०॥
 दुरुज्झिय-पत्ताइसु-ममत्तए निप्पिहे सरीरेवि ।
 जायामायाहारे बायालीसेसणाकुसले ॥३१॥
 तंपि ण रुवरसत्थं भुंजंताणं न चेव दप्पत्थं ।
 अक्खोवंगनिमित्तं संजमजोगाण वहणत्थं ॥३२॥
 वेयण वेयाणच्चे इरियट्ठाए य संजमट्ठाए ।
 तह पाणवत्तियाए छट्ठं पुण धम्मचिंताए ॥३३॥
 अप्पुव्वनाणगहणे थिरपरिचियधारणेक्कमुज्जुत्ते ।
 सुत्तं अत्थं उभयं जाणंति अणुट्ठयंति सया ॥३४॥

अट्ट नाणदंसणचारित्तायार ^१णवचउक्कंमि ।
 अणिगूहियबलवीरिए अगिलाए धणियमाउत्ते ॥३५॥
 गुरुणा खरफरुसाणिट्टदुट्टनिट्टरगिराए सयहुत्तं ।
 भणिरे णो ^२पडिसूरिति जत्थ सीसे तयं गच्छं ॥३६॥
 तवसा अचिंतउप्पन्नलद्धिसाइसयरिद्धिकलिए वि ।
 जत्थ न हीलंति गुरुं सीसे तं गोयमा ! गच्छं ॥३७॥
 तेसट्टितिसयपावाउयाण विजया विट्ठजसपुंजे ।
 जत्थ न हीलंति गुरुं सीसे तं गोयमा ! गच्छं ॥३८॥
 जत्थाखलियममिलियं अव्वाइद्धं पयक्खरविसुद्धं ।
 विणओवहाणपुव्वं दुवालसंगं पि सुयनाणं ॥३९॥
 गुरुचलणभत्तिभरनिब्भरिकपरिओसलद्धमालावे ।
 अज्झीयंति सुसीसा एगगमणा स गोयमा ! गच्छं ॥४०॥
 सगिलाणसेहबालाउलस्स गच्छस्स दसविहं विहिणा ।
 कीरइ वेयाक्कं गुरुआणत्तीए तं गच्छं ॥४१॥
 दसविहसामायारी जत्थ ठिए भव्वसत्तसंघाए ।
 सिज्झंति य बुज्झंति य ण य खंडिज्झइ तयं गच्छं ॥४२॥
 इच्छा मिच्छा तहक्कारो, आवस्सिया य निसीहिया ।
 आपुच्छणा य पडिपुच्छा, छंदणा य निमंतणा ॥४२॥अ॥
 उवसंपया य काले समायारी भवे दसविहा उ ॥४३॥

१. ज्ञानदर्शन - चारित्राचार सत्काश्रतुविंशतिस्तथा तपसो द्वादश सर्वे मिलिताः षट्त्रिंशद्
 भेदास्तेष्विति । २. प्रतिकूलयन्तीति ।

जत्थ य जिट्ठकणिट्ठो जाणिञ्जइ जेट्ठविणयबहुमाणं ।
 दिवसेणवि जो जेट्ठो णो हीलिञ्जइ तयं गच्छं ॥४४॥
 जत्थ य अज्जाकप्पं पाणच्चाएवि रोरवदुब्भिकखे ।
 ण य परिभुञ्जइ सहसा गोयम ! गच्छं तयं भणियं ॥४५॥
 जत्थ य अज्जाहिं समं थेरावि ण उल्लवंति गयदसणा ।
 ण य णिज्झायंति त्थीअंगोवंगाइं तं गच्छं ॥४६॥
 जत्थ य सन्निहिउक्खडआहडमादीण नामगहणेऽवि ।
 पूर्वकम्मा भीए आउत्ता ^१कप्पतिप्पमि ॥४७॥
 जत्थ य पच्चंगुब्भडदुञ्जय ^२जोव्वणमरट्ठदप्पेणं ।
 वाहिज्जंतावि मुणी णिक्खंति तिलोत्तमंपि तं गच्छं ॥४८॥
 वायामेत्तेणवि जत्थ भट्ठसीलस्स निग्गहं विहिणा ।
 बहुलद्धिजुयस्सावि कीरइ गुरुणा तयं गच्छं ॥४९॥
 मउए निहुयसहावे हासदवविवज्जिए विगहमुक्के ।
 असमंजसमकरेंते गोयरभूमऽट्ठ विहरंति ॥५०॥
 मुणिणो णाणाभिग्गहदुक्करपच्छित्तमणुचरंताणं ।
 जायइ चित्तचमक्कं देविंदाणंपि तं गच्छं ॥५१॥
 जत्थ य वंदणपडिक्कमणमाइमंडलिविहाणनिउणन्नू ।
 गुरुणो अखलियसीले सययं कट्ठुग्गतवनिरए ॥५२॥
 जत्थ य उसभादीणं तित्थयराणं सुरिंदमहियाणं ।
 कम्मट्ठविप्पमुक्काण आणं न खलिञ्जइ स गच्छो ॥५३॥

१. कल्पदाने-त्रिः पात्रप्रक्षालन इति । २. यौवनोत्कृष्टदर्पेण - बाध्यमाना अपि मुनयो
 नेक्षन्ते तिलोत्तमां-अप्सरोविशेषमपीति ।

तित्थयरे तित्थयरे तित्थं पुण जाण गोयमा ! संघं ।
 संघे य ठिए गच्छे गच्छठिए नाणदंसणचरित्ते ॥५४॥
 णादंसणस्स नाणं दंसणनाणे भवंति सव्वत्थ ।
 भयणा चारित्तस्स तु दंसणनाणे धुवं अत्थि ॥५५॥
 नाणी दंसणरहिओ चरित्तरहिओ उ भमइ संसारे ।
 जो पुण चरित्तजुत्तो सो सिज्झइ नत्थि संदेहो ॥५६॥
 नाणं पगासयं सोहओ तवो संजमो य गुत्तिकरो ।
 तिण्हंपि समाओगे मोक्खो णेक्कस्सवि अभावे ॥५७॥
 तस्सवि य ^१सकंगाइं नाणादितिगस्स खंतिमादीणि ।
 तेसिं चेक्केक्कपयं जत्थाणुड्डेज्जइ स गच्छो ॥५८॥
 पुढविदगागणिवाऊवणप्फई तह तसाण विविहाणं ।
 मरणंतेऽवि ण मणसा कीरइ पीडं त्रयं गच्छं ॥५९॥
 जत्थ य बाहिरपाणस्स बिदुमेत्तंपि गेम्हमादीसुं ।
 तण्हासोसियपाणे मरणेवि मुणी ण इच्छंति ॥६०॥
 जत्थ य सूलविसूइय अन्नयरे वा विचित्तमायंके ।
 उप्पन्ने जलणुज्जालणाइं ण करेति मुणी तयं गच्छं ॥६१॥
 जत्थ य तेरसहत्ये अज्जाओ परिहरंति णाणहरे ।
 मणसा सुयदेवयमिव ^२सव्वमिवित्थी परिहरंति ॥६२॥
^३इतिहासखेडु-कंदप्प^४णाहियवादं ण कीरए जत्थ ।
 धावण डेवणलंघण ण ^५मयारजयार-उच्चरणं ॥६३॥

१. क्षान्त्यादीनि ज्ञानादित्रिकस्य स्वाङ्गानीति । २. सार्वभिव सर्वज्ञामिव स्त्रियं परिहरन्ति ज्ञानधरा इति । ३. पुरावृत्तमिति । ४. नास्तिकवाद इति । ५. मकारजकार-अश्लील शब्दोच्चारणमिति ।

जत्थित्थी-करफरिसं अंतरियं कारणेवि उप्पन्ने ।
 दिट्ठीविसदित्तग्गीविसं व वज्जिज्जइ स गच्छो ॥६४॥
 जत्थित्थीकरफरिसं लिंगी अरहावि सयमवि करेज्जा ।
 तं निच्छयओ गोयम ! जाणिज्जा मूलगुणवाहा ॥६५॥
 मूलगुणेहिं उ खलियं बहुगुणकलियंपि लद्धिसंपन्नं ।
 उत्तमकुलेवि जायं निद्धाडिज्जइ जहिं तयं गच्छं ॥६६॥
 जत्थ हिरण्णसुवण्णे धणधन्ने कंसदूस^१फलहाणं ।
 सयणाण आसणाण य न य परिभोगो से तयं गच्छं ॥६७॥
 जत्थ हिरण्णसुवण्णं हत्थेण परागयंपि नो छिप्पे ।
 कारणसमप्पियंपि हु खणनिमिसद्धंपि तं गच्छं ॥६८॥
 दुद्धरबंभव्वयपालणट्ठ अज्जाण चवलचित्ताणं ।
 सत्त सहस्सा परिहारठाणवी जत्थत्थि तं गच्छं ॥६९॥
 जत्थुत्तरवडपडिउत्तरेहिं अज्जाओ साहुणा सद्धिं ।
 पलवंति सुकुद्धावी गोयम ! किं तेण गच्छेण ? ॥७०॥
 जत्थ य गोयम ! बहुविहविकप्पकल्लोलचंचलमणाणं ।
 अज्जाणमणुट्ठिज्जइ भणियं तं केरिसं गच्छं ? ॥७१॥
 जत्थेकंगसरीरा साहू सह साहुणीहिं हत्थ सया ।
 उड्ढं गच्छेज्ज बहिं गोयम ! गच्छंमि का मेरा ? ॥७२॥
 जत्थ अ अज्जाहिं समं संलावुल्लावमाइववहारं ।
 मोत्तुं धम्मवएसं गोयम ! तं केरिसं गच्छं ॥७३॥

भयवमणियतविहारं णिययविहारं ण ताव साहूणं ।

कारणनीयावासं जो सेवे तस्स का वत्ता । ॥७४॥

निम्ममनिरहंकारे उज्जुत्ते नाणदंसणचरित्ते ।

सयलारंभविमुक्के अप्पडिबद्धे सदेहेवि ॥७५॥

आयारमायरंते एगक्खेत्तेवि गोयमा ! मुणिणो ।

वाससयंपि वसंते गीयत्थेऽऽराहगे भणिए ॥७६॥

जत्थ ^१समुद्देसकाले साहूणं मंडलीए अज्जाओ ।

गोयम ! ठवंति पादे इत्थीरज्जं न तं गच्छं ॥७७॥

जत्थ य हत्थसएवि य रयणीचारं चउण्हमूणाओ ।

उड्ढं दसण्हमसइं से करेति अज्जा उ णो तयं गच्छं ॥७८॥

अववाएणवि कारणवसेण अज्जा चउण्हमूणाउ ।

गाऊयमवि परिसक्कंति जत्थ तं केरिसं गच्छं ? ॥७९॥

जत्थ य गोयम ! साहू अज्जाहिं समं पंहमि अट्ठणा ।

अववाएणवि गच्छेज्ज तत्थ गच्छंमि का मेरा ? ॥८०॥

जत्थ य तिसट्ठिभेयं चक्खूरागग्गिउदीरणिं साहू ।

अज्जाउ निरिक्खेज्जा तं गोयम ! केरिसं गच्छं ? ॥८१॥

जत्थ य अज्जालद्धं ^२पडिग्गहदंडादिविविहमुवगरणं ।

परिभुज्जइ साहूहिं तं गोयम ! केरिसं गच्छं ॥८२॥

अइदुलहं भेसज्जं बलबुद्धिविवद्धणंपि पुट्ठिकरं ।

अज्जालद्धं भुंजइ का मेरा तत्थ गच्छंमि ? ॥८३॥

सोऊण गइं सुकुमालियाए तह ससगभसगभइणीए ।
 ताव न वीससियव्वं सेयट्ठी धम्मिओ जाव ॥८४॥
 दढचारित्तं मोत्तुं आयरियं मयहरं च गुणरासिं ।
 अज्जा वट्ठावेई तं अणगारं न तं गच्छं ॥८५॥
 १घणगज्जियहयकुहुकुहुयविज्जुदुग्गेज्जमूढहिययाओ ।
 होज्जा वाऽवारियाओ इत्थीरज्जं न तं गच्छं ॥८६॥
 पच्चक्खा सुयदेवी तवलद्धीए सुराहिवणुयावि ।
 जत्थ २रिएजेक्कज्जा इत्थीरज्जं न तं गच्छ ॥८७॥
 गोयम ! पंचमहव्वय गुत्तीणं तिण्ह पंचसमिईणं ।
 दसविह धम्मस्सेक्कं कहवि खलिज्जइ न तं गच्छं ॥८८॥
 दिणदिक्खियस्स दमगस्स अभिमुहा अज्जचंदणा अज्जा ।
 निच्छइ आसणगहणं सो विणओ सव्वअज्जाणं ॥८९॥
 वाससयदिक्खियाए अज्जाए अज्जदिक्खिओ साहू ।
 भत्तिभरनिब्भराए वंदणविणएण सो पुज्जो ॥९०॥
 अज्जियलाभे गिल्हा सएण लाभेण जे असंतुट्ठा ।
 भिक्खायरियाभग्गा अन्नयउत्तं गिराऽऽहेति ॥९१॥
 गयसीसगणं ओमे भिक्खायरिया अपच्चलं थेरं ।
 गणिहिंति ण ते पावे अज्जियलाभं गवेसंता ॥९२॥
 ओमे सीसपवासं अप्पडिबद्धं अजंगमत्तं च ।
 ण गणेज्ज एगखेत्ते गणेज्ज वासं णिययवासी ॥९३॥

१. घनगर्जितमिव धावद्भयोदरप्रदेशसमीपोत्पन्नवायुविशेष इव विद्युदिव दुर्गाह्यगूढहृदयाः
 स्त्रिय इति । २. प्रविशेदिति ।

आलंबणाण भरिओ लोओ जीवस्स अजउकामस्स ।
 जं जं पिच्छइ लोए तं तं आलंबणं कुणइ ॥९४॥
 जत्थ मुणीण कसाए चमढिज्जंतेवि परकसाएहिं ।
 णेच्छेज्ज समुद्धेउं सुणिविद्धो पंगुलव्व तयं गच्छं ॥९५॥
 धम्मंतरायभीए भीए संसारगब्भवसहीणं ।
 णोदीरिज्ज कसाए मुणी मुणीणं तयं गच्छं ॥९६॥
 सीलतवदाणभावणचउविह धम्मंतरायभवभीए ।
 जत्थ बहू गीयत्थे गोयम ! गच्छं तयं वासे ॥९७॥
 जत्थ य कम्मविवागस्स चिद्धियं चउगईए जीवाणं ।
 णाऊण महवरद्धेऽवी नो पकुप्पंति तं गच्छं ॥९८॥
 जत्थ य गोयम ! ^१पंचण्ह कहवि सूणाण एक्कमवि होज्जा ।
 तं गच्छं तिविहेणं वोसिरिय वइज्ज अन्नत्थ ॥९९॥
 सूणारंभपवित्तं गच्छं वेसुज्जलं व ण वसेज्जा ।
 जं चारित्तगुणेहिं तु उज्जलं तं निवासेज्जा ॥१००॥
 तित्थयरसमो सूरी दुज्जयकम्मट्टमल्लपडिमल्ले ।
 आणं अइक्कमंते ते कापुरिसे न सप्पुरिसे ॥१०१॥
 भट्ठायारो सूरी भट्ठायाराणुविकखओ सूरी ।
 उम्मग्गटिओ सूरी तिण्णिवि मग्गं पणासंति ॥१०२॥
 उम्मग्गटिए सूरिंमि निच्छयं भव्वसत्तसंघाए ।
 जम्हा तं मग्गमणुसरंति तम्हा ण तं जुत्तं ॥१०३॥

एक्कंपि जो दुहत्तं सत्तं परिबोहिउं ठवे मग्गे ।
 ससुरासुरंमिवि जगे तेणेहं घोसियं अमाघायं ॥१०४॥
 भूए अत्थि भविस्संति केई जगवंदणीय-कमजुयले ।
 जेसिं परहियकरणेक्कबद्धलक्खाण वोलिही कालं ॥१०५॥
 भूए अणाइकालेण केई होहेति गोयमा ! सूरी ।
 नामग्गहणेणवि जेसिं होज्ज नियमेण पच्छित्तं ॥१०६॥
 एयं गच्छे ववत्थं दुप्पसहाणंतरं तु जो खंडे ।
 तं गोयम ! जाण गणिं निच्छयओऽणंतसंसारी ॥१०७॥
 जं सयलजीवजगमंगलेक्ककल्लाणपरमकल्लाणे ।
 सिद्धि-पहे वोच्छिण्णे पच्छित्तं होइ तं गणिणो ॥१०८॥
 तम्हा गणिणो समसत्तुमित्तपक्खेण परहियरणं ।
 कल्लाणकंखुणा अप्पणो य आणा ण लंधेया ॥१०९॥
 एवं मेरा ण लंधेयव्वत्ति, एयं गच्छववत्थं लंधेतु तिगारवेहिं पडिबद्धे ।
 संखाईए गणिणो अज्जवि बोहिं न पावन्ति ॥११०॥
 ण लभेहिंति य अन्ने अणंतहुत्तोवि परिभमंतित्थं ।
 चउगइभव-संसारे चिद्धिज्ज चिरं सुदुक्खत्ते ॥१११॥
 चोदसरज्जूलोगे गोयम ! वालग्ग कोडिमेत्तंपि ।
 तं नत्थि पएसं जत्थ अणंतमरणे न संपत्ते ॥११२॥
 चुलसीइजोणिलक्खे सा जोणी नत्थि गोयमा ! इहइं ।
 जत्थ ण अणंतहुत्तो सव्वे जीवा समुप्पन्ना ॥११३॥
 सूईहिं अग्गिवन्नाहिं, संभिन्नस्स निरंतरं ।
 जावइयं गोयमा ! दुक्खं, गब्भे अट्ठगुणं तयं ॥११४॥

गब्भाओ निष्फिडंतस्स, जोणीजंतनिपीलणे ।

कोडीगुणं तयं दुक्खं, कोडाकोडिगुणंपि वा ॥११५॥

जायमाणाण जं दुक्खं, मरमाणाण जंतुणं ।

तेण दुक्खविवागेणं, जाइं न सरंति अत्तणिं ॥११६॥

नाणाविहासु जोणीसु, परिभमंतेहिं गोयमा !

तेण दुक्खविवागेण, संभरिणण णवि जिच्चए ॥११७॥

जम्मजरामरणदोगच्चवाहीओ चिइंतु ता ।

लज्जेज्जा गब्भवासेणं, को ण बुद्धो महामई ? ॥११८॥

बहुरुहिरपूइजंबाले असुईकलिमलपूरिए ।

अणिट्टे य दुब्भिगंधे, गब्भे को धिइं लभे ? ॥११९॥

ता जत्थ दुक्खविक्खिरणं, एगंत सुहपावणं ।

से आणा नो खंडेज्जा, आणाभंगे कुओ सुहं ? ॥१२०॥

से भयवं ! अट्ठण्हं साहूणमसइं उस्सग्गेण वा अववाएण वा चउहिं अणगारेहिं समं गमणागमणं नियंठियं तथा दसण्हं संजईणं हेट्ठा उस्सग्गेणं चउण्हं तु अभावे अववाएणं हत्थसयाओ उद्धं गमणं णाणुण्णायं आणं वा अइक्कमंते साहू वा साहूणीओ वा अणंतसंसारिए समक्खाए ता णं से दुप्पसहे अणगारे असहाए भवेज्जा सावि य विण्हुसिरी अणगारी असहाया चेव भवेज्जा एवं तु ते कहां आराहगे भवेज्जा ? गोयमा ! णं दुस्समाए परियंते ते चउरो जुगप्पहाणे खाइगसम्मत्तनाणदंसणचरित्तसमन्निए भवेज्जा, तत्थ णं जे से महायसे महानुभागे दुप्पसहे अणगारे से णं अच्चंत विसुद्ध-सम्मद्वंसणनाणचरित्तगुणेहिं उववेए सुदिट्ठसुगइमगे आसायणाभीरु अच्चंतपरमसद्धासंवेगवेरग्गसम्मग्गट्ठिए णिरब्भगयणामलसरयकोमुई-पुत्तिम्माइंदुकरविमलपरपरमजसे वंदाणं परमवंदे पुज्जाणं परमपुज्जे

भवेज्जा तहा सावि य सम्मत्तनाणचरित्तपडागा महायसा
महासत्ता-महाणुभागा एरिसगुणजुत्ता चेव सुगहियनामधेज्जा विण्हुसिरी
अणगारी भवेज्जा, तंपि णं जिणदत्तफग्गुसिरीनामं सावगमिहुणं
बहुवासरवन्नणिज्जगुणं चेव भवेज्जा, तहा तेसिं सोलस-संवच्छराइं परमं
आउं अट्ठ य परियाओ आलोइयनीसल्लाणं च पंचनमोक्कारपराणं
चउत्थभत्तेणं सोहम्मे कप्पे उववाओ, तयणंतरं च हिट्ठिमगमणं तहावि
ते एयं गच्छववत्थं णो विलंधिसु ।८।

से भयवं ! केणं अट्ठेणं एवं वुच्चइ जहा णं तहावि एयं
गच्छववत्थं णो विलंधिसुं ? गोयमा ! इओ आसन्नकालेणं चेव
महायसे महासत्ते महाणुभागे सेज्जंभवे णामं अणगारे महातवस्सी
महामई दुवालसंगसुयधारी भवेज्जा, से णं अपक्खवाएणं ^१अप्पाउक्खे
सव्वसत्ते सुयअतिसएणं विन्नाय एक्कारसण्हं अंगाणंचउदसण्हं पुव्वाणं
परमसारणवणीयभूयं सुपउणं सुपद्धरुज्जयं सिद्धिमग्गं दसवेयालियं णाम
सुयक्खंधं णिऊहेज्जा, से भयवं ? किं पडुच्च ? गोयमा ! मणगं
पडुच्चा, जहा कहं नाम एयस्स णं मणगस्स पारंपरिएणं थेवकालेणेव
महंतघोरदुक्खागराओ चउगइसंसारसागराओ निप्फेडो भवतु ?
भवदुगुंछेवण, सेऽवि ण विणा सव्वन्नुवएसेणं, से य सव्वन्नुवएसे
अणोरपारे दुरवगाढे अणंतगमपज्जवेहिं नो सक्का अप्पेणं कालेणं
अवगाहिउं तहा णं गोयमा ! अइसएणं एवं चित्तेज्जा, एवं से णं
सेज्जंभवे जहा -

‘अणंतपार बहु जाणियव्वं, अप्पो अ कालो बहुले अ विग्घे ।

जं सारभूतं तं गिण्हियव्वं, हंसो जहा खीरमिवंबुमीसं ॥१२१॥

तेणं इमस्स भव्वसत्तस्स मणगस्स तत्तपरिन्नाणं भवउत्तिकाउणं
जाव णं दसवेयालियं सुयक्खंधं णिज्जूहेज्जा, तं च वोच्छिन्नेणं

तक्कालदुवालसंगेणं गणिपिडगेणं जाव णं दूसमाए परियंते दुप्पसहे ताव
 णं सुत्तत्थेणं वाएज्जा, से अ सयलागमनिस्संदं दसवेयालिय-सुयक्खंधं
 सुत्तओ अज्झीहीय गोयमा ! से णं दुप्पसहे अणगारे, तओ तस्स णं
 दसवेयालियसुत्तस्साणुगयत्थाणुसारेणं तहा चेव पवत्तिज्जा, णो णं
 सच्छंदयारी भवेज्जा, तत्थ दसवेयालिय-सुयक्खंधे तक्कालमिणमो
 दुवालसंगे सुयक्खंधे पइड्डिणे भवेज्जा, एएणं अट्ठेणं एवं वुच्चइ जहा
 तहावि णं गोयमा ! ते एवं गच्छववत्थं नो विलधिंसु । ९।

से भयवं ! जइ णं गणिणोवि अच्चंतविसुद्धपरिणामस्स वि केइ
 दुस्सीले सच्छंदत्ताए इ वा गारवत्ताए इ वा जायाइमयत्ताए इ वा आणं
 अइक्कमेज्जा से णं किमाराहगे भवेज्जा ? गोयमा ! जे णं गुरु
 समसत्तुमित्तपक्खो गुरुगुणेसुं ठिए सययं सुत्ताणुसारेणं चेव विसुद्धासए
 विहरेज्जा तस्साणमइक्कंतेहिं णवणउएहिं चउहिं सएहिं साहूणं जहा तहा
 चेव अणाराहगे भवेज्जा । १०।

से भयवं ! कयरे णं ते पंचसए एकविवज्जिए साहूणं जेहिं च णं
 तारिसगुणोववेयस्स महाणुभागस्स गुरुणो आणं अइक्कमिउं णाराहियं ?
 गोयमा ! णं इमाए चेव उसभचउवीसिगाए अतीताए तेवीसइमाए
 चउवीसिगाए जाव णं परिनिव्वुडे चउवीसइमे अरहा ताव णं अइक्कंतेणं
 केवइएणं कालेणं गुणनिष्फन्ने कम्मसेलमुसुमूरणे महायसे महासते
 महाणुभागे सुगहियनामधेज्जे वइरे णाम गच्छाहिवई भूए, तस्स णं
 पंचसयं गच्छं निगंथीहिं विणा, निगंथीहिं समं दो सहस्से य अहेसि,
 ता गोयमा ! ताओ निगंथीओ अच्चंतपरलोगभीरुयाओ
 सुविसुद्धनिम्मलंतकरणाओ खंताओ-दंताओ मुत्ताओ जिइंदियाओ
 अच्चंत^१-भणिरीओ नियसरीरस्साविय छक्कायवच्छलाओ
 जहोवइइअच्चंतघोरवीरतवच्चरणसोसियसरीराओ जहा णं तिथ्यरेणं
 पन्नवियं तहा चेव अदीणमणसाओ मायामयहंकारममकारइ-

(र)-तिहासखेडुकंदप्पणाहियवायविप्पमुक्काओ तस्सायरियस्स सयासे सामन्नमणुचरंति, ते य साहुणो सव्वे वि गोयमा ! न तारीसे ^१मणागा, अहऽन्नया गोयमा ! ते साहुणो तं आयरियं भणंति जहा जइ - णं भयवं ! तुमं आणवेहि ता णं अम्हेहिं तित्थयत्तं करिय चंदप्पहसामियं वंदिय धम्मचक्कं गंतूणमागच्छामो, ताहे गोयमा ! अदीणमणसा ^२अणुत्तावलगंभीरमहुराए भारतीए भणियं तेणायरिएणं जहा इच्छायारेणं न कप्पइ तित्थयत्तं गंतुं सुविहियाणं, ता जाव णं वोलेइ जत्तं ताव णं अहं तुम्हे चंदप्पहं वंदावेहामि, अन्नं च जत्ताए गएहिं असंजमे पडिवज्जइ, एएणं कारणेणं तित्थयत्ता पडिसेहिज्जइ, तओ तेहिं भणियं - जहा भयवं ! केरिसो उण तित्थयत्ताए गच्छमाणाणं असंजमो भवइ ?, सो पुण इच्छायारेणं विइज्जवारं एरिसं उल्लावेज्जा बहुजणेणं वाउल्लगो भन्निहिसि, ताहे गोयमा ! चिंतियं तेणं आयरिएणं जहा णं ममं वइक्कमिय निच्छयओ एए गच्छिहिंति तेणं तु ^३मए समयं चडुत्तरेहिं वयंति । अह अन्नया सुबहुं मणसा संधारेऊणं चेव भणियं तेण आयरिएणं-जहाणं तुब्भे किंचिवि सुत्तत्थं वियाणह छिय तो जारिसं तित्थयत्ताए गच्छमाणाणं असंजमं भवइ तारिसं सयमेव वियाणेह किं एत्थ बहुपलविएणं ? अन्नं च विदियं तुम्हेहिंपि संसारसहावं जीवाइपयत्थत्तं च ।

अहऽन्नया बहुउवाएहिं णं विणिवारितस्सवि तस्सायरियस्स गए चेव ते साहुणो कुद्धेणं, कयंतेणं पेरिए तित्थयत्ताए, तेसिं च गच्छमाणाणं कत्थइ अणेसणं, कत्थइ हरियकायसंघट्टणं, कत्थइ बीयक्कमणं, कत्थइ पिवीलियादीणं तसाणं संघट्टणपरितावणोद्ववणाइसंभवं, कत्थइ बइट्टपडिक्कमणं, कत्थइ ण कीरए चेव चाउक्कालियं सज्झायं, कत्थइ ण संपाडेज्जा

मत्तभंडोवगरणस्स विहीए उभयकालं पेहपमज्जणपडिलेहणपक्खोडणं, किं बहुणा ? गोयमा ! कित्तिं भन्निहिइ ? अट्टारसण्हं सीलंगसहस्साणं सत्तरसविहस्स णं संजमस्स दुवालसविहस्स णं सव्वभंतरबाहिरस्स तवस्स जाव णं खंताइअहिसालक्खणस्सेव य दसविहस्साणगारधम्मस्स जत्थेक्केक्कपयं चेव सुबहुएणं पि कालेणं थिरपरिचिएण दुवालसंगमहासुयक्खंधेणं बहुभंगसयसंधत्तणाए दुक्खं निरइयारं परिवालिऊण जे, एयं च सव्वं जहाभणियं निरइयारमणुट्ठेयंति । एवं ^१संसरिऊण चित्तिं तेण गच्छाहिवइणा जहा णं मे ^२विप्परुक्खेण ते दुट्ठसीसे मज्झं अणाभोगपच्चाएणं सुबहुं असंजमं काहिति तं च सव्वं मे ^३मच्छंतिं होही जओ णं हं तेसिं गुरु ताहं तेसिं पट्ठीए गंतूणं पडिजागरामि, जेणाहमित्थपए पायच्छित्तेणं णो संबज्जेजेति वियप्पिऊणं गओ सो आयरिओ तेसिं पट्ठीए जाव णं दिट्ठे तेणं असमंजसेण गच्छमाणे ।

ताहे गोयमा ! सुमहुरमंजुलालावेणं भणियं तेणं गच्छाहिवइणा जहा भो भो उत्तमकुलनिम्मलवंस-विभूसणा अमुगपसुगाइमहासत्ता साहूओ ! पहपडिवन्नाणं पंचमहव्वयाहिट्ठिय-तणूणं महाभागाणं साहुसाहुणीणं सत्तावीसं सहस्साइं थंडिलाणं सव्वदंसीहिं पन्नत्ताइं, ते य सुउवउत्तेहिं विसोहिज्जंति, ण उणं अन्नोवउत्तेहिं, ता किमेयं सुन्नासुन्नीए अण्णोवउत्तेहिं गम्मइ इच्छायारेणं उवओगं देह, अन्नं च-इणमो सुत्तत्थं किं तुम्हाणं विसुमरियं भवेज्जा जं सारं सव्वपरमतत्ताणं जहा 'एगे वेइंदिए पाणी एगं सयमेव हत्थेण वा पएण वा अन्नयरेण वा सलागाइअहिगरणभूओवगरणजाएणं जे णं केई संघट्ठेज्जा वा संघट्ठवेज्जा वा एवं संघट्ठियं वा परेहिं समणुजाणेज्जा से णं तं कम्मं जया उदिन्नं भवेज्जा तया जहा उच्छुखंडाइं जंते तहा निप्पीलिज्जमाणा छम्मासेणं खवेज्जा, एवं गाढे दुवालसेहिं संवच्छरेहिं तं कम्मं वेदेज्जा,

१. संसृत्वेति । २. परोक्षमिति । ३. मत्सत्कमिति ।

एवं अगाढपरियावणे वाससहस्सं, गाढपरियावणे दसवाससहस्से, एवं अगाढकिलामणे वासलक्खं, गाढकिलामणे दसवासलक्खांइं, उद्दवणे वासकोडी, एवं तेइंदियाइसुं पि णेयं, ता एवं च वियाणमाणा मा तुम्हे मुञ्जहत्ति, एवं च गोयमा ! सुत्ताणुसारेणं सारयंतस्सावि तस्सायरियस्स ते महापावकम्मे गमगमहल्लफलेणं हल्लोहलीभूएणं तं आयरियाणं वयणं असेसपावकम्मट्टदुक्खविमोयगं णो बहु मन्नति ।

ताहे गोयमा ! मुणियं तेणायरिएणं जहा निच्छयओ उम्मग्गपट्टिए सव्वपगारेहिं चेव इमे पावमई-दुट्ठसीसे, ता किमट्ठमहमिमिसिं पट्टीए लल्लीवागरणं करेमाणोऽणुगच्छमाणो य सुक्खाए गयजलाए णदीए उवुज्झं^१ ? एए गच्छंतु दसदुवारेहिं, अहयं तु तावायहियमेवाणुचिट्ठेमो, किं मज्झं परकएणं सुमहंतेणावि पुन्नपब्भारेणं थेवमवि किंची परित्ताणं भवेज्जा ? सपरक्कमेणं चेव मे आगमुत्ततवसंसजमाणुट्ठाणेणं भवोयही तरेयव्वा, एस उणं तित्थयराएसो जहा-

‘अप्पहियं कायव्वं जइ सक्का परहियं च पयरेज्जा ।

अत्तहियपरहियाणं अत्तहियं चेव कायव्वं ॥१२२॥

अन्नं च-जइ एते तवसंसजमकिरियं अणुपालिहिति तओ एएसिं चेव सेयं होहिइ, जइ ण करेहिति तओ एएसिं चेव दुग्गइगमणुत्तरं हवेज्जा, नवरं तहावि मम गच्छो समप्पिओ गच्छाहिवइ अहयं भणामि, अन्नं च -

जे तित्थयरेहिं भगवंतेहिं छत्तीसं आयरियगुणे समाइट्ठे तेसिं तु अहयं एक्कमविं णाइक्कमामि जइ वि पाणोवरमं भवेज्जा, जं चागमे इहपरलोगविरुद्धं तं णायरामि ण कारयामि ण कज्जमाणं समणुजाणामि, ता मेरिसगुणजुत्तस्सावि जइ भणियं ण करेति ताऽहमिमिसिं वेसग्गहणा उट्ठालेमि, एवं च समए पन्नत्ती जहा- जे केई

साहू वा साहुणी वा वायामित्तेणावि असंजममणुचेट्टेज्जा से णं सारेज्जा से णं वारेज्जा से णं चोएज्जा पडिचोएज्जा, से णं सारेज्जंते वा वारिज्जंते वा चोइज्जंते वा पडिचोइज्जंते वा जे णं तं वयणमवमन्निय अलसायमाणे वा अभिनिविट्ठेइ वा ण तहत्ति पडिवज्जिय इच्छं पउजित्ताणं तत्थ ^१णो पडिक्कमेज्जा से णं तस्स वेसग्गहणं उद्दालेज्जा ।

एवं तु आगमुत्तणाएणं गोयमा ! जाव तेणायरिएणं एगस्स सेहस्स वेसग्गहणं उद्दालियं ताव णं अवसेसे दिसोदिसिं पणट्ठे, ताहे गोयमा ! सो य आयरिओ सणियं २ तेसिं पट्ठीए जाउमारद्धो णो णं तुरियं २ । से भयवं ! किमट्ठं तुरियं २ णो पयाइ ? गोयमा ! खाराए भूमीए जो महरुं संकमेज्जा महराए खारं किण्हाए पीयं पीयाओ किण्हं जलाओ थलं थलाओ जलं संकमेज्जा तेणं विहीए पाए पमज्जिय २ संकमेयव्वं, णो पमज्जेज्जा तओ दुवालससंवच्छरियं पच्छित्तं भवेज्जा, एएणमट्ठेण गोयमा ! सो आयरिओ ण तुरियं २ गच्छे । अहऽन्नया सुयाउत्तविहीए थडिलसंकमणं करेमाणस्स णं गोयमा ! तस्सायरियस्स आगओ बहुवासरखुहापरिगयसरीरो वियडदाढाकरालकयंतभासुरो पलयकालमिव घोररुवो केसरी, मुणियं च तेण महाणुभागेणं गच्छाहिवइणा जहा जइ दुयं गच्छेज्जइ ता चुक्किज्जइ इमस्स, णवरं दुयं गच्छमाणाणं असंजमं, ता वरं सरीरवोच्छेयं, ण असंजमपवत्तणंति चिंतित्ठण विहीए उवट्ठियस्स सेहस्स जमुद्दालियं वेसग्गहणं तं दाऊण ठिओ निप्पडिक्कम्मपायवोवगमणाणसणेणं, सोऽवि सेहो तहेव । अहऽन्नया अच्चंतविसुद्धंतकरणे पंचमंगलपरे सुहज्जवसायत्ताए दुवे वि गोयमा ! वावाइए तेण सीहेणं अंतगडे केवली जाए अट्ठप्पयारमलकलंकविप्पमुक्के सिद्धे य, ते पुण गोयमा ! एकूणपंचसए साहूणं तक्कम्मदोसेणं जं दुक्खमणुभवमाणे चिट्ठंति जं चाणूभूयं जं चाणुभविहंति अणंतसंसारसागरं परिभमंते तं को अणंतेणंपि कालेणं

भणिउं समत्थो ? एए ते गोयमा ! एगूणे पंचसए साहूणं जेहिं च णं तारिसगुणोववेतस्स णं महानुभागस्स गुरुणो आणं अइक्कमियं णो आराहियं अणंतसंसारिएजाए । ११ ।

से भयवं ! किं तिथयरसंतियं आणं णाइक्कमेज्जा उयाहु आयरिय-संतियं ? , गोयमा ! चउव्विहा आयरिया भवंति, तंजहा नामायरिया ठवणायरिया दव्वायरिया भावायरिया तत्थ णं जे ते भावायरिया ते तिथयरसमा चेव दट्ठव्वा तेसिं संतियाणं* णाइक्कमेज्जा । १२ ।

से भयवं ! कयरेणं ते भावायरिया भन्नंति ? गोयमा ! जे अज्जपव्वइएवि आगमविहीए पयं पएणाणुसंचरंति ते भावायरिए, जे उण वाससयदक्खिएवि हुताणं वायामेत्तेणंपि आगमओ बाहिं करंति ते णामठवणाहिं णिओइयव्वे । से भयवं ! आयरियाणं केवइयं पायच्छित्तं भवेज्जा ? जमेगस्स साहुणो तं आयरियमयहरपवत्तिणीए सत्तरसगुणं, अहा णं सीलखलिए भवंति तओ तिलक्खगुणं, जं अइदुक्करं जं न सुकरं, तम्हा सव्वहा सव्वप्पयारेहिं णं आयरियमहयरपवत्तिणीए, अत्ताणं पायच्छित्तस्स संरक्खेयव्वं, अक्खलियसीलेहिं च भवेयव्वं । १३ ।

से भयवं ! जे णं गुरु सहसाकारेणं अन्नयरट्ठाणे चुक्केज्ज वा खलेज्ज वा से णं आराहगे ण वा ? गोयमा ! गुरु णं गुरुगुणेषु वट्ठमाणो अक्खलियसीले अपमादी अणालस्सी सव्वालंबणविप्पमुक्के समसत्तुमेत्तपक्खे सम्मग्गपक्खवाए जाव णं कहा भणिरे सद्धम्मजुत्ते भवेज्जा णो णं उम्मग्गदेसए ^१अहमाणुरए भवेज्जा, सव्वहा सव्वप्पयारेहिं णं गुरुणा ताव अप्पमत्तेणं भवियव्वं, णो णं पमत्तेणं, जे उण पमादी भवेज्जा से णं दुरंतपंतलक्खणे अदट्ठव्वे महापावे, जइ णं ^२सबीए हवेज्जा ता णं निययदुच्चरियं जहावत्तं सपरसीसगणाणं ^३पक्खाविय

१. अधमानुरतो न भवेदिति । २. सत्तंततिः सद्वितीयो वा । ३. प्रख्याप्यकथयित्वेति ।

* सत्कामाज्ञामिति ।

जहा दुरंतपरंतलक्खणे अदद्व्वे महापावकम्मकारी सम्मग्गपणासओ अहयंति एवं निदिताणं गरहिताणं आलोइता णं च जहाभणियं पायच्छित्तमणुचरेज्जा से णं किंचुदेसेणं आराहगे भवेज्जा, जइ णं नीसल्ले नियडीविप्पमुक्के न पुणो सम्मग्गाओ परिभंसेज्जा, अहा णं परिभस्से तओ णाराहेइ । १४ ।

से भयवं ! केरिसगुणजुत्तस्स णं गुरुणो गच्छनिकखेवं कायव्वं ? गोयमा ! जे णं सुव्वए जे णं सुसीले जे णं दढव्वए जे णं दढचारित्ते जे णं अणिंदियं जे णं अरहे जे णं गयरगे जे णं गयदोसे जे णं निद्वियमोहमिच्छत्तमलकलंके जे णं उवसंते जे णं सुविन्नायजगट्ठितीए जे णं सुमहावेरग्गमग्गमल्लीणे जे णं इत्थीकहापडिणीए जे णं भत्तकहापडिणीए जे णं तेणगकहापडिणीए जे णं रायकहापडिणीए जे णं जणवय-कहापडिणीए जे णं अच्चंतमणुकंपसीले जे णं परलोगपच्चवायभीरु जे णं कुसीलपडिणीए जे णं विन्नायसमयसब्भावे जे णं गहियसमयपेयाले जे णं अहन्निसाणुसमयं ठिए खंतादि-अहिंसालक्खणदसविहे समणधम्मो जे णं उज्जुत्ते अहन्निसाणुसमयं दुवालसविहे तवोकम्मो जे णं सुउवउत्ते सययं पंचसमिईसु जे णं सुगुत्ते सययं तीसु गुत्तीसुं जे णं आराहगे ससत्तीए अट्टारसण्हं सीलंगसहस्साणं जे णं अविराहगे एगंतेणं ससत्तीए सत्तरविहस्स णं संजमस्स, जे णं उस्सग्गरुई जे णं तत्तरुई, जे णं समसत्तुमेत्तपक्खे, जे णं सत्तभयट्ठाणविप्पमुक्के, जे णं अट्टमयट्ठाणविप्पजट्ठे जे णं नवण्हं बंभचेरगुत्तीणं विराहणाभीरु जे णं बहुसुए, जे णं आरियकुलुप्पन्ने जे णं अदीणे, जे णं अकिविणे जे णं अणालसिए, जे णं संजईवग्गस्स पडिवक्खे जे णं सययं धम्मोवएसदायगे जेणं सययं ओहसामायारीए परुवगे, जे णं मेरावट्ठिए जे णं असामायारीभीरु, जे णं आलोयणारिहपायच्छित्त-
दाणपयच्छणक्खमे, जे णं वंदणमंडलिविराहणजाणगे जे णं

पडिक्कमणमंडलिविराहणजाणगे, जे णं सज्झायमंडलिविराहणजाणगे, जे णं वक्खाणमंडलिविराहणजाणगे, जे णं आलोयणमंडलिविराहणजाणगे, जे णं उद्देसमंडलिविराहणजाणगे, जे णं समुद्देसमंडलिविराहणजाणगे, जे णं पव्वज्जाविराहणजाणगे, जे णं उवट्ठावणाविराहणाजाणगे जे णं उद्देससमुद्देसाणुन्नाविराहणजाणगे, जे णं कालखेत्तदव्वभावभावंतरंतर-
वियाणगे, जे णं कालखेत्तदव्वभावालंबणिविप्पमुक्के जे णं सबालवुड्ढगिलाणसेहसिक्खगस्रहम्मियअज्जावट्ठावणकुसले जे णं परुवगे नाणदंसणचारित्ततवोगुणाणं, जे णं चरए धरए पभावगे नाणदंसणचारित्ततवोगुणाणं जे णं दढसम्मत्ते जे णं सययं अपरिसाई जे णं धीइमं जे णं गंभीरे जे णं सुसोमले से जे णं दिणयरमिव अणभि-
भवणीए तवतेएणं जे णं ससरीरोवरमेऽवि छक्कायसमारंभविवज्जी, जे णं तवसीलदाणभावणामयचउव्विहधम्मंतरायभीरु जे णं सव्वासायणभीरु जे णं इड्ढिरससायागारवरोद्धज्झाणविप्पमुक्के जे णं सव्वावस्सगमुज्जुत्ते जे णं सविसेसलद्धिजुत्ते जे णं आवडियपिल्लियामंतिओवि णायरेज्जा
१अयज्जं, जे णं नो बहुनिद्धो, जे णं नो बहुभोई जे णं सव्वावस्सगसज्झायज्झाणपडिमाभिग्गह-घोर-परीसहोवसग्गेसु जियपरी-
समे, जे णं सुपत्तसंगहसीले, जे णं अपत्तपरिट्ठावणविहिन्नु, जे णं
२अणुद्धयबोंदी, जे णं परसमयससमयसम्मंवियाणगे, जे णं कोहमाणमायालोभममकारादिइतिहासखेडुकंदप्पणाहियवायविप्पमुक्के
३धम्मकहासंसारवासविसयाभिलासादीणं वेरग्गुप्पायगे पडिबोहगे भव्वसत्ताणं से णं गच्छनिक्खेवणजोग्गे से णं गणी से णं गणहरे से णं तित्थे से णं तित्थयरे से णं अरहा से णं केवली से णं जिणे से णं तित्थुब्भासगे से णं वंदे से णं पुज्जे से णं नमंसणिज्जे से णं दडुव्वे से णं परमपवित्ते से णं परमकल्लाणे से णं परममंगले से णं सिद्धी से णं मुत्ती से णं सिवे से णं मोक्खे से णं ताया से णं संमग्गे से णं गती से

णं सरन्ने से णं सिद्धे मुत्ते पारगाए देवे देवदेवे, एयस्स णं गोयमा !
गणनिक्खेवं कुञ्जा एयस्स णं गणनिक्खेवं कारवेज्जा एयस्स णं
गणनिक्खेवणं समणुजाणेज्जा, अन्नहा णं गोयमा ! आणांभंगे । १५।

से भयवं ! केवइयं कालं जाव एस आणा पवेइया ? गोयमा !
जाव णं महायसे महासत्ते महाणुभागे सिरिप्पभे अणगारे । से भयवं !
केवइएणं कालेणं से सिरिप्पभे अणगारे भवेज्जा ? गोयमा ! होही
दुरंतपंतलक्खणे अदट्ठव्वे रोद्धे चंडे पयंडे उग्गपयंडडंडे निम्मेरे निक्खिवे
निग्घिणे नित्तिंसे कुरयर-पावमई अणारिए मिच्छदिट्ठी कक्की नाम रायाणे ।
से णं पावे पाहुडियं भमाडिउकामे सिरिसमणसंघं कयत्थेज्जा, जाव णं
कयत्थेइ ताव णं गोयमा ! जे केई तत्थ सीलड्ढे महाणुभागे
अचलियसत्ते तवोहणे अणगारे, तेसिं च पाडिहेरियं कुञ्जा सोहम्मे
कुलिसपाणी एरावणगामी सुरवरिंदे । एवं च गोयमा ! देविंदवंदिए
दिट्ठपच्चए णं सिरिसमणसंघे ^१णिट्ठिज्जा णं कुणय-पासंडधम्मे, जाव, णं
गोयमा ! एगे अबिइज्जे अहिंसालक्खणखंतादि-दसविहे धम्मे, एगे
अरहा देवाहिदेवे, एगे जिणालए, एगे वंदे पूए दक्खे सक्कारे सम्माणे
महायसे महासत्ते महाणुभागे दढसीलव्वयनियमधारए तवोहणे साहू
तत्थ णं चंदमिव सोमलेसे सूरिए इव तवतेयरासी पुढवी इव
परीसहोवसग्गसहे मेरुमंदरधरे इव निप्पकंपे ठिए
अहिंसालक्खणखंतादिदसविहेधम्मे से णं सुसमणगणपरिवुडे
निरब्भगयणामलकोमुईजोगजुत्ते इव गहरिक्खपरियरिए गहवई चंदे
अहिययरं विराइज्जा गोयमा ! से णं सिरिप्पभे अणगारे । तो गोयमा !
एवतियं कालं जाव एस आणा पवेइया । १६।

से भयवं ! उड्ढं पुच्छा, गोयमा ! तओ परेण उड्ढं हायमाणे
कालसमए, तत्थ णं जे केई छक्कायसमारंभविवज्जी से णं धन्ने पुन्ने वंदे
पूए नमंसणिज्जे सुजीवियं जीवियं तेसिं । १७।

से भयवं ! सामन्ने पुच्छा जाव णं वयासी ? गोयमा ! अत्थेगे जे णं जोगे अत्थेगे जे णं नो जोगे, से भयवं ! केण अट्ठेणं एवं वुच्चइ जहा णं अत्थेगे जाव जे णं नो जोगे ? गोयमा ! अत्थेगे जेसिं णं सामन्ने पडिकुट्ठे अत्थेगे जेसिं च णं सामन्ने नो पडिकुट्ठे, एएणं अट्ठेणं एवं वुच्चइ-जहा णं अत्थेगे जे णं जोगे अत्थेगे जे णं नो जोगे । से भयवं ! कयरे ते जेसिं णं सामन्ने पडिकुट्ठे ? कयरे वा ते जेसिं च णं णो परियाए पडिसेहिए ? गोयमा ! अत्थेगे जे णं विरुद्धे, अत्थेगे जे णं नो विरुद्धे, जे णं से विरुद्धे से णं पडिसेहिए, जे णं से णो विरुद्धे से णं नो पडिसेहिए । से भयवं ! के णं से विरुद्धे के वा णं अविरुद्धे ? गोयमा ! जे जेसुं देसेसुं दुगुंछणिञ्जे जे जेसुं देसेसुं दुगुंछिए जे जेसुं देसेसुं पडिकुट्ठे से णं तेसुं देसेसुं विरुद्धे, जे य णं जेसुं देसेसुं णो दुगुंछणिञ्जे जे य णं जेसुं देसेसुं णो दुगुंछिए जे य णं जेसुं देसेसुं णो पडिकुट्ठे से य णं तेसुं देसेसुं नो विरुद्धे, तत्थ गोयमा ! जे णं जेसुं २ देसेसुं विरुद्धे से णं नो पव्वावए जे णं जेसुं २ देसेसुं णो विरुद्धे से णं पव्वावए । से भयवं ! से कत्थ देसे विरुद्धे के वा णो विरुद्धे ? गोयमा ! जे णं केई पुरिसे इ वा इत्थिए इ वा रागेण वा दोसेण वा अणुसएण वा कोहेण वा लोभेण वा अवराहेण वा अणवराहेण वा समणं वा माहणं वा मायरं वा पियरं वा भायरं वा भइणिं वा भाइणेयं वा सुयं वा सुयसुयं वा धूयं वा णत्तुयं वा सुण्हं वा जामाउयं वा दाइयं वा गोत्तियं वा सजाइयं वा विजाइयं वा सयणं वा असयणं वा संबंधियं वा असंबंधियं वा सणाहं वा असणाहं वा इड्ढिमंतं वा अणिड्ढिमंतं वा सएसियं वा विएसियं वा आरियं वा अणारियं वा हणेज्ज वा हणावेज्ज वा, उद्वविज्ज वा उद्ववाविज्ज वा से णं परियाए अओग्गे । से णं पावे, से णं निंदिए, से णं गरहिए, से णं दुगुंछिए, से णं पडिकुट्ठे, से णं पडिसेहिए, से णं आवई, से णं विग्धे से णं अयसे, से णं अकित्ती, से णं उम्मग्गे, से णं अणायारे, एवं रायदुट्ठे, एवं तेणे, एवं परजुवइपसत्ते, एवं अन्नयरे इ वा केई वसणाभिभूए,

एवं अइसंकिलिट्टे, एवं छुहाणडिए, एवं रिणोवदुए,
 अविन्नायजाइकुलसीलसहावे, एवं बहुवाहिवेयणापरिगयसरीरे, एवं
 रसलोलुए, एवं बहुनिदे, एवं इतिहासखेडुकंदप्पणाहियवायचच्चरिसीले,
 एवं बहुकोऊहले, एवं बहुपोसवगे जाव णं
 मिच्छादिट्ठिपडिणियकुलुप्पन्ने इ वा से णं गोयमा ! जे केई आयरिए इ
 वा मयहरे इ वा गीयत्थे इ वा अगीयत्थे इ वा आयरियगुणकलिए इ
 वा, मयहरगुणकलिए इ वा, भविस्सायरिए इ वा, भविस्समयहरए इ
 वा लोभेण वा गारवेण वा दोण्हं गाउसयाणं अब्भंतरं पच्चावेज्जा से णं
 गोयमा ! वड्ढकमियमेरे, से णं पव्वयणवोच्छित्तिकारए, से णं
 तित्थवोच्छित्तिकारए, से णं संघवोच्छित्ति- कारए, से णं वसणाभिभूए,
 से णं अदिट्ठपरलोगपच्चवाए, से णं अणायारपवित्ते, से णं अकज्जारी,
 से णं पावे, से णं पावपावे, से णं महापावपावे, से णं गोयमा !
 अभिग्गहियचंडरुदकूरमिच्छदिट्ठी । १८।

से भयवं ! केणं अट्ठेणं एवं वुच्चइ ? गोयमा ! आयारे
 मोक्खमग्गे, णो णं अणायारे मोक्खमग्गे, एएणं अट्ठेणं एवं वुच्चइ ।

से भयवं ! कयरे से णं आयारे कयरे वा से णं अणायारे ?
 गोयमा ! आयारे आणा, अणायारे णं तप्पडिवक्खे, तत्थ जे णं
 आणापडिवक्खे से णं एगंतेणं सव्वपयारेहिं सव्वहा वज्जणिज्जे, जे णं
 णो आणापडिवक्खे से णं एगंतेणं सव्वपयारेहिं णं सव्वहा आयरणिज्जे,
 तहा णं गोयमा ! जं जाणिज्जा जहा णं एस णं सामन्नं विराहेज्जा से णं
 सव्वहा विवज्जेज्जा । १९।

से भयवं ! केह परिक्खा ? गोयमा ! णं जे केई पुरिसेइ वा
 इत्थियाओ वा सामन्नं पडिवज्जिउकामे कंप्पेज्जा वा, थरहरेज्ज वा,
 निसीएज्ज वा, छड्ढिं वा पकरेज्ज, सगेण वा परगेण वा आमंतिए इ वा
 १संनिएइ वा तदहुत्तं गच्छेज्ज वा, अवलोइज्ज वा पलोइज्ज वा, वेसगहणे

१. आहूयते वा संज्ञायते वेति ।

ढोइज्जमाणे कोई ^१उप्पाएइ वा असुहे दोन्निमित्तेइ वा भवेज्जा से णं गीयत्थे गणी अन्नयरेइ वा मयहरादी महया नेउत्तेणं निरुवेज्जा, जस्स णं एयाइं ^२पर तक्केज्जा से णं णो पव्वावेज्जा, से णं गुरुपडिणीए भविज्जा, से णं निद्धम्मसबले भवेज्जा, से णं सव्वहा सव्वपयारेसु णं केवलं एगंतेणं अकज्जकरणुज्जाए भवेज्जा, से णं जेणं वा तेणं वा सुएण वा विन्नाणेण वा गारविए भवेज्जा, से णं संजईवग्गस्स चउत्थवयखंडणसीले भवेज्जा, से णं बहुरुवे भवेज्जा ॥२०॥

से भयवं कयरे णं से बहुरुवे वुच्चइ ? जे णं ओसन्नविहारीणं ओसन्ने, उज्जयविहारीणं उज्जयविहारी, निद्धम्मसबलाणं निद्धम्मसबले, बहुरुवी रंगगए चारणे इव णडे -

‘खणेण रामे य, खणेण लक्खणे, खणेण दसगीवरावणे,

खणेणं ^३टप्परकन्न-दंतुर-जराजुत्तगतपंडरकेसबहुपवंचभरिए
विदूसगे ॥१२३॥

खणेणं तिरियं च जाती, वाणर-हणुमंत-केसरी ।

जहा णं एसं गोयमा ! तहा णं से बहुरुवे ॥१२४॥

एवं गोयमा ! जे णं असई कयाई केइ चुक्कखलिएणं पव्वावेज्जा से णं दूरद्धाण-ववहिए करेज्जा, से णं सन्निहिए णो धरेज्जा, से णं आयरेणं णो आलवेज्जा से णं भंडमत्तोवगरणेणं आयरेणं नो पडिलाहाविज्जा, से णं तस्स गंथसत्थं नो उद्दिसेज्जा, से णं तस्स गंथसत्थं नो अणुजाणेज्जा, से णं तस्स सद्धिं गुज्झरहस्सं वा णो अगुज्झरहस्सं वा णो मंतिज्जा, एवं गोयमा ! जे केई एयदोसविप्पमुक्के से णं पव्वावेज्जा, तहा णं गोयमा ! मिच्छदेसुप्पन्नं अणारियं णो पवावेज्जा, एवं वेसासुयं नो पववावेज्जा, एवं गणियं नो पव्वावेज्जा, एवं चक्खुविगलं, एवं

१. कश्चिदाकस्मिकमुपद्रवं कुर्यादिति । २. परः कश्चित्तर्कयेतेति ‘परिक्खेज्जा’ इत्यपि पाठः । ३. भयंकरकर्ण इति ।

विकल्पियकरचरणं, एवं छिन्नकन्ननासोदुं, एवं कुट्टवाहीए
 गलमाणसडहडंतं एवं पंगुं अयंगमं मूयं बहिरं एवं अच्चुक्कडकसायं एवं
 बहुपासंडसंडं एवं घणरागदोसमोहमिच्छत्तमलखवलियं एवं
 उज्झियउत्तयं एवं ^१पोराणनिकखुडं एवं
 जिणालगाइवहुदेवबलीकरणभोइयं^२ चक्कयरं^३ एवं पाडणट्टुत्तचारणं एवं
^४सुयजहुं चरणकरणजहुं जहुकायं णो पव्वावेज्जा, एवं तु जाव णं
 नामहीणं थामहीणं कुलहीणं जाइहीणं बुद्धिहीणं पन्नाहीणं
 गामउडमयहरं वा गामउडमयहरसुयं वा अन्नयरं वा
 निंदियाहमहीणजाइयं वा अविन्नायकुलसहावं वा गोयमा ! सव्वहा णो
 दिक्खे णो पव्वाविज्जा, एएसिं तु पयाणं अन्नयरपए खलेज्जा जो सहसा
 देसूणपुव्वकोडीतवेण गोयम ! सुज्जेज्ज वा ण वावि ॥२१॥

‘एवं गच्छववत्थं तहत्ति पालेत्तु तं तहेव जहा भणियं ।

रयमलकिलेसमुक्के गोयम ! मुक्खं गएऽणंतं ॥१२५॥

गच्छंति गमिस्संति य ससुरासुरजगणमंसिए वीरे ।

भुवणेक्कपायडजसे जहभणियगुणट्टिए गणिणो ॥१२६॥

से भयवं ! जे णं केई अमुणियसमयसब्भावे होत्था विहीए इ वा
 अविहीए इ वा कस्सई गच्छायारस्स वा मंडलिधम्मस्स वा
 छत्तीसइविहस्स णं सप्पभेयनाणदंसणचरित्ततववीरियायारस्स वा मणसा
 वा वायाए वा काएण वा कर्हिं चि अन्नयरे ठाणे केइ गच्छाहिर्वई
 आयरिए इ वा अंतो विसुद्धपरिणामे वि होत्ताणं असई चुक्केज्ज वा
 खलेज्ज वा परुवेमाणे वा अणुट्टेमाणे वा से णं आराहगे उयाहु
 अणाराहगे ?, गोयमा ! अणाराहगे ।

१. उत्पन्नजितो यदि वा पुराणशास्त्रज्ञस्तत्र स्थिरमतिश्च यदि वा पुराणः असारश्चेति ।

२. भोगासक्त इति । ३. भिक्षुविशेषश्चक्रेण चरतीति । ४. श्रुतग्रहणेऽशक्त
 एतदन्यतरं न प्रवाजयेदिति ।

से भयवं ! केणं अट्टेणं एवं वुच्चइ जहा णं गोयमा ! अणाराहगे ? गोयमा ! णं इमे दुवालसंगे सुयनाणे अणप्पवसिए अणाइनिहणे सव्भूयत्थपसाहगे अणाइसंसिद्धे से णं देविंदवंदवदाणं^१ अतुलबलवीरिएसरियसत्तपरक्कममहापुरिसायारकंतिदित्तिलावन्नरुवसोह-ग्गाइसयलकलाकलावविच्छड्डमंडियाणं अणंतनाणीणं सयंसंबुद्धाणं जिणवराणं अणाइसिद्धाणं अणंताणं वट्टमाणसमयसिज्झमाणाणं अत्रेसिं च आसन्नपुरेक्खडाणं अणंताणं सुगहियनामधेज्जाणं महायसाणं महासत्ताणं महाणुभागाणं तिहुयणिक्कतिलयाणं तेलोक्कनाहाणं जगपवराणं जगेक्कबंधूणं जगगुरुणं सव्वन्नूणं सव्वदरिसीणं पवरवरधम्मतित्थंकराणं अरहंताणं भगवंताणं भूयभविस्साईयणागयवट्टमाणनिखिलासेस-कसिणसगुणसपज्जसव्ववत्थुविदियसव्भावाणं असहाए पवरे एकमेक्कमगे, से णं सुत्तत्ताए अत्थत्ताए गंथत्ताए, तेसिं पि णं जहट्टिए चेव पन्नवणिज्जे जहट्टिए चेवाणुट्टणिज्जे जहट्टिए चेव भासणिज्जे जहट्टिए चेव वायणिज्जे जहट्टिए चेव परुवणिज्जे जहट्टिए चेव वायरणिज्जे जहट्टिए चेव कहणिज्जे । से णं इमं दुवालसंगे गणिपिडगे, तेसिं पि णं देविंदविंदवदाणं णिखिलजगविदियसदव्वसपज्जवगइआगइहासवुड्ढि^२ जीवाइतत्त जाव णं वत्थुसहावाणं अलंघणिज्जे अणइक्कमणिज्जे^३ अणासायणिज्जे । तहा चेव इमे दुवालसंगे सुयनाणे सव्वजगजीवपाणभूयसत्ताणं एगंतेणं हिए सुहे खमे नीसेसिए आणुगामिए पारगामिए पसत्थे महत्थे महागुणे महाणुभावे महापुरिसाणुचिन्ने परमरिसिदेसिए दुक्खक्खयाए कम्मक्खयाए मोक्खयाए संसारुत्तारणयाए त्ति कट्ट उवसंपज्जित्ताणं विहरिसु, किमुत्तमत्रेसिं त्ति । ता गोयमा ! जे णं केइ अमुणिय समय सव्भावे इ वा अविइयसमयसारे इ वा विहिए इ वा अविहीए इ वा गच्छाहिवई वा आयरिए इ वा अंतो विसुद्धपरिणामे वि होत्था,

१. ऐश्वर्यमिति । २. हासवृद्धीति । ३. 'अणुमोयणिज्जे' इत्यपि कचिदादर्शे इति ।

गच्छायारमंडलिधम्मा छत्तीसइविहआयारादि जाव णं अन्नयरस्स वा आवस्सगाइकरणिज्जस्स णं पवयणसारस्स असती चुक्केज्ज वा खलेज्ज वा ते णं इमे दुवालसंगे सुयनाणे अन्नहा पयरेज्जा, जे णं इमे दुवालसंगसुयणाणनिबद्धंतरोवगयं ^१एक्कपयअक्खरमवि अन्नहा पयरे से णं उम्मग्गे पयंसेज्जा, जे णं उम्मग्गे पयंसे से णं अणाराहगे भवेज्जा, ता एएणं अट्ठेणं एवं वुच्चइ जहा णं गोयमा ! एणंतेणं अणाराहगे । २२ ।

से भयवं ! अत्थि केई जेणमिणमो परमगुरुणं पी अलंघणिज्जं परमसरणं फुडं पयडं पयडपयडं परमकल्लाणं कसिणकम्मट्टदुक्खनिट्ठवणं पवयणं अइक्कमेज्ज वा वइक्कमेज्ज वा लंघेज्ज वा खंडेज्ज वा विराहेज्ज वा आसाइज्ज वा से मणसा वा वयसा वा कायसा वा जाव णं वयासी ? गोयमा ! णं अणंतेणं कालेणं परिवट्ठमाणेणं सययं दस अच्छेरगे भविंसु, तत्थ णं असंखेज्जे अभव्वे असंखेज्जे मिच्छादिट्ठी असंखेज्जे ^३सासायणे दव्वलिंगमासीय सदत्ताए डंभेणं सक्कारिज्जंते ^३एत्थेए धम्मिगत्ति काऊणं बहवे अदिट्ठकल्लाणे जइ णं पवयणमब्भुवगमंति तमब्भुवगमिय रसलोलत्ताए विसयलोलत्ताए दुट्ठंतिदियदोसेणं अणुदियहं जहड्डियं मग्गं निट्ठवंति उम्मग्गं च उस्सप्पयंति, ते य सव्वे तेणं कालेणं इमं परमगुरुणं पि अलंघणिज्जं पवयणं जाव णं आसायंति । २३ ।

से भयवं ! कयरेणं ते णं कालेणं दस अच्छेरगे भविंसु ? गोयमा ! णं इमे ते अणंतेणं कालेणं दस अच्छेरगे भवंति, तंजहा तित्थयराणं उवसग्गे गब्भसंकामणे वामातित्थयरे तित्थयरस्स णं देसणाए अभव्वसमुदाएणं परिसाबंधि सविमाणान चदाइच्चाणं तित्थयरसमवसरणे आगमणे वासुदेवाणं संखड्ढुणीए अन्नयरेण वा ^४रायकउहेणं परोप्परमेलावगे इह इं तु भारहे खेत्ते

१. 'एक्कयक्खरमवि' पाठान्तरमिति । २. साशातना इति । ३. अत्रैत इति ।

४. राजचिह्नेनेति ।

हरिवंसकुलुप्पत्तीए चमरुप्पाए एगसमएणं अट्टसयसिद्धिगमणं
असंजयाणं पूयाकारगेत्ति ।२४।

से भयवं ! जे णं केई कहिं चि कयाई पमायदोसओ
पवयणमासाएज्जा से णं किं आयरियपयं पावेज्जा ? गोयमा ! जे णं
केई कहिं चि कयाई पमायदोसओ असई कोहेण वा माणेण वा
मायाए वा लोभेण वा रागेण वा दोसेण वा भएण वा हासेण वा
मोहेण वा अन्नाण-दोसेण वा पवयणस्स णं अन्नयरट्ठाणे वड्ढित्तेणं पि
अणायारं असमायारिं परुवेमाणे वा अणुमन्नेमाणे वा पवयणमासाएज्जा
से णं बोहिं पि णो पावे, किंमग आयरियपयलंभं ? से भयवं ! किं
अभव्वे मिच्छादिट्ठी आयरिए भवेज्जा ? गोयमा ! भवेज्जा, एत्थं च णं
इंगालमद्दगाई णेए ।

से भयवं ! किं मिच्छादिट्ठी निक्खमेज्जा ?, गोयमा !
निक्खमेज्जा ।

से भयवं ! कयरेणं लिंगेणं से णं वियाणेज्जा जहा णं धुवमेस
मिच्छादिट्ठी ? गोयमा ! जे णं कयसामाइए सव्वसंगविमुत्ते भवित्ताणं
अफासुपाणगं परिभुंजेज्जा जे णं अणगारधम्मं पडिवज्जित्ताणम^१सई
सोईरियं वा परोइरियं वा तेउकायं सेवेज्ज वा सेवाविज्ज वा तेउकायं
सेविज्जमाणं अन्नेसिं समणुजाणेज्ज वा तहा नवण्हं बंभचेरगुत्तीणं जे केई
साहू वा साहुणी वा एक्कामवि खंडिज्ज वा विराहेज्ज वा खंडिज्जमाणं वा
विराहिज्जमाणं वा बंभचेरगुत्तीं परेसिं समणुजाणेज्जा वा मणेण वा
वायाए वा काएण वा से णं मिच्छादिट्ठी, न केवलं मिच्छादिट्ठी
अभिगहियमिच्छादिट्ठी वियाणेज्जा ।२५।

से भयवं ! जे णं केई आयरिए इ वा मयहरए इ वा असई
कहिंचि कयाई तहाविहं संविहाणगमासज्ज इणमो निग्गंथं पवयणमन्नहा

१. खोदीरितं वा परोदीरितं वेत्ति ।

पन्नवेज्जा से णं किं पावेज्जा ? गोयमा ! जं सावज्जायरिएणं पावियं ।

से भयवं ! कयरे णं से सावज्जायरिए ? किं वा तेणं पावियंति ? गोयमा ! णं इओ य उसभादितित्थंकरचउवीसिगाए अणंतेणं कालेणं जाव अतीता अन्ना चउवीसिगा तीए जारिसो अहयं तारिसो चेव सत्तरयणी पमाणेणं जगच्छेरयभूओ देविंद-विंदवंदिओ पवरवरधम्मसिरिनामचरम-धम्मतित्थंकरो अहेसि । तस्से य तित्थे सत्त अच्छेरगे पभूए, अहऽन्नया परिनिव्वुडस्स णं तस्स तित्थंकरस्स कालक्कमेणं असंजयाणं सक्कारकारवणे णामऽच्छेरगे वहिउमारद्धे, तत्थ णं लोगाणुवर्तीए मिच्छत्तोवहयं असंजयपूयाणुरयं बहुजणसमूहं ति वियाणिऊण तेणं कालेणं तेणं समएणं अमुणियसमयसब्भावेहिं^१ तिगारवमइरामोहिएहिं णाममेत्तआयरियमयहरेहिं सड्ढाईणं सयासाओ दविणजायं पडिग्गहिय २ थंभसहस्सूसिए^२ सकसके ममत्तिए चेइयालगे काराविऊणं ते चेव दुरंत पंत-लक्खणाहमाहमेहिं^३ आसईए । ते चेव चेइयालगे^४ मासीय गोविऊणं च बलवीरियपुरिसक्कारपरक्कमे संते बले संते वीरिए संते पुरिसक्कारपरक्कमे चइऊणं उग्गाभिग्गहे अणिययविहारं णीयावासमासइत्ताणं सिढिली होऊणं^५ संजमाइसुड्डिए पच्छा परिचिच्चाणं इहलोगपरलोगावायं अंगीकाऊण य सुदीह-संसारं तेसुं चेव मढदेवउलेसुं अच्चत्थं गढिरे मुच्छिरे ममीकारहंकारेहिं णं अभिभूए सयमेव विचित्तमल्लदामाईहिं णं देवच्चणं काउमब्भुज्जए, जं पुण समयसारं परं इमं सव्वन्नुवयणं तं दूरसुदूरयरेणं उज्झियंति तं जहा-सव्वे जीवा सव्वे पाणा सव्वे भूया सव्वे सत्ता ण हंतव्वा, ण अज्जावेयव्वा, ण परियावेयव्वा, ण परिघेत्तव्वा, ण विराहेयव्वा, ण किलामेयव्वा, ण उद्वेयव्वा, जे केई सुहुमा, जे केई बायरा, जे केई तसा, जे केई थावरा, जे केई पज्जत्ता, जे केई अपज्जत्ता, जे केई

१. गारव एव मदिरा तथेति । २. स्वकस्वकानिति । ३. आश्रिता इति ४. आसित्वेति । ५. संयमादिषूत्थिता अपीति ।

एगिंदिया, जे केई बेदिया, जे केई तेदिया, जे केई चउरिंदिया, जे केई पंचिंदिया, तिविहं तिविहेणं मणेणं वायांए काएणं, जं पुण गोयमा ! मेहुणं तं एगंतेणं ३ णिच्छयओ ३ बाढं तहा आउतेउसमारंभं च सव्वहा सव्वपयारेहिं सययं विवज्जेजा मुणीति एस धम्मे धुवे सासए णिइए समिच्च लोगं खेयन्नूहिं पवेइएत्ति । २६।

से भयवं ! जे णं केई साहू वा साहुणी वा निग्गंथे अणगारे दव्वत्थयं कुज्जा से णं किमालवेज्जा ?, गोयमा ! जे णं केई साहू वा साहुणी वा निग्गंथे अणगारे दव्वत्थयं कुज्जा सेणं अजयए इ वा असंजए इ वा देवभोइए इ वा देवच्चगे इ वा जाव णं उम्मग्गपइड्डिए इ वा दुरुज्झियसीले इ वा कुसीले इ वा सच्छंदयारिए इ वा आलवेज्जा । २७।

एवं गोयमा ! तेसिं अणायारपवित्ताणं बहूणं आयरियमयहरादीणं एगे मरगयच्छवी कुवलपप्पहाभिहाणे णाम अणगारे महातवस्सी अहेसि, तस्स णं महामहंते जीवाइपयत्थे सुत्तत्थपरिन्नाणे सुमहंतं चेव संसारसागरे तासुं तासुं जोणीसुं संसरणभयं, सव्वहा सव्वपयारेहि णं अच्चंतं आसायणा भीरुयत्तणं, तक्कालं तारिसेऽवी असमंजसे अणायारे बहुसाहम्मियपवत्तिए तहावी सो तित्थयराणमाणं णाइक्कमेइ । अहऽन्नया सो अणिगूहियबलवीरियपुरिसक्कारपरक्कमे, सुसीसगणपरियरिओ, सव्वन्नुप्पणीयागमसुत्तत्थोभयाणुसारेणं ववगयरागदोसमोहमिच्छत्त-ममकाराहंकारो, सव्वत्थ अपडिबद्धो किं बहुणा ?, सव्वगुणगणाहिड्डियसरीरो अणेगगामागरनगरपुरखेडकब्बडमडंबदोण-मुहाइसन्निवेसविसेसेसुं अणेगेसुं भव्वसत्ताणं संसारचारगविमोक्खणिं सद्धम्मकहं परिकहेंतो विहरिंसु । एवं च वच्चंति दियहा । अन्नया णं सो महाणुभागो विहरमाणो आगओ गोयमा ! तेसिं णीयविहारीणमावासगे, तेहिं च महातवस्सी काऊण सम्माणिओ किइक्कम्मासणपयाणाइणा सुविणएणं एवं च सुहनिसन्नो, चिट्ठित्ताणं

धम्मकहाइणा विणोएणं पुणो गंतुं पयत्तो, ताहे भणिओ सो
 महाणुभागो गोयमा ! तेहिं दुरंतपंतलक्खणेहिं लिंगोवजीवीहिं
 भट्टायारुम्मग्गपवत्तगऽभिग्ग- हीयमिच्छादिट्ठीहिं, जहा णं भयवं ! जइ
 तुममिहइं एक्कं वासारत्तियं चाउम्मासियं ^१पउंजियं ता णमेत्थं एत्तिगे
 चेइयालगे भवंति पूणं तुज्झाणत्तीए, ता कीरओ अणुग्गहत्थमम्हाणं
 इहेव चाउम्मासियं, ताहे भणियं तेण महाणुभागेणं गोयमा ! जहा भो
 भो पियंवए ! जइ वि जिणालए तहा वि सावज्जमिणं णाहं वायामित्तेणं
^२पेयं आयरिज्जा, एवं च समयसारपरं तत्तं जहट्टियं अविवरीयं णीसंकं
 भणमाणेणं तेसिं मिच्छादिट्ठीलिंगीणं साहुवेसधारीणं मज्झे गोयमा !
 आसकलियं तित्थयरणामकम्मगोयं तेणं कुवलयप्पभेणं,
 एगभवावसेसीकओ भवोयही । तत्थ य दिट्ठो ^३अप्पुल्लवणिज्ज-
 नामसंघमेलावगो अहेसि, तेहिं च बहूहिं पावमईहिं
 लिंगिण-लिंगिणियाहिं परोप्परमेगमयं काऊणं गोयमा ! तालं दाऊणं
 विप्पलोइयं चेव तं तस्स महाणुभागसुमहतवस्सिणो कुवलयप्पहाभिहाणं
 कयं च से सावज्जायरियाभिहाणं सद्वकरणं, गयं च पसिद्धीए, एवं च
^४सद्विज्जमाणोऽवि सो तेणापसत्थसद्वकरणेणं तहावि गोयमा ! ईसिपि
 ण कुप्पे । १२८।

अहऽन्नया तेसिं दुरायाराणं सद्धम्मपरंमुहाणं
 अगारधम्माणगारधम्मोभयभट्टाणं लिंगमेत्तनामपव्वइयाणं कालक्कमेणं
 संजाओ परोप्परं आगमवियारो जहा णं सड्ढगाणमसई संजया चेव
 मढ्ढेउले पडिजागरेति खंडपडिए य समारावयंति, अन्नं च जाव
 करणिज्जं तं पइ समारंभे कज्जमाणे जइस्सावि णं णत्थि दोससंभवं, एवं
 च केई भणंति संजमं मोक्खनेयारं, अन्ने भणंति- जहा णं
 पासायवडिंसए पूयासक्कारबलिविहाणाईसु णं तित्थुच्छप्पणा चेव

१. प्रयोजितवान् उपदिष्टवान्वेति । २. अप्येतद् यदिवा 'एयं पाठान्तरमाश्रित्यैतदिति ।

३. अल्पमुल्लपनीयं यत्र स तथा रहसीति । ४. शब्दायितोऽपीति ।

मोक्खगमणं, एवं तेसिमविइयपरमत्थाणं पावकम्माणं जं जेण सिद्धं सो तं चेवुदामुस्सिखलेणं मुहेणं पलवति, ताहे समुट्ठियं वादसंघट्टं, नत्थि य कोई तत्थ आगमकुसलो तेसिं मज्झे जो तत्थ जुत्ताजुत्तं वियारेइ जो य पमाणपुव्वमुवइसइ, तहा एगे भणंति जहा अमुगो अमुगत्थामे चिट्ठे, अन्ने भणंति - अमुगो, अन्ने भणंति - किमित्थ बहुणा पलविएणं ? सव्वेसिमम्हाणं सावज्जायरिओ एत्थ पमाणंति, तेहिं भणियं जहा एवं होउत्ति हक्कारावेह लहुं ।

तओ हक्काराविओ गोयमा ! सो तेहिं सावज्जायरिओ, आगओ दूरदेसाओ अप्पडिबद्धत्ताए विहरमाणो सत्तहिं मासेहिं, जाव णं दिट्ठो एगाए अज्जाए । सा य तं कट्ठुगगतवचरणसोसियसरीरं चम्मट्ठिसेसतणुं अच्चंतं तवसिरीए दिप्पंतं सावज्जायरियं पेच्छियं 'सुविम्हियं'तत्तकरणा वियक्किउं पयत्ता अहो किं एस महानुभागो णं सो अरहा किं वा णं धम्मो चेव मुत्तिमंतो ? किं बहुणा ?, तियसिंदवंदाणंपि वंदणिज्जपायजुओ एसत्ति चिंतिऊणं भत्तिभरनिब्भरा आयाहिणपयाहिणं काऊणं उत्तिमंगेणं संघट्टमाणी झडित्ति णिवडिया चलणेसुं गोयमा ! तस्स णं सावज्जायरियस्स । दिट्ठो य सो तेहिं दुरायारेहिं पणमिज्जमाणो । अन्नया णं सो तेसिं तत्थ जहा जगगुरुहिं उवइट्टं तहा चेव गुरुवएसाणुसारेणं, आणुपुव्वीए जहट्ठियं सुत्तत्थं वागरेइ तेऽवि तहा चेव सदहंति । अन्नया ताव वागरियं गोयमा ! जाव णं एक्कारसण्हमंगाणं चोदसण्हं पुव्वाणं दुवालसंगस्स णं सुयनाणस्स णवणीयसारभूयं सयलपावपरिहारडुकम्मनिम्महणं आगयं इणमेव गच्छमेरापन्नवणं महानिसीहसुयक्खंधस्स पंचमज्झयणं, एत्थेव गोयमा ! ताव णं वक्खाणियं जाव णं आगया इमा गाहा ।

‘जत्थित्थीकरफरिसं अंतरियं कारणेवि उपपन्ने ।

अरहाऽवि करेज्ज सयं तं गच्छं मूलगुणमुक्कं ॥१२७॥

१. सुविस्मिताऽन्तःकरणेति ।

तओ गोयमा ! अप्संकिणं चेव चितियं तेणं सावज्जायरिणं जहा णं जइ इह एयं जहड्डियं पन्नवेमि तओ जं मम वंदणं दाउमाणीए तीए अज्जाए उत्तिमंगेण चलणग्गे पुट्ठे तं सव्वेहिंपि दिट्ठमेएहिंति ता जहा मम सावज्जायरियाभिहाणं कयं तहा अन्नमवि किंचि ^१एत्थमुट्ठकं काहिंति जेणं तु सव्वलोए अपुज्जो भविस्सं, ता अहमन्नहा सुत्तत्थं पन्नवेमि ? ता णं महती आसायणा, तो किं करियव्वमेत्थंति ?, किं एयं गाहं परुवयामि ? किं वा ण ? अन्नहा वा पन्नवेमि ? अहवा हाहा ण जुत्तमिणं उभयहावि अच्चंतगरहियं आयहियट्ठीणमेयं, जओ णमेस समयाभिप्पाओ जहा णं जे भिक्खू दुवालसंगस्स णं सुयनाणस्स असई चुक्खलियपमायासंकादी-सभयत्तेणं पयक्खरमत्ताविंदुमवि एक्कं परुविज्जा अन्नहा वा पन्नवेज्जा संदिद्धं वा सुत्तत्थं वक्खाणेज्जा अविहीए अओगस्स वा वक्खाणेज्जा, से भिक्खू अणंतसंसारी भवेज्जा, ता किं एत्थं ? जं होही तं च भवउ, जहड्डियं चेव गुरुवएसाणुसारेणं सुत्तत्थं पवक्खामिति चित्तिऊणं गोयमा ! पवक्खाया णिखिलावयवविसुद्धा सा तेण गाहा ।

एयावसरंमि चोइओ गोयमा ! सो तेहिं दुरंतपंतलक्खणेहिं जहा जइ एवं वा तुमंपि ताव मूलगुणहीणो जाव णं संभरसु तं जं तद्विवसं तीए अज्जाए तुज्झं वंदणं दाउकामाए पाए उत्तमंगेणं पुट्ठे, ताहे इहलोइगायसभीरु^२ ^३खरसत्थरीहुओ गोयमा ! सो सावज्जायरिओ विचिंतिओ जहा जं मम सावज्जायरियाभिहाणं कयं इमेहिं तहा तं किंपि संपयं काहिंति जेणं तु सव्वलोए अपुज्जो भविस्सं, ता किमित्थं परिहारं दाहामिति चिंतमाणेणं संभरियं तित्थयरवयणं, जहा णं जे केई आयरिए इ वा मयहरए इ वा गच्छाहिर्वई सुयहरे भवेज्जा से णं जंकिंचि सव्वन्नुणंतनाणीहिं ^४पावाववायट्ठाणं पडिसेहियं तं

१. असमञ्जसमिति । २. 'हीरु' पाठान्तरमिति । ३. अत्यन्तजडीभूत इति ।

४. मैथुनस्याऽपवादस्थानं प्रतिषेधितमिति ।

सव्वसुयाणुसारेणं विन्नाय सव्वहा सव्वपयारेहिं णं णो समायरेज्जा, णो णं समायरिज्जमाणं समुणुजाणेज्जा, से कोहेण वा माणेण वा मायाए वा लोभेण वा भएण वा हासेण वा गारवेण वा दप्पेण वा पमाएण वा असती चुक्खलिएण वा दिया वा राओ वा एगओ वा परिसागओ वा सुत्ते वा जागरमाणे वा तिविहंतिविहेणं मणेणं वायाए काएणं एतेसिमेव पयाणं जे केई विराहगे भवेज्जा से णं भिक्खू भुज्जो २ निंदणिज्जे गरहणिज्जे खिसणिज्जे दुगुंछणिज्जे सव्वलोगपरिभूए बहुवाहिवेयणापरिगयसरीरे उक्कोसठिईए अणंतसंसारसागरं परिभमेज्जा, तथ णं परिभममाणे खणमेक्कंपि न कहिंचि कयाइ निव्वुइं संपावेज्जा, तो पमायगोयरगयस्स णं मे पावाहमाहमहीणसत्तकाउरिसस्स इहइं चेव समुट्ठिया ए* १महंता आवई जेण ण सक्को अहमेत्थं जुत्तीखमं किंचि पडिउत्तरं पयाउं जे, तहा परलोगे य अणंतभवपरंपरं भममाणो घोरदारुणाणंतसो य दुक्खस्स भागी भविहामिऽहं मदभग्गोत्ति चिंतयंतोऽवलक्खिओ सो सावज्जायरिओ गोयमा ! तेहिं दुरायारपावकम्मदुट्ठसोयारेहिं^२ जहा णं अलियखरमच्छरीभूओ एस, तओ संखुद्धमणं^३ खरसत्थरीभूयं कलिऊणं च भणियं तेहिं दुट्ठसोयारेहिं जहा जाव णं नो छिन्नमिणमो संसयं ताव णं उड्ढं वक्खाणं अत्थि, ता एत्थं तं परिहारगं वायरेज्जा जं पोढजुत्तीखमं कुग्गहणिम्महणपच्चलंति, तओ तेण चिंतियं जहा नाहं अदिन्नेणं परिहारगेण चुक्किमो मेसिं, ता किमित्थ परिहारगं दाहामित्ति चिंतयंतो पुणोवि गोयमा ! भणिओ सो तेहिं दुरायारेहिं जहा किमट्ठं चिंतासागरे णिमज्जिऊणं ठिओ ? सिग्घमेत्थं किंचि परिहारगं वयाहि, णवरं तं परिहारगं भणिज्जा जं^४ जहुत्तत्थकियाए अव्वभिचारी । ताहे सुइरं परितप्पिऊणं हियएणं भणियं सावज्जायरिएणं जहा एएणं अत्थेणं जगगुरुहिं वागरियं जं अओगस्स सुत्तत्थं न दायव्वं, जओ

१. महतीति । २. श्रोतृभिरिति । ३. अत्यन्तजडीभूतमिति । * वाक्यालङ्कारे ।

४. यथोक्तार्थक्रिययेति ।

‘आमे घडे निहत्तं जहा जलं तं घडं विणासेइ ।

इय सिद्धंतरहस्सं अप्पाहारं विणासेइ ॥१२८॥

ताहे पुणो वि तेहिं भणियं जहा किमेयाइं ^१अरडवरडाइं असंबद्धाइं दुब्भासियाइं पलवह ? जइ परिहारं ण दाउं सक्के ता ^२उप्फिड मुयसु आसणं, ^३ऊसर सिग्घं इमाओ ठाणाओ, किं देवस्स रुसेज्जा जत्थ तुमंपि पमाणीकाऊणं सव्वसंघेणं समयसब्भावं वायरेउं जे समाइडो ? तओ पुणोवि सुइरं परितप्पिऊणं गोयमा ! अन्नं परिहारगमलभमाणेणं अंगीकाऊणं दीहसंसारं भणियं च सावज्जायरिएणं जहा णं उस्सग्गाववायेहिं आगमो ठिओ, तुब्भे ण याणहेयं, एगंतो मिच्छंतं, जिणाणमाणा मणेगंता ।

एयं च वयणं गोयमा ! गिम्हायवसंताविएहिं सिहिउलेहिं व अहिणवपाउससजलघणोरल्लिमिव सबहुमाणं समाइच्छियं तेहिं दुडुसोयारेहिं ।

तओ एगवयणदोसेणं गोयमा ! निबंधिऊणाणंतं संसारियत्तणं अपडिक्कमिऊणं च तस्स पावसमुदायमहाखंधमेलावगस्स मरिऊण उववन्नो वाणमंतरेसु सो सावज्जायरिओ । तओ चुओ समाणो उववन्नो पवसियभत्ताराए पडिवासुदेवपुरोहियधूयाए कुच्छिमि ।

अहऽन्नया वियाणिउं तीए जणणीए पुरोहियभज्जाए जहा णं हा हा हा दिन्नं मसिकुच्चयं सव्वनियकुलस्स इमीए दुरायाराए मज्झ धूयाए । साहियं च पुरोहियस्स । तओ संतप्पिऊण सुइरं बहुं च हियएण साहारेउं निव्विसया कया सा तेणं पुरोहिएणं, एमहंता असज्झदुन्निवारअयसभीरुणा । अहऽन्नया थेवकालंतरेणं कहिंचि थाममलभमाणी सीउण्हवायविज्झडिया ^४खुक्खामकंठा दुब्भिक्खदोसेणं

पविट्टा दासत्ताए रसवाणियगस्स गेहे, तत्थ य बहूणं मज्झपाणगाणं
संचियं साहरेइ अणुसमयमुच्चिड्डगंति ।

अन्नया अणुदिणं साहरमाणीए तमुच्चिड्डगं दहूण च बहुमज्झपाणगे
मज्झमावियमाणे पोग्गलं च समुद्दिसंते तहेव तीए मज्झमंसस्सोवरिं
दोहलगं समुप्पन्नं जाव णं जं तं बहुमज्झपाणं
नडनट्टुत्तचारणभडोड्डुचेड^१ तक्करासरिसजातीसमुज्झियं खुरसीसपुंछ-
कन्नड्डिमियगयं उच्चिड्डं^२ वल्लूरखंडं तं समुद्दिसितं समारद्धा । ताहे तेसु
चेव उच्चिड्डकोडियगेसु जंकिंचि णाहीए मज्झं^३ विथक्कं
तमेवासाइउमारद्धा । एवं च कइवयदिणाइक्केमणं मज्झमंसस्सोवरिं दढं
गेही संजाया । ताहे तस्सेव रसवाणिज्जगस्स गेहाउ परिमुसिऊणं किंचि
कंसदूसदविणजायं अन्नत्थ विक्किणिऊणं मज्झं मंसं परिभुंजइ, ताव णं
विन्नायं तेण रसवाणिज्जगेण, साहियं च नरवइणो, तेणावि वज्झा
समाइट्टा ।

तत्थ य राउले एसो गोयमा ! कुलधम्मो जहा णं जा काइ
आवन्नसत्ता नारी अवरहदोसेणं सा जाव णं नो पसूया ताव णं नो
वावाएयव्वा, तेहिं^४ विणिउत्तगणिगितगेहिं सगेहे नेऊण पसूइसमयं
जाव णियंतिया रक्खेयव्वा ।

अहऽन्नया णीया तेहिं हरिएसजाईहिं सगेहं, कालक्कमेण पसूया य
दारगं तं सावज्जायरियजीवं । तओ पसूयमेत्ता चेव तं बालयं
उज्झिऊण पणट्टा^५ “मरणभयाहित्था^६ सा गोयमा ! दिसिमेक्कं गंतूणं,
वियाणियं च तेहिं पावेहिं जहा पणट्टा सा पावकम्मा । साहियं च
नरवइणो सूणाहिवइणा जहा णं देव ! पणट्टा सा दुरायारा
कयलिगब्भोवमं दारगमुज्झिऊणं, रन्ना वि पडिभणियं - जहा णं जइ

१. तक्करासदशजातिसमुज्झितमिति । २. धूलिमिश्रितमिति यदिवा ‘वल्लूरखंडं’ इति
पाठमाश्रित्य त्रुटितखण्डमिति । ३. अवशिष्टमिति ४. विनियुक्तकनिकृन्तकैरिति
५. मरणभयाऽऽवस्तेति । ६. ‘हियत्था’ कचिदिति

नाम सा गया ता गच्छत तं बालगं पडिवालेज्जासु, सव्वहा तहा कायव्वं जहा तं बालगं ण वावज्जे, गिण्हेसु इमे पंच सहस्सा दविणजायस्स तओ नरवइणो संदेसेणं सुयमिव परिवालिओ सो पंसुलीतणओ ।

अन्नया कालक्रमेणं मओ सो पावकम्मो सूणाहिवई । तओ रन्ना समणुजाणिउं तस्सेव बालगस्स घरसारं, कओ पंचण्ह सयाणं अहिवई । तत्थ य सूणाहिवइए ठिओ समाणो ताइं तारिसाइं अकरणिज्जाइं समणुद्धित्ताणं गओ सो गोयमा ! सत्तमाए पुढवीए अपइट्ठाणनामे निरयावासे सावज्जायरियजीवो । एवं तं तत्थ तारिसं घोरपचंडरोद्धं सुदारुणं दुक्खं तित्तीसं सागरोवमं जाव कहकहवि किलेसेणं समणुभविऊणं इहागओ समाणो उववन्नो अंतरदीवे एगोरुयजाई । तओ वि मरिऊणं उववन्नो तिरियजोणीए महिसत्ताए, तत्थ य जाइं काइं पि णारगदुक्खाइं तेसिं तु सरिसनामाइं अणुभविऊणं छव्वीसं संवच्छराणि तओ गोयमा ! मओ समाणो उववन्नो मणुएसु । तओ गओ वासुदेवत्ताए सो सावज्जायरियजीवो । तत्थवि अहांऊयं परिवालिऊणं अणेग संगामारंभपरिगहदोसेण मरिऊण गओ सत्तमाए । तओवि उव्वट्ठिऊण सुइरकाला उववन्नो गयकन्नो नाम मणुयजाई । तओवि कुणिमाहारदोसेणं कूरज्जवसायमई गओ मरिऊणं पुणोवि सत्तमाए तहिं चेव अपइट्ठाणे निरयावासे । तओ उव्वट्ठिऊणं पुणोवि उववन्नो तिरिएसु महिसत्ताए ।

तत्थवि णं नरगोवमं दुक्खमणुभविताणं मओ समाणो उववन्नो बालविहवाए पंसुलीमाहणधूयाए कुच्छंसि । अहऽन्नया निउत्त-पच्छन्नगब्भसाडणपाडणखारचुण्णजोगदोसेणं अणेगवाहिवेयणापरि-गयसरीरो, सिडिहिडंतकुट्ठवाहीए परिगलमाणो, सलसलितकिमि-जालेणं खज्जंतो नीहरिओ नगओवम-घोरदुक्खनिवासाओ गब्भवासाओ गोयमा ! सो सावज्जायरिय-जीवो ।

तओ सव्वलोगेहिं निंदिज्जमाणो गरहिज्जमाणो खिसिज्जमाणो

दुगुंछिज्जमाणो सव्वलोगपरिभूओ पाणखाणभोगोवभोगपरिवज्जिओ गब्भवासपभित्तीए चेव विचित्तसारीरमाणसिगघोरदुक्खसंतत्तो सत्त संवच्छरसयाइं दो मासे य चउरो दिणे य जाव जीविऊणं मओ समाणो उववन्नो वाणमंतरेसुं । तओ चुओ उववन्नो मणुएसुं पुणोवि सूणाहिवत्ताए । तओवि तक्कम्मदोसेणं सत्तमाए । तओवि उव्वट्टेऊणं उववन्नो तिरिएसुं चक्कियघरंसि गोणत्ताए ।

तथ य चक्कसगडलंगलायट्टणेणं अहन्निसं जूवारोवणेणं पच्चिऊण कुहियखंधं संमुच्छिए य किमी ताहे अक्खमीहूयं खंधं जुवधरणस्स विण्णाय पट्टीए वाहुउमारद्धो तेणं चक्किएणं । अहऽन्नया कालक्कमेणं जहा खंधं तहा पच्चिऊणं कुहिया पट्टी, तत्थावि संमुच्छिए किमी, सडिऊण विगयं च पट्टिचम्मं, ता अकिंचियरं निप्पओयणंति णाऊण मोक्कलिओ गोयमा ! तेणं चक्किएणं तं सलसलित-किमिजालेहिं णं खज्जमाणं बड्डलं सावज्जायरियजीवं, तओ मोक्कलिओ समाणो परिसडियपट्टिचम्मो बहुकायसाणकिमिकुलेहिं सबज्झव्भंतरे विलुप्पमाणो एकूणतीसं संवच्छराइं जाव आउयं परिवालेऊणं मओ समाणो उववण्णो अणेगवाहिवेयणापरिगयसरीरो मणुएसुं महाधणस्स णं इब्भस्स गेहे । तथ य वमणविरेयणखार-कडुतित्तकसाय-तिहला-गुग्गलकाढगे आवीयमाणस्स निच्चविसोसणाहिं च असज्झाणुवसम्मघोरदारुणदुक्खेहिं पज्जालियस्सेव गोयमा ! गओ निप्फलो तस्स मणुयजम्मो । एवं च गोयमा सावज्जायरियजीवो चोद्दसरज्जुयलोगं जम्मणमरणेहिं णं निरंतरं पडिजरिऊणं सुदीहाणंतकालाओ समुप्पन्नो मणुयत्ताए अवरविदेहे । तथ य भागवसेणं लोगाणुवत्तीए गओ तित्थयरस्स वंदणवत्तियाए पडिबुद्धो य पव्वइओ । सिद्धो अ इह तेवीसमतित्थयरपासणामस्स काले । एयं तं गोयमा ! सावज्जायरिएण पाव्वियं ।

से भयवं ! किं पच्चइयं तेणाणुभूयं एरिसं दूसहं घोरदारुणं

महादुक्खसंनिवायसंघट्टमित्ति-कालं ति ? गोयमा ! जं भणियं तक्कालसमयं जहा णं 'उस्सग्गाववाएहिं आगमो ठिओ, एगंतो मिच्छत्तं, जिणाणमाणा अणेगंतोत्ति' एयवयणपच्चइयं ।

से भयवं ! किं उस्सग्गाववाएहिं णं नो ठियं आगमं ?, एगंतं च पन्नविज्जइ ? गोयमा ! उस्सग्गाववाएहिं चेव पवयणं ठियं, अणेगंतं च पन्नविज्जइ, णो णं एगंतं, णवरं आउक्कायपरिभोगं तेउकायसमारंभं मेहुणासेवणं च एते तओ थाणंतरे एगंतेणं ३ निच्छयओ ३ बाढं ३ सव्वहा सव्वपयारेहिं णं आयहियट्ठीणं 'निसिद्धंति । एत्थं च सुत्ताइक्कमे सम्मग्गविप्पणासणं उम्मग्गपयरिसणं तओ य आणाभंगं आणाभंगाओ अणंतसंसारी । से भयवं ! किं तेण सावज्जायरिएणं मेहुणमासेवियं ? गोयमा ! सेवियासेवियं, णो सेवियं णो असेवियं । से भयवं ! केणं अट्टेणं एवं वुच्चइ ? गोयमा ! जं तीए अज्जाए तक्कालं उत्तिमंगेणं पाए फरिसिए, फरिसिज्जमाणे य णो तेण आउंटिउं संवरिए, एएणं अट्टेणं एवं गोयमा ! वुच्चइ ।

से भयवं ! एद्वहमेत्तस्सावि णं एरिसे घोरदुव्विमोक्खे बद्धपुट्ट-निकाइए कम्मबंधे ? गोयमा ! एवमेयं, ण अन्नहत्ति । से भयवं ! तेण तिथयरणामकम्मगोयं आसकलियं एगभवावसेसीकओ आसी भवोयही ता किमेयमणंतसंसाराहिंडणंति ? गोयमा ! निययपमायदोसेणं । तम्हा एयं वियाणित्ता भवविरहमिच्छमाणेणं गोयमा ! सुदिट्ठसमयसारेणं गच्छाहिवइणा सव्वहा सव्वपयारेहिं णं सव्वत्थामेसु अच्चंतं अप्पमत्तेणं भवियव्वंति बेमि । २९।



महानिशीहसुयक्खंधस्स दुवालसंगसुयनाणस्स ।

णवणीयसारनाम पंचमं अज्झयणं ॥५॥

१. यद्यपि ग्रन्थान्तरेऽप्यायतेजःकाययोः कल्पिका प्रतिसेवनोच्यते, मैथुनस्य तु रागद्वेषरहितप्रवृत्त्यभावेनात्यन्तनिषेध एव, तथाप्यप्यादिप्रतिसेवात्रयस्यैव तत्त्वतो गृहवासत्वादुज्झितगृहवासानामुत्सर्गरुचीनां मुनीनां तन्निर्वाहार्थं पुष्टालम्बनानामपि तादृशचारित्रशुद्ध्यै तस्यात्यन्तिकनिषेध इति । (गुरुतत्त्वविनिश्चयतः)

अथ गीयत्थविहार नाम छट्ठमज्झयणं

भयवं ! जो रत्तिदियहं सिद्धंतं पढइ सुणेइ वक्खाणेइ चिंतए
सततं सो किं अणायारमायरे ? सिद्धंतगयमेगंपि अक्खरं जो वियाणई ।
सो गोयम ! मरणंतेविऽणाचारं नो समायरे ॥१॥

से भयवं ! ता कीस दसपुव्वी णंदिसेणे महायसे पव्वज्जं चिच्चा
गणिकाए गेहं पविट्ठो य वुच्चई ?

गोयमा ! तस्स ^१पसिट्ठं से भोगहलं खलियकारणं ।

भवभयभीओ तहावि दुयं, सो पव्वज्जमुवागओ ॥१॥

पायालं अवि उड्ढमुहं, सगं होज्जा अहोमुहं ।

ण उणो केवलिपन्नत्तं वयणं अन्नहा भवे ॥२॥

अन्नं सो ^२बहूवाए वा सुयनिबद्धे वियारिउं ।

गुरुणो ^३पामूले मोत्तूणं, लिंगं निव्विसओ गओ ॥३॥

तमेव वयणं सरमाणो, दंतभग्गो सकम्मुणा ।

भोगहलं कम्मं वेदेइ, बद्धपुट्टनिकाइयं ॥४॥

भयवं ! ते केरिसोवाए, सुयनिबद्धे वियारिए ।

जेणुज्झिय सामन्नं, अज्जवि पाणे धरेइ सो ? ॥५॥

एते ते गोयमोवाए, केवलीहिं पवेइए ।

जहा विसयपराभूओ, सरेज्जा सुत्तमिमं मुणी ॥६॥

तं जहा-तवमट्ठगुणं घोरं आढवेज्जा सुदुक्करं ।

जया विसए उदिज्जंति, ^४पडणासणविसं पि वा ॥७॥

-
१. प्रकथितं मया तस्येति । २. बहूनुपायान् विचार्येति । ३. पादमूल इति ।
४. पडणाणसणविसं इति पाठः संभाव्यते तथा पतनमनशनं विषं वेति । 'विसं
पिबे' इत्यपि कचिदिति ।
-

उब्बंधिऊणं मरियव्वं, नो चरित्तं विराहए ।
 अह एयाइं न सक्केज्जा, ता गुरुणं लिंगं समप्पिया ॥८॥
 विदेसे जत्थ नागच्छे, पउत्ती तत्थ गंतूणं ।
 अणुव्वय पालेज्जा, ^१णो णं भविआ णिद्धंधसे ॥९॥
 ता गोयम ! णंदिसेणेणं, गिरिपडणं जाव पत्थुयं ।
 तावायासे इमा वाणी, पडिओवि णो मरिज्ज तं ॥१०॥
 दिसामूहाइं जा जोए, ता पेच्छे चारणं मुणिं ।
 अकाले नत्थि ते मच्चू, ^२विसमविसमादितुंगओ* ॥११॥
 ताहेवि ^३अणहियासेहिं, विसएहिं जाव पीडिओ ।
 ताव चिंता समुप्पन्ना, जहा-किं जीविएण मे ॥१२॥
 कुंदेन्दुनिम्मलयरगं, तित्थं पावमती अहं ।
 उड्डाहितो हु सुज्झिस्सं, कत्थ गंतुमणारिओ ? ॥१३॥
 अहवा सलंछणो चंदो, कुंदस्स उण का पहा ।
 कलिकलुसमलकलंकेहिं, वज्जियं जिणसासणं ॥१४॥
 ता एयं सयलदारिदुहकिलेसक्खयं-करं ।
 पवयणं खिसावितो, कत्थ गंतूण सुज्झिहं ? ॥१५॥
 दुग्गुट्टकं गिरिं रोढुं, अत्ताणं चुन्निमो धुवं ।
 जाव विसयवसो णाहं, किंचित्थुड्डाहं करं ॥१६॥
 एवं पुणोवि आरोढुं, टंकुच्छिन्नं गिरीयडं ।
 संवरे किल ^४निरागारं गयणे पुणरवि भाणियं ॥१७॥

१. मा भूत् निर्दयो निर्लज्ज इति । २. 'विसमचित्तादितुंगओ' पाठान्तरमाश्रित्य उत्तुङ्गादपि विषमचितादेः सकाशादिति । * 'विसमवितादि तुंगओ' पाठान्तरं तच्च 'विसमविहादितुंगओ' संभाव्यते । ३. दुःसहयैर्विषयैरिति ४. निरपवादमिति ।

अयाले नत्थि ते मच्चू, चरिमं तुज्झं इमं तणुं ।
 ता बद्धपुट्ठं भोगहलं, वेइत्ता संजमं कुरु ॥१८॥
 एवं तु जाव बे वारा, चारणसमणेहिं सेहिओ ।
 ताहे गंतूण सो लिंगं, गुरुपामूले निवेदिउं ॥१९॥
 तं सुत्तत्थं सरेमाणो, दूरं देसंतरं गओ ।
 तत्थाहारनिमित्तेणं, वेसाए घरमागओ ॥२०॥
 धम्मलाभं जा भणई, अत्थलाभं विमग्गिओ ।
 तेणावि सिद्धिजुत्तेणं, एवं भवउत्ति भाणियं ॥२१॥
 अद्धतेरसकोडीओ, दविणजायस्स जा तहिं ।
 हिरण्णविट्ठिं दावेउं, मंदिरा पडिगच्छइ ॥२२॥
 उत्तुंगथोरथणवट्ठा, गणिगा आलिंणिउं दढं ।
 भन्ने किं जासिमं दविणं, अविहीए दाउं ? ^१चुल्लागा ! ॥२३॥
 तेणवि भवियव्वं एयं, कलिऊणेयं पभाणियं ।
 जहा जा ते विही इट्ठा, तीए दव्वं पयच्छसु ॥२४॥
 गहिऊणाभिग्गहं ताहे, पविट्ठो तीए मंदिरं ।
 एयं जहा न ताव अहयं, भोयणपाणविहिं करे ॥२५॥
 दस-दस ण बोहिए जाव, दियहे २ अणूणगे ।
 पइन्ना जा न पुन्नेसा, ^२काइयमोक्खं न ता करे ॥२६॥
 अन्नं च न मे दायव्वा, पव्वजोवड्डियस्सवि ।
 जारिसगं तु गुरुलिंगं, भवे सीसंपि तारिसं ॥२७॥

अखीणत्थं निहीकाउं, लुंछिओ ^१खोसिओवि सो ।
 तहाऽऽराहिओ गणिगाए, बद्धो जह पेमपासेहिं ॥२८॥
 आलावाओ पणओ पणयाउ रती रतीइ वीसंभो ।
 वीसंभाओ णेहो पंचविहं वड्ढए पेम्मं ॥२९॥
 एवं सो पेम्मपासेहिं, बद्धोऽवि सावगत्तणं ।
 जहोवइड्ढं करेमाणो, दस अहिए वा दिणे दिणे ॥३०॥
 पडिबोहिऊण संविग्गगुरुपामूलं पवेसई ।
 संपयं बोहिओ सो वि, दुम्महेण जहा तुमं ॥३१॥
 धम्मं लोगस्स साहेसि, अत्तकज्जंमि मुज्झसि ।
 णुणं ^२विक्रेणुयं धम्मं, जं सयं णाणुचिड्ढसि ॥३२॥
 एयं सो वयणं सोच्चा, दुम्महस्स सुभासियं ।
 थरथरथरस्स कंपंतो, निंदिउं गरहिउं चिरं ॥३३॥
 हा हा हा हा अकज्जं मे, भट्टसीलेण किं कयं ?
 जेणं तु ^३सुत्तो घसरे, गुडिओऽसुइ किमी जहा ॥३४॥
 धी धी धी धी अहन्नेणं पेच्छ जं मेऽणुचिड्ढियं ।
 जच्चकंचणसमऽत्ताणं, असुइसरिसं मए कयं ॥३५॥
 खणभंगुरस्स देहस्स, जा विवत्ती ण मे भवे ।
 ता तित्थयरस्स पामूलं, पायच्छित्तं चरामिऽहं ॥३६॥
 एसमागच्छती एत्थं, चिड्ढंताणेव गोयमा !
 घोरं चरिऊण पायच्छित्तं, संविग्गोऽम्हेहिं भासिउं ॥३७॥

घोरवीरतवं काउं, असुहकम्पं खवेत्तु य ।
 सुक्कज्झाणे समारुहिउं, केवलं पप्प सिज्झिही ॥३८॥
 ता गोयमेयणाएणं, बहू उवाए वियारिया ।
 लिंगं गुरुस्स अप्पेउं, नंदिसेणेण जइ कयं ॥३९॥
 उस्सग्गं ता तुमं बुज्झ, सिद्धंतेयं जहट्ठियं ।
 तवंतरा उदयं तस्स महंतं आसि गोयमा ! ॥४०॥
 तहा वि जा विसए उदिन्ने, तवे घोरं महातवं ।
 अट्ठगुणं तेणमणुचिन्नं, तो वि विसए ण णिज्झिए ॥४१॥
 ताहे विसभक्खणं पडणं, अणसणं तेण इच्छियं ।
 एयंपि चारणसमणेहिं, बे वारा जाव सेहिओ ॥४२॥
 ताव य गुरुस्स रयहरणं, ^१अल्लियन्नं देसंतरं गओ ।
 एते ते गोयमोवाए, सुयनिबद्धे वियाणए* ॥४३॥
 जहा-जाव गुरुणो न रयहरणं, पव्वज्जा य न अल्लिया ।
 तावाकज्जं न कायव्वं, लिंगमवि जिणदेसियं ॥४४॥
 अन्नत्थ ण उज्झियव्वं, गुरुणो मोत्तूण अंजलिं ।
 जइ सो उवसामिउं सक्को, गुरु ता उवसामई ॥४५॥
 अह अन्नो उवसामिउं सक्को ^२तोऽवी तस्स कहिज्झइ ।
 गुरुणावि तयं णऽन्नस्स, ^३गिरावेयव्वं कयाइऽवी ॥४६॥
 जो भविया ^४वीयपरमट्ठो, जगट्ठिइ-वियाणगो ।
 एयाइं तु पयाइं जो, गोयमा ! णं विडंबए ॥४७॥

१. अर्पयित्वाऽन्यं देशान्तरं गत इति । २. 'ताव' पाठान्तरमिति । ३. गिरा
 नाऽऽवेदितव्यमिति । ४. विदितपरमार्थ इति । * वियाणि ए पा० ।

मायापवंचडंभेण सो भमिही आसडो जहा ॥४७॥ अ॥
 भयवं ! न याणिमो कोऽवि, मायासीलो हु आसडो ?
 किं वा निमित्तमुवचरिउं, सो भमे बहुदुहडिओ ॥४८॥
 चरिमस्सऽन्नस्स तित्थंमि, गोयमा ! कंचणच्छवी
 आयरिओ आसि भूइक्खो, तस्स सीसो य स आसडो ॥४९॥
 महव्वयाइं घेतूणं, अह सुत्तत्थं अहिज्जिया
 ताव कोऊहलं जायं, णो णं विसएहिं पीडिओ ॥५०॥
 चित्तेइ य जह सिद्धंते, एरिसो दंसिओ विही
 ता तस्स पमाणेणं, गुरुयणं रंजिउं दढं ॥५१॥
 तवं चऽट्ठगुणं काउं, पडणाणसणं विसं
 करेहामि जहाऽहंपि, देवयाए निवारिओ ॥५२॥
 दीहाऊ णत्थि ते मच्चू, भोगे भुंज जहिच्छिए ॥५३॥
 लिंगं गुरुस्स अप्पेउं, अन्नं देसंतरं वय ।
 भोगहलं वेइया पच्छा, घोरवीरतवं चर ॥५४॥
 अहवा हा हा अहं मूढो, आयसल्लेण सल्लिओ ।
 समणाणं णेरिसं जुत्तं, समयमवी मणसि धारिउं ॥५५॥
 एत्था उ मे पच्छित्तं, आलोएत्ता लहुं ^१धरे ।
 अहवणं ण आलोउं, मायावी भन्निमो पुणो ॥५६॥
 ता दसवासे आयामं, मासक्खमणस्स पारणे ।
 वीसायंबिलमादीहिं, दो दो मासाण पारणे ॥५७॥
 पणुवीसं वासे तत्थ, चंदायणतवेण य ।
 छट्ठट्ठमदसमाइं अट्ठ वासे यऽणूणगे ॥५८॥

महघोरैरिसपच्छित्तं, सयमेवेत्थाणुच्चरं ।
 गुरुपामूलेऽवि एत्थेयं, पायच्छित्तं मे ण ^१अग्गलं ॥५९॥
 अहवा तित्थयरेणेस, किमट्ठं वाइओ विही ?
 जेणेयमहीयमाणोऽहं, पायच्छित्तस्स मेलिओ ? ॥६०॥
 अहवा-सोच्चिय जाणेज्ज सव्वन्नू, पच्छित्तं अणुचरामहं ।
 जमित्थं दुट्ठचित्तियं, तस्स मिच्छामि दुक्कडं ॥६१॥
 एवं तं कट्ठं घोरं, पायच्छित्तं सयंमती ।
 काऊणंपि ससल्लो सो, वाणमंतरियं गओ ॥६२॥
 हिट्ठिमोवरिमगेवेयविमाणे तेण गोयमा !
 वयंतो आलोइत्ता, जइ तं पच्छित्तं कुव्विया ॥६३॥
 वाणमंतरदेवत्ता, चइऊणं गोयमा ! ५५सडो ।
 रासहत्ताए तिरिच्छेसुं, नरिंदघरमागओ ॥६४॥
 निच्चं तत्थ वडवाणं संघट्टणदोसा तहिं ।
 वसणे वाही समुप्पण्णा, किमी एत्थ संमुच्छिए ॥६५॥
 तओ किमिएहिं खजंतो, वसणदेसंमि गोयमा !
 मुक्काहारो खिइं लेढे, वियणत्तो ताव साहुणो ॥६६॥
 अदूरेण ^२पवोलेंते, दट्ठूणं जाइं सरेत्तु य ।
 निंदितुं गरहितुं आया, अणसणं पडिवज्जिया ॥६७॥
 कागसाणेहिं खजंतो, सुद्धभावेणं गोयमा !
 अरहंताणंति सरमाणो, संमं उज्झिय तणूं ॥६८॥

कालं काउण देविंदमहाघोससमाणिओ ।
 जाओ तं दिव्वं इडिंढ, समणुभोत्तुं तओ चुओ ॥६९॥
 उववन्नो वेसत्ताए, जा सा नियडी ण पयडिया ।
 तओवि मरिऊणं बहू, अंतपंते कुलेऽडिओ ॥७०॥
 कालक्रमेणं महराए, सिवइंदस्स दियाइणो ।
 सुओ होऊणं पडिबुद्धो, सामन्नं काउं निव्वुडो ॥७१॥
 एयं तं गोयमा ! सिद्धं, नियडीपुंजं तुं आसडं ।
 जे य सव्वन्नमुहभणिए, वयणे मणसा विडंबिए ॥७२॥
 कोऊहलेणं विसयाणं, ण उणं विसएहिं पीडिओ ।
 सच्छंदपायच्छित्तेण, भमिओ भवपरंपरं ॥७३॥
 एयं नाउणमिक्कंपि, सिद्धंतिगमालावगं ।
 जाणमाणो हु उम्मगं, कुञ्जा जे से वियाणिहि ॥७४॥
 जो पुण सव्वसुयन्नाणं, अद्धं वा थेत्तयंपि वा ।
 णच्चा वएज्ज मग्गेणं, तस्स ^१अहो ण बज्झई,
 एयं नाऊण मणसावि, उम्मगं नो पव्वत्तए ॥७५॥ त्ति बेमि,
 'भयवं ! अकिच्चं काउणं, पच्छित्तं जो करेज्ज वा ।
 तस्स लट्ठयरं पुरओ, जं अकिच्चं न कुव्वई ? ॥७६॥
 ताऽजुत्तं गोयमा ! मिणमो, वयणं मणसावि धारिउं ।
 जहा काउमकत्तव्वं, पच्छित्तेणं तु सुज्झिहं ॥७७॥
 जो एयं वयणं सोच्चा, सदहे अणुचरेइ वा ।
 भट्ठसीलाणं सव्वेसिं, सत्थवाहो स गोयमा ! ॥७८॥

एसो काउंपि पच्छित्तं, पाणसंदेह-कारणं ।
 आणा-अवराह-पदीवसिहं, पविसे सलभो जहा ॥७९॥
 भयवं ! जो बलं विरियं, पुरिसयारपरक्कमं ।
 अणिगूहंतो तवं चरइ, पच्छित्तं तस्स किं भवे ? ॥८०॥
 तस्सेयं होइ पच्छित्तं, असढभावस्स गोयमा !
 जो तं थामं वियाणेत्ता, ^१वेरी-सेन्नमिवेक्खिया ॥८१॥
 जो बलं वीरियं सत्तं, पुरिसयारं निगूहए ।
 सो सपच्छित्तऽपच्छित्तो, ^२सढसीलो नराहमो ॥८२॥
 नीयागोत्तं दुहं घोरं निरए सुक्कोसियट्ठित्तिं ।
 वेदेंतो तिरिजोणीए, हिंडेज्जा चउगईए सो ॥८३॥
 से भयवं ! पावयं कम्मं, परं वेइय समुद्धरे ।
 अणणुभूएण णो मोक्खं, पायच्छित्तेण किं तहिं ? ॥८४॥
 गोयमा ! वासकोडीहिं, जं अणेगाहिं संचियं ।
 तं पच्छित्तरवीपुट्ठं, पावं तुहिणं व विलीयइ ॥८५॥
 घणघोरंधयारतमतिमिस्सा, जह सूरस्स गोयमा !
 पायच्छित्तरविस्सेवं, पावं कम्मं पणस्सए ॥८६॥
 णवरं जइ तं पच्छित्तं, जह भणियं तह समुद्धरे ।
 असढभावो अणिगूहिय-बलवीरिय-पुरिसयारपरक्कमे ॥८७॥
 अन्नं च काउ पच्छित्तं, सव्वथेवं णमणुद्धरे ।
 जो दरुद्धियसल्लो ^३अप्पेसो, दीहं चाउग्गइयं अडे ॥८८॥

भयवं ! कस्सालोएज्जा ? पच्छित्तं को व देज्ज वा ?

कस्स व पच्छित्तं देज्जा ?, आलोचावेज्ज वा कहं ॥८९॥

गोयमालोयणं ताव, केवलीणं बहूसुवि ।

जोयणसएहिं गंतूण, सुद्धभावेहिं दिज्जए ॥९०॥

चउनाणीणं तयाभावे, एवं ओहि-मईसुए ।

जस्स विमलयरे तस्स, तारतम्भेण दिज्जई ॥९१॥

उस्सगं पन्नविंतस्स, उस्सगो पड्वियस्स य ।

उस्सगगरूइणो चेव, सव्वभावंतरेहिं णं ॥९२॥

उवसंतस्स दंतस्स, संजयस्स तवस्सिणो ।

समितीगुत्तिपहाणस्स, दढचारित्तस्सासढभाविणो ॥९३॥

आलोएज्जा पडिच्छेज्जा, दिज्जा दाविज्ज वा परं ।

अहन्निसं तदुद्धिं, पायच्छित्तं अणुच्चरे ॥९४॥

से भयवं ! कित्तिं तस्स, पच्छित्तं हवइ निच्छियं ?

पायच्छित्तस्स ठाणाइं, केवइयाइं ? कहेहि मे ॥९५॥

गोयमा ! जं सुसीलाणं, समणाण दसण्ह उ ।

खलियागयपच्छित्तं, संजई तं नवगुणं ॥९६॥

एक्का पावइ पच्छित्तं, जइ सुसीला दढव्वया ।

अह सीलं विराहेज्जा, ता तं हवइ सयगुणं ॥९७॥

तीए पंचेदिया जीवा, जोणीमज्झे निवासिणो ।

सामन्नं नव लक्खाइं, सव्वे पासंति केवली ॥९८॥

केवलनाणस्स ते, गम्मा णोऽकेवली ताइं पासती ।

ओहिनाणी वियाणेए, णो पासे मणपज्जवी ॥९९॥

ते पुरिसं संघट्टंती, कोलूहुगंमि तिले जहा ।
 सव्वे ^१मुसुमूरावेइ, रंतुं मत्ता अहन्निया ॥१००॥
 चक्कमंतीइ गाढाइं, काइयं वोसिरंतिया ।
 वावाइज्जा य दो तिन्नि, सेसाइं परियावई ॥१०१॥
 पायच्छित्तस्स ठाणाइं, संखाईयाइं गोयमा !
 अणालोइयंतो हु एकंपि, ससल्लमरणं मरे ॥१०२॥
 सयसहस्सनारीणं, पोढुं फालित्तु निग्घिणो ।
 सत्तट्ठमासिए गब्भे, चडप्फडंतं णिगितई ॥१०३॥
 जं तस्स जत्तियं पावं, तित्तियं तं नवं गुणं ।
 एकसित्थीपसंगेणं, साहू बंधेज्ज मेहुणा ॥१०४॥
 साहुणीए सहस्सगुणं, मेहुणेक्कसिं सेविए ।
 कोडीगुणं तु बिज्जेणं, तइए बोही पणस्सइ ॥१०५॥
^२जो साहू इत्थियं दट्ठुं, विसयट्ठो रामेहिई ।
 बोहिलाभा परिब्भट्ठो, ^३कहं वराओ सो होहीइ ? ॥१०६॥
 अबोहि लाभियं कम्मं, संजओ अह संजई ।
 मेहुणे सेविए आउतेउक्काए पबंधई ॥१०७॥
 जम्हा तीसुवि एएसु, अवरज्झंतो हु गोयमा !
 उम्मग्गमेव ^४वद्धारे, मग्गं निट्ठवइ सव्वहा ॥१०८॥
 भगवं ! ता एएण नाएणं, जे गारत्थी ^५मउक्कडे ।
 रत्तिंदिया ण छट्ठंति, इत्थियं तस्स का गई ॥१०९॥

१. नाशयतीति २. 'एयं नाउण जो साहू इत्थिय रामेहिई' पाठान्तरमिति । ३. 'कहं वराओ सोहिही' पाठान्तरमिति । ४. वर्धयेदिति ५. मदोत्कटा इति ।

ते सरीरं सहत्येणं, छिदिऊणं तिलंतिलं ।
 अग्गीए जइवि होमंति, तोऽवि सुद्धी ण दीसइ ॥११०॥
 तारिसो वि णिवित्तिं सो, परदारस्स जई करे ।
 सावगधम्मं च पालेइ, गइं पावेइ मज्झिमं ॥१११॥
 भयवं ! सदारसंतोसे, जइ भवे मज्झिमं गई ।
 ता सरीरेऽवि होमंतो, कीस सुद्धिं ण पावई ॥११२॥
 सदारं परदारं वा इत्थी पुरिसो व गोयमा !
 रमंतो बंधए पावं, णो णं भवइ अबंधगो ॥११३॥
 सावगधम्मं जहुत्तं जो, पाले परदारं चए ।
 जावज्जीवं तिविहेणं, तमणुभावेण सा गई ॥११४॥
 णवरं नियमविहूणस्स, परदारमगयस्स उ ।
 अणियत्तस्स भवे बंधं, णिवित्तीए महाफलं ॥११५॥
 सुथेवाणंपि निवित्तिं, जो मणसावि विराहए ।
 सो मओ दुग्गइं गच्छे, मेघमाला जहऽज्जिया ॥११६॥
 मेघमालज्जियं नाहं, जाणिमो भुवणबंधव !
 मणसावि अणुनिव्वत्तिं, जा खंडिय दुग्गइं गया ॥११७॥
 वासुपुज्जस्स तित्थंमि, ^१भोला कालगच्छवी ।
 मेघमालऽज्जिया आसि, गोयमा ! मणदुब्बला ॥११८॥
 सा - ^२नियममागासपक्खं दाउं, * काउं भिक्खा य निग्गया ।
^३अन्नओ णत्थिणी सारमंदिरोवरि संठिया ॥११९॥

१. सरलचित्तेति २. नियमात्मकाऽऽकाशपञ्जरं दत्त्वा स्वकृत्यान्निवृत्ता सती यदि वा भिक्षां च कृत्वा निजावासवेदिकात् उपरिभागं निर्गतिति । ३. अन्यतः अनर्थिनी यदि वा नासिकाऽऽभूषणवती काचित् स्त्री हर्म्योपरि संस्थिताऽन्यदाऽऽसन्नमन्दिरं लंघयित्वा गन्तुमिच्छुकेति । * 'दा' पाठान्तरमिति ।

आसन्नमंदिरं अन्नं, लंघित्ता गंतुमिच्छुगा ।

^१मणसाऽभिनंदेवं जा, ताव पञ्जलिया दुवे ॥१२०॥

नियमभंगं तयं सुहुमं, तीए तत्थ ण णिंदियं ।

तं नियमभंगदोसेणं, डज्झित्ता पढमियं गया ॥१२१॥

एवं नाउं सुहुमंपि, नियमं मा विराहिह ।

जेच्छिज्जा अक्खयं सोक्खं, अणंतं च अणोवमं ॥१२२॥

तवसंजमे वएसुं च, नियमो ^२दंडनायगो ।

तमेव खंडमाणस्स, ण वए णो व संजमे ॥१२३॥

आजम्मेणं तु जं पावं, बंधेज्जा मच्छबंधगो ।

वयभंगं काउमाणस्स, तं चेवऽट्ठगुणं मुणे ॥१२४॥

सयसहस्सं सलद्धीए, जोवसामित्तु^३ निक्खमे ।

वयं नियममखंडंतो, जं सो तं पुन्नमज्झिणे ॥१२५॥

पवित्ता य निवित्ता य, गारत्थी संजमे तवे ।

जमणुट्ठिया तयं लाभं, जाव दिक्खा न गिण्हिया ॥१२६॥

साहुसाहुणीवग्गेणं, विन्नायव्वमिह गोयमा ।

जेसिं मोत्तूण ऊसासं, नीसासं नाणुजाणियं ॥१२७॥

तमवि जयणाए अणुन्नायं, विजयणाए ण सव्वहा ।

अजयणाइ ऊससंतस्स, कओ धम्मो ? कओ तवो ? ॥१२८॥

भयवं ! जावइयं दिट्ठं, तावइयं कहऽणुपालिया ।

जे भवे अवीयपरमत्थे, किच्चाकिच्चमयाणगे ? ॥१२९॥

१. एवं स्त्रीपुरुषयोः संयोगमभिनन्दयति स्म मनसेति । २. ब्रह्मचर्यं सेनापतिस्थानीयमिति । ३. उपशमय्येति ।

एगंतेणं हियं वयणं, गोयम ! दिस्संति केवली ।
 णो बलमोडीइ कारेंति, हत्थे घेतूण जंतुणो ॥१३०॥
 तित्थयरभासिए वयणे, जे तहत्ति अणुपालिया ।
 सिंदा देवगणा तस्स, पाए पणमंतिं हरिसिया ॥१३१॥
 जे अविइयपरमत्थे, किच्चाकिच्चमजाणगे ।
 अंधोअंधीए तेसिं समं, जलथलं गडुटिकुरं^१ ॥१३२॥
 गीयत्थो य विहारो, बीओ गीयत्थमीसओ ।
 समणुत्ताओ सुसाहूणं, नत्थि तइयं वियप्पणं ॥१३३॥
 गीयत्थे जे सुसंविग्गे, अणालस्सी दढव्वए ।
 अखलियचारित्ते सययं, रागदोसविवज्जए ॥१३४॥
 निट्ठवियट्ठमयट्ठाणे, समियकसाये जिइंदिए ।
 विहरेज्जा तेसिं सद्धिं तु, ते छउमत्थेवि केवली ॥१३५॥
 सुहुमस्स पुढवीजीवस्स, जत्थेगस्स किलामणा ।
 अप्पारंभं तयं वेत्ति, गोयमा ! सव्वकेवली ॥१३६॥
 सुहुमस्स पुढवीजीवस्स, वावत्ती जत्थ संभवे ।
 महारंभं तयं बिंति, गोयमा ! सव्वकेवली ॥१३७॥
 पुढवीकाइयं एक्कं, दरमलेंतस्स गोयमा !
 असायकम्मबंधो हु, दुव्विमोक्खे ससल्लिए ॥१३८॥
 एवं च आऊतेऊवाऊ तह वणस्सती ।
 तसकाय मेहुणे तह, चिक्कणं चिणइ पावगं ॥१३९॥
 तम्हा मेहुणसंकप्पं, पुढवादीण विराहणं ।
 जावज्जीवं दुरंतफलं, तिविहं तिविहेणं वज्जए ॥१४०॥

ता जेऽविदियपरमत्थे, गोयमा ! णो य जे मुणे ।
 तम्हा ते विवज्जेज्जा, दोग्गईपंथदायगा ॥१४१॥
 गीयत्थस्स उ वयणेणं, विसं हालाहलं पि वा ।
 निव्विकप्पो पभक्खेज्जा, तक्खणा जं ^१समुद्दवे ॥१४२॥
 परमत्थओ विसं ^२तोसं, अमयरसायणं खु तं ।
 णिव्विकप्पं ण संसारे, मओवि सो ^३अमयस्समो ॥१४३॥
 अगीयत्थस्स वयणेणं, अमयंपि ण घोट्टए ।
 जेण अयरामरे हविया, जह किलाणो मरिज्जिया ॥१४४॥
 परमत्थओ ण तं अमयं, विसं तं हलाहलं ।
 ण तेण अयरामरो होज्जा, तक्खणा निहणं वए ॥१४५॥
 अगीयत्थस्स कुसीलेहिं, संगं तिविहेण वज्जए ।
 मोक्खमग्गस्सिमे विग्घे, पहंमी तेणगे जहा ॥१४६॥
 पज्जलियं हुयवहं दट्ठं, णीसंको तत्थ पविसिउं ।
 अत्ताणंपि डहिज्जासि, नो कुसीलं समल्लिए ॥१४७॥
 वासलक्खंपि सूलीए, संभिन्नो अच्छिया सुहं ।
 अगीयत्थेण समं एक्कं, खणद्धंपि न संवसे ॥१४८॥
 विणावि तंतमंतेहिं, घोरदिट्ठीविसं अहिं ।
 डसंतंपि समल्लीया, णागीयत्थं कुसीलाहमं ॥१४९॥
 विसं खाएज्ज हालहलं, तं किर मारेइ तक्खणं ।
 ण करेऽगीयत्थसंसंगिं, विट्ठवे लक्खंपि जं तहिं ॥१५०॥

-
१. समुद्रावयेद् मारयेतेति । २. तोषकारणाद् यदि वा सर्व संपत्करत्वात् संपदिति ।
 ३. अमृतेन सम इति ।
-

सीहं वग्धं पिसायं वा, घोररूवं भयंकरं ।

^१ओगिलमाणंपि लीएज्जा, ण कुसीलमगीयत्थं तथा ॥१५१॥

सत्तजम्मंतरं सत्तु, अवि मन्निज्जा सहोयरं ।

वयनियमं जो विराहेज्जा, ^२जणयं पिक्खे तयं रिउं ॥१५२॥

वरं हि मच्चू सुविसुद्धकम्मुणो, न यावि नियमं ^३भंतूण जीवियं ॥१५३॥

अगीयत्थत्तदोसेण, गोयमा ! ईसरेण उ ।

जं पत्तं तं निसामेत्ता, लहु गीयत्थो मुणी भवे ॥१५४॥

से भयवं ! णो वियाणेऽहं, ईसरो कोवि मुणिवरो ।

किं वा अगीयत्थदोसेण, पत्तं तेण ? कहेहि णे^४ ॥१५५॥

चउवीसिगाए अन्नाए, एत्थ भरहंमि गोयमा !

पढमे तित्थंकरे जइया, विहीपुव्वेण निव्वुडे ॥१५६॥

तइया निव्वाणमहिमाए, कंतरूवे सुरासुरे ।

निवयंते उप्पयंते व दढुं पच्चंतवासिओ ॥१५७॥

अहो अच्छेरयं अज्ज, मच्च-लोयंमी पेच्छिमो ।

ण इंदजाल सुमिणं वावि दिट्ठं कत्थई पुणो ॥१५८॥

एवं-वीहापोहाए, पुव्वि जाइं सरित्तु सो ।

मोहं गंतूण खणमेक्कं, मारुयाऽऽसासिओ पुणो ॥१५९॥

थरथरथरस्स कंपंतो, निदिउं गरहिउं चिरं ।

अत्ताणं गोयमा ! धणियं, सामन्नं गहिउमुज्जओ ॥१६०॥

अह पंचमुट्ठियं लोयं, जावाढवइ महायसो ।

सविणयं देवया तस्स, रयहरणं ताव ढोयई ॥१६१॥

१. भक्षयन्तमपीति २. जनकमपीक्षेत रिपुमिति । ३. भङ्गत्वेति । ४. नः अस्माकमिति ।

५. 'हालाहलं' पाठान्तरमिति

उगं कटं तवच्चरणं, तस्स दहूण ईसरो ।
 लोओ पूयं करेमाणो, जाव उ गंतूण पुच्छई ॥१६२॥
 केण तं दिक्खिओ ? कथं ?, उप्पन्नो को कुलो तव ?
 सुत्तत्थं कस्स पामूले, साइसयं हो समज्जियं ? ॥१६३॥
 सो पच्चएगबुद्धो जा, सव्वं तस्स वि वागरे ।
 जाइं कुलं दिक्खा सुत्तं, अत्थं जह य समज्जियं ॥१६४॥
 तं सोऊण अहन्नो सो, इमं चिंतेइ गोयमा !
 अलिया अणारिओ एस, लोगं डंभेण परिमुसे ॥१६५॥
 ता जारिसमेस भासेइ, तारिसं सोऽवि जिणवरो ।
 ण किंचित्थ वियारेणं, तुण्हिक्के ई^१ वरं ठिए ॥१६६॥
 अहवा णहि णहि सो भगवं ! देवदाणवपणमिओ ।
 मणोगयंपि जं मज्झं, तंपि च्छिन्निज्ज संसयं ॥१६७॥
 तावेस जो होउ सो होउ, किं वियारेण एत्थ मे ?
 अभिणंदामीह पव्वज्जं, सव्वदोक्खविमोक्खणिं ॥१६८॥
 ता पडिगओ जिणिंदस्स, सयासे जा तं णेक्खइ ।
 भुवणेसं जिणवरं तोवि, गणहरमासीय द्विओ ॥१६९॥
 परिनिव्वुयंमि भगवंते, धम्मतित्थंकरे जिणे ।
 जिणाभिहियसुत्तत्थं, गणहरो जा परूवइ ॥१७०॥
 तावमालावगं एयं, वक्खाणंमि समागयं ।
 पुढवीकाइगमेगं जो, वावाए सो असंजओ ॥१७१॥

ता ईसरो विचिंतेई, सुहुमे पुढविकाइए ।
 सव्वत्थ उद्विजंति, को ताइं रक्खिउं तरे ? ॥१७२॥
 १हलुई-करेइ अत्ताणं, एत्थं एस महायसो ।
 असद्धेयं जणे सयले, २किमद्धेयं पवक्खई ? ॥१७३॥
 ३अच्चंतकडयडं एयं, वक्खाणं तस्सवी फुडं ।
 कण्ठसोसो परं लाभे, एरिसं कोऽणुचिट्ठए ? ॥१७४॥
 ता एयं विप्पमोत्तूणं, सामन्नं किंचि मज्झिमं ।
 जं वा तं वा कहे धम्मं, ता लोओऽम्हाणाउट्ठई ॥१७५॥
 अहवा हा हा अहं मूढो, पावकम्मी णराहमो ।
 णवरं जइ णाणुचिट्ठामि, अन्नोऽणुचेट्ठती जणो ॥१७६॥
 जेणेयमणंतनाणीहिं, सव्वन्नूहिं पवेदियं ।
 ४जो एहिं अन्नहा वाए, तस्स अट्ठो ण बज्झइ ॥१७७॥
 ताहमेयस्स पच्छित्तं, घोरमइदुक्करं चरं ।
 लहुं सिग्घं सुसिग्घयरं, जाव मच्चू ण से भवे ॥१७८॥
 आसायणाकयं पावं, ५आसंझेण विज्जव्वती ।
 दिव्वं वाससयं पुन्नं, अह सो पच्छित्तमणुचरे ॥१७९॥
 तं तारिसं महाघोरं, पायच्छित्तं सयंमई ।
 काउं पत्तेयबुद्धस्स, सयासे पुणोवि गओ ॥१८०॥

१. आत्मानं लघुकीकरोतीति २. किमर्थं प्रचष्टे एवं गणधरः अर्थानिति ।
 ३. अत्यन्त-कर्कशमुद्देगजनकं वेति । ४ 'जो एयं' पाठान्तरमाश्रित्य - "य एनं
 जिनवचनमन्यथा वाचयति तस्यार्थो न बाध्यते" इति सर्वज्ञेनैव प्रवेदितमतस्तस्य न
 दोषः । अपि तु ममैवेति चिन्तितम् ईश्वरेणेति । ५. आसन्ध्यं विध्याप्यत यदिवा
 'आसुं जेण' पाठान्तरमाश्रित्य-आशु येन विध्याप्यत इति ।

तत्थावि जा सुणे वक्खाणं, तावऽहिगारमिमागयं ।
 पुढवादीणं समारंभं, साहू तिविहेण वज्जए ॥१८१॥
 दढमूढो ^१हुत्थ जोई ता, ईसरो मुक्खभुओ ।
 विचिंतेवं जहित्थ जए, को ण ताइं समारभे ? ॥१८२॥
 पुढवीए ताव एसेव, समासीणोवि चिट्ठई ।
 अग्गीए रद्धयं खायइ, सव्वं बीयसमुब्भवं ॥१८३॥
 अन्नं च विणा पाणेणं, खणमेक्कं जीवए कहं ?
^२ता किंपि तं पवक्खे मज्झं पच्चुय मच्छंतियं ॥१८४॥
 इमस्सेव समागच्छे, ण उणेयं कोइ सदहे ।
 तो चिट्ठउ ताव एसेत्थं, वरं सो चेव गणहरो ॥१८५॥
 अहवा एसो न सो मज्झं, एक्कोवि भणियं करे ।
^३अलिया एवंविहं धम्मं, किंचुद्देसेणं तं पि य ॥१८६॥
 साहिज्जई जो सुवे किंचि, ण उण मच्चंतकडयडं ।
 अहवा चिट्ठंतु तावेए, अहयं सयमेव वागरं ॥१८७॥
 सुहं सुहेणं जं धम्मं, सव्वोवि अणुट्ठए जणो ।
 न कालं कडयडस्सऽज्ज, धम्मस्सिति जाव चिंतइ ॥१८८॥
 घडहोडंतोऽसणी ताव, णिवडिओ तस्सोवरिं ।
 गोयम ! निहणं गओ ताहे, उववन्नो सत्तमाए सो ॥१८९॥
 सासणसुयनाणसंमग्गपडिणीयत्ताए ईसरो ।
 तत्थ तं दारुणं दुक्खं, नरए अणुभविउं चिरं ॥१९०॥

१. अत्र खलु पश्यति मूर्ख इवेति । २. तस्मात् प्रत्युत यो मत्सत्कः मच्चिन्तितः
 सामान्यो मध्यमो धर्मस्तं कमपि मह्यं प्रचक्षीतेति । ३. आश्रिता इति ।

इहागओ समुद्धंमि, महामच्छे भवेउणं ।
 पुणोवि सत्तमाए य, तित्तीसं सागरोवमे ॥१९१॥
 दुव्विसहं दारुणं दुक्खं, अणुहविऊणिहागओ ।
 तिरियपक्खीसु उववन्नो, कागत्ताए स ईसरो ॥१९२॥
 तओवि पढमियं गंतुं, उव्वट्ठित्ता इहागओ ।
 दुट्ठसाणो भवेत्ताणं, पुणरवि पढमियं गओ ॥१९३॥
 उव्वट्ठित्ता तओ इहइं, खरो होउं पुणो मओ ।
 उववन्नो रासहत्ताए, छब्भवगहणे निरंतरं ॥१९४॥
 ताहे मणुस्सजाईए, समुप्पन्नो पुणो मओ ।
 उववन्नो वणयरत्ताए, माणुसत्तं समागओ ॥१९५॥
 तओऽवि मरिउं समुप्पन्नो, 'मज्जारत्ते स ईसरो ।
 पुणोवि निरयं गंतुं, इह सीहत्तेणं पुणो मओ ॥१९६॥
 उववज्जिउं चउत्थीए, सीहत्तेण पुणोऽविह ।
 मरिऊणं चउत्थीए, गंतुं इह समायाओ ॥१९७॥
 तओवि नरयं गंतुं, चक्कियत्तेण ईसरो ।
 तओवि कुट्ठी होऊणं, बहुदुक्खदिओ मओ ॥१९८॥
 किमिएहिं खज्जमाणस्स, पन्नासं संवच्छरे ।
 जाऽकामनिज्जरा जाया, तीए देवेसुववज्जिउं ॥१९९॥
 तओ इह नरीसरत्तं, लद्धूणं सत्तमिं गओ ॥२००॥
 एवं नरगतिरिच्छेसुं, कुच्छियमणुएसु ईसरो
 गोयम ! सुइरं परिब्भमिउं, घोरदुक्खसुदुक्खिओ ।
 संपइ गोसालओ जाओ, एस 'स चेवीसरज्जिओ ॥२०१॥

तम्हा एयं वियाणित्ता, अचिरा गीयत्थे मुणी ।

भवेज्जा विदियपरमत्थे, सारासारपरिन्नुए ॥२०२॥

सारासारमयाणेत्ता, अगीयत्थत्तदोसओ ।

वयमेत्तेणावि रज्जाए, पावगं जं समज्जियं ॥२०३॥

तेणं तीए अहन्नाए, जा जा होही नियंतणा ।

नारयतिरियकुमाणुस्से, तं सोच्चा को धिइं लभे ? ॥२०४॥

से भयवं ! का उण सा रज्जिया ? किं वा तीए अगीयदोसेणं वयमेत्तेणंपि पावकम्मं समज्जियं जस्स णं विवागयं सोऊणं णो धिइं लभेज्जा ? गोयमा ! णं इहेव भारहे वासे भद्दो नाम आयरिओ अहेसि । तस्स य पंचसए साहूणं महाणुभागाणं दुवालससए निग्गंथीणं । तत्थ य गच्छे चउत्थरसियं ओसावणं तिदंडोव्वित्तं च कढिओदगं विप्पमोत्तूणं चउत्थं न परिभुज्जइ । अन्नया रज्जानामाए अज्जियाए पुव्वकयअसुहपावकम्मोदएणं सरीरगं कुट्टवाहीए परिसडिऊणं किमिएहिं समुद्धिसिउमारद्धं । अहऽन्नया परिगलंतपुइरूहिरतणू तं रज्जज्जियं पासिया ताओ व संजईओ भणंति जहा हला हला दुक्करकारिगे ! किमेयंति ? ताहे गोयमा ! पडिभणियं तीए महापावकम्माए भग्गलक्खणजम्माए रज्जज्जियाए, जहा एएणं फासुगपाणगेण आविज्जमाणेणं विणट्ठं मे सरीरगंति । जावेयं पलवे ताव णं संखुहियं हियं गोयमा ! सव्वसंजईसमूहस्स, जहा णं विवज्जामो फासुगपाणगंति ।

तओ एगाए तत्थ चिंतियं संजईए-जहा णं जइ संपयं चेव ममेयं सरीरगं एगनिमिसब्भंतरेणेव पडिसडिऊणं खंडखंडेहिं परिसडेज्जा तहावि अफासुगोदगं इत्थ जंमे ण परिभुंजामि, फासुगोदगं न परिहरामि । अन्नं च किं सच्चमेयं फासुगोदगेणं इमीए सरीरगं विणट्ठं ? सव्वहा ण सच्चमेयं, जओ णं पुव्वकयअसुहपावकम्मोदएणं सव्वमेवंविहं हवइत्ति सुदट्ठयरं चिंतियं पयत्ता, जहा णं भो पेच्छ २

अन्नाणदोसोवहयाए दढमूढहिययाए विगतलज्जाए इमीए महापावकम्माए संसारघोरदुक्खदायगं केरिसं दुट्ठवयणं गिराइयं, जं मम कन्नविवरेसुं पि णो पविसेज्जत्ति, जओ भवंतरकएणं असुह-पावकम्मोदएणं जं किंचि दारिद्रदुक्ख- दोहग्गअयसब्भक्खाणकुट्टाइवाहिकिलेससन्निवायं देहंमि संभवइ, न अन्नहत्ति, जेणं तु एरिसमागमे पढिज्जइ, तं जहा -

को देइ कस्स देज्जइ विहियं को हरइ हीरए कस्स ?

सयमप्पणो विढत्तं अल्लियइ दुहंपि सुक्खंपि ॥२०५॥

चिंतमाणीए चेव उप्पन्नं केवलनाणं, कया य देवेहिं केवलिमहिमा । केवलिणावि णरसुरासुराणं पणासियं संसयतमपडलं अज्जियाणं च । तओ भत्तिब्भरनिब्भराए पणामपुव्वं पुट्ठो केवली रज्जाए जहा भयवं ! किमट्ठमहं एमहंताणं महावाहिवेयणाणं भायणं संवुत्ता ? ताहे गोयमा ! सजलजलहरसुरदुंदुहिनिग्घोसमणोहारिगंभीरसरेणं भणियं केवलिणा - जहा सुणसु दुक्करकारिए ! जं तुज्झ सरीरविहडणकारणंति, तए रत्तपित्तदूसिए अब्भंतरओ सरीरगे सिणिद्धाहारमाकंठाए ^१कोलियगमीसं परिभुत्तं । अन्नं च - एत्थ गच्छे एत्तिए सए साहुसाहुणीणं तहावि जावइएणं अच्छीणि पक्खालिज्जंति तावइयंपि बाहिरपाणगं ^२सागारियद्वायनिमित्तेणावि णो णं कयाइ परिभुज्जइ । तए पुण गोमुत्तपडिगाहणगयाए तस्स मच्छियाहिं भिणिहिणित-सिंघाणग-लालालोलियवयणस्स णं सड्ढगसुयस्स बाहिरपाणगं संघट्टिऊण मुहं पक्खालियं । तेण य बाहिरपाणयसंघट्टणविराहणेणं ससुरासुर-जगवंदाणंपि अलंघणिज्जा गच्छमेरा अइक्कमिया । तं च ण खमियं तुज्झ पवयणदेवयाए, जहा साहूणं साहुणीणं च पाणोवरमेवि ण छिये हत्थेणावि जं कूवतलायपुक्खरिणिसरियाइमतिगयं उदगंति, केवलं तु जमेव विराहियं ववगयसयलदोसं फासुगं तस्स परिभोगं पन्नत्तं

वीयरागेहिं । ता सिक्खवेमि एसा हू दुरायारा जेणऽन्नोवि कोवि ण
 एरिससमायारं पवत्तेइ त्ति चिंतिऊणं अमुगं २ चुण्णजोगं
 समुद्दिसमाणाए पक्खित्तं असणमज्झमि ते देवयाए तं च ते
 णोवलक्खित्तं सक्खियंति देवयाए चरियं । एएण कारणेणं ते सरीरं
 विहडियंति, ण उण फासुदगपरिभोगेणंति । ताहे गोयमा ! रज्जाए
 विभाविं जहा एवमेयं ण अन्नहत्ति, चिंतिऊण विन्नविओ केवली-जहा
 भयवं ! जइ अहं जहुत्तं पायच्छित्तं चरामि ता किं ^१पन्नप्पइ मज्झ एयं
 तणुं ? तओ केवलिणा भणियं, जहा जइ कोइ पायच्छित्तं पयच्छइ ता
 पण्णप्पइ । रज्जाए भणियं, जहा भयवं ! जइ तुमं चिय पायच्छित्तं
 पयच्छसि, अन्नो को एरिसमहप्पा ?, तओ केवलिणा भणियं जहा
 दुक्करकारिए ! पयच्छामि अहं ते पच्छित्तं नवरं पच्छित्तमेव णत्थि जेणं
 ते सुद्धी भवेज्जा । रज्जाए भणियं- भयवं ! किं कारणंति ? केवलिणा
 भणियं जहा जं ते संजइवंदपुरओ गिराइयं जहा मम
 फासुयपाणगपरिभोगेण सरीरगं विहडियंति । एयं च
 दुड्डपावमहासमुदाएक्कपिंडं तुह वयणं सोच्चा संखुद्धाओ सव्वाओ चेव
 इमाओ संजईओ, चिंतियं च एयाहिं- जहा निच्छयओ विमुच्चाओ
 फासुगोदगं, तयज्झवसायस्सालोइयं निंदियं गरहियं चेयाहिं, दिन्नं च
 मए एयाण पायच्छित्तं । एत्थं च एएण तव्वयणदोसेणं जं ते समज्जियं
 अच्चंतकडुविरसदारुणं बद्धपुट्टनिकाइयं तुंगं पावरासिं । तं च तए
 कुट्टभगंदरजलोदरवायगुम्मसासनरोहहरिसागंडमालाहिं अणेगवाहि-
 वेयणापरिगयसरीराए दारिदुदुक्खदोहग्गअयसऽब्भक्खाणसंतावुव्वेग-
 संदीवियपज्जलियाए अणंतेहिं भवग्गहणेहिं सुदीहकालेणं तु
 अहन्निसाणुभवेयव्वं । एएणं कारणेणं एसेमा^२ गोयमा ! सा रज्जज्जिया
 जाए अगीयत्थत्तदोसेण वायामेत्तेणेव एमहंतं दुक्खदायगपावकम्मं
 समज्जियंति । २।

१. प्रगुणयतीति (-पादशौचार्थं यदिवा सामान्यतः अशुचिर्निर्लेपनार्थमिति । २ 'एस इमा'
 पाठान्तरमिति

'अगीयत्तदोसेणं, भावसुद्धिं ण पावए ।
 विणा भावविसुद्धीए, सकलुसमणसो मुणी भवे ॥२०६॥
 अणुथेवकलुसहिययत्तं, अगीयत्तदोसओ ।
 काऊण लक्खणज्जाए, पत्ता दुक्खपरंपरा ॥२०७॥
 तम्हा तं णाउ बुद्धेहिं, सव्वभावेण सव्वहा ।
 गीयत्थेहिं भवित्ताणं, कायव्वं निक्कलुसं मणं ॥२०८॥
 भयवं ! नाहं वियाणामि, लक्खणदेवी हु अज्जिया ।
 जा अणुकलुसमगीयत्तत्ता, काउं पत्ता दुक्खपरंपरं ॥२०९॥
 गोयमा ! पंचसु भरहेसु, एरवएसु उस्सप्पिणी ।
 ओसप्पिणीए एगेगा, सव्वयालं चउवीसिया ॥२१०॥
 सययमवोच्छितीए भूया, तह य भविस्सई ।
 अणाइनिहणा एसा, धुवं एत्थ जगठिइ ॥२१०-अ ॥
 एवं गोयम ! एयाए, चउवीसिगाए जा गया ।
 अतीयकाले असीइमा, तहियं जारिसगे अहयं ॥२१०-ब ॥
 सत्तरयणी पमाणेणं, देवदाणव-पणमिओ ।
 चरिमो तित्थयरो, जइया तया जंबुदाडिमो राया ॥२११॥
 भारिया तस्स, सिरिया नाम बहुस्सुया ।
 अन्नया सह दइएणं, धूयत्थं बहु उवाइए करे ॥२१२॥
 देवाणं कुलदेवीए, चंदाइच्चगहाण य ।
 कालक्कमेण अह जाया, धूया कुवलल्लोयणा ॥२१३॥
 तीए तेहिं कयं नामं, लक्खण देवी अहऽन्नया ।
 जाव सा जोव्वणं पत्ता, ताव मुक्का सयंवरा ॥२१४॥

वरियं तीये वरं पवरं, णयणाणंदकलालयं ।
 परिणियमेत्तो मओ सोवि भत्ता, सा मोहं गया ॥२१५॥
 १पयलंतंसुनयणेणं परियणेण य ।
 तालियंटवाएणं, दुक्खेणं आसासिया ॥२१६॥
 ताहे हा हाऽऽकंदं करेऊणं, हिययं सीसं च पिट्ठिउं ।
 अत्ताणं चोट्टफेट्टाहिं, घट्ठिउं दसदिसासु सा ॥२१७॥
 तुण्हिक्का बंधुवग्गस्स, वयणेहिं तु ससज्झसं ।
 ठियाऽह कइवयदिणेसुं, अन्नया तित्थंकरो ॥२१८॥
 बोहिंतो भव्वकमलवणे, केवलनाणदिवायरो ।
 विहरंतो आगओ तत्थ, उज्जाणंमि समोसढो ॥२१९॥
 तस्स वंदणभत्तीए, संतेउरबलवाहणो ।
 सव्विड्ढीए गयो राया, धम्मं सोऊण पव्वइओ ॥२२०॥
 तहिं संतेउरसुयधूओ, सुहपरिणामो अमुच्छिओ ।
 उगं कट्ठं तवं घोरं, दुक्करं अणुचिट्ठई ॥२२१॥
 अन्नया गणिजोगेहिं, सव्वेऽवी ते पवेसिया ।
 असज्झाइल्लियं काउं, लक्खणदेवी ण पेसिया ॥२२२॥
 सा एगंतेवि चिट्ठंती, कीडंते २पक्खिरुल्लए ।
 दट्ठणेयं विचिंतेइ, सहलमेयाण जीवियं ॥२२३॥
 जेणं पेच्छ चिडयस्स, संघट्ठंती चिडुल्लिया ।
 समं पिययमंगेसुं, निव्वुइं परमं जणे ॥२२४॥

अहो तित्थंकरेणऽहं, किमहं चक्खुदरिसणं ?
 पुरिसेत्थीरमंताणं, सव्वहा विणिवारियं ॥२२५॥
 ता णिदुक्खो सो अन्नेसिं, सुहदुक्खं ण याणई ।
 अग्गी दहणसहाओवि, दिट्ठीदिट्ठो ण णिडुहे ॥२२६॥
 अहवा न हि न हि भगवं ! तं, आणावितं न अन्नहा ।
 जेण मे दट्ठूण कीडंते, पक्खी पक्खुभियं मणं ॥२२७॥
 जाया पुरिसाहिलासा मे, जा णं सेवामि मेहुणं ।
 जं सुविणेवि न कायव्वं, तं में अज्ज विचित्तियं ॥२२८॥
 तहा य एत्थ जम्मंमि, पुरिसो ताव मणेणवि ।
 णिच्छिओ एत्तियं कालं, सुविणंतेवि कहिंचिवि ॥२२९॥
 ता हा हा हा दुरायारा, पावसीला अहन्निया ।
 अट्टमट्ठाइं चिंतंती, तित्थयरमासाइमो ॥२३०॥
 तित्थयरणावि अच्चंतं, कट्ठं कडयडं वयं ।
^१अइदुद्धरं समादिट्ठं, उग्गं घोरं ^२सुदुद्धरं ॥२३१॥
 ता तिविहेण को सक्को, एयं अणुपालेऊणं ?
 वायाकम्मसमायरणेवि, रक्खं णो तइयं मणं ॥२३२॥
 अहवा चित्तिज्जइ दुक्खं, कीरइ पुण सुहेण य ।
 ता जो मणसावि कुसीलो स कुसीलो सव्वकज्जेसु ॥२३३॥
 ता जं एत्थ इमं खलियं, सहसा ^३तुडिवसेण मे ।
 आगयं तस्स पच्छित्तं, आलोइत्ता लहुं चरं ॥२३४॥

सईणं सीलवंताणं, मज्झे पढमा महाऽऽरिया ।
 धुरंमि ^१दीयए रेहा, एयं सग्गेवि ^२घूसई ॥२३५॥
 तहा य पायधूली मे, सब्बोवी वंदए जणो ।
 जहा किल सुज्झिज्जए मिमीए इति पसिद्धा अहं जगे ॥२३६॥
 ता जइ आलोयणं देमि, ता एयं पयडी भवे ।
 मम भायरो पिया माया, जाणित्ता हुंति दुक्खिए ॥२३७॥
 अहवा कहवि पमाएणं, जं मे मणसा विचिंतियं ।
 तमालोइयं नच्चा, मज्झ वग्गस्स को ^३दुहो ? ॥२३८॥
 जावेयं चिंतितुं गच्छे, तावुडुंतीए कंटगं ।
^४फुडियं ढसत्ति पाययले, ता ^५णिसत्ता पडुल्लिया ॥२३९॥
 चित्तेइ हो ^६एत्थ जम्मंमि, मज्झ पायंमि कंटगं ।
 ण कयाइ खुत्तं ता किं, संपयं एत्थ होहिई ? ॥२४०॥
 अहवा मुणियं तु ^७परमत्थ-जाणगे अणुमती कया ।
 संघट्टतीए चिडुल्लीए, सीलं तेण विराहियं ॥२४१॥
 मूयंधकाणबहिरंपि, कुट्टं सिडिविडिविडिवडं ।
 जाव सीलं न खंडेइ, ता देवेहिं थुव्वई ॥२४२॥
 कंटगं चेव पाए मे, खुत्तं ^८आगासगाभियं ।
 एएणं जं ^९महं चुक्का, तं मे लाभं महंतियं ॥२४३॥

१. दीयत इति । २. घोष्यत इति ३. को द्रोहः किं वा दुःखमिति । ४. स्पृष्टं यदिवा 'पुडियं' इति पाठान्तरमाश्रित्य लग्नमिति । ५. निःसत्त्वा यद्वा 'निसण्णा' 'निसम्मा' च पाठान्तरमाश्रित्य निषण्णा पतनाभिमुखेति । ६. आत्मसंबोधन इति । ७. अथवा ज्ञातं नु परमार्थज्ञायकेनाऽनुमति कृतेति 'नु' पाठान्तरमाश्रित्येति । ८. ऊर्ध्वमूखमिति । ९. 'अहं' पाठान्तरमिति ।

सत्त वि ^१साहा उ पायाले, इत्थी जा मणसा वि य ।
सीलं खंडेई सा णेइ कहियं जणणीए मे इमं ॥२४४॥

ता जं ण णिवडई वज्जं, पंसुविट्ठी ममोवरिं ।
सयसकरं ण फुट्टइ वा, हिययं तं महच्छेरंगं ॥२४५॥

णवरं जइ ^२मेयमालोयं, ता लोगो एत्थ चिंतिहि ।
जहाऽमुगस्स धूयाए, एयं मणसा अज्झवसियं ॥२४६॥

तं न तहवि पओगेणं, परववएसेणालोइमो ।
जहा जइ कोइ एयमज्झवसे, पच्छित्तं तस्स होइ किं ? ॥२४७॥

तं चिय सोऊण काहामि, तवेणं तत्थ कारणं ।
जं पुण भयवयाऽऽइट्ठं, घोरमच्चंतनिट्ठुरं ॥२४८॥

तं तवं सीलचारित्तं, तारिसं जाव नो कयं ।
तिविहं तिविहेण णीसल्लं, ताव पावे* ण खीयए ॥२४९॥

अह सा परववएसेणं, आलोएत्ता तवं चरे ।
पायच्छित्तनिमित्तेण, पन्नासं संवच्छरे ॥२५०॥

छट्ठमदसमदुवालसेहिं, ^३लयाहिं णेइ दस वरिसे ।
अकयमकारियमसंकप्पिएहिं ^४परिभूयभिकखलद्धेहिं ॥२५१॥

चणगेहिं दुन्नि बे भुज्जिएहिं सोलस मासखमणेहिं ।
वीसं आयामायंबिलेहिं, आवस्सगं अछड्डेंति ॥२५२॥

चरई य अदीनमनसा, अह सा पच्छित्तनिमित्तं ।
ताहे य गोयमा ! चित्ते, जं पच्छित्तं तयं कयं ॥२५३॥

१. सप्त शाखा वंशपरम्परा नयति पाताले इति । २. एतदालोचयिष्यामीति । ३. लताभिरिति । ४. उज्जितभिक्षालब्धैर्भ्रष्टैः - भुग्नैश्चणकैर्द्वे द्वे चत्वारि वर्षाणि नयतीति ।

* 'पावं' पाठान्तरमिति ।

ता किं तमेव ण कयं मे, जं मणसा अज्झवसियं तया ?

इय रहे* वि उ पच्छित्तं, इय रहे व उ मे कयं ॥२५४॥

ता किं तन्न समायरियं, चिंतेती निहणं गया ।

उग्गं कट्ठं तवं घोरं, दुक्करंपि चरित्तु सा ॥२५५॥

सच्छंदपायच्छित्तेणं, सकलुसपरिणामदोसओ ।

कूच्छियकम्मा समुप्पन्ना, वेसाए परिचेडिया ॥२५६॥

खंडोद्धा णाम चडुगारी, ^१मज्झखडहडगवाहिया ।

विणीया सव्ववेसाणं, थेरीए य चउग्गुणं ॥२५७॥

लावन्नकंतिकलियावि, ^२बोडा जाया तहावि सा ।

अन्नया थेरी चिंतेइ, मज्झं बोडाए जारिसं ॥२५८॥

लावन्नं कंती रूवं, नत्थि भुवणे वि तारिसं ।

ता विरंगामि एईए, कन्ने णक्कं सहोड्डयं ॥२५९॥

एसां उ ण जाव ^३विउप्पज्जे, मम धूयं कोवि णेच्छिही ।

अहवा हा हा ण जुत्तमिणं, धूयातुल्लेसा वि मे ॥२६०॥

णवरं सुविणीया एसा ^४विउप्पऽन्नत्थ गच्छिही ।

ता तह करेमि जह एसा, देसंतरं गया वि य ॥२६१॥

ण लभेज्जा कत्थई थामं आगच्छइ ^५पडिल्लिया ।

देवेमि से वसीकरणं, गुज्झदेसं तु ^६सीडिमो ॥२६२॥

निगडाइं च से देमि, भमडउ तेहिं नियंतिया ।

एवं सा जुन्नवेसा जा, मणसा परितप्पिउं^७ सुवे ॥२६३॥

१. मद्यभाजनानां शीघ्रवाहिकेति । २. मुण्डितेति । ३. विरूप्येत । ४. व्युत्पलुत्येति ।

५. बन्धनवतीति । ५. सीवयामो यदिवा 'साडिमो' इति पाठान्तरमाश्रित्य शाटयाम इति । ७. परितप्येति । * रहसीति ।

ता खंडोद्वा वि सिमिणंमि, गुज्झं सीडिज्जं^१तगं ।
 पिच्छइ नियडे य दिज्जंते, कन्ने नासं च^२वट्टियं ॥२६४॥
 सा समिणहं वियारेउं, णद्वा जह कोइ ण याणइ ।
 कहकहवि परिभमंती सा, गामपुरनगरपट्टणे ॥२६५॥
 छम्मासेणं तु संपत्ता, संखंडं णाम खेडगं ।
 तत्थ वेसमण-सरिसविहवरंडापुत्तस्स सा जुया ॥२६६॥
 परिणीया महिला ताहे मच्छरेण पज्जले दढं ।
 रोसेण फुरफुरंती सा, जा दियहे केइ चिट्ठइ ॥२६७॥
 निसाए निब्भरं^३सइयं, खडोद्धीं ताव पिच्छई ।
 तं दद्धुं धाइया चुल्लिं, दित्तं घेतुं समागया ॥२६८॥
 तं पक्खिविऊणं गुज्झंते, ^४फालिया जाव हियययं ।
 जाव दुक्खभरक्कंता, ^५चलचलुच्चेल्लिं करे ॥२६९॥
 ता सा पुणो विचिंतेइ, जावजीवं ण उट्टए ।
 ताव देमी से दाहाइं, जेण में भवसएसुऽवि ॥२७०॥
 न तरई पिययमं काउं, इणमो पडिसंभरंति या ।
 ताहे गोयम ! आणेउं, ^६चक्खियसालाउ अयमयं ॥२७१॥
^७तावित्तु फुलिंगमेल्लंतं, जोणीए पक्खित्तं ^८कुसं ।
 एवं दुक्खभरक्कंता, तत्थ मरिऊण गोयमा ! ॥२७२॥
 उववन्ना चक्कवट्टिस्स, महिलारयणत्तेण सा ।
 इओ य रंडपुत्तस्स, महिला तं कलेवरं ॥२७३॥

१. 'साडिज्जंतगं' पाठान्तरमिति । २. चूर्णितं कर्तितं वेति । ३. सुप्तामिति । ४. पाटितेति ।
 ५. यथा तप्ततैलकटाहे पच्यमानं जघनस्थानं तथाऽतीवपीडामनुभवतीति ।
 ६. तैलिकाऽऽपणादिति । ७. तापयित्वेति । ८. उपकरणविशेष इति ।

जीवुज्झियंपि रोसेण, छेतुं छेतुं सुसुहुमयं सा ।
 साणकागमादीणं, जाव घत्ते दिसोदिसिं ॥२७४॥
 ताव रंडापुत्तोवि, बाहिरभूमीओ आगओ ।
 सो य दोसगुणे णाउं, बहुं मणसा वियप्पिउं ।
 गंतूण साहुपामूलं, पव्वज्जा^१ काउ निव्वुडो ॥२७५॥
 अह सो लक्खणदेवीए, जीवो खंडोद्वीयत्तणा ।
 इत्थीरयणं भवित्ताणं, गोयमा ! छट्ठियं गओ ॥२७६॥
 तन्नेरइयं महादुक्खं, अइघोरं दारूणं तहिं ।
 तिकोणे निरयावासे, सुचिरं दुखेण वेइउं ॥२७७॥
 इहागओ समुप्पन्नो, तिरिय जोणीए गोयमा !
 साणत्तेणाह ^२मयकाले, विलग्गो मेहुणे तहिं ॥२७८॥
 माहिसिएणं कओ घाओ, विच्चे जोणी समुच्छला ।
 तत्थ किमिएहिं दसवरिसे, खद्धो मरिऊण गोयमा ॥२७९॥
 उववन्नो वेसत्ताए, तओवि मरिउण गोयमा ?
 एगूणं जाव सयवारं आमगब्भेसु पच्चिओ ॥२८०॥
 जम्मदरिद्वस्स गेहंमि, माणुसत्तं समागओ ।
 तत्थ दोमासजायस्स, माया पंचत्तमुवगया ॥२८१॥
 ताहे महया किलेसेणं, थन्नं पाउं घराघरिं ।
 जीवावेऊण जणगेणं, गोउलियस्स ^३समल्लिओ ॥२८२॥
 तहियं नियजणणिच्छीरं, आवियमाणे निबंधिउं ।
^४छावरूए गोणिओ दुहमाणेणं, जं बद्धं अंतराइयं ॥२८३॥

१. पव्वज्जं पाठान्तरमिति २. मदकाले मत्तताकाल इति । ३. समर्पित इति ।

४. शावकरूपान् शिशूनिति ।

तेणं सो लक्खणञ्जाए, कोडाकोडीभवंतरे ।

जीवो थन्नमलहमाणो बज्झंतो ^१रुज्झंतो ^२नियलिज्झंतो हम्मंतो
दम्मंतो ^३विच्छेइज्झंतो य हिंडिओ ॥२८४॥

उववन्नो मणुयजोणीए, डागिणित्तेण गोयमा !

तत्थ य साणयपालेहिं, कीलिउं छट्ठियं गया ॥२८५॥

तओ उव्वट्ठिऊणिहइं, तं लब्धुं माणुसत्तणं ।

जत्थ य सरीरदोसेणं, ए महंतमहिमंडले ॥२८६॥

जामब्धजाम घडियं वा, णो लब्धं ^४वेरत्तियं जहियं ।

पंचे^५व उ घरे गामे, नगरपुरपट्टणेसु वि ॥२८७॥

तत्थ य गोयम ! मणुयत्ते, णारयदुक्खाण सरिसिए ।

अणेगे रण्णरण्णेणं, घोरे दुक्खेऽणुभोत्तुणं ॥२८८॥

सो लक्खणदेवीजीवो, सुरोद्दज्झाणदोसओ ।

मरिऊण सत्तमिं पुढविं, उववन्नो ^६रेवाडाहाणे ॥२८९॥

तत्थ य तं तारिसं दुक्खं, तित्तीसं सागरोवमे ।

अणुभविऊणं इह उववन्नो, वंझाणोणित्तणेण य ॥२९०॥

खेत्तखलगाइं चमढेंती, भंजंती य चरंति या ।

सा गोणी बहुजणोहेहिं, मिलिऊणागाहपंकवलए पवेसिया ॥२९१॥

तत्थ ^७खुत्ती जलोयाहिं, लूसिज्झंती तहेव य ।

कागमादीहिं लुप्पंती, कोहाविट्ठा मरेउणं ॥२९२॥

-
१. रुध्यमान इति । २. निगड्यमान इति ३. वियुज्यमान इति । ४. निद्रारूपं रात्रिविश्राममिति । ५. पञ्चत्त्वपि गृहग्रामादिषु सा यत्र ब्रजतु तत्र तथा विश्रामो न लब्ध इति । ६. 'खाडाहडे' पाठान्तरमिति । ७. निमग्नेति ।
-

ताहे विजलधण्णे रण्णे, मरुदेसे दिट्ठीविसो ।
 सप्पो होऊण पंचमगं, पुढविं पुणरवि गओ ॥२९३॥
 एवं सो लक्खणज्जाए, जीवो गोयमा ! चिरं ।
 घणघोरदुक्खसंतत्तो, चउगइसंसारसागरे ॥२९४॥
 नारयतिरियकुमणुएसुं, आहिंडित्ता पुणोविहं ।
 होही सेणियजीवस्स, तित्थे पउमस्स खुज्जिया ॥२९५॥
 तत्थ य दोहग्गखाणी सा, गामे नियजणणीओ वि य ।
 गोयम ! दिट्ठा न कस्सावि, ^१अच्छीय रइदा तहिं भवे ॥२९६॥
 ताहे सव्वजणेहिं सा, उव्वियणिज्जत्तिकाउणं ।
 मसिगेरुयविलित्तंगा, खरेरूढा भमाडिउं ॥२९७॥
 गोयमा ! ओपक्खपक्खेहिं, वाइयखरविरसडिंडिमं ।
 निद्धाडिहिई ण अन्नत्थ, गामे लहिहिइ पविसिउं ॥२९८॥
 ताहे कंदफलाहारा, रन्नवासे वसंतिया ।
 दट्ठा ^२सच्छुंदरेण वियणत्ता, णाहीए मज्झदेसए ॥२९९॥
 तओ सव्वं सरीरं से ^३भरिज्जसुंदराण य ।
 तेहिं तु विलुप्पमाणी सा, दूसहघोरदुहाउरा ॥३००॥
 वियणत्ता पउमत्तित्थयरं, तप्पएसे समोसढं ।
 पेच्छिही जाव ता तीए, अन्नेसिमवि बहुवाहिवेयणापरिगय-
 सरीराणं तद्देसविहारिभव्वसत्ताणं नरनारिगणाणं तित्थयर -
 दंसणा चेव सव्वदुक्खं विणिट्ठिही ॥३०१॥

१. अक्ष्णो रतिदा-आनन्ददात्री न भवेदिति । २. 'मच्छुंदरेण पाठान्तरमिति ।
 ३. भरिष्यते उन्दरैरिति ।

ताहे सो लक्खणज्जाए, तहियं खुज्जियत्ते जिओ ।

गोयम ! घोरं तवं चरिउं, दुक्खाण अंतं गच्छिही ॥३०२॥

एसा सा लक्खणदेवी, जा अगीयत्थदोसओ ।

गोयम ! अणुकलुसचित्तेणं, पत्ता दुक्खपरंपरं ॥३०३॥

जहा णं गोयमा ! एसा, लक्खणदेविज्जया तहा ।

सकलुसचित्ते अगीयत्थे, ऽणंते पत्ते दुहावली ॥३०४॥

तम्हा एयं वियाणित्ता, सव्वभावेण सव्वहा गीयत्थेहिं भवेयव्वं,
कायव्वं तु सुविसुद्धसुनिम्मलविमलनीसल्लं निकलुसं मणंति बेमि

॥३०५॥

पणयामरमरुयमउडुग्घुट्ठचलण-सयवत्तजयगुरू ।

जगनाह ! धम्मतिथयर, भूयभविस्सवियाणण ॥३०६॥

तवसा निद्वड्ढकम्मंस, वंमहवइरवियारण ।

चउकसाय निट्ठवण, सव्वजगजीववच्छल ॥३०७॥

घोरंधयारमिच्छत्ततिमिसतमतिमिरणासण ।

लोगालोगपगासगर, मोहवइरिनिसुंभण^१ ॥३०८॥

दुरुज्झियराग-दोस-मोह-मोस-सोग संत सोम सिवंकर ।

अतुलियवलविरियमाहप्पय, तिहुयणिक्कमहायस ॥३०९॥

निरुवमरूव अणन्नसम, ससयसुहमुक्खदायग ।

सव्वलक्खणसंपुन्न, तिहुयणलच्छिविभूसिय ॥३१०॥

भयवं ! परिवाडीए, सव्वं जंकिंचि कीरण ।

^२अथक्के हुंडिदुद्धेणं, कज्जं तं कत्थ लब्भई ॥३११॥

सम्मदंसणमेगंमि, वितिये जम्मे अणुव्वए ।
 ततिए सामाइयं जम्मे, चउत्थे पोसहं करे ॥३१२॥
 दुद्धरं पंचमे बंभं, छट्ठे सच्चित्तवज्जणं ।
 एवं सत्तट्ठनवदसमे, जम्मे उद्धिट्ठमाइयं ॥३१३॥
 चिच्चेक्कारसमे जम्मे, समणतुल्लुणो भवे ।
 एयाए परिवाडीए, संजयं किं न अक्खसि ? ॥३१४॥
 जं पुण सोऊण मइविगलो, बालयणो^१ ।
 केसरिस्स व सद्दं गयजुवइ सोउं नासे^२ दिसोदिसं ॥३१५॥
 तमीरिसं संजमं नाह ! सुदुल्ललिया उ सुकुमालिया ।
 सोऊणं पि नेच्छंति, तेऽणुड्डीसु कहं पुण ? ॥३१६॥
 गोयम ! तित्थंकरे मोत्तुं अन्नो दुल्ललिओ जगे ।
 जइ अत्थि कोइ ता भणउ, अह णं सुकुमालओ ? ॥३१७॥
 जे णं-गब्भत्थाणंपि देविंदो, अमयमंगुट्ठयं कयं ।
 आहारं देह भत्तीए, संथवं सययं करे ॥३१८॥
 देवलोगचुए संते, कम्मा से णं जहिं घरे ।
 अभिजाहिति तहिं सययं, हिरण्णवुड्डी य वरिस्सई ॥३१९॥
 गब्भावन्नाण तद्देसे, ईई रोगा य सत्तुणो ।
 अणुभावेण खयं जंति, जायमित्ताण तक्खणे ॥३२०॥
 आकंपियासणा चउरो, देवसंघा महीहरे ।
 अभिसेयं सव्विड्ढीए, काउं सत्थामे गया ॥३२१॥

१. 'वा यणो' पाठान्तरमिति । २. 'तासे' पाठान्तरमिति ।

अहो लावन्नं कंती, दिती रूवं अणोवमं ।
 जिणाणं जारिसं पाय अंगुडुग्गं ण तं इहं ॥३२२॥
 सव्वेसु देवलोगेसु, सव्वदेवाण मेलिउं ।
 कोडाकोडिगुणं काउं, जइवि ^१उण्हालिज्जए ॥३२३॥ युग्मम् ॥
 अह जे अमरपरिग्गहिया, नाण-त्तयसमन्निया ।
 कलाकलावनिलया, जणमणाणंदकारया ॥३२४॥
 सयणबंधवपरियारा, देवदाणवपूइया ।
 पणइयणपूरियासा, भुवणुत्तमसुहालया ॥३२५॥
 भोगिस्सरियं रायसिरिं, गोयमा ! तं तवज्जियं ।
 जा दियहा केई भुंजंति, ताव ओहीए जाणिउं ॥३२६॥
 खणभंगुरं अहो एयं, लच्छी पावविवड्ढणी ।
 ता जाणंतावि किं अम्हे, चारित्तं नाणुचिद्धिमो ? ॥३२७॥
 जावेरिस मणपरिणामं, ताव लोगंतिगा सुरा ।
 थुणिउं भणंति जगज्जीवहिययं तित्थं पवत्तिहा ॥३२८॥
 ताहे वोसड्ढचत्तदेहा, विहवं सव्वजगुत्तमं ।
 गोयमा ! तणमिव परिचिद्धा, जं इंदाणवि दुल्लहं ॥३२९॥
 नीसंगा उग्गं कट्ठं, घोरं अइदुक्करं तवं ।
 भुयणस्सवि उक्कट्ठं, समुप्पायं चरंति ते ॥३३०॥
 जे पुण खरहरफुट्टिसिरे, एगजम्मसुहेसिणो ।
 तेसिं दुल्ललियाणंपि सुट्ठवि नो हियइच्छियं ॥३३१॥
 गोयम ! महुबिंदुस्सेव, जावइयं तावइयं सुहं ।
 मरणंते वी न संपज्जे, कयरं दुल्ललियत्तणं ? ॥३३२॥

अहवा गोयम ! पद्यक्खं, पेच्छ य जारिसयं नरा ।
 दुल्ललियं सुहमणुहंति, जं निसुणिज्जा न कोइ वी ॥३३३॥
 केई करंति ^१मासिल्लिं, हालियगोवालत्तणं ।
 दासत्तं तह पेसत्तं ^२गोडत्तं सिप्पे बहु ॥३३४॥
^३ओलग्गं किसि वाणिज्जं, पाणच्चायकिलेसियं ।
 दालिद्दऽविहवत्तणं केई, कम्मं, काउण घराघरिं ॥३३५॥
 अत्ताणं विगोवेउं, ^४ढिणिढिणिते अ हिंडिउं ।
 नग्गुग्घाडकिलेसेणं, जा समज्जंति ^५परिहणं ॥३३६॥
 जरजुन्नफुट्टसयछिदं, लद्धं कहकहवि ओढणं ।
 जा अज्जा कल्लिं करिमो, ^६फट्ठं ता तमवि परिहणं ॥३३७॥
 तहावि गोयमा ! बुज्झ, फुडवियडपरिफुडं ।
 एतेसिं चेव मज्झाओ, अणंतरं भणियाण कस्सई ॥३३८॥
^७लोयं लोगाचारं च चेच्चा सयणकियं तहा ।
 भोगोवभोगं दाणं च, भोत्तूणं कदसणासणं ॥३३९॥
 धाविउं गुप्पिउं सुइरं, खिज्जिऊण अहन्निसं ।
^८कागणिं कागणीकाउं, अद्धं पायं विसोवगं ॥३४०॥
 कत्थइ कहिंचि कालेणं, लक्खं कोडिं च मेलिउं ।
 जई एगिच्छा ^९मईपुन्ना, बीया णो संपज्जए ॥३४१॥

१. मासिकीं भृतिकां प्राप्नुवन्तीति । २. संदेशवाहित्वमिति । ३. सेवामिति । ४. परिश्रान्ताः सन्तः क्रन्दन्तो यदिवा निश्चेष्टमाना इति । ५. परिधानमिति । ६. स्फाटितं तावत् तदपि परिधानमिति । ७. त्यक्त्वा लोकं लोकाचारं स्वजनक्रियां भोगोपभोगं दानं च तथा कदशनं कदासनं च भुक्त्वेति । ८. काकिणी २ अर्धं पादं च विशेषकं संचित्येति । ९. यद्येकेच्छा मत्या पूर्णा न तु तत्त्वतस्तर्हि द्वितीया न संपद्येतेति ।

एरिसयं दुल्ललियत्तं, सुकुमालत्तं च गोयमा !

धम्मारंभंमि संपडइ, कम्मारंभे न संपडे ॥३४२॥

जेणं जस्स मुहे कवलं, ^१गंडी अन्नेहिं धिज्जाए ।

भूमीए न ठवए पायं, इत्थीलक्खेसु कीडए ॥३४३॥

तस्सावि णं भवे इच्छा, अन्नं सोऊणं ^२सारियं ।

^३समुट्ठहामि तं देसं, अह सो आणं ^४पडिच्छउ ॥३४४॥

सामभेओवपयाणाइं, अह सो सहसा पउंजिउं ।

तस्स साहसतुलण्डा, ^५गूढचरिएण वच्चइ ॥३४५॥

एगागी ^६कप्पडाबीओ, दुग्गारन्नं गिरी सरी ।

लंघित्ता बहुकालेणं, दुक्ख दुक्खं पत्तो तहिं ॥३४६॥

दुक्खं ^७खुक्खामकंठो सो, जा भमडे घराघरिं ।

^८जायंतो छिहमम्माइं तत्थ जइ कहवि ण णज्जाए ॥३४७॥

ता जीवंतो ण चुक्केज्जा, अह पुन्नेहिं ^९समुच्चरे ।

तओ णं परिवत्तियं देहं, तारिसो सगिहे विसे ॥३४८॥

^{१०}को तंमि परियणो मन्ने, ताहे सो असिणाणाइसु ।

नियचरियं पायडेउणं, जुज्झसज्जो भवेउणं ॥३४९॥

सच्चवला ^{११}थोभेणं, खंडं खंडेण जुज्झिउं ।

अह तं नरिंदं निज्जिणइ, अहवा तेण पराजियए ॥३५०॥

-
१. इक्षुशकलमिति । २. सारिकास्थानीयां स्त्रियमिति । ३. सम्यगुन्नतं करिष्यामीति ।
 ४. स्वीकुर्यादिति । ५. गूढवेषेणेति । ६. वस्त्रद्वितीय इति । ७. क्षुधा क्षामकण्ठ इति ।
 ८. याचमान इति । ९. समुद्धरे पाठान्तरमिति । १०. तस्मिन् परिवर्तितदेहे प्रविष्टे
 सति कः परिजनो मन्येतेति ११. रोधेन यदिवा धामेण पाठान्तरमिति ।
-

बहुपहारगलंतरुहिरंगो, गयतुरया^१उद्ध-अहो-मुहो ।
 णिवडइ रणभूमीए, गोयमा ! सो जया तया ॥३५१॥
 तं तस्स दुल्ललियत्तं, सुकुमालत्तं कहिं वए ?
 जे केवलं पि सहत्थेणं, ^२अहोभागं च धोविउं ॥३५२॥
 निच्छंतो पायं ठविउं, भूमीए न कयाइ वि ।
 एरिसोऽवी स दुल्ललिओ, एयावत्थमवी गओ ॥३५३॥
 जइ भन्ने धम्मं चिट्ठे ता, पडिभणइ न सक्किमो ।
 तो गोयमा ! अहन्नाणं, पावकम्माण पाणिणं ॥३५४॥
 धम्मट्ठाणंमि मई, न कयावि भविस्सए ।
 एएसिं इमो धम्मो, इक्कजंमीण भासए ॥३५५॥
 जहा ^३खंतपियंताणं, सव्वं अम्हाण होहिइ ।
 ता जो जमिच्छे तं तस्स, जइ अणुकूलं पवेइए ॥३५६॥
 तो वयनियमविहूणा वि, मोक्खं इच्छंति पाणिणो ।
 एए एतेण रूसंति, एरिसं चिय कहेयव्वं ॥
 णवरं ण मोक्खो एयाणं, ^४मुसावायं ^५व आवई ॥३५७॥
 अन्नं च रागं दोसं च मोहं च, भयं छंदाणुवत्तिणं
 तित्थंकराणं णो भूयं, णो भवेज्जा उ गोयमा ! ॥३५८॥
 मुसावायं ण भासंते, गोयमा ! तित्थंकरे
 जेणं तु केवलनाणेणं, तेसिं सव्वं पच्चक्खगं जगं ॥३५९॥
 भूयं भव्वं भविस्सं च, पुत्रं पावं तहेव य
 जं किंचि तिसु वि लोएसु, तं सव्वं तेसि पायडं । ॥३६०॥

१. ऊर्ध्वमुखः अधोमुखो वेति । २. केवलं स्वहस्तेन पायुं प्रक्षाल्येति । ३. खाद-
 त्पिबतामिति । ४. अन्यथा मृषावादापत्तिरिति । ५. 'च' पाठान्तरमिति ।

पायालं अवि उड्ढमुहं, सगं एज्जा अहोमुहं
 पूणं तिथ्यरमुहभणियं, वयणं होज्ज न अन्नहा ॥३६१॥
 नाणं दंसणचारित्तं, तवं घोरं सुदुक्करं
 सोग्गइमग्गो फुडो एस, परूवन्ती जहट्ठिओ ॥३६२॥
 अन्नहा न तिथ्यरा वाया मणसै व कम्मुणा
 भाणंति जइ वि भुवणस्स, पलयं हवइ तक्खणे ॥३६३॥
 जं हियं सव्वजगजीवपाणभूयाण केवलं ।
 तं अणुकंपाए तिथ्यरा, धम्मं भासंति अवितहं ॥३६४॥
 जेणं तु समणुचिन्नेणं दोहग्गदुक्खदारिद्ररोग-सोगकुगइभयं ।
 ण भविज्जा उ विइएणं*, संतावुव्वेगं तहा ॥३६५॥
 भयवं ! णो एरिसं भणिमो, जह छंदं अणुवत्तय ।
 णवरमेयं तु पुच्छामो, जो जं सक्के स तं करे ? ॥३६६॥
 गोयमा ! णेरिसं जुत्तं, खणं मणसा वि चिंतिउं ।
 अह जइ एवं भवे णायं, १तावंधारे हअं बलं ॥३६७॥
 घयऊरे खंडरब्बाए, एक्को सक्केइ खाइउं ।
 अन्नो महुमंसमज्जाई अन्नो रमिऊण २एत्थियं ॥३६८॥
 अन्नो एयंपि नो सक्के, अन्नो जोएई३ परकयं ।
 अन्नो ४चडवडमुहे एसु, अन्नो एयंपि भाणिऊण ण सक्कुणोई ॥३६९॥
 चोरियं जारियं अन्नो, अन्नो किंचि ण सक्कुणोई ।
 भोत्तुं भोत्तुं ५सुपत्थरिए, सक्के चिट्ठेतु मंचगे ॥३७०॥

१. तावदन्धकारे हतं बलमिति । २. स्त्रियमिति । ३. पश्यति परकृतमिति ।
 ४. चटपटमुखः लिप्सुरिति । ५. सुप्रस्तुते मञ्जक इति । * द्वितीयवारमित्यर्थः ।

मिच्छामि दुक्कडमियं हंत, एरिसं नो भणामिऽहं । .
 गोयमा ! अन्नंपि जं भणसि, तंपि तुज्झ कहेमऽहं ॥३७१॥
 एत्थ जम्मे नरो कोई, कसिणुगं संजमं तवं ।
 जइ णो सक्कइ काउं जे तह वि सोगइपिवासिओ ॥३७२॥
 नियमं पक्खिखीरस्स, एगं वालउप्पाडणं ।
 रयहरणस्सेगियं दसियं, एत्तियं तु ^१परिधारियं ॥३७३॥
 सक्कुणोइ एयंपि न जावजीवं, पालेउं ता इमस्स वी ।
 गोयमा ! तुज्झ बुद्धीए, सिद्धिखेत्तस्स ^२उप्परं ॥३७४॥
 मंडवियाए भवेयव्वं, दुक्करकारि ^३भणित्तुणं ।
 णवरं एयारिसं ^४भवियं, किमट्ठं गोयमा ! एयं पुणो तं पपुच्छसि ॥३७५॥
 तित्थंकरे चउन्नाणी, ससुरासुरजगपूइए ।
 निच्छियं सिज्झियव्वेऽवि, तंमि जम्मे न अन्नजम्मे ॥३७६॥
 तहा वि अणिगूहिता बलं विरियं, पुरिसयारपरक्कमं ।
 उगं कट्ठं तवं घोरं, दुक्करं अणुचरंति ते ॥३७७॥
 ता अन्नेसु वि सत्तेसुं, चउगइसंसारघोरदुक्खभीएसु ।
 जं जहेव तित्थयरा भणंति तं, तहेव समणुट्ठेयव्वं,
 गोयम ! सव्वं जहट्ठियं ॥३७८॥
 जं पुण गोयम ! ते भणियं, परिवाडीए कीरइ ।
 अथक्के हुंडिदुद्धेण, कज्जं तं कत्थ लब्भए ? ॥३७९॥
 तत्थवि गोयम ! दिट्ठंतं, महासमुद्धंमि कच्छभो ।
 अन्नेसि मगरमादीणं, “संघट्ठाभीउट्ठओ ॥३८०॥

१. परिधारितं पाठान्तरमिति । २. ओप्परं पाठान्तरमिति । ३. भणयित्तुणामिति । ४.
 भव्यमिति । ५. संघट्टनभीतः पलायित इति ।

बुडनिब्बुड करेमाणो स बली ^१सल्लोब्भली पेल्लापेल्लीए कत्थई ।

^२उल्लीरिजंतो ^३तट्ठो णासंतो धावंतो, पलायंतो दिसोदिसं ॥३८१॥

^४उच्छल्लं ^५पच्छल्लं, हीलणं बहुविहं तहिं ।

असहंतो थाममलहंतो, खणनिमिसंपि कत्थई ॥३८२॥

कहकहवि दुक्खसंततो, सुबहुकालेहिं तं जलं ।

अवगाहितो गओ उवरिं, पउमिणीसंडं स घणं ॥३८३॥

छिड्डं महया किलेसेणं, लद्धुं ता जत्थ पेच्छई ।

गहनक्खत्त-परियरियं, कोमुइचंदं ^६खहेऽमले ॥३८४॥

दिप्पंत-कुवलय-^७कल्हारं, कुमुयसयवत्तवणप्फइ ।

^८कुरुलियंते हंसकारंडे, चक्कवाए सुणेइ य ॥३८५॥

जमदिट्ठं सत्तसुवि ^९साहासु अब्भुअं चंदमंडलं ।

तं दट्ठुं विम्हिओ खणं, चिंतइ एयं जहा होही ॥३८६॥

एयं तं सगं ताऽहं, बंधवाणं पयंसिमो ।

बहुकालेणं गवेसेउं, ते घेत्तूण समागओ ॥३८७॥

घणघोरंधयाररयणीए, भद्वक्किण्हचउद्दसीहिं तु ।

ण पेच्छे जाव तं रिद्धिं, बहुकालं निहालिउं ।

पुण कच्छभो ^{१०}जाओ, तहावि तं रिद्धिं न पेच्छइ ॥३८८॥

-
१. शल्यैर्भल्लैश्च प्रेरितः सन् पीड्यमानः क्वचिच्च यदिवा 'जालोज्जली' पाठान्तरमाश्रित्य जालेभ्यश्चाऽऽत्मानं रक्षयन् प्रस्वेदीभूत इवेति किं च 'झालोज्जली' इत्यपि पाठस्तु चिन्त्य इति । २. ईषद् विदीर्यमाण इति ३. त्रस्त इति । ४. ऊर्ध्वगमनमिति ५. विपरीतगमनमिति । ६. आकाश इति । ७. श्वेतमिति ८. शब्दायमानानिति ९. वंशपरंपराच्चिति । १०. यात इति
-

एवं चउगईभवगहणे, दुल्लभे माणुसत्तणे ।
 अहिंसालक्खणं धम्मं, लहिऊणं जो पमायई ॥३८९॥
 सो पुण बहुभवलक्खेसु, दुक्खेहिं माणुसत्तणं ।
 लद्धंपि न लब्भई धम्मं, तं रिद्धिं कच्छभो जहा ॥३९०॥
 दियहाइं दो व तिन्नि व अद्धाणं होइ जं तु लग्गेण ।
 सव्वायरेण तस्सवि, संबलयं लेइ ^१पविसंतो ॥३९१॥
 जो पुण दीहपवासो चुलसीईजोणि-लक्खनियमेणं ।
 तस्स तवसीलमइयं संबलयं किं न चिंतेह ? ॥३९२॥
 जह जह पहरे दियहे मासे संवच्छरे य वोलंति ।
 तह तह गोयम ! जाणसु ^२दुक्के आसन्नयं मरणं ॥३९३॥
 जस्स न नज्जइ कालं न य वेला नेय दियहपरिमाणं ।
^३नाएवि नत्थि कोइ वि जगंमि अजरामरो एत्थं ॥३९४॥
 पावो पमायवसओ जीवो संसार-कज्जमुज्जुत्तो ।
 दुक्खेहिं न निव्विन्नो सुक्खेहिं न गोयमा ! तिप्पे ॥३९५॥
 जीवेण जाणि उ विसज्जियाणि जाईसएसु देहाणि ।
 थेवेहिं तओ सयलपि तिहुयणं होज्ज ^४पडिहत्थं ॥३९६॥
 नहदंतमुद्धभमुहऽक्खिकेस जीवेण विप्पमुक्केसु ।
 तेसु वि हविज्ज कुलसेलमेरुगिरिसन्निभे कूडे ॥३९७॥
 हिमवंत-मलय-मंदरदीवोदहिधरणिसरिसरासीओ ।
 अहिययरो आहारो जीवेणाहारिओ अणंतहुत्तो ॥३९८॥

१. पवसंतो पाठान्तरमाश्रित्य प्रवसन्निति । २. उपतिष्ठत इति ३. 'ताए वि'
 पाठान्तरमाश्रित्य तथापीति । ४. पूर्णमिति

गुरुदुःखभरुक्रंतस्स अंसुनिवाएण जं जलं गलियं ।
 तं अगडतलायनईसमुद्दमाईसु णवि होज्जा ॥३९९॥
 १आवीयं थण्णीरं सागरसलिलाओ बहुयरं होज्जा ।
 संसारंमि अणंते २अविलाजोणीए एक्काए ॥४००॥
 सत्ताहविवन्नसुकुहिय-साणजोणीए मज्झदेसंमि ।
 किमियत्तण केवलएण जाणि मुक्काणि देहाणि ॥४०१॥
 तेसिं सत्तमपुढवीए सिद्धिखेत्तं च जाव उक्कुरुडं ।
 चोद्दसरज्जुं लोगं अणंतभागेण वि भरेज्जा ॥४०२॥
 पत्ते य कामभोगे कालमणंतं इहं स उवभोगे ।
 अप्पुव्वं चिय मन्नइ जीवो तहवि य विसयसोक्खं ॥४०३॥
 जह कच्छुल्लो कच्छुं कंडुयमाणो दुहं मुणइ सोक्खं ।
 मोहाउरा मणुस्सा तह कामदुहं सुहं बिंति ॥४०४॥
 जाणंति अणुभवंति य जम्मजरामरणसंभवे दुक्खे ।
 न य विसएसु विरज्जंति गोयमा ! दुग्गइगमणपत्थिए जीवे ॥४०५॥
 सव्वगहाणं पभवो महागहो सव्वदोसपायट्ठी ।
 कामग्गहो दुरप्पा जेणऽभिभूयं जगं सव्वं तस्स वसं जे गया पाणी ॥४०६॥
 जाणंति जहा भोगिड्ढिसंपया सव्वमेव धम्मफलं ।
 तहवि दढमूढहियए पावं काऊण दोग्गई जंति ॥४०७॥
 वच्चइ खणेण जीवो पित्तानिलसिंभधाउखोभेहिं ।
 उज्जमह मा विसीयह तरतमजोगो इमो दुलहो ॥४०८॥

१. आपीतं स्तनक्षीरमिति । २. पशुयोण्यां मेषीयोण्यां वा तथा 'अबलाजोणीए' इत्यपि पाठान्तरमिति ।

पंचिंदियत्तणं माणुसत्तणं आयरिए जणे सुकुलं ।
साहुसमागमसुणणासद्दहणाऽरोगपव्वज्जा ॥४०९॥

सूलअहिविसविसूइयपाणियसत्थग्गिसंभमेहि च ।
देहंतरसंकमणं करेइ जीवो मुहुत्तेण ॥४१०॥

जावाउ सावसेसं जाव थेवो वि अत्थि ववसाओ ।
ताव करेज्ज अप्पहियं मा ^१तप्पिहहा पुणो पच्छ ॥४११॥

सुरधणु-विज्जुखणदिट्ठंनट्ठसंज्ञाणुरागसिमिणसमं ।
देहं इति तु ^२वियलइ आमय-भंडं व जल-भरियं ॥४१२॥

इय जाव ण चुक्कसि एरिसस्स खणभंगुरस्स देहस्स ।
उगं कट्ठं घोरं चरसु तवं नत्थि परिवाडी ॥४१३॥

गोयमात्ति ! 'वाससहस्संपि जई काऊणं संजमं सुविउलंपि ।
अंते किलिट्ठभावो न विसुज्झइ कंडरीउव्व ॥४१४॥

अप्पेणवि कालेणं केइ जहगहियसीलसामन्ना ।
साहंति निययकज्जं पोंडरियमहारिसिक्ख जहा ॥४१५॥

ण अ संसारंमि सुहं जाइजरारणदुक्खगहियस्स ।
जीवस्स अत्थि जम्हा तम्हा मोक्खो उवाएओ^३ ।
सव्वपयारेहिं सव्वहा सव्वभावभावंतरेहिं णं गोयमा ॥४१६॥ त्तिवेमि ॥

महानिशीहसुयक्खंधस्स छट्ठमज्झयणं गीयत्थ विहारं नाम समत्तं



१. मा संतपिष्येति । २. विगलति-क्षयमेति आमघट इव जलभृतस्तथा 'पणइ-आगमं व भंडं व' इत्यादि पाठान्तरमाश्रित्य प्रणयिसमागम इव क्षणस्थायी यद्वा जलभृतमिव मृण्मयं भाजनं प्रतिक्षणं विशेषेण गलति क्षयं च यातीति । ३. उपादेय इति ।

सत्तमज्झयणं (पच्छित्तसुत्तं)

‘भयवं ! ता एय नाएणं, जं भणियं आसि मे तुमं जहा ।
परिवाडीए तच्च किं न अक्खसि, पायच्छित्तं तत्थ मज्झवी ॥१॥
हवइ गोयम ! पच्छित्तं, जइ तुमं तमालंबसि ।
नवरं धम्मवियारो ते, कओ सुवियारिओ फुडो ॥२॥
ण होइ एत्थ पच्छित्तं, पुणरवि पुच्छेज्ज गोयमा !
संदेहं जाव ^१देहत्थं, मिच्छत्तं ताव निच्छयं ॥३॥
मिच्छत्तेणवि अभिभूए, तित्थयरस्स विभासियं ।
वयणं लंघित्तु विवरीयं, वाएत्ताणं पविसंति ॥४॥
घोरतमतिमिरबहलंधयारं पायालं णवरं
सुवियारिउं काउं, तित्थयरा सयमेव य ।
भणंति तं जहा चेव, गोयमा ! समणुट्ठए ॥५॥
अत्थेगे गोयमा ! पाणी, जे पव्वज्जिय जहा तहा ।
अविहीए तह चरे धम्मं, जह संसारा ण मुच्चए ॥६॥
से भयवं ! कयरे णं से विहीसीलोगो ? गोयमा !
इमे णं से विहीसीलोगो, तं जहा-चिइवंदणं
पडिकमणं, जीवाजीवाइतत्तसब्भावं ।
समिइंदियदमगुत्ती, कसायनिग्गहणमुवओगं ॥७॥
नाऊण सुवीसत्थो सामायारिं कियाकलावं च ।
आलोइय नीसल्लो आगब्भा परमसंविग्गो ॥८॥
जम्मजरामरण भीओ चउगइसंसारकम्मदहणट्ठा ।
पइदियहं हियएणं एयं अणवरय झायंतो ॥९॥
जरमरणमयरपउरे रोग-किलेसाइबहुविहतरंगे ।
कम्मट्ठकसायागाहगहिरभवजलहिमज्झंमि ॥१०॥

भमिहामि भट्टसम्पत्तनाणचारित्तलद्धवरपोओ ।
 कालं अणोरपारं अंतं दुक्खाणमलभंतो ॥११॥
 ता कइया सो दियहो जत्थाहं सत्तुमि- त्समपक्खो ।
 नीसंगो विहरिस्सं सुहज्जाणनिरंतरो पुणोऽभवट्ठं ॥१२॥
 एवं चिरचिंतियऽभिमुहमणोरहोरुसंपत्तिहरिसमुल्लसिओ^१ ।
 भत्तिभरनिब्भरो^२णयरोमंचकंचुयपुलइयंगो ॥१३॥
 सीलंगसहस्सट्ठा- रसण्ह धरणे समोच्छयखंधो ।
 छत्तीसायारुक्कंठनिट्ठवियासेसमिच्छत्तो ॥१४॥
 पडिवज्जे पव्वज्जं विमुक्कमयमाणमच्छरामरिसो ।
 निम्ममनिरहंकारो विहिणेवं गोयमा ! विहरे ॥१५॥
 विहग इवापडिबद्धो उज्जुत्तो नाणदंसणचरित्ते ।
 नीसंगो घोरपरिसहोवंसग्गाइं पजिणंतो ॥१६॥
 उग्गअभिग्गहपडिमाइ रागदोसेहिं दूरतरमुक्को ।
 रोद्धट्ठज्जाणविवज्जिओ य विगहासु अ असत्तो ॥१७॥
 जो चंदणेण बाहुं आलिंपइ वासिणा व जो तच्छे ।
 संथुणइ जो अ निंदइ समभावो हुज्ज दुण्हंपि ॥१८॥

एवं अणिगूहियबलविरिअपुरिसक्कारपरक्कमो सममणतण-
 मणिलिट्ठकंचणो^३चेव ॥१८॥ परिचत्तकलत्तपुत्तसुहिसयणमित्तबंधवधण-
 धन्नसुवन्नहिरण्णमणि-रयणसारभंडारो अच्चंत-परमवेरग्ग- वासणाजणिय-
 पवरसुहज्जवसायपरमधम्मसद्धापरो अकिलिट्ठनिकलुस- अदीणमाणसो
 य वयनियमनाणचारित्ततवाइसयलभुवणिक्कमंगल-अहिंसालक्खणखंता-
 इदसविह-धम्माणुट्ठाणेकंतबद्धलक्खो, सव्वावस्सगतक्कालकरणसज्झायज्झा-
 णमाउत्तो संखाईयअणेग-कसिणसंजमपएसु अविखलिओ
 संजयविरय-पडिहयपच्चक्खाय पावकम्मो अणियाणो मायामोसविवज्जिओ
 साहू वा साहुणी वा एवं गुणक्कलिओ जइ कहवि पमायदोसेणं असइं

१ 'हरिससमुल्लसिओ' पाठान्तरमिति । २. अवन्त इति । ३. 'चेक्को' पाठान्तरमाश्रित्य
 रागद्वेषरहित एक इति ।

कहिंचि कथइ वायाइ वा मणसा इ वा कायेण इ वा तिकरणविसुद्धीए सव्व-भावभावंतरेहिं चेव संजममायरमाणो असंजमेणं छलेज्जा तस्स णं विसोहिपयं पायच्छित्तमेव, तेणं पायच्छित्तेणं गोयमा ! तस्स विसुद्धिं उवदिसिज्जा, न अन्नहत्ति । तत्थ णं जेसुं जेसुं ठाणेसुं जत्थ-जत्थ जावइयं पच्छित्तं तमेव ^१निट्ठंकिंयं पच्छित्तं भन्नइ ।

से भयवं ! केणमट्ठेणं भन्नइ जहा णं तमेव ^२निट्ठंकिंयं भन्नइ ? गोयमा ! अणंतराणंतरक्कमेणं इणमो पच्छित्तसुत्ता, अणेगे भव्वसत्ता चउगइ-संसारचारगाओ बद्धपुट्टनिकाइयदुव्विमोक्खघोरपारद्धकम्मनियडाइं संचुन्निऊण अचिरा विमुच्चिहिंति । अन्नं च इणमो पच्छित्तसुत्तं अणेगगुणगणाइन्नस्स दढव्वयचरित्तस्स एगंतेणं जोगस्सेव ^१विवक्खिए पएसे चउकन्नं पन्नवेयव्वं णो छकन्नं पन्नवेयव्वं तहा य जस्स जावइएणं पायच्छित्तेणं परमविसोही भवेज्जा तं तस्स णं अणुयत्तणाविरहिण्ण धम्मैक्करसिएहिं वयणेहिं जहड्डियं अणूणाहियं तावइयं चेव पायच्छित्तं पयच्छेज्जा । एएणं अट्ठेणं एवं वुच्चइ जहा णं गोयमा ! तमेव निट्ठंकिंयं पायच्छित्तं भन्नइ । १।

से भयवं ! कइविहं पायच्छित्तमुवइट्ठं ? गोयमा ! दसविहं पायच्छित्तं उवइट्ठं, तं च अणेगहा जाव णं पारंचिए । २।

से भयवं ! केवइयं कालं जाव इमस्स णं पायच्छित्तसुत्त-स्साणुट्ठाणं वहिही ? गोयमा ! जाव णं कक्की णामे रायाणे निहणं गच्छिय, एक्कजिणाययणमंडियं वसुहं सिरिप्पभे अणगारे, भयवं ! उड्ढं पुच्छा, गोयमा ! उड्ढं न केई एरिसे पुण्णभागे होहि जस्स णं इणमो सुयक्खंधं उवइसेज्जा । ३।

से भयवं ! केवइयाइं पायच्छित्तस्स णं पयाइं ? गोयमा ! संखाइयाइं पायच्छित्तस्स णं पयाइं । से भयवं ! तेसिं णं संखाइयाणं पायच्छित्तपयाणं किं तं पढमं पायच्छित्तस्स णं पयं ? गोयमा ! पइदिणकिरियं । से भयवं । किं तं पइदिणकिरियं ? गोयमा ! जमणुसमयाहन्निसा पाणोवरमं जावाणुट्ठेयव्वाणि संखेज्जाणि आवस्सगाणि ।

से भयवं ! केणं अट्टेणं एवं वुच्चइ जहा णं आवस्सगाणि ? गोयमा !
असेसकसिणङ्कम्मक्खयकारिउत्तमसम्मदंसणनाणचारित्तअच्चंतघोरवीरु-
ग्गकडुसुदुक्करतवसाहणट्ठाए परूविज्जंति । नियमित- विभत्तुद्धिडुपरिमिएणं
कालसमएणं पयंपयेणाहन्निसाणुसमयमाजम्मं अवस्समेव ^१तिथ्यराइसु
कीरंति अणुट्ठिज्जंति उवइसिज्जंति परूविज्जंति पन्नविज्जंति सययं, एएणं
अट्टेणं एवं वुच्चइ गोयमा ! जहा णं आवस्सगाइं । तेसिं च णं गोयमा ! जे
भिकखू कालाइक्कमेणं वेलाइक्कमेणं समयाइक्कमेणं अलसायमाणे
अणोवउत्तपमत्ते अविहीए अन्नेसिं च असद्धं उप्पायमाणे अन्नयरमावस्सगं
पमाइय पमाइय संतेणं बलवीरि-एणं ^२सातलेहडत्ताए आलंबणं वा किंचि
घेतूणं ^३चिराइयं ^४पउरिया णो णं जहुत्तयालं समणुट्ठेज्जा से णं गोयमा !
महापायच्छिती भवेज्जा । ४।

से भयवं किं तं बिइयं पायच्छित्तस्स णं पयं ?, गोयमा ! बीयं
तइयं चउत्थं पंचमं जाव णं संखाइयाइं पायच्छित्तस्स णं पयाइं ताव णं
एत्थं चेव पढमपायच्छित्तपए ^५अंतरोवगयाइं समणुविंदा । से भयवं !
केणं अट्टेणं एवं वुच्चइ ? गोयमा ! जओ णं सव्वास्सगकालाणुपेही
भिकखू णं रोद्धइज्जाणरागदोसकसायगारवममकाराइसु णं
अणेगपमायालंबणेसु च सव्वभाव-भावंतरतरेहिं णं अच्चंतविष्णमुक्को
भवेज्जा, केवलं तु नाणदंसणचारित्तं तवोकम्मसज्जायज्जाण-
सद्धम्मावस्सगेसु अच्चंत अणिगूहियबलवीरियपरक्कमे सम्मं अभिरमेज्जा ।
जाव णं सद्धम्मावस्सगेसु अभिरमेज्जा ताव णं सुसंवुडासवदारे हवेज्जा ।
जाव णं सुसंवुडासवदारे हवेज्जा ताव णं सजीववीरिएणं
अणाइभव-गहण-संचियाणिडुडुडुक्कम्मरासीए एगंतणिडु- वणेक्कबद्धलक्खो
अणुक्कमेणनिरुद्धजोगीभवेत्ताणंनिहइडासेसकम्मंधणेविमुक्कजाइजरामरण-
चउगइसंसारपासबंधणे य सव्वदुक्खविमोक्ख- तेलोक्कसिहरनिवासी
भवेज्जा । एएणं अट्टेणं गोयमा ! एवं वुच्चइ जहा णं एत्थं चेव
पढमपए अवसेसाई पायच्छित्तपयाइं ^५अंतरोवगयाइं समणुविंदा । ५।

१. तीर्थकरादिषु सत्तु इति शेष इति । २. सुखलाम्पव्वेनेति । ३. चिरायितमिति ।

४. प्रकुर्यादिति । ५. समाविष्टानि समनुविद्या इति

से भयवं ! कयरे ते आवस्सगे ? गोयमा ! णं चिइवंदणादओ ।
 से भयवं ! ^१कम्हि आवस्सगे असई पमायदोसेणं कालइक्कमिए इ वा
 वेलाइक्कमिए इ वा समयातिक्रमिए इ वा अणोवउत्तपमत्ते इ वा^२
 अविहीए इ वा समणुट्टिए इ वा णो णं जहुत्तयालं विहीए सम्मं
 अणुट्टिए इ वा ^३असंपडिए इ वा विच्छं पडिए^४ इ वा अकए इ वा
 पमाए इ वा केवइयं पायच्छित्तमुवइसेज्जा ? गोयमा ! जे केई भिक्खु
 वा भिक्खुणी वा संजयविरयपडिहयपच्चक्खाय-पावकम्मे दिक्खा-
 दियाप्पभिईओ अणुदियहं जावज्जीवाभिग्गहेणं सुवीसथे^५ भत्तिनिब्भरे
 जहुत्तविहीए सुत्तत्थमणुसरमाणो अणण्णमाणसेग्गचित्ते
 तग्गयमाणससुहज्झवसाए थयथुईहिं ण तेकालियं चेइए वंदेज्जा तस्स णं
 एगाए वाराए खवणं पायच्छित्तं उवइसेज्जा बीयाए छेयं । तइयाए
 उवट्ठावणं ।

अविहीए चेइयाइं वंदे तओ पारंचियं, जओ अविहीए चेइयाइं
 वंदेमाणो अन्नेसिं असद्धं संजणे ईइकाऊणं । जो उण हरियाणि वा
 बीयाणि वा पुष्पाणि वा फलाणि वा पूयट्ठाए वा महिमट्ठाए वा
 सोभट्ठाए वा संघट्टेज्ज वा संघट्ठावेज्ज वा छिंदिज्ज वा छिंदावेज्ज वा
 संघट्टिज्जंताणि वा छिंदिज्जंताणि वा परेहिं समणुजाणेज्ज वा एएसुं
 सव्वेसुं उवट्ठावणं खमणं चउत्थं आयंबिलं एक्कासणगं निव्विगइयं
 गाढागाढ-भेदेणं जहासंखेणं णेयं । जे णं चेइए वंदेमाणस्स वा
 नमंसमाणस्स वा संथुणेमाणस्स वा पंचप्पयारं सज्झायं वा पयरेमाणस्स
 वा विग्घं करेज्ज वा-कारवेज्ज वा कीरंतं वा परेहिं समणुजाणेज्ज वा से
 तस्स एएसुं दुवालसं छट्ठं एक्कासणगं कारणिगस्स, निक्कारणिगे अवंदे
 संवच्छरं जाव पारंचियं काऊणं उवट्ठावेज्जा । ६ ।

जे णं पडिक्कमणं नो पडिक्कमेज्जा से णं तस्सोवट्ठावणं निदेसेज्जा,

१. कस्मिन्नावश्यक इति । २. 'अणोवउत्तपमत्तेहिंवा' पाठान्तरमिति । ३. सम्यग् न
 घटित इति । ४. विलम्बेन घटिते यदि वा वैपरीत्येन घटित इति
 ५. सुविश्वस्त इति ।

बड्दपडिक्कमणेणं खमणं, सुन्नासुन्नीए अणोवउत्तपमत्तो वा पडिक्कमणं करेज्जा दुवालसं, पडिक्कमणकालस्स चुक्कइ चउत्थं, अकाले पडिक्कमणं करेज्जा चउत्थं, कालेणं वा पडिक्कमणं णो करेज्जा चउत्थं ।

संथारगओवविट्ठो वा पडिक्कमणं करेज्जा दुवालसमं, मंडलीए ण पडिक्कमेज्जा उवट्ठावणं, कुसीलेहिं समं पडिक्कमणं करेज्जा उवट्ठावणं, परिभट्ठबंभचेरवएहिं समं पडिक्कमेज्जा पारंचियं, सव्वस्स समणसंघस्स तिविहं तिविहेण खमणमरिसामणं अकाऊण पडिक्कमणं करेज्जा उवट्ठावणं, पयंपएणाविच्चाभेलियं पडिक्कम्मणसुत्तं ण पयट्ठेज्जा चउत्थं ।

पडिक्कमणं काऊणं संथारगे इ वा फलहगे इ वा तुयट्ठेज्जा खमणं । दिया तुयट्ठेज्जा दुवालसं । पडिक्कमणं काउं गुरुपामूलं वसहिं संदिसावेत्ताणं ण पच्चुप्पेहेइ चउत्थं ।

वसहिं पच्चुप्पेहिऊणं ण संपवेएज्जा छट्ठं, वसहिं असंपवेएत्ताणं रयहणं पच्चुप्पेहिज्जा पुरिवड्ढं, रयहरणं विहीए पच्चुप्पेहिताणं गुरुपामूलं मुहणंतगं पच्चुप्पेहिय उवहिं ण संदिसावेज्जा पुरिवड्ढं, मुहणंतगेणंपच्चुप्पेहिए णं उवहिं संदिसावेज्जा पुरिवड्ढं, असंदेसावियं उवहिं पच्चुप्पेहिज्जा पुरिवड्ढं, अणुवउत्तो उवहिं वा वसहिं वा पच्चुप्पेहे दुवालसं, अविहीए वसहिं वा उवहिं वा अन्नयरं वा भंडमत्तोवगरणजायं किंचि अणोवउत्तपमत्तो पच्चुप्पेहिज्जा दुवालसं ।

वसहिं वा उवहिं वा भंडमत्तोवगरणं वा अपडिलेहियं वा दुप्पडिलेहियं वा परिभुंजेज्जा दुव्वालसं, वसहिं वा उवहिं वा-भंडमत्तोवगरणं वा ण पच्चुप्पिहिज्जा उवट्ठावणं ।

एवं वसहिं उवहिं पच्चुप्पेहिताणं जम्ही पएसे संथारयं जम्ही उ पएसे उवहीए पच्चुप्पेहणं कयं तं ^१थामं णिउणं ^२हलुयहलुयं

दंडापुंछणगेण वा रयहरणेण वा साहरेत्ताणं तं च कयवरं पच्चुप्पेहितु
छप्पइयाओ ण पडिगाहिज्जा दुवालसं ।

छप्पइयाओ पडिगाहित्ताणं तं च कयवरं परिद्वेऊणं ईरियं ण
पडिक्कमेज्जा चउत्थं, अपच्चुप्पेहियं कयवरं परिद्वेज्जा उवट्ठावणं जइ णं
छप्पइयाओ हवेज्जा अहा णं नत्थि तओ दुवालसं ।

एवं वसहिं उवहिं पच्चुप्पेहिऊणं ^१समाहिं ^२खइरोल्लगं च ण
परिद्वेज्जा चउत्थं । अणुग्गए सूरिए समाहिं वा खयरोल्लगं वा
परिद्वेज्जा आयंबिलं, हरिकायससंते इ वा बीयकायसंसेत्ते इ वा
तसकायबेइंदियाईहिं वा संसत्ते थंडिले समाहिं वा खइरोल्लगं वा परिद्वे
अन्नयरं वा उच्चाराइयं वा वोसिरिज्जा पुरिमइढे
एक्कासणगायंबिलमहक्कमेणं जइ ण णो उद्वणं संभवेज्जा, अहा णं
उद्वणासंभाविए तओ खमणं । तं च थंडिलं पुणरवि पडिजागरिऊणं
नीसंकं काऊणं पुणरवि आलोएत्ताणं जहाजोगं पायच्छित्तं ण
पडिगाहिज्जा तओ उवट्ठावणं । समाहिं परिद्वेमाणो सागारिएणं
^३संचिक्खीयए ^४संचिक्खीयमाणो वा परिद्वेज्जा खवणं । अप्पच्चुप्पेहिए
थंडिले जं किंचि वोसिरेज्जा तत्थोवट्ठावणं ।

एवं वसहिं उवहिं पच्चुप्पेहेत्ताणं समाहिं खइरोल्लगं च परिद्वेत्ताणं
एगग्गमाणसो आउत्तो विहीए सुत्तत्थमणुसरेमाणो ईरियं न पडिक्कमेज्जा
एक्कासणं ।

मुहणंतगेणं विणा ईरियं पडिक्कमेज्जा वंदणं पडिक्कमणं वा करेज्जा
जंभाएज्ज वा सज्झायं वा करेज्जा वायणादी सव्वत्थ पुरिमइढं ।

एवं च ईरियं पडिक्कमित्ताणं सुकुमालपम्हल-^५अचोप्पड-

१. प्रश्रवणमात्रकमिति । २. श्लेष्ममात्रकमिति । ३. संवीक्ष्यत इति । ४. संवीक्ष्यमाण इति ।

५. स्नेहरहितेनेति ।

^१अविक्रिष्टेणं अविद्धदंडेणं दंडापुच्छणगेणं वसहिं न पमज्जे एक्कासणं ।

^२बोहारियाए वा वसहिं बोहारिज्जा उवट्ठावणं ।

वसहीए दंडापुच्छणं दाऊणं कयवरं न परिट्ठवेज्जा चउत्थं । अपच्चुप्पेहियं कयवरं परिट्ठवेज्जा दुवालसं, जइ णं छप्पइयाउ ण हवेज्जा, अहवा णं हवेज्जा तओ णं उवट्ठावणं । वसहीसंठियं कयवरं पच्चुप्पेहमाणेण जाओ छप्पइयाओ तत्थ अत्रेसिऊणं २ समुच्चिणिय २ पडिगाहिया ताओ जइ णं ण सव्वेसिं भिक्खूणं ^३संविभइऊणं देज्जा तओ एक्कासणं, जइ सयमेव अत्तणा ताओ छप्पइयाओ पडिगाहिज्जा । अह णं ण संविभइउं दिज्जा ण य अत्तणो पडिगाहेज्जा तओ पारंचियं ।

एवं वसहिं दंडापुच्छणगेणं विहीए य पमज्जिऊणं कयवरं पच्चुप्पेहेऊणं छप्पइयाओ संविभाविऊणं च तं कयवरं ण परिट्ठवेज्जा परिट्ठवित्ताणं च सम्मं विहीए अच्चंतोवउत्तएगगग्गमाणसेण पयंपएणं तु सुत्तत्थोभयं सरमाणे जे णं भिक्खू ण ईरियं पडिक्कमेज्जा तस्स अ आयंबिलं खमणं पच्छित्तं निद्देसेज्जा ।

एवं तु अइक्कमिज्जा णं गोयमा ! किं चूणं दिवड्ढं घडिगं पुव्वण्हिगस्स णं पढमजामस्स । एयावसरम्ही उ गोयमा ! जे णं भिक्खू गुरूणं पुरो विहीए सज्झायं संदिसाविऊणं एगगचित्ते सुयाउत्ते दढं धीइए घडिगूणपढमपोरिसी जावज्जीवाभिगहेणं अणुदियहं अपुव्वणाणगहणं न करेज्जा तस्स दुवालसमं पच्छित्तं निद्देसेज्जा । अपुव्वनाणाहिज्जणस्स अस्सई जमेव पुव्वाहिज्जियं तं सुत्तत्थोभयमणुसरमाणो एगगमाणसे न परावत्तेज्जा भत्तित्थीरायतक्करजणवयाइविचित्तविगहासु अ णं अभिरमेज्जा अवंदणिजे । जेसिं च णं पुव्वाहीयं सुत्तं णत्थेव अउव्वन्नाणगहणस्स णं असंभवो वा

तेसिमवि घडिगूणपढमपोरिसी पंचमंगलं पुणो पुणो परावत्तणीयं । अहा णं पो परावत्तिया विगहं कुव्वीया वा निसामिया वा सेणं अवंदे । एवं घडिगुणगाए पढमपोरिसीए जे णं भिक्खू एगग्गचित्तो सज्झायं काऊणं तओ पत्तगमत्तगकमढगाइं भंडोवगरणस्स णं अवक्खित्ताउत्तो विहीए पच्चुप्पेहणं ण करेज्जा तस्स णं चउत्थं पच्छित्तं निदिसेज्जा भिक्खुसद्दो पच्छित्तसद्दो अ इमे सव्वत्थं पइपयं जोजणीए, जइ णं तं भंडोवगरणं ण भुंजीया । अहा णं परिभुंजे दुवालसं ।

एवं अइक्कंता पढमपोरिसी । बीयपोरसीए अत्थगहणं न करेज्जा पुरिमइढं, जइ णं वक्खाणस्स णं अभावो । अहा णं वक्खाणं अत्थेव तं ण सुणेज्जा अवंदे, वक्खाणस्सासंभवे कालवेलं जाव वायणाइसज्झायं न करेज्जा दुवालसं ।

एवं पत्ताए कालवेलाए जं किंचि अइयराइयदेवसियाइयारे निंदिए गरहिए आलोइए पडिक्कंते जंकिंचि काइगं वा वाइगं वा माणसिगं वा उस्सुत्तायरणेण वा उम्मग्गायरणेण वा अकप्पासेवणेण वा अकरणिज्जसमायरणेण वा दुज्झाइएण वा दुव्विचिंतिएण वा अणायारसमायरणेण वा अणिच्छियव्वसमायारणेण वा असमणपाउग्गसमायरणेण वा नाणे दंसणे चरित्ते सुए सामाइए तिण्हं गुत्तियादीणं चउण्हं कसायादीणं पंचण्हं महव्वयादीणं छण्हं जीवनिक्कायादीणं सत्तण्हं पाणेसणमाईणं सत्तण्हं पिंडेसणमाईणं अट्ठण्हं पवयणमाइयाणं नवण्हं बंभवेरगुत्ताईणं दसविहस्स णं समणधम्मस्स एवं तु जाव णं एमाइ-अणेगालावगमाईणं खंडणे विराहणे वा आगमकुसलेहिं णं गुरुहिं पायच्छित्तमुवइडं, तं निमित्तेणं जहा सत्तीए अणिगूहियबलवीरियपुरिसयार-परक्कमे असढत्ताए अदीणमाणसे अणसणाइसवज्झंतरं दुवालसविहं तवोकम्मं गूरुणमंतिए पुणरवि णिट्ठंकिऊणं सुपरिफुडं काऊणं तहत्ति अभिनंदित्ताणं खंड-खंडीविभत्तं वा एगपिंडड्डियं वा ण सम्ममणुचेट्ठेज्जा से णं अवंदे । ७।

से भयवं ! केणं अट्टेणं खंडाखंडीए काऊणमणुचिट्ठेज्जा ?,
 गोयमा ! जे णं भिक्खू संवच्छरद्धं चाउमास मासखमणं वा ^१एक्कोलगं
 काऊणं न सक्कुणोई ते णं छट्ठमदसमदुवालसद्धमासक्खमणेहिं णं तं
 पायच्छित्तं अणुपवेसेइ, अन्नमवि जंकिंचि ^२पायच्छित्ताणुयं । एतेणं
 अट्टेणं खंडाखंडीए समणुचिट्ठे ।

एवं तु समोगाढं किंचूणं पूरिमड्ढं । एयावसरंमि उ जे णं
 पडिक्कमंते इ वा वंदंते इ वा सज्झायं करंते इ वा परिभमंते इ वा
 संचरंते इ वा गए इ वा ठिए इ वा बइड्डलगे इ वा उड्डियलगे इ वा
 तेउकाएण वा ^३फुसियल्लगे भवेज्जा से णं आयंबिलं ण संवरेज्जा तओ
 चउत्थं ।

अन्नेसिं तु जहाजोगं जहेव पायच्छित्ताणि पविसंति, तहा ससत्तीए
 तवोकम्मं णाणुट्ठेइ तओ चउग्गुणं पायच्छित्तं तमेव बीयदियहे
 उवइसेज्जा । जेसिं च णं वंदंताण वा पडिक्कमंताण वा दीहं वा मज्जारं
 वा छिंदिऊणं गयं हवेज्जा तेसिं च णं लोयकरणं अन्नत्थ गमणं ^४तंमाणं
 उग्गतवाभिरमणं, एयाइं ण कुव्वंति तओ गच्छवज्जे, जेणं तु तं
 महोवसग्गसाहगं उप्पायगं दुन्निमित्तममंगलावहं हविया ।

जेणं पढमपोरिसीए वा बीयपोरिसीए वा चंकमणियाए वा
 परिसक्कएज्जा ^५अगालसंन्निए इ वा ^६छट्ठी करेइ वा से णं जइ
 चउव्विहेणं ण संवरेज्जा तओ छट्ठं ।

दिया थंडिले पडिलेहिए राओ सन्नं वोसिरेज्जा समाहीए वा
 एगासणं गिलाणस्स, अन्नेसिं तु छट्ठमेव, जइ णं दिया ण थंडिलं

१. अविरामेण युगपदिति । २. अणुकं लघुप्रायश्चित्तमिति । ३. स्पृष्टो भवेदिति ।
 ४. तन्मानं तत्प्रमाणमिति । ५. अकालं मलोत्सर्गं करोतीति । ६. वमनं करोतीति ।

पच्चुप्पेहियं णो णं समाही 'संजमिया + अपच्चुप्पेहिए* थंडिलेऽपेहियाए
चेव समाहीए रयणीए सन्नं वा कइयं वा वोसिरिज्जा एगासणं
गिलाणस्स, सेसाणं दुवालसं, अहा णं गिलाणस्स मिच्छुक्कडं वा ।

एवं पढमपोरिसीए बीयपोरिसीए वा सुत्तत्थाहिज्जणं मोत्तूणं जे णं
इत्थीकहं वा भत्तकहं वा देसकहं वा रायकहं वा तेणकहं वा
गारत्थियकहं वा अन्नं वा असंबद्धं रोद्धट्टज्जाणोदीरणाकहं पत्थावेज्ज वा
उदीरेज्ज वा कहेज्ज वा कहावेज्ज वा से णं संवच्छरं जाव अवंदे ।

अहा णं पढमबीयपोरिसीए जइ णं कयाई महया कारणवसेणं
अब्धघडिगं वा घडिगं वा सज्झायं न कयं तत्थ मिच्छुक्कडं गिलाणस्स,
अन्नेसिं निव्विगइयं दढनिदुरं ।

तेण वा गिलाणेणं वा जइ णं कहिंचि केणइ कारणेणं जाएणं
असई गीयत्थ गुरुणा अणणुन्नाएणं सहसा कयादी बइट्टपडिक्कमणं कयं
हवेज्जा तओ मासं जाव अवंदे, चउमासे जाव मूणव्वयं च ।

जे णं पढमपोरिसीए अणइक्कंताए तइयाए पोरिसीए अइक्कंताए
भत्तं वा पाणं वा पडिगाहेज्ज वा परिभुंजेज्ज वा तस्स णं पुरिमड्डं ।
चेइएहिं अवंदिएहिं उवओगं करेज्जा पुरिमड्डं । गुरुणो अंतिए
णोवओगं करेज्जा चउत्थं, अकएणं उवओगेणं जंकिंचि पडिगाहेज्जा
चउत्थं, अविहीए उवओगं करेज्जा खवणं ।

भत्तट्ठाए वा पाणट्ठाए वा भेसज्जट्ठाए वा सकज्जेण वा गुरुकज्जेण
वा बाहिरभूमीए निग्गच्छंते णं गुरुणो पाए उत्तिमंगेणं संघट्टेत्ताणं
आवस्सियं ण करेज्जा पविसंते घंघसालईसु णं वसहीदुवारे णिसीहियं ण
करेज्जा पुरिमड्डं ।

१. शौचार्थं जलभाजनं वा वस्त्रादिना यदि न बद्धं पिहितं वेति । * 'पच्चुप्पेहिए' पाठान्तरमिति ।

*सत्तण्हं कारणजायाणमसमई वसहीए बहिं निग्गच्छे गच्छबज्झो । एगो गच्छे उवट्ठावणं । अगीयत्थस्स गीयत्थस्स वा संकणिज्जस्स भत्तं वा पाणं वा भेसज्जं वा वत्थं वा पत्तं वा दंडगं वा अविहीए पडिगाहेज्जा गुरुणं च णालोइज्जा तइयवयस्स छेदं मासं जाव अवंदे मूणव्वयं च ।

भत्तट्ठाए वा पाणट्ठाए वा भेसज्जट्ठाए वा सकज्जेण वा गुरूकज्जेण वा पविट्ठो गामे वा नगरे वा रायहाणीए वा तिगचउक्कचच्चरपरिसागिहे इ वा तत्थ कहं वा विकहं वा षत्थावेज्जा उवट्ठावणं । सोवाहणो परिसक्केज्जा उवट्ठावणं । उवाहणाओ ण पडिगाहिज्जा खवणं । तारिसे णं संविहाणगे उवाहणाओ ण परिभुंजेज्जा खवणं ।

गओ वा ठिओ वा केणइ पुट्ठो निउणं महरं थोवं कज्जावडियं अगव्वियमतुच्छं निट्ठोसं सयलजणमणाणंदकारयं इहपरलोग-सुहावहं वयणं ण भासेज्जा अवंदे, जइ णं नाभिग्गहिओ । ^१सोलसदोसविरहियं पी ससावज्जं भासेज्ज उवट्ठावणं, बहुभासे उवट्ठावणं, ^२पडणीयं भासे उवट्ठावणं, ^३पडिनायं भासे उवट्ठावणं । कसाएहिं ^४जिज्जे अवंदे, कसाएहिं समुइत्तेहिं भुंजे रयणिं वा परिवसेज्जा मासं जाव मूणव्वए अवंदे य उवट्ठावणं च । परस्स वा कस्सई कसाए समुदीरेज्जा दरकसायस्स वा कसायवुड्ढिं करेज्जा मम्मं वा किंचि ^५चालेज्जा एतेसुं गच्छबज्झो । फरुसं भासे दुवालसं, कक्कसं भासे दुवालसं, खरफरुसकक्कसणिट्ठुरमणिट्ठं भासेज्जा उवट्ठावणं, दुब्बोलं देइ खमणं, कलिं ^६किलिकिंच-कलहं झंझं डमरं वा करेज्जा गच्छबज्झो ।

मगारजगारं वा बोल्ले खवणं, बीयवाराए अवंदे, वहंतो संघबज्झो,

१. प्रत्यक्ष-परोक्ष-कालत्रिक-वचनत्रिक-लिङ्गत्रिक- उपनयाऽपनयचतुष्काऽध्यात्मेति ।
 २. प्रत्यनीकमिति । ३. प्रतिज्ञातं कदाग्रहपूर्वकमिति । ४. कषायैर्जीयेतेति ।
 ५. 'बोलेज्जा' इति क्वचित् पाठान्तरमिति । ६. क्रीडातः कलहमिति ।

^१चैत्य - ^२भक्त ^३पान ^४भेषज - ^५स्वकार्य - ^६गुरूकार्यं ^७बहिर्भूमिगमनमिति ।

हणंतो संघबज्झो, एवं खणंतो भंजंतो ^१ल्लसंतो, ^२लूडितो जालितो जालावेंतो पयंतो पयावितो, एतेसु सव्वेसु पत्तेगं संघबज्झो ।

गुरुपि ^३पडिसूरेज्जा अन्नं वा मयहराइयं कहिंचि हीलेज्जा गच्छायारं वा संघायारं वा वंदण-पडिकमणमाइमंडलीधम्मं वा अइकमेज्जा अविहीए वा पव्वावेज्ज वा उवट्ठावेज्ज वा ^४अओगस्स वा सुत्तं वा अत्थं वा उभयं वा परूवेज्जा अविहीए सारेज्ज वा वारिज्ज वा चोएज्ज वा विहीए वा सारणवारण-चोयणं ण करेज्जा, उम्मग्गपट्टियस्स वा जहाविहीए जाव णं सयलजणसन्निज्झं परिवाडीए ण भासेज्जा हियं भासं सपक्खगुणावहं एतेसु सव्वेसु पत्तेगं कुलगणसंघ-बज्झो । कुलगणसंघबज्झीकयस्स णं अच्चंतघोरवीरतवाणुट्ठाणाऽभिरयस्सावि णं गोयमा ! ^५अप्पेही, तम्हा कुलगणसंघबज्झीकयस्स णं खणखणद्धघडिगद्धघडिगं वा ण ^६चिट्ठेयव्वंति ।

अपच्चुप्पेहिए थंडिल्ले उच्चारं वा पासवणं वा खेलं वा सिंघाणं वा जल्लं वा परिट्ठावेज्जा निसीयंतो संडासगे ण पमज्जेज्जा निव्विगइयायंबिलमहकमेणं, भंडमत्तोवगरणजायं जंकिंचि दंडगाइं ठवंते इ वा निक्खिवंतो इ वा साहरंतो इ वा पडिसाहरंतो इ वा गिण्हंतो इ वा पडिगिण्हंतो इ वा गेण्हेज्ज वा पडिगेण्हेज्ज वा, एतेसुं असंसत्तखेत्ते पत्तेगं चउरो आयंबिले, संसत्तखित्ते उवट्ठावणं ।

दंडगं वा रयहरणं वा पायपुंछणं वा अंतरकप्पगं वा चोलपट्टगं वा वासाकप्पं वा जाव णं मुहणंतगं वा अन्नयरं वा किंचि संजमोवगरणजायं अप्पडिलेहियं वा दुप्पडिलेहियं वा उणाइरित्तं गणणाए पमाणेण वा परिभुंजे खवणं ।

सव्वत्थ पत्तेगं । अविहीए नियंसणुत्तरीयं रयहरणं दंडगं वा

१. अभिपतन्ति । २. लुण्टयन्ति । ३. प्रतिकूलयेतेति । ४. अपात्रस्येति ।

५. अप्रेक्षी-अदर्शनीय इति । ६. बहिष्कृतस्य पार्श्वे न तिष्ठेदिति ।

परिभुंजे चउत्थं । सहसा रयहरणं खंधे निक्खिवइ उवट्ठावणं ।

अंगं वा उवंगं वा संबाहावेज्जा खवणं । रयहरणमुस्संघट्टे चउत्थं ।
पमत्तस्स सहसा मुहणंतगाइ किंचि संजमोवगरणं विप्पणस्से तत्थ णं जाव
खमणोवट्ठावणं, जहाजोगं गवेसणं मिच्छुक्कडं वोसिरणं पडिगाहणं च ।

आउकायतेउकायस्स णं संघट्टणाई एगंतेंणं णिसिद्धे, जो उण
जोईए ^१अंतलिकखबिंदुवारेहिं वा आउत्तो वा अणाउत्तो वा सहसा
फुसेज्जा तस्स णं पकहियं चेवायंबिलं ।

इत्थीणं अंगावयवं किंचि हत्थेण वा पाएण वा दंडगेण वा
^२करधरियकुसग्गेण वा ^३चलणखेवएण वा संघट्टे पारंचियं । सेसं पुणो
वि सट्ठाणे पबंधेण भाणिहिइ ।

एवं तु आगयं, भिक्खाकालं, एयवसरम्ही उ गोयमा ! जेणं भिक्खू
पिंडेसणाभिहिएणं विहिणा अदीणमणसो 'वज्रंतो वीयहरियाइं, पाणे य
दगमट्टियं' । 'ओवायं विसमं खाणुं,' 'रन्नो गिहवईणं च संकट्ठाणं
विवज्रंतो' पंचसमियतिगुत्तो गोयरचरियाए ^४पाहुडियं न पडियरिया तस्स
णं चउत्थं पायच्छित्तं उवइसेज्जा जइ णं नो अभत्तट्ठी । ठवणकुलेसु
पविसे खवणं । सहसा ^५पडिवुत्थं पडिगाहियं तक्खणा ण परिट्ठवे
निरुवद्वे थंडिले खवणं । अकप्पं पडिगाहेज्जा चउत्थाइ जहाजोगं । कप्पं
वा पडिसेहेइ उवट्ठावणं । गोयरपविट्ठो कहं वा विकहं वा उभयकहं वा
^६पत्थावेज्ज वा उदीरेज्ज वा कहेज्ज वा निसामेज्ज वा छट्ठं ।

गोयरमागओ य भत्तं वा पाणं वा भेसज्जं वा जं जेण ^७चित्तियं,
जं जहा य चित्तियं जं जहा य पडिगाहियं तं जहा सव्वं णालोएज्जा
पुरिवड्ढं । इरियाए अपडिक्कंताए भत्तपाणाइयं आलोएज्जा पुरिवड्ढं ।
ससरक्खेहिं पाएहिं अपमज्जिएहिं इरियं पडिक्कमेज्जा पुरिवड्ढं । इरियं

१. सच्छिद्रगवाक्षरूपजालकैरिति २. करधृतकुशाग्रेणेति । ३. चरणक्षेपेणेति ।

४. साधुमर्यादयाऽनासेवित्ता भिक्षा यदिवा न प्रतिकुष्टाऽर्चनिकेति । ५.
पर्युषितमिति । ६. प्रारम्भेतेति । ७. प्रतिलाभितमिति ।

पडिक्कमिउकामो तिन्नि वाराउ चलणगाणं हेडुमि भूमिभागं ण पमज्जेजा णिव्विइंगं । ^१कन्नोड्डियाए वा मुहणंतगेण वा विणा इरियं पडिक्कमे मिच्छुक्कडं पुरिमड्डं वा । ^२पाहुडियं आलोइत्ता सज्झायं ^३पट्टवेत्तु तिसराइं धम्मोमंगलाइं ण कड्ढेजा चउत्थं । धम्मोमंगलगेहिं च णं अपयट्टिएहिं चेइयसाहूहिं च अवंदिएहिं पारावेजा पुरिवड्डं । अपाराविएणं भत्तं वा पाणं वा भेसज्जं वा परिभुंजे चउत्थं । गुरुणो अंतियं ण पारावेजा नो उवओगं करेजा नो णं पाहुडियं आलोएजा ण सज्झायं पट्टवेजा, एतेसुं पत्तेयं उवट्ठावणं । गुरु वि य जे णं नो उवउत्ते हवेजा से णं पारंचियं । साहम्मियाणं संविभागेणं अविदिन्नेणं जं किं चि भेसजाइ परिभुंजे छट्ठं । भुंजंते इ वा परिवेसंते इ वा पारिसाडियं करेजा छट्ठं । तित्तकहुयकसायंबिल महरलवणाइं रसाइं ^४आसाइंते इ वा ^५पलिसायंते इ वा परिभुंजे चउत्थं । तेसु चेव रसेसुं रागं गच्छे खमणमड्डमं वा ।

अकएण काउस्सग्गेणं विगईए परिभुंजे पंचेव आयंबिलाणि । दोणहं विगईणं उड्डं परिभुंजे पंच निव्वइयगाणि अकारणिओ विगइपरिभोगं कुजा अड्डमं ।

असणं वा पाणं वा भेसज्जं वा गिलाणस्स अदिन्नाणुच्चरियं परिभुंजे पारंचियं । गिलाणाणं अपडिजागरिएणं भुंजे उवट्ठावणं । सब्वमवि णियकत्तव्वं परिचिच्चाणं गिलाणकत्तव्वं न करेजा अवंदे । गिलाणकत्तव्वमालंबिऊणं निययकत्तव्वं पमाएजा अवंदे, गिलाणकप्पं ण उत्तारेजा अड्डमं, गिलाणेणं ^६सद्धिं एगसद्देण पाहुडियं गंतुं जमाइसे तं न कुजा पारंचिए, नवरं जइ णं से गिलाणे सत्थचित्ते । अहा णं सन्निवायादीहिं उब्भामियमाणसे हवेजा तओ जमेव गिलाणेणमाइड्डं तं

१. उत्थिताग्रया मुखवस्त्रिकयेति । २. भिक्षामिति । ३. 'पट्टावितु' पाठान्तरमिति । ४. आस्वादयन्ति । ५. परिशाटयन्ति । ६. 'सद्धिरे' 'सद्धिए' एगसद्देणागंतुं जमाइसे' च पाठान्तरमाश्रित्य ग्लाने व्याकुलिते सति तथैकशब्देन ग्लानेनाऽऽहुते सत्यागत्य यदिवा कलहं कृत्वेति ।

न कायव्वं, तस्स जहाजोगं कायव्वं, ण करेज्जा संघबज्झो ।

आहाकम्मं वा उद्देसियं वा पूइकम्मं वा मीसजायं वा ठवणं वा पाहुडियं वा पाओयरं वा कीयं वा पामिच्चं वा परियट्ठियं वा अभिहडं वा उब्भिन्नं वा मालोहडं वा अच्छेज्जं वा अणिसट्ठं वा अज्झोयरं वा धाइदूइनिमित्तेणं आजीववणीमगतिगिच्छाकोहमाणमायालोभेणं पुव्वि-
संथवपच्छासंथवविज्जामंतचुन्नजोगे संकियमक्खियनिक्खित्त-पिहियसा-
हरियदायगुम्मीस-अपरिणयलित्तछड्डिय एयाए बायालाए दोसेहिं
अन्नयरदोसदूसियं आहारं वा पाणं वा भेसज्जं वा परिभुंजेज्जा सब्वत्थ
पत्तेगं जहाजोगं कमेणं खमणायंबिलादी उवइसेज्जा । छण्हं
कारणजायाणमसइं भुंजे अट्ठमं । सधूमं सइंगालं भुंजे उवट्ठावणं ।
संजोइय २ जीहालेहडत्ताए भुंजे आयंबिलखवणं ।

संते बलवीरियपुरीसयारपरक्कमे अट्ठमिचउद्दसीनाणपंचमीपज्जोसवण-
चाउम्मासिए चउत्थट्ठमछट्ठे ण करेज्जा खवणं ।

कप्पं णावियइ चउत्थं । कप्पं परिट्ठवेज्जा दुवालसं ।
पत्तगमत्तगकमढगं वा अन्नयरं वा भंडोवगरणजायं ^१अतिप्पिऊणं
ससिणिद्धं वा ^२असिणिद्धं वा ^३अणुल्लेहियं ठवेज्जा चउत्थं । पत्ताबंधस्स
णं गंठीओ ण छोडिज्जा ण सोहेज्जा चउत्थं पच्छित्तं । समुद्देसमंडलीओ
संघट्टेज्जा आयामं । संघट्टं वा समुद्देसमंडलिं छिविऊण दंडापुंछणगं न
देज्जा निव्विइयं । समुद्देसमंडली छिविऊणं दंडापुंछणगं च दाऊणं इरियं
न पडिक्कमेज्जा निव्विइयं । एवं इरियं पडिक्कमित्तु दिवसावसेसियं ण
संवरेज्जा आयामं, गुरुपुरओ ण संवरिज्जा पुरिमड्ढं, अविहीए संवरेज्जा
आयंविलं, संवरित्ताणं चेइयसाहूणं वंदणं ण करेज्जा पुरिमड्ढं,
कुसीलम्स वंदणगं दिज्जा अवंदे ।

एयावसरम्ही उ बहिरभूमीए^४ पाणियकज्जेणं गंतूणं “चागामेत्ताणं
समोगाढेज्जा किंचूणाहियं तइयपोरिसी, तमवि जाव णं इरियं

१. अप्रक्षालयित्वेति २. क्वचिदिदं पदं नास्ति क्वचिच्च ‘असिणिद्धं’ इति ।

३. अग्नोज्ज्वेति । ४. मत्तोत्सर्गार्थमिति । ५. जावागमे ताव णं । पाठान्तरमिति ।

पडिक्कमित्ताणं विहीए गमणागमणं च आलोइऊणं पत्तगमत्तगकमढगाइयं भंडोवगरणं निक्खिवइ ताव णं अणूणाहिया तइयपोरिसी हवेज्जा । एवं अइक्कंताए तइयपोरिसीए गोयमा ! जे णं भिक्खू उवहिं थंडिलाणि विहिणा गुरुपुरओ संदिसावित्ताणं पाणगस्स य संवरेऊणं कालवेलां जाव सज्झायं ण करेज्जा तस्स णं छट्ठं पायच्छित्तं उवइसेज्जा ।

एवं च आगयाए कालवेलाए गुरुसंतियं उवहिं थंडिल्ले वंदणपडिक्कमणसज्झायमंडलीओ वसहिं च पच्चुप्पेहिता णं समाही खइरोल्लगे य संजमिऊणं ^१अत्तणगे उवहिथंडिल्ले पच्चुप्पेहित्तु, गोयरयरियं पडिक्कमिऊणं कालो ^२गोयरचरियाघोसणं काऊणं तओ देवसियाइयारविसोहिनिमित्तं काउस्सगं करेज्जा, एएसुं पत्तेगं उट्ठावणं पुरिमड्ढेगासणगोवट्ठावणं जहासंखेणं णेयं ।

एवं काऊणं काउस्सगं मुहणंतगं पच्चुप्पेहेउं विहीए गुरुणो किइकम्मं काऊणं जं किंचि कत्थइ सुरुगमपभिईए चिट्ठंतेण वा गच्छंतेण वा चलंतेण वा भमंतेण वा ^३संचरंतेण वा पुढवीदगअगणिमारुयवणस्सइहरियतणबीयपुप्फफलकिसलयपवालकंदल-वित्तिचउपंचिंदियाणं संघट्टपरियावणकिलावणउट्ठवणं वा कयं हवेज्जा तहा तिण्हं गुत्तादीणं चउण्हं कसायाईणं पंचण्हं महव्वयादीणं छण्हं जीवनिकायादीणं सत्तण्हं पाणपिंडेसणाणं अट्ठण्हं पवयणमायादीणं नवण्हं बंभचेरादीणं दसविहस्स समणधम्मस्स नाणदंसणचरित्ताणं च जं खंडियं जं विराहियं तं निंदिऊणं गरहिऊणं आलोइऊणं पायच्छित्तं च पडिवज्जेऊणं एगग्गमाणसे सुत्तत्थोभयं धणियं भावेमाणे पडिक्कमणं ण करेज्जा उवट्ठावणं । एवं तु अदंसणं गओ सूरिओ ।

१. आत्मीयोपधिं स्थण्डिल्लभूमिं वेति २. गोचरः गुरुकुलं तस्य चर्या भिक्षाटनादिका तां प्रतिक्रान्तुं कालो वर्तत इति घोषणां कृत्वेति । ३. 'संचरंतेण वा' पाठान्तरमिति ।

चेइएहिं अवंदिएहिं पडिक्कमेज्जा चउत्थं, एत्थं च अवसरं विन्नेयं । पडिक्कमिऊणं च विहीए रयणीए पढमजामं अणूणगं सज्झायं न करेज्जा दुवालसं । पढमपोरिसीए अणइक्कंताए संधारगं संदिसावेज्जा छट्ठं । असंदिसाविण्णं संधारगेणं संधारेज्जा चउत्थं । अपच्चुप्पेहिए थंडिल्ले संधारेइ दुवालसं, अविहीए संधारेज्जा चउत्थं, उत्तरपट्टगेणं विणा संधारेइ चउत्थं, ^१दोउडं संधारेज्जा चउत्थं, ^२झुसिरं सणप्पयादी संधारेज्जा सयं आयंबिलाणं । सव्वस्स समणसंघस्स साहम्मियाणमसाहम्मियाणं च सव्वस्सेव जीवरासिस्स सव्व-भाव-भावंतरेहिं णं तिविहं तिविहेणं खामणमरिसावणं अकाऊणं चेइएहिं तु अवंदिएहिं गुरुपायमूलं च उवहिदेहस्सासणादीणं च सागारेणं पच्चक्खाणेणं अकएणं कन्नविवरेसुं च कप्पासरूवेणं ^३अट्ठइएहिं संधारगम्ही उ ठाएज्जा, एएसुं पत्तेगं उवट्ठावणं । संधारगम्ही ठाऊणमिमस्स णं धम्मसरीरस्स गुरुपारंपरिणं समुवलद्धेहिं तु इमेहि परममंतक्खरेहिं दससु वि दिसासुं अहिहरिकरिदुट्ठपंतवाण-मंतरपिसायादीणं रक्खं ण करेज्जा उवट्ठावणं । दससु वि दिसासु रक्खं काऊणं दुवालसहिं भावणाहिं अभावियाहिं सोविज्जा पणुवीसं आयंबिलाणि । एक्कं निदं ^४सोऊणं पडिबुद्धे ईरियं पडिक्कमेत्ताणं पडिक्कमणकालं जाव सज्झायं न करेज्जा दुवालसं, पसुत्ते दुसुमिणं वा कुसुमिणं वा उग्गहेज्जा सएण ऊसासाणं काउस्सगं । रयणीए छीएज्ज वा खासेज्ज वा फलहगपीढगदंडगेण वा ^५खुडुक्कगं पउरिया खमणं । दिया वा राओ वा हासखेडुक्कंदप्पणा^६हवायं करेज्जा उवट्ठावणं ।

एवं जे णं भिक्खू सुत्ताइक्कमेणं कालाइक्कमेणं ^७आवासगं कुव्वीया तस्स णं कारणिगस्स मिच्छुक्कडं गोयमा ! पायच्छित्तं उवइसेज्जा, जे य णं अकारणिगे तेसिं तु णं जहाजोगं चउत्थाइ उवएसे ।

१. द्विपुटमिति । २. शुषिरं सणं तृणविशेषस्तदात्मकादीति । 'कुसिरं णप्पयादि' पाठान्तरं तु चिन्त्यमिति । ३. अस्थगितयोरिति । ४. सुप्तवेति । ५. क्षुद्रं शब्दादिकं प्रकुर्यादिति । ६. नास्तिकवादमिति । ७. आवश्यकं कुर्वीतेति ।

जे णं भिक्खू आउकायं वा तेउकायं वा इत्थीसरीरावयवं वा संघट्टेज्जा नो णं परिभुंजेज्जा से णं तस्स पणुवीसं आयंबिलाणि उवइसेज्जा, जे उण परिभुंजेज्जा से णं दुरंतपंतलक्खणे अदट्ठव्वे महापावकम्मे पारंचिए, अहा णं महातवस्सी हवेज्जा तओ सत्तरिं मासखमणाणं सयरिं अद्धमासखमणाणं सयरिं दुवालसाणं सयरिं दसमाणं सयरिं अट्ठमाणं सयरिं छट्ठाणं सयरिं चउत्थाणं, सयरिं आयंबिलाणं सयरिं एगट्ठाणाणं सयरिं सुद्धायामेगासणाणं सयरिं निव्विगइयाणं जाव णं अणुलोमपडिलोमेणं निद्विसेज्जा । ^१एयं च पायच्छित्तं जे अ णं भिक्खू *अवीसंतो समणुट्टेज्जा से णं ^२आसण्णपुरेक्खडे नेये । ८।

से भयवं । इणमो सयरिं सयरिं अणुलोमपडिलोमेणं केवइयं कालं जाव समणुट्ठिहिइ ? गोयमा ! जाव णं ^३आयारमंगं वाएज्जा । भयवं ! उड्ढं पुच्छा, गोयमा ! उड्ढं केई समणुट्टेज्जा केई णो समणुट्टेज्जा । जे णं समणुट्टेज्जा से णं वंदे से णं पुज्जे से णं दट्ठव्वे से णं सुपसत्थ-सुमंगले सुगहीयणामधेज्जे तिण्हंपि लोगाणं वंदणिज्जेत्ति । जे णं तु णो समणुट्टे से णं पावे से णं महापावे से णं महापावपावे से णं दुरंतपंतलक्खणे जाव णं अदट्ठव्वेत्ति । ९।

जया णं गोयमा ! इणमो पच्छित्तसुत्तं वोच्छिज्जिहिइ तया णं चंदाइच्चगहरिक्खतारगाणं सत्त अहोरेत्ते तेयं णो विफुरेज्जा । १०।

इमस्स णं वोच्छेदे गोयमा ! कसिणसंजमस्स अभावो, जओ णं सव्वपावणिट्ठवगे चेय पच्छित्ते, सव्वस्स णं तवसंजमाणुट्ठाणस्स पहाणमंगे परमविसोहीपए, पवयणस्सावि णं णवणीयसारभूए पन्नते । ११।

इणमो सव्वमवि पायच्छित्ते गोयमा ! जावइयं एगत्थ संपिडियं हवेज्जा तावइयं चेव एगस्स णं गच्छाहिंवइणो मयहरपवत्तणीए य चउगुणं उवइसेज्जा, जओ णं सव्वमवि एएसिं ^४पयंसियं हवेज्जा । अहा

१. एतच्चाऽऽजन्मकारावास इव ज्ञेयमिति । २. 'आसण्णपुरेक्खडे' इत्यपि पाठान्तरमिति ।

३. यावदाचाराङ्गं पठिष्यते जिनशासने तावदिदं प्रायश्चित्तं समनुष्ठास्यत इति ४. प्रदर्शितमिति । * अविश्राम्यन्निति ।

णमिमे चेव पमायं संगच्छेज्जा तओ अन्नेसिं संते धीबलवीरिए सुद्धतरागमब्भुज्जमं ^१हावेज्जा । अहाणं किंचि सुमहंतमवि तओऽणुटट्ठाणमब्भुज्जमेज्जा ता णं न तारिसाए धम्मसद्धाए, किं तु मंदुच्छाहे समणुद्देज्जा, भग्गपरिणामस्स य निरत्थगमेव कायकेसे, जम्हा एयं तम्हा उ ^२अचिंताणंतनिरणुबधिपुन्नपब्भारेणं संजुज्जमाणेवि साहुणो न संजुज्जंति, एवं च सव्वमवि गच्छाहिवइयादीणं दोसेणेव पवत्तेज्जा, ^३एएणं पवुच्चइं गोयमा ! जहा णं गच्छाहिवइयाईणं इणमो सव्वमवि पच्छित्तं जावइयं एगत्थ संपिंडियं हवेज्जा तावइयं चेव चउग्गुणं उवइसेज्जा । १२ ।

से भयवं ! जे णं गणी अप्पमादी भवेत्ताणं सुयाणुसारेणं जहुत्तविहाणेहिं चेव सययं अहन्निसं गच्छं न सारवेज्जा तस्स किं पायच्छित्तमुवइसिज्जा ? गोयमा ! ^४अप्पउत्ती पारंचियं उवइसेज्जा ।

से भयवं जस्स उण गणिणो सव्वपमायालंबणविप्पमुक्कस्सावि णं सुयाणुसारेणं जहुत्तविहाणेहिं चेव सययं अहन्निसं गच्छं सारवेमाणस्स उ केई तहाविहे दुड्डीसीले न सम्मग्गं समायेरेज्जा तस्स वि किं पच्छित्तं मुवइसेज्जा ? गोयमा ! उवइसेज्जा । से भयवं ! केणं अट्ठेणं ? गोयमा ! जओ णं तेणं अपरिक्खियगुणदोसे निक्खमाविए हवेज्जा एएणं । से भयवं ! किं तं पायच्छित्तमुवइसेज्जा ? गोयमा ! जे णं एवंगुणकलिए गणी से णं जया एवंविहे पावसीले गच्छे तिविहं तिविहेणं वोसिरित्ताणं आयहियं नो समणुद्देज्जा तया णं संघबज्जे उवइसेज्जा । से भयवं जया णं गणिणा गच्छे तिविहेणं वोसिरिए हवेज्जा तया णं ते “गच्छे आदरेज्जा ? जइ संविग्गे भवेत्ताणं जहुत्तं पच्छित्तमणुचरेत्ताणं अन्नस्स गच्छाहिवइणो उवसंपज्जित्ताणं सम्मग्गमणुसरेज्जा तओ णं आयरेज्जा । अहा णं

१. हापयेदिति । २. मोक्षप्रापकपुण्यप्राग्भारेणेति । ३. एएणं अट्ठेणं एवं पवुच्चइं पाठान्तरमिति । ४. विदेशे यतो नागच्छेत् प्रवृत्तिस्तत्राऽज्ञातवासे यत्क्रियते तत् अप्रवृत्तिपाराश्रिकमिति । ५. तं गच्छमिति ।

सच्छंदताए तहेव चिट्ठे तओ णं चउव्विहस्सावि समणसंघस्स बज्झं तं गच्छं णो आयरेज्जा । १३ ।

से भयवं ! जया णं से सीसे जहुत्तसंजमकिरियाए वट्ठंति तहाविहे य केई कुगुरु तेसिं दिक्खं परूवेज्जा तया णं सीसा किं समणुट्ठेज्जा ? गोयमा ! घोरवीरतवसंजमे । से भयवं कहं ? , गोयमा ! अन्नगच्छे पविसेत्ताणं । से भयवं जयाणं तस्स संतिएणं ^१सिरिगारेणं चिण्हिए समाणे अन्नगच्छेसुं पवेसमेव ण लभेज्जा तया णं किं कुव्विज्जा ? गोयमा ! सब्बपयारेहिं णं तं तस्स संतियं सिरियारं फुसावेज्जा । से भयवं ! केण पयारेणं तं तस्स संतियं सिरियारं सब्बपयारेहिं णं फुसियं हवेज्जा ? गोयमा ! अक्खरेसुं । से भयवं ! किं णामे ते अक्खरे ? गोयमा ! जहा णं अपडिगाही कालकालंतरेसुंपि अहं इमस्स ^२सीसाणं वा सीसणीगाणं वा । से भयवं ! जया णं एवं विहे अक्खरे ण ^३पयादी ? गोयमा ! जया णं एवंविहे अक्खरे ण पयादी तया णं आसन्नपावयणीणं पकहित्ताणं, चउत्थादीहिं समक्कमित्ताणं अक्खरे दावेज्जा । से भयवं ! जया णं एएणं पयारेणं से णं कुगुरु अक्खरे ण पदेज्जा तया णं किं कुज्जा ? गोयमा ! जया णं एएणं पयारेणं से णं कुगुरु अक्खरे नो ^४पयच्छे तया णं संघबज्जे उवइसेज्जा । से भयवं ! केण अट्ठेणं एवं वुच्चइ ? गोयमा ! ^५सुदुप्पयहे इणमो महामोहपासे ^६गेहपासे तमेव विप्पजहित्ताणं अणेगसारीरिगमणो-समुत्थचउगइसंसार-दुक्खभय-भीए कह कहवि मोहमिच्छत्तादीणं खओवसमेणं सम्मगं समोवलभित्ताणं ^७ निव्विन्न-कामभोगे ^८निरणुबंधे पुन्नर्माहज्जे, तं च तवसंजमाणुट्ठाणेणं, तस्सेव तवसंजमकिरियाए जाव णं गुरु सयमेव विग्घं पयरे अहा णं परेहिं कारवे कीरमाणे वा समणुवेक्खे सपक्खेण वा परपक्खेण वा ताव णं तस्स महाणुभागस्स साहुणो संतियं

१. न्यायेन चिह्निते सति यदिवा 'अलिहिए' पाठान्तरमाश्रित्याऽलिखिते सतीति ।

२. 'सितस्स वा' क्वचिदधिकः पाठ इति । ३. प्रदद्यादिति । ४. 'पदेज्जा' पाठान्तरमिति । ५. सुदुःप्रहेयः सुदुस्त्याज्य इति । ६. 'गेहवासे' पाठान्तरमिति । ७. समुपलभ्येति । ८. मोक्षप्रापकं पुण्यमभ्यर्जयेदिति ।

विज्रमाणमवि धम्मवीरियं पणस्से जाव णं धम्मवीरियं पणस्से । ताव णं जे पुन्नभागे आसन्नपुरक्खडे चेव सो^१ पणस्से । जइ णं णो समणलिंगं विप्पजहे ताहे जे एवंगुणोववेए से णं तं गच्छमुज्झिय अन्नं गच्छं^२ समुप्पयाइ । तत्थवि जाव णं संपवेसं ण लभे ताव णं कयाइ उण अविहीए पाणे पयहेज्जा कयाइ उण मिच्छत्तभावं गच्छिय परपासंडियमासएज्जा^३ । कयाइ उण दाराइसंगह काऊणं अगारवासे पविसेज्जा । अहा णं से ताहे महातवस्सी भवेत्ताणं पुणो अतवस्सी होऊणं परकम्मकरे हवेज्जा । जाव णं एयाइं न हवंति ताव णं एगंतेणं वुड्ढिं गच्छे मिच्छत्ततमे— जाव णं मिच्छत्ततमंधीकए बहुजणनिवहे दुक्खेणं समणुट्ठेज्जा दुग्गइनिवारए सोक्खपरंपरकारए अहिंसालक्खणसमणधम्मे । जाव णं एयाइं भवंति ताव णं तित्थस्सेव वोच्छित्ती । जाव णं तित्थस्सेव वोच्छित्ती ताव णं सुदूरववहिए परमपए । जाव णं सुदूरववहिए परमपए ताव णं अच्चंतसुदुक्खिए चेव भव्वसत्तसंघाए पुणो चउगईए संसरेज्जा । एएणं अट्ठेणं एवं वुच्चइ गोयमा ! जहा णं जे णं एएणेव पयारेणं कुगुरू अक्खरे णो पएज्जा से णं संघबज्जे उवइसेज्जा । १४।

से भयवं ! केवइएणं कालेणं पहे कुगुरू भविहिंति ? गोयमा ! इओ य अद्धतेरसणं वाससयाणं साइरेगाणं समइक्कंताणं परओ भविसुं, से भयवं ! केणं अट्ठेणं ? गोयमा ! तक्कालं इड्ढीरससायगारवसंगए ममीकार-अहंकारग्गीए अंतो संपज्जलंतबोदी अहमहंतिकयमाणसे अमुणियसमयसब्भावे गणी भविसुं, एएणं अट्ठेणं । से भयवं ! किण्णं सव्वेऽवी एवंविहे तक्कालं गणी भवीसुं ? गोयमा ! एगंतेणं नो सव्वे, केई पुण दुरंतपंतलक्खणे अदड्ढव्वे एगाए जणणीए जमगसमगं पसूए निम्मेरे पावसीले दुज्जायजम्मे सुरोद्धपयंडाभिग्गहिय- दूरमहामिच्छदिट्ठी भविसुं । से भयवं ! कहां ते समुवलक्खेज्जा ? गोयमा ! उस्सुत्तउम्मग्गपवत्तणुद्दिसण-अणुमइपच्चाएण । १५।

१. 'सो पवरं' पाठान्तर्भवति । २. समुत्थयातीति । ३. आश्रयेदिति ।

से भयवं ! जे णं गणी किंचियावस्सगं पमाएज्जा ? गोयमा ! जे णं गणी अकारणिगे किंचि खणमेगमवि पमाए से णं अवंदे उवइसेज्जा । जे णं तु सुमहाकारणिगेवि संते गणी खणमेगमवी ण किंचि णिययावस्सगं पमाए से णं वंदे पूए दट्ठव्वे जाव णं सिद्धे बुद्धे पारगए खीणट्ठकम्ममले नीरए उवइसेज्जा, सेसं तु महया पबंधेणं सत्थाणे चेव भाणिहिइ । १६।

एवं पच्छित्तविहिं सो उणाऽणुड्ढती अदीणमणो,
जुंजइ य जहाथामं जे से आराहगे भणिए ॥२०॥
जलजलणदुट्ठसावयचोरनरिंदाऽहिजोगिणीण भए ।
तह भूयजक्ख- रक्खसखुद्धपिसायाणं मारीणं ॥२१॥
कलिकलहविग्घरोहग- कंताराडइसमुद्धमज्जे वा ।
दुच्चितिय अवसउणे संभरियव्वा इमा विज्जा ॥२२॥

*पूआएहइं जन्अम्दअन्उ ज्अम्घअन्इउम्एहइम् त्इवइक्अम्उ
न्आहइहइम् प्अव्वअन्आभउ हइअए हअरउ भउएहइम्
म्अहउसउद्अणउ म्अत्थअइ दएउ अन्अम्तउ एहइम्
अत्थअसइक्खअणअम् घएप्पइसअम् तओ एयाए पवरविज्जाए विहीए
अत्ताणगं समहिमंतिऊणं इमेए सत्तक्खरे उत्तमंगेभयखंध-
कुच्छीचलणतलेसु संणिसेज्जा,^१ तंजहा-अउम् उत्तमंगे, कूउ
वामखंधगीवाए, रउ वामकुच्छीए, कूउ-वामचलणयले, लए दाहिए
चलणयले, स्व्आ दाहिए कुच्छीए, ह्आ दाहिणखंधगीवाए । १७।

‘दुसुमिणदुन्निमित्ते गहपीडुवसग्गमारिरिड्ढभए ।

वासासणिविज्जुए, वायारिमहाजणविरोहे ॥२३॥

जं चऽत्थि भयं लोगे, तं सव्वं निद्वले इमाए विज्जाए ।

^१सत्थपहे मंगलयरे रिद्धियरे पावहरे सयल-वरऽक्खयसोक्खदाई

१. ‘सण्हट्ठे’ ‘सण्हट्ठे’ च पाठान्तरमिति । * पाएहिं जणंदणु, जंघनिउम्मेहिं
तिविक्रमु । नाहिहिं पब्बनाभु, हियए हरू भुएहिं महुसुदणु ॥ मत्थइ देउ अणंतु एहिं
अत्थसिक्खणं घेपिस्सं ॥ २ ‘सन्न्यसेदिति’

काउमिमे पच्छित्ते, जइ णं तु ण तब्भवे सिज्झे ॥२४॥

ता लहिऊण ^१विमाणगयं सुकुलुप्पतिं दुयं च पुण बोहिं ।

सोक्खपरंपरणं सिज्झे कम्मट्ठबंधरयमलविमुक्के ॥२५॥

गोयमेत्ति बेमि ।

से भयवं ! किं एयाणुमेत्तमेव पच्छित्तविहाणं जेणेवमाइस्से ? गोयमा ! एयं सामन्नेणं दुवालसण्ह कालमासाणं पइदिण-महन्निसाणुसमयं पाणोवरमं जाव ^२सबालवुड्ढसेहमयहरायरियमाईणं, तहा य ^३अपडिवाइमहोऽवहिमणपञ्जवनाणी छउमत्थतित्थयराणं एगंतेणं अब्भुट्ठाणारिहावस्सगसंबंधियं चेव सामन्नेणं पच्छित्तं समाइट्ठं नो णं एयाणुमेत्तमेव पच्छित्तं । से भयवं ! किं अपडिवायमहोऽवही-मणपञ्जवनाणी छउमत्थवीयरगे सयलावस्सगे समणुट्ठीया ? गोयमा ! समणुट्ठीया, न केवलं समणुट्ठीया जमगसमगमेवाणवरयमणुट्ठीया । से भयवं ! कहं ? गोयमा ! अचिंतबलवीरियबुद्धिनाणाइसयसत्तीसामत्थे णं से भयवं ? केणं अट्ठेणं ते समणुट्ठीया ?, गोयमा ! मा णं उस्सुत्तुम्मग्गपवत्तणं मे भवउत्तिकाऊणं । १८।

से भयवं ! किं तं सविसेसं पायच्छित्तं जाव णं वयासी ? गोयमा ! वासारत्तियं पंथगामियं वसहिपारिभोगियं गच्छायारमइक्कमणं संघायारमइक्कमणं गुत्तीभेयपयरणं सत्तमंडली-धम्माइक्कमणं अगीयत्थगच्छ-पयाणजायं कुसीलसंभोगजं अविहीए पव्वज्जादाणोवट्ठावणाजायं ^३अओग्गस्स सुत्तत्थोभयपण्णवणजायं अणाययणेक्खणविरत्तणाजायं देवसियं राइयं पक्खियं मासियं चउमासियं संवच्छरियं एहियं पारलोइयं मूलगुणविराहणं उत्तरगुणविराहणं आभोगाणाभोगयं आउट्ठिपमायदप्प-कप्पियं वयसमणधम्म-संजमतवनियम-कसायदंडगुत्तीयं मयभय-गारवइंदियजं ^४वसणायंकरोद्दट्ठज्झाणरागदोसमोहमिच्छत्तदुड्ढकूरज्झ-

१. 'विमाणगइ' पाठान्तरमिति । २. महावधिज्ञानमिति । ३. अयोग्यस्येति ।

४. 'वसणाइक' पाठान्तरमिति ।

वसायसमुत्थं मम- त्तमुच्छापरिग्गहारंभजं असमिदत्त-^१पट्टीमंसा-
 सित्तधम्मंतराय- संतावुव्वेवगासमाहाणुप्पायगं संखाईया आसायणा
 अन्नयरासायणयं पाणवहसमुत्थं मुसावायसमुत्थं अदत्तादाणगहणसमुत्थं
 मेहुण- सेवणासमुत्थं परिग्गहकरणसमुत्थं राइभोयणसमुत्थं माणसियं
 वाइयं काइयं असंजमकरणकारवण-अणुमइसमत्थं जाव णं
 णाणदंसणचारित्तायारसमुत्थं, किं बहुणा ? जावइयाइं
 तिगालचिइवंदणादओ पायच्छित्तट्ठाणाइं पन्नत्ताइं तावइयं च पुणो
 विसेसेण गोयमा ! असंखेयहा पन्नविज्जंति । एवं संधारेज्जा जहा णं
 गोयमा ! पायच्छित्तसुत्तस्स णं संखेज्जाओ निज्जुत्तीओ, संखेज्जाओ
 संगहणीओ, संखिज्जाइं अणुओगदाराइं, संखेज्जे अक्खरे, अणंते पज्जवे
 जाव णं दंसिज्जंति उवदंसिज्जंति आघविज्जंति पन्नविज्जंति परूविज्जंति
 कालाभिग्गहत्ताए दव्वाभिग्गहत्ताए खेत्ताभिग्गहत्ताए भावाभिग्गहत्ताए
 जाव णं आणुपुव्वीए अणाणुपुव्वीए जहाजोगं गुणठाणेसुं ति बेमि । १९।

से भयवं ! एरिसे पच्छित्तबाहुले, से भयवं ! एरिसे पच्छित्तसंघट्टे, से
 भयवं ! एरिसे पच्छित्तसंगहणे अत्थि केई जे णं आलोइत्ताणं
 निंदित्ताणं गरहित्ताणं जाव णं अहारिहं तवोकम्मं
 पायच्छित्तमणुचरित्ताणं सामन्नमाराहेज्जा पवयणमाराहिज्जा आणं
 आराहिज्जा जाव णं आयहियट्ठयाए उवसंपज्जित्ताणं सकज्जुत्तमट्ठं
 आराहेज्जा ? गोयमा ! णं चउव्विहं आलोयणं ^२विंदा, तं जहा
 नामालोयणं ठवणालोयणं दव्वाल्लोयणं भावाल्लोयणं । एते चउरोऽवि
 पए अणेगहा वि उप्पाइज्जंति । तत्थ ताव समासेणं णामालोयणं
 नाममेत्तेणं, ठवणालोयणं पोत्थयाइसुमालिहियं, दव्वाल्लोयणं नाम जं
 आलोएत्ताणं असट्ठभावत्ताए जहोवइट्ठं पायच्छित्तं नाणुचिट्ठे । एते
 तओऽवि पए एगंतेणं गोयमा ! अपसत्थे । जे णं से चउत्थे पए
 भावाल्लोयणं नाम ते णं तु गोयमा ! आलोएत्ताणं निंदित्ताणं गरहित्ताणं

पायच्छित्तमणुचरित्ताणं जाव णं आयहियद्वाए उवसंपञ्जित्ताणं
सकज्जुत्तममड्डं आराहेज्जा । से भयवं ! कयरे णं से चउत्थे पए ?
गोयमा ! भावालोयणं । से भयवं ! किं तं भावालोयणं ? गोयमा !
जे णं भिक्खू एरिसे संवेगवेरग्गए सीलतवदाणभावचउखंधसुसमण
धम्माराहणेक्कंतरसिए मयभयगारवादीहिं अच्चंतविष्णमुक्के सव्वभाव-
भावंतरेहिं नीसल्ले आलोइत्ताणं विसोहिपयं पडिगाहित्ताणं तहत्ति
समणुट्ठीया सव्वुत्तमं संजमकिरियं समणुपालिज्जा ॥२०॥

तं जहा - कयाइं पावाइं ईमाइं, जेहिं अट्ठीण बज्झए ।

तेसिं तित्थयरवयणेहिं, सुद्धी अम्हाण कीरउं ॥२६॥

परिचिच्चाणं तयं कम्मं, घोरसंसारदुक्खदं ।

मणोवयकायकिरियाहिं, सीलभारं धरेमिऽहं ॥२७॥

जह जाणइ सव्वन्नू, केवली तित्थंकरे ।

आयरिए चारित्तइढे, उवज्झायसुसाहुणो ॥२८॥

जह पंच लोयपाले य, 'सत्ता धम्मे य जाणए ।

तहाऽऽलोएमिऽहं सव्वं, तिलमित्तंपि न निण्हवं ॥२९॥

तत्थेव जं पायच्छित्तं, गिरिवरगुरुयंति आवए ।

तमणुच्चरेमि दे सुद्धिं, जह पावे झत्ति विलिजए ॥३०॥

मरिऊणं नरयतिरिएसुं, कुंभीपाएसु कथई ।

कथइ करवत्तजंतेहिं, कथइ भिन्नो उ सूलिए ॥३१॥

घंसणं घोलणं कहिंमि, कथइ छेयण-भेयणं ।

बंधणं लंघणं कहिंमि, कथइ दमणमंकणं ॥३२॥

णत्थणं वाहणं कहिंमि, कत्थइ वहणतालणं ।
 गुरुभारक्कमणं कहिंचि, कत्थइ जमलारविंधणं ॥३३॥
 उरपट्टिअट्टिकडिभंगं, परवसो तण्हं छुहं ।
 संतावुव्वेगदारिदं, विसहीहामि पुणोविहं ॥३४॥
 ता इहइं चेव सव्वंपि, नियदुच्चरियं जहट्ठियं ।
 आलोइत्ता निंदित्ता गरहिता, पायच्छित्तं चरित्तुणं ॥३५॥
 निद्वहामि पावयं कम्मं, झत्ति संसारदुक्खयं ।
 अब्भुट्ठित्ता तवं घोरं, धीरवीरपरक्कमं ॥३६॥
 अच्चंतकडयडं कट्ठं, दुक्करं दुरणुच्चरं
 उग्गुग्गयरं जिणाभिहियं, सयलकल्लाणकारणं ॥३७॥
 पायच्छित्तनिमित्तेणं, पाणसंधारकारयं ।
 आयेरेणं तवं चरिमो, ^१जेणुब्भे सोक्खई तणुं ॥३८॥
 कसाए विहलीकट्ठु, इंदिए पंच निग्गहं ।
 मणोवईकायदंडाणं, निग्गहं धणियमारभं ॥३९॥
 आसवदारे निरुंभेत्ता, चत्तमयमच्छर-अमरिसो ।
 गयरागदोसमोहोऽहं नीसंगो निप्परिग्गहो ॥४०॥
 निम्ममो निरहंकारो, सरीरअच्चंतनिप्पिहो ।
 महव्वयाइं पालेमि, निरइयाराइं निच्छिओ ॥४१॥
 हट्ठी हा अहन्नोऽहं,, पावो पावमती अहं
 पाविट्ठो पावकम्मोऽहं पावाहमाहमयरोऽहं ॥४२॥

कुसीलो भट्टचारिती, भिल्लसूणोवमो अहं ।
 चिलातो निक्खिवो पावी, कूरकम्मीह निग्घिणो ॥४३॥
 इणमो दुल्लभं लभिउं, सामन्नं नाणदंसणं । चारित्तं वा विराहेत्ता,
 अणालोइयनिंदियागरहिय अकयपच्छित्तो, वावज्जंतो जई अहं ॥४४॥
 ता निच्छयं अणुत्तारे, घोरे संसारसागरे ।
 निबुड्डो भवकोडीहिं, समुत्तरंतो ण वा पुणो ॥४५॥
 ता जा जरा ण पीडेइ, वाही जाव न केई मे ।
 जाविंदिया न हायंति, ताव धम्म चरेत्तुऽहं ॥४६॥
 निद्वहमइरेण पावाइं, निदिउं गरहिउं चिरं ।
 पायच्छित्तं चरित्ताणं, निक्कलंको भवामिऽहं ॥४७॥
 निक्कलुसनिक्कलंकाणं, सुद्धभावाण गोयमा !
 तन्नो नट्ठं ^१जयं गहियं, सुदूरामवि ^२परिवलित्तुणं ॥४८॥
 एवमालोयणं दाउं, पायच्छित्तं चरित्तुण ।
 कलिकलुसकम्ममलमुक्के, जइ णो सिज्झिज्ज तक्खणं ॥४९॥
 ता वए देवलोगंमि, निच्चुज्जोए सयंपहे ।
 देवदुंदुहिनिग्घोसे, अच्छरासयसंकुले ॥५०॥
 तओ चुया इहागंतुं, सुकुलुप्पंतिं लभेत्तुणं ।
 निव्विन्नकामभोगा य, तवं काउं मया पुणो ॥५१॥
 अणुत्तरविमाणेसुं, निवसिऊणेहमागया ।
 हवंति धम्मतिथयरा, सयलतेलोक्कबंधवा ॥५२॥

एस गोयम ! विन्नेये, सुपसत्थे चउत्थे पए ।
 भावालोयणं नाम, अक्खयसिवसौक्खदायगे ॥५३॥ त्ति बेमि ।
 से भयवं ! एरिसं पप्प, विसोहिं उत्तमं वरं ।
 जे पमाया पुणो असई, कत्थइ चुक्के खलिज्ज वा ॥५४॥
 तस्स किं भवे सोहिपयं सुविसुद्धं चेव लिक्खिए ।
 उयाहु णो समुल्लिक्खे ? संसयमेव वियागरे ॥५५॥ गोयमा !
 निंदितं गरहितं सुइरं, पायच्छित्तं चरित्तुणं ।
 १निक्खारियवत्थमिवाए खंपणं जो न रक्खए ॥५६॥
 सो सुरहिगंधगब्भिणगंधोदयविमलनिम्मलपवित्ते ।
 मज्झिअ खीरसमुद्दे, असुईगड्ढाए जइ पडइ ॥५७॥
 २ता पुण तस्स सामग्गी सव्वकम्मखयंकरा ।
 ३अह होज्ज देवजोग्गा, असुईगंधं खु दुद्धरिसं ॥५८॥
 एवं कयपच्छित्ते, जे णं छज्जीवकायवयनियमं ।
 दंसणनाणचरित्तं, सीलंगे वा तवंगे वा ॥५९॥
 कोहेण व माणेण व, मायालोभ-कसाय-दोसेणं ।
 रागेणं पओसेण व, अन्नाण मोहमिच्छत्तहासेणं वावि ॥६०॥
 भएणं कंदप्पदप्पेणं एएहि य अन्नेहि य गारवमालंबणेहिं जो खंडे ।
 सो सव्वट्ठविमाणप्पत्ते अत्ताणगं निरए खिवे ॥६१॥
 से भयवं । किं आया संरक्खेयव्वो उयाहु छज्जीवनिकायमाइसंजमं
 संरक्खेयव्वं ? गोयमा ! जे णं छक्कायसंजमं संरक्खे से णं

१. प्रक्षालितवस्त्रमिव य आत्माऽपराधकलङ्कादाऽऽत्मानं यदि न रक्षयेदिति । २. 'ता पुण तस्स कहं तं खीरोवहीमज्जणस्स सामग्गी' पाठान्तरमिति । ३. अथ स्यादेवयोग्याऽपि मज्जनसामग्गी तथाप्यशुचिगन्धः खलु दुर्धर्षस्तथाविधगर्तापतितत्वादिति ।

अणंत-दुक्खपयायगाओ दोग्गइगमणाओ अत्ता संरक्खे, तम्हा छक्कायाइसंजममेव रक्खेयव्वं होइ ।२१।

से भयवं ! केवतिए असंजमट्टाणे पन्नत्ते, गोयमा ! अणेगे असंजमट्टाणे पन्नत्ते - जाव णं कायासंजमट्टाणे । से भयवं ! कयरे णं से कायासंजमट्टाणे ? गोयमा ! कायासंजमट्टाणे अणेगहा पन्नत्ते, तंजहा -

‘पुढविदगागणिवाऊवणप्फई तह तसाण विविहाणं ।

हत्थेणवि फरिसणयं वज्जेज्जा जावजीवंपि ॥६२॥

सीउण्हखारखित्ते अग्गीलोणूस अंबिले णेहे ।

पुढवादीए परोप्पर खयंकरे ^१बज्झसत्थेए ॥६३॥

ण्हाणुम्मट्ठणखोभणहत्थंगुलि-अक्खिसोयकरणेणं ।

^२आवीयंते अणंते आऊजीवे खयं जंति ॥६४॥

संधुक्कणजलणुज्जालणेण उज्जोयकरणमादीहिं ।

वीयणफूमणउब्भावणेहिं सिहिजीवसंघायं ॥६५॥

जाइ खयं अन्नेऽविय छज्जीवनिकायगइगए जीवे ।

जलणो सुट्ठइओवि हु संभक्खइ दसदिसाणं च ॥६६॥

वीयणग-तालियंटय- चामरउक्खेव-हत्थत्तालेहिं ।

धावणडेवण-लंघणऊसासोईहिं वाऊणं ॥६७॥

अंकूर-कुहर-किसलय-पवाल-पुप्फ-फलकंदलाईणं ।

हत्थफरिसेण बहवे जंति खयं वणप्फईजीवे ॥६८॥

गमणागमणनिसीयण-सुयणुट्ठण- अणुवउत्तयपमतो ।

वियलेंदियं बित्तिचउपचेंदियाण गोयम ! खयं नियमा ॥६९॥

पाणाइवायविरई सिवफलया गिण्हिऊण ता धीमं ।

मरणावयंमि पत्ते मरेज्ज विरइं न खंडेज्जा ॥७०॥

अलियवयणस्स विरइं सावज्जं सच्चमवि न भासिज्जा ।
 परदव्वहरणविरइं करेज्ज दिन्ने वि मा लोभं ॥७१॥
 धरणं दुद्धरबंभव्वयस्स काउं परिग्गहचायं ।
 राईभोयणविरइं पचिंदियनिग्गहं विहिणा ॥७२॥
 अन्ने य कोहमाणा रागदोसे य आलोयणं दाउं ।
 ममकार अहंकारे ^१पयहियव्वे पयत्तेणं ॥७३॥
 जह तवसंजमसज्झायझाणमाईसु सुद्धभावेहिं ।
 उज्जमियव्वं गोयम ! विज्जुलयाचंचले जीवे ॥७४॥
 किंबहुणा ? गोयमा ! एत्थं, दाऊणं आलोयणं ।
 पुढविकायं विराहेज्जा, कत्थ गंतुं स सुज्झिही ? ॥७५॥
 किं बहुणा गोयमा ! एत्थं, दाऊणं आलोयणं ।
 बाहिरपाणं तहिं जम्मे, जो पिए कत्थ सुज्झिही ? ॥७६॥
 किं बहुणा ? गोयमा ! एत्थं दाऊण आलोयणं
 उण्हवइ^२ जालाइ जाओ, फुसिओ वा कत्थं सुज्झिही ? ॥७७॥
 किं बहुणा गोयमा ! एत्थं दाऊणं आलोयणं ।
 वाउकायं उदीरेज्जा, कत्थ गंतूण स सुज्झिही ? ॥७८॥
 किं बहुणा गोयमा ! एत्थं, दाऊणं आलोयणं !
 जो हरियतणं पुष्फं वा, फरिसे कत्थ स सुज्झिही ॥७९॥
 किं बहुणा गोयमा ! एत्थं दाऊणं आलोयणं ।
 अक्कमई बीयकायं जो, कत्थ गंतुं स सुज्झिही ? ॥८०॥
 किं बहुणा गोयमा ! एत्थं, दाऊणं आलोयणं ।
 वियलेंदी बितिचउपंचिंदिय परियावे, जो कत्थ स सुज्झिही ? ॥८१॥
 किं बहुणा गोयमा ! एत्थं, दाऊणं आलोयणं ।
 छक्काए जो न रक्खेज्जा, सुहुमे कत्थ स सुज्झिही ? ॥८२॥

१. प्रहातव्यः त्याज्यं इति । २. उष्णीकरोति ज्वालयति या ज्वालास्ताः स्पृष्टो वेति ।

किं बहुणा गोयमा ! एत्थं दाऊणं आलोयणं !
तसथावरे जो न रक्खे, कथं गंतुं स सुज्झिही ? ॥८३॥
आलोइयनिंदियगरहिओवि कयपायच्छित्तणीसल्लो ।
उत्तमठाणंमि ठिओ पुढवारंभं परिहरिज्जा ॥८४॥
आलोइय०* उत्तमठाणंमि ठिओ, जोईए मा फुसावेजा ॥८५॥ आलोइय०*
संविग्गो । उत्तमठाणंमि ठिओ, मा वियाविज्ज^१ अत्ताणं ॥८६॥ आलोइय०*
संविग्गो । छिन्नपि तणं हरियं, असई मणगं मा फरिसे ॥८७॥ आलोइय०*
संविग्गो । उत्तमठाणंमि ठिओ, जावज्जीवंपि एतेसिं ॥८८॥
बेंदियतेदियचउरोपंचिंदियाण जीवाणं ।
संघट्टणपरियावण- किलावणोद्वण मा कासी ॥८९॥ आलोइय०*
संविग्गो । उत्तमठाणंमिठिओ, सावज्जं मा भणिज्जासु ॥९०॥ आलोइय०*
संविग्गो । ^१ लोयत्थेणवि भूई गहिया गिहिउक्खिविउऽदिन्ना ॥९१॥
आलोइय०*
नीसल्लो । जे ^२ इत्थी संलावेज्जा, गोयमा । कथं स सुज्झिही ? ॥९२॥ आलोइय०*
संविग्गो । चोदसधम्मवगरणे, उड्ढं मा परिगहं कुज्जा ॥९३॥
तेसिंपि निम्ममत्तो अमुच्छिओ अगड्ढिओ दढं हविया ।
अह कुज्जा उ ममत्तं ता सुद्धी गोयमा । नत्थि ॥९४॥
किं बहुणा ? गोयमा ! एत्थं, दाऊणं आलोयणं ।
रयणीए आविए पाणं, कथं गंतुं स सुज्झिही ॥९५॥
आलोइयनिंदियगरहिओवि कय पायच्छित्तनीसल्लो ।
^४ छाइक्कमे ण रक्खे जो, कथं सुद्धिं लभेज्ज सो ? ॥९६॥

१. चामरादिनाऽऽत्मानं मा व्यजयेदिति । २. लोचार्थमपि भूतिः- भस्म गृहीता
गृहिणाऽदत्तेति । ३. 'इत्थि' पाठान्तरमिति । ४. प्राणातिपातादिविरतीनां
षण्णामतिक्रमं न रक्षयेदिति । * पूर्वश्लोकवत् पूर्वार्द्धं ज्ञेयम् ।

अपसत्थे य जे भावे, परिणामे य दारुणे ।

पाणाइवायस्स वेरमणे, एस पढमे अइक्कमे ॥९७॥

तिव्वरागा य जा भासा, निट्टुरखरफरुसककसा ।

मुसावायस्स वेरमणे, एस बीए अइक्कमे ॥९८॥

उग्गहं अजाइत्ता, अचियत्तंमि अवग्गहे ।

अदत्तादाणस्स वेरमणे, एस तइए अइक्कमे ॥९९॥

सद्दा रूवा रसा गंधा, फासाणं पवियारणे ।

मेहुणस्स वेरमणे, एस चउत्थे अइक्कमे ॥१००॥

इच्छा मुच्छा य गेही य, कंखा लोभे य दारुणे ।

परिग्गहस्स वेरमणे, पंचमगेसाइक्कमे ॥१०१॥

अइमत्ताहारहोइत्ता, सूरक्खित्तंमि संकिरे ।

राईभोयणस्स वेरमणे, एस छट्ठे अइक्कमे ॥१०२॥

आलोइयनिंदियगरहिओवि कयपायच्छित्तणीसल्लो ।

जयणं अयाणमाणो, भवसंसारे भमे जहा सुसढो ॥१०३॥

भयवं ! को उण सो सुसढो ? कयरा वा सा जयणा ?
जमजाणमाणस्स णं तस्स आलोइयनिंदियगरहिओ वि
कयपायच्छित्तस्सावि संसारं णो विणिद्धियंति ? गोयमा ! जयणा णाम
अट्टारसण्हं सीलंगसहस्साणं, संत्तरसविहस्स णं संजमस्स, चोदसण्हं
भूयगामाणं, तेरसण्हं किरियाठाणाणं, सबज्झब्भंतरस्स णं दुवालसविहस्स
णं तवोऽणुट्ठाणस्स, दुवालसण्हं भिक्खुपडिमाणं, दसविहस्स णं
समणधम्मस्स, णवण्हं चेव बंभगुत्तीणं, अट्ठण्हं तु पवयणमाईणं,
सत्तण्हं चेव पाणपिंडेसणाणं, छण्हं तु जीवनिकायाणं, पंचण्हं तु
महव्वयाणं, तिण्हं तु चेव गुत्तीणं जाव णं तिण्हमेव सम्मदंसणनानाणचरित्ताणं

भिक्षू कंतारदुम्भिकखायंकाईसु णं सुमहासमुप्पन्नेसु अंतोमुहुत्तावसेस-
कंठगयपाणेसुंषि णं मणसावि उ खंडणं विराहणं ण करेज्जा ण कारवेज्जा
ण समणुजाणेज्जा जाव णं नारभेज्जा न समारंभेज्जा जावज्जीवाएत्ति, से णं
जयणाए भत्ते से णं जयणाए धुवे^१ से णं जयणाए दक्खे से णं जयणाए
वियाणाएत्ति गोयमा ! सुसढस्स उण महती संकहा परमविम्वहयजणणी य
॥२२॥ चूलिया पढमा एगंतनिज्जरा चू. १ अ. ७ ॥



अध्ययन ८ सुसढ अणगारकहा

से भयवं ! केणं अट्ठेणं एवं वुच्चइ ? तेणं कोलेणं तेणं समाणं
सुसढ नामधेज्जो ^२अणगारेह भूयवं, तेणं च एगेगस्स णं पक्खस्संतो
पभूयट्ठाणियाओ विदिन्नाओ सुमहंताइं च अच्चंतघोरसुदुक्कराइं
पायच्छित्ताइं समणुचिन्नाइं तहावि तेणं ^३वराएणं विसोहीपयं न
समुवलद्धंति, एतेणं अट्ठेणं एवं वुच्चइ,

से भयवं ! केरिसा उ णं तस्स सुसढस्स वत्तव्वया ? गोयमा !
अत्थि इह चेव भारहेवासे अवंती णाम जणवओ, तत्थ य संबुक्के नामं
खेडगे, तम्मि य जम्मदरिद्धे निम्मेरे निक्खिवे किविणे णिराणुकंपे अइक्कूरे
निक्कलुणे नित्तिसे रोद्धे चंडरोद्धपयंडदंडे पावे अभिग्गहियमिच्छादिट्ठी
अणुच्चरियनामधेज्जे सुज्जसिवे नाम धिज्जाइ अहेसि । तस्स य धूया
सुज्जसिरी । सा य परितुलियसयलतिहुयणनरनारीगणा लावन्नकंति-
दित्तिरुव-सोहग्गाइसएणं अणोवमा ^४अत्तगा । तीए अन्नभवंतरंमि
इणमो हियएण दुच्चितियं अहेसि, जह णं - सोहणं हवेज्जा जइ णं
इमस्स बालगस्स माया वावज्जे तओ मज्झ असवक्कं भवे, एसो य
बालगो दुज्जीविओ भवइ ताहे मज्झ सुयस्स रायलच्छी परिणमेज्जत्ति,
तक्कम्मद्रोसेणं तु जायमेत्ताए चेव पंचत्तमुवगया जणणी, तओ गोयमा !

१. निश्चलो यतनायामिति २. अनगार इह भूतवानिति । ३. 'वराएण' 'विराएणं' च
पाठान्तरमिति । ४. आत्मजेति ।

तेणं सुज्जसिवेणं महया किलेसेणं छंदमाराहमाणेणं बहूणं
अहिणवपसूयजुवतीणं घराघरिं थन्नं पाऊणं जीवाविया सा बालिया ।

अहन्नया जाव णं बालभावमुत्तिन्ना सा सुज्जसिरी ताव णं आगयं
१अमायापुत्तं महारोरवं दुवालससंवच्छरियं दुब्भिक्खंति । जाव णं
२फेट्ठोफेट्ठीए जाउमारद्धे सयलेवि णं जणसमूहे । अहऽन्नया
बहुदिवसखुहतेणं विसायमुवगएणं तेण चिंतियं जहा किमेयं
वावाइऊणं समुद्दिसामि किं वा णं इमीए पोग्गलं विक्किणिऊणं चेव
अन्नं किंचिवि वणिमगाउ पडिगाहित्ताणं पाणवित्तिं करेमि, णो णमन्ने
केई जीवसंधारणोवाए संपयं मे हविज्जत्ति, अहवा हद्धी हा हा ण
जुत्तमिणंति, किंतु जीवमाणिं चेव विक्किणामित्ति चिंतिऊणं
विक्रियासुज्जसिरी महारिद्धीजुयस्स चोद्दसविज्जाठाणपारगस्स णं
माहणगोविंदस्स गेहे । तओ बहुजणेहिं धिद्धीसद्दोवहओ तं देसं
परिचिच्चा णं गओ अन्नदेसंतरं सुज्जसिवो । तत्थावि णं पयट्ठो सो गोयमा !
इत्थेव विन्नाणे जाव णं अन्नेसिं कन्नगाओ अवहरित्ताणं अवहरित्ताणं
अन्नत्थ विक्किणिऊण मेलियं सुज्जसिवेण बहुं दविणजायं ।

एयावसरंमि उ समइक्कंते साइरेगे अट्ठसंवच्छरे दुब्भिक्खस्स जाव
णं वियलियमसेसविहवं तस्सावि णं गोविंदमाहणस्स, तं च
वियाणिऊण विसायमुवगएणं चिंतियं गोयमा ! तेणं गोविंदमाहणेणं,
जहा णं होही ३संधार-कालं मज्झ कुडुंबस्स, नाहं विसीयमाणे बंधवे
खणद्धमवि दट्ठूणं सक्कुणोमि, ता किं कायव्वं संपयं अम्हेहिंति
चिंतयमाणस्सेव आगया गोउलाहिवइणो भज्जा ४खईयगविक्किणत्थं
तस्स गेहे जाव णं गोविंदस्स भज्जाए तंदुल्लमल्लगेणं पडिगाहियाओ
चउरो घणविगईमीसखइयगकगोलियाओ, ५ तं च पडिगाहियमेत्तमेव

१. यस्मिन्माता पुत्रं न जानाति भर्तव्यमितीति । २. बलादाच्छेदनं भाषायां
छिन्नाङ्गपटीति । ३. संहारकालः प्रलय इति । ४. खाद्यकविक्रयार्थमिति ।

५ लघुमोदकाकारा इति ।

परिभुत्तं डिंभेहिं, भणियं च ^{१अ}महयरीए जहा णं भट्टिदारिगे !
 पयच्छाहि णं तं अम्हाणं तंदुल्लमल्लं चिरं वट्टे जेणऽम्हे गोउलं वयामो ।
 तओ समानत्ता गोयमा ! तीए माहणीए सा सुज्जसिरी जहा णं हला !
 तं जमम्ह* णरवइणा णिसावयं ^१पहियं पेहियं^२ तत्थ जं तं तंदुल्लमल्लं
 तं आणेहि लहुं जेणाहमिमीए पयच्छामि, जाव दुंढिऊणं नीहरिया
 मंदिरं सा सुज्जसिरी, नोवलद्धं तं तंदुल्लमल्लं, साहियं च माहणीए,
 पुणोवि भणियं माहणीए जहा हला ! अमुगं अमुगं थाममणुद्धुया
 अन्नेसिऊणमाणेह, पुणोवि पयट्ठा ^३अलिंदगे जाव णं ण पिच्छे ताहे
 समुट्ठिया सयमेव सा माहणी जाव णं तीएवि ण दिट्ठं पुण,
 सुविम्हियमाणसा णिउणन्नेसिउं पयत्ता, जाव णं पिच्छे गणिगासहायं
 पढमसुयं पयरिक्के ओयणं समुट्ठिसमाणं, तेणावि पडिदट्ठं जणणीं
 आगच्छमाणीं चितियं अहन्नेणं जहा चलिया अम्हाणं ओअणं
 अवहरिउकामा पायमेसा, ता जइ इहासन्नमागच्छिही तओऽहमेयं
 वावाइस्सामित्ति चिंतयंतेणं भणिया दूरासन्ना चेव महयासद्देणं सा
 माहणी जहा णं भट्टिदारिगा ! जह तुमं इहयं समागच्छिहिसि तओ मा
 एवं तं बोल्लिया जहा णं णो परिकहियं, निच्छयं अहयं ते
 वावाएस्सामि । एवं च अणिट्ठवयणं सोच्चाणं वज्जासणिहया इव धसत्ति
 मुच्छिऊणं निवडिया धरणिवट्टे गोयमा ! माहणित्ति । तओ णं तीए
 महीयरीए परिवालिकुणं किंचि कालक्खणं वुत्ता सा सुज्जसिरी जहा णं
 हला ! हला ! कन्नगे ! अम्हा णं चिरं वट्टे ता भणसु सिग्घं
 नियजणणिं जहा णं एह लहुं पयच्छसुं तमम्हाणं तंदुल्लमल्लं अहा णं
 तंदुल्लमल्लं विप्पणट्ठं तओ णं मुग्गमल्लगमेव पयच्छसु । ताहे पविट्ठा सा
 सुज्जसिरी अलिंदगे जाव णं दट्ठुणं तमवत्थंतरगयं^४ माहणीं महया

१अ. मथितदध्ना चरतीति मथितचरी पृषोदरत्वात् प्राकृतत्वाच्च महयरी
 गोपालिका गोरसविक्रयिकेति । १. प्रहितं प्रेषितमिति २. प्रहितं-इष्टमुपहाररूपं
 निशात्रतविषयकमिति । ३. धान्यभाजनविशेष इति । ४. 'निच्छेदं मुच्छिरं तं'
 क्वचिदधिकः पाठ इति । * 'जमम्हाण' पाठान्तरमिति ।

हाहारवेणं ^१धाहाविउं पयत्ता सा सुज्जसिरी । तं चायन्निऊणं सह परिवग्गेणं धाइओ सो माहणो महीयरी अ । तओ पवणजलेण आसासिऊणं पुट्ठा सा तेहिं जहा भट्टिदारिगे ! किमेयं किमेयंति ?

तीए भणियं - जहा णं ^२मा मा अत्ताणगं दरमएणं दीहेणं खावेह मा, मा विगयजलाए सरीए वुज्झेह, मा मा अरज्जुएहिं पासेहिं नियंतिए मज्झ णं ^३माहेणाऽऽणप्पेह, जहा णं किल एस पुत्ते, एस धूया, एस णं णत्तुगे, एसा णं सुण्हा एस णं जामाउगे, एसा णं माया, एसा णं जणगे, एसो भत्ता, एस णं इट्ठे मिट्ठे पिए कंते सुहीयसयणमित्त-बंधुपरिवग्गे । इह इं पच्चक्खमेवेयं विदिट्ठं अलियमलिया चेवेसा बंधवा सा, सकज्जत्थी चेव ^४संभयए लोओ, परमत्थओ न केइ सुही, जाव णं सकज्जं ताव णं माया, ताव णं जणगे, ताव णं धूया ताव णं जामाउगे ताव णं णत्तुगे ताव णं पुत्ते ताव णं सुण्हा ताव णं कंता ताव णं इट्ठे मिट्ठे पिए कंते सुहीसयणजणमित्तबंधुपरिवग्गे, सकज्जसिद्धीविरहेणं तु ण कस्सई काइ माया, न कस्सई केइ जणगे, ण कस्सई काइ धूया, ण कस्सई केइ जामाउगे, ण कस्सई केइ पुत्ते, ण कस्सई काइ सुण्हा, न कस्सई केइ भत्ता, ण कस्सई केइ कंता, ण कस्सई केइ इट्ठे मिट्ठे पिए कंते सुहीसयणमित्तबंधुपरिवग्गे, जेणं तु पेच्छ पेच्छ मए अणेगोवाइयसओवलद्धे साइरेगणवमासे कुच्छीएवि धारिऊणं च अणेगणिद्धमहुरउसिणतिक्वसुलिय ^५सणिद्धआहार-पयाण-सिणाणुव्वट्ठण-^६धूयकरण-संवाहण-धन्नपयाणाईहिं णं एमहंतमणुस्सीकए जहा किल अहं पुत्तरज्जंमि पुत्तपुत्तमणोरहा सुहंसुहेणं पणइयणपूरियासा कालं

१. पूकर्तुमिति । २. मा माऽऽत्मानमर्थ-मृतेन दीर्घेण सर्पेण खादयेरिति । इयमन्याश्चाडसंभवास्तथापि तात्त्विकोऽय इति । ३. आहेणे-वरगृहे नववधूप्रवेशे यथा सा विज्ञाप्यते तथा मा आणप्पेह विज्ञापय यथा किलेष पुत्र इत्यादीति ४. संभजत इति । ५. शब्दवद् भक्षितं सदिति । 'सुलुसुनिय' पाठान्तरमिति । ६. धूपनमिति ।

गमीहामि, ता, एरिसं वड्यरंतिएयं च णारुण मा धवाईसुं करेह
खणद्धमवि अणुं पि पडिबंधं, जहा णं इमे मज्झ सुए संवुत्ते तहा णं
गेहे गेहे जे केइ भूए जे केइ वट्टंति जे केइ भविंसु - तहा णं एरिसे,
सेऽवि बंधुवग्गे केवलं तु सकज्जलुद्धे चेव घडियामुहुत्तपरिमाणमेव
कंचिं कालं भएज्जा वा, ता भो भो जणा ! ण किंचि कज्जं एतेणं
कारिमबंधुसंताणेणं अणंतसंसारघोरदुक्खपदायगेणंति ।

एगे चेवाहन्निसाणुसमयं सययं सुविसुद्धासए भयह धम्मे । धम्मे
घणं मिट्ठे पिए कंते परमत्थसुही-सयणजणमित्तबंधुपरिवग्गे । धम्मे य
णं हिट्ठिकरे^१ धम्मे य णं पुट्ठिकरे धम्मे य णं बलकरे धम्मे य णं
उच्छाहकरे धम्मे य णं निम्मलजसकित्तीपसाहगे धम्मे य णं
माहप्पजणगे धम्मे य णं सुट्ठसोक्खपरंपरदायगे । से णं सेव्वे से णं
आराहणिज्जे, से य णं पोसणिज्जे, से य णं पालणिज्जे, से य णं
करणिज्जे, से य णं चरणिज्जे, से य णं अणुट्ठिज्जे, से य णं
उवइस्सणिज्जे, से य णं कहणिज्जे, से य णं भणणिज्जे, से य
पन्नवणिज्जे, से य णं कारवणिज्जे । से य णं धुवे सासये अक्खए अव्वए
सयलसोक्खनिही धम्मे । से य णं अलज्जणिज्जे से य णं
अउलबलवीरिएसरियसत्तपरक्कमसंजुए पवरे वरे इट्ठे पिए कंते दइए
सयलऽसोक्खदारिद्वसंतावुव्वेग-अयसऽब्भक्खाणजम्मजरामरणाइअसे-
सभयनिन्नासगे अणण्णसरिसे सहाए तेलोक्केक्कसामिसाले । ता अलं
सुहीसयणजणमित्तबंधुगण-धणधन्नसुवण्ण-हिरण्णरयणोहनिही-कोससंच-
याइ-सक्कचाव-विज्जुलयाडो-वचंचलाए सुमिणिंदजालसरिसाए खणदिट्ठ-
नट्ठभंगुराए अधुवाए असासयाए संसारवुड्ढिकारिगाए
णिरयावयारहेउभूयाए सोग्गइमग्गविग्घदायगाए अणंत-दुक्खपयायगाए
रिद्धीए । सुदुल्लहा हु भो धम्मस्स साहणी सम्मदंसणनानाचरित्तराहणी
नीरुत्ताइसामग्गी । अणवरयमहन्निसाणुसमएहिं णं खंडखडेहिं तु

परिसडइ आउं । दढघोरनिडुरासब्भचंडाजरासणिसण्णिवायसंचुण्णिणए
सयजज्जरभंडगे इव अकिंचिकरे भवइ उ दियहाणु-दियहेणं इमे तणू ।
किसलयदलग्गपरिसंठियजलबिंदुमिवाकंडे निमिसद्धब्भंतरेणेव लहुं ढलइ
जीविए । अविढत्तपरलोगपत्थयणाणं तु निप्फले चेव मणुयजम्मे ।

ता भो ण खमे तणुतणुयतरेवि ईसिंपि पमाए, जओ णं एत्थं
खलु सव्वकालमेव समसत्तुमित्तभावेहिं भवेयव्वं, अप्पमत्तेहिं च
पंचमहव्वए धारेयव्वे, तं जहा-कसिणपाणाइवायविरती,
अणलिय-भासित्तं, दंतसोहणमित्तस्सवि अदिन्नस्स वज्जणं,
मणोवयकायजोगेहिं तु अखंडियअविराहियणवगुत्तीपरिवेढियस्स णं
परमपवित्तस्स सव्वकालमेव दुद्धरबंभचेरस्स धारणं,
वत्थपत्तसंजमोवगरणेसुं पि णिम्ममत्तया, असणपाणाईणं तु चउव्विहेणेव
राईभोयणच्चाओ, उग्गमउपायणेसणाईसु णं सुविसुद्धपिंडग्गहणं,
संजोयणाइपंचदोस-विरहिणं परिमिणं काले भिन्ने,^१
पंचसमित्तिविसोहणं, तिगुत्तीगुत्तया, ईरियासमिईमाईओ, भावणाओ,
अणसणाइतवोवहाणाणुट्ठाणं मासाइभिक्षुपडिमाओ, विचित्ते दव्वाई
अभिग्गहे, अहो णं भूमीसयणे, केसलोए, निप्पडिकम्मसरीरया,
सव्वकालमेव गुरुनिओगकरणं, खुहापिवासाइ परीसहाहियासणं,
दिव्वाइउवसग्गविजओ, लद्धावलद्धवि- त्तिया, किं बहुणा ?
अच्चंतदुव्वहे भो वहियव्वे अविसामंतेहिं चेव सिरिमहापुरिस-वूढे
अट्टारससीलंगसहस्सभारे, तरियव्वे अ भो बाहाहिं महासमदे,
अविसाईहिं च णं भो भक्खियव्वे णिरासाए वालुयाकवले, परिसक्केयव्वं
च भो णिसियसुत्तिकखदारुणकरवालधाराए, पायव्वा य णं भो
सुहुयहुयवहजालावली, भरियव्वे णं भो सुहुमपवणकोत्थलगे, गमियव्वं
च णं भो गंगापवाहपडिसोएणं, तोलेयव्वं भो साहसतुलाए मंदरगिरिं,
जेयव्वे य णं एगागिएहिं चेव धीरत्ताए सुदुज्जए चाउरंगे बले,

१. पूर्वापराऽहोभ्यां भिन्ने मध्याह्ने इत्यर्थः संभाव्यते ।

विंधेयव्वा णं भो परोप्परविवरीय-भमंत-अट्ठचक्कोवरि वांमच्छिम्मि उ
धीउल्लिया, गहेयव्वा णं भो सयलतिहुयणविजया णिम्मला जसकित्ती-
जयपडागा । ता भो भो जणा एयाओ धम्माणुद्वाणाओ सुदुक्करं णत्थि
किंचि मन्नंति ।

वुज्झंति नाम भारा ते द्विय वुज्झंति वीसमंतेहिं ।

सीलभरो अइगुरुओ जावज्जीवं अविस्सामो ॥१॥

ता उज्झिऊण पेम्मं घरसारं पुत्तदविणमाईयं ।

णीसंगा अविसाई पयरह सव्वुत्तमं धम्मं ॥२॥

णो धम्मस्स भडक्का^१ उक्कंचण वंचणा य ववहारो ।

^२णिच्छम्मो तो धम्मो मायादीसल्लरहिओ उ ॥३॥

भूएसु जंगमत्तं तेसुवि पंचेदियत्तमुक्कोसं ।

तेसुवि अ माणुसत्तं मणुयत्ते आरिओ देसो ॥४॥

देसे कुलं पहाणं कुले पहाणे य जाइमुक्कोसा ।

तीए रुवसमिद्धी रुवे य बलं पहाणयरं ॥५॥

होइ बले चिय जीयं जीए य पहाणयं तु विन्नाणं ।

विन्नाणे सम्मत्तं सम्मत्ते सीलसंपत्ती ॥६॥

सीले खाइयभावो खाइयभावे य केवलं नाणं ।

केवलिए पडिपुन्ने पत्ते अयरामरो मोक्खो ॥७॥

ण य संसारंमि सुहं जाइजरामरणदुक्खगहियस्स ।

जीवस्स अत्थि जम्हा तम्हा मोक्खो उवाएओ ॥८॥

आहिंडिऊण सुइरं अणंतहुत्तो हु जोणिलक्खेसुं ।

तस्साहणसामग्गी पत्ता भो भो बहू इण्हिं ॥९॥

ता एत्थ जन्न पत्तं तदत्थं भो उज्जमं कुणह तुरियं ।

विबुहजणणिंदियमिणं उज्झह संसार-अणुबंधं ॥१०॥

लहिउं भो धम्मसुइं अणेगभवकोडिलक्खेसुवि दुलहं ।

जइ णाणुट्ठह सम्मं ता पुणरवि दुल्लहं होही ॥११॥

लद्धेल्लियं च वोहिं णाणुट्ठे अणागयं पथे ।

सो भो अन्नं वोहिं लहिही कयरेण मोल्लेणं ? ॥१२॥

जाव णं पुव्वजाईसरणपच्चएणं सा माहणी एत्तियं वागरेइ ताव णं
 गोयमा ! पडिवुद्धमसेसंपि बंधुजणे बहुणागरजणो य । एयावसरंमिउ
 गोयमा ! भणियं सुविदियसोग्गइपहेणं तेणं गोविंद-माहणेणं जहा णं
 धिद्धिद्धि वंचिया एयावन्तं कालं, जतो वयं मूढे अहो णु कट्टमन्नाणं
 दुविन्नेयमभागधिज्जेहिं खुदसत्तेहिं अदिट्ठघोरुग्गपरलोगपच्चवाएहिं
 अतत्ताभिणिविट्ठदिट्ठीहिं पक्खवायमोहसंधुक्कियमाणसेहिं रागदोसोवह-
 यबुद्धीहिं परं तत्तधम्मं । अहो सजीवेणेव परिमुसिए एवइयं कालसमयं ।
 अहो किमेस णं परमप्पा भारियाछलेणासि उ मज्झ गेहे, उदाहु णं जो
 १सो णिच्छिओ मीमंसएहिं सव्वन्नू सोच्चि एस सूरिए इव
 संसयतिमिरावहारित्तेणं लोगावभासे मोक्खमग्गसंदरिसणत्थं सयमेव
 पायडीहूए । अहो महाइसयत्थपसाहगाओ मज्झं दइयाए ३वायाओ !
 भो भो जण्णयत्तविण्हयत्तजण्णदेवविस्सामित्तसुमिच्चादओ मज्झं अंगया !
 अब्भुट्ठाणारिहा ससुरासुरस्सावि णं जगस्स एसा तुम्ह जणणित्ति । भो
 भो पुरंदरपभितीओ ३खंडियाओ ! वियारह णं ५सोवज्झायभारियाओ
 जगत्तयाणंदाओ कसिण-किव्विस-णिट्ठहण-सीलाओ वायाओ ।
 पसन्नोऽज्ज तुम्ह गुरु आराहणेक्कसीलाणं परमप्पबलं
 जजण-जायणज्झयणाइणा छक्कम्माभिसंगेणं । तुरियं विणिज्जिणेह

१. यो नेच्छितो मीमांसकैः सर्वज्ञः स एव एष इति । २. वाच इति । ३. छात्रा इति ।

४. स्वोपाध्यायभार्याया इति ।

पंचेदियाणि, परिच्छयह णं कोहाइए पावे, वियाणेह णं अमेज्झाइजंबालपंकपडिपुण्णासुतीकलेवरे । पविस्सामो वणंतं ।

इच्चेवं अणेगेहिं वेरग्गजणणेहिं सुहासिएहिं वागरंतं चोदसविज्जाट्टाणपारगट भो गोयमा ! गोविंदमाहणं सोऊणं अच्चंतं जम्मजरारणभीरुणो बहवे सप्पुरिसे सव्वुत्तमं धम्मं विमरिसिउं समारद्धे । तत्थ केइ वयन्ति जहा एस धम्मो पवरो, अन्ने भणांति जहा एस धम्मो पवरो, जाव णं सव्वेहिं पमाणीकया गोयमा ! सा जातीसरा माहिणित्ति । ताहे तीए संपवक्खायमहिंसोवलक्खियमसंदिद्धं खंताइदसविहं समणधम्मं दिद्धंतहेऊहिं च परमपच्चयं विणीयं तेसिं तु । तओ य ते तं माहणिं सव्वन्नूमिति काऊणं सुरइयकरकमलंजलिणो सम्मं पणमिऊणं गोयमा ! तीए माहणीए सद्धिं अदीणमणसे बहवे नरनारीगणे चेच्चाणं सुहियजणमित्तबंधु-परिवग्ग-गिह-विहवसोक्खमप्प-कालियं निक्खंते सासय-सोक्खसुहाहिलासिणो सुनिच्छियमाणसे समणत्तेण सयल- गुणोहधारिणो चोदसपुव्वधरस्स चरिमसरीरस्स णं गुणधरथविरस्स णं सयासेत्ति । एवं च ते गोयमा ! अच्चंतघोरवीरतवसंजमाणुट्टाण- सज्झायझाणाईसु णं असेसकम्मक्खयं काऊणं तीए माहणीए समं विहुयरयमले सिद्धे गोविंदमाहणादओ णरणारिगणे सव्वेऽवी महायसेत्तिवेमि । ११।

से भयवं ! किं पुण काऊणं एरिसा सुलहबोही जाया सा सुगहिय-नामधिज्जा माहणी जीए एयावइयाणं भव्वसत्ताणं अणंतसंसारघोरदुक्खसंतत्ताणं सद्धम्मदेसणाइएहिं तु सासयसुह-पयाणपुव्वगमब्भुद्धरणं कयंति ? गोयमा ! जं पुव्वं सव्वभावभावंतरंतरेहिं णं णीसल्ले आजम्मालोयणं दाऊणं सुद्धभावाए जहोवइद्धं पायच्छित्तं कयं पायच्छित्तसमत्तीए य समाहिए य कालं काऊणं सोहम्मे कप्पे सुरिंदग्गमहिंसी जाया तमणुभावेणं । से भयवं ! किं से णं माहणीजीवे तब्भवंतरंमि समणी निग्गंथी अहेसि ? जे णं

णीसल्लमालोइत्ताणं जहोवइडुं पायच्छित्तं कयंति । गोयमा ! जे णं से माहणीजीवे से णं तज्जम्मे बहुलद्धिसिद्धिजुए महिड्ढीपत्ते सयलगुणाहारभूए उत्तमसीलाहिड्डियतणू महातवस्सी जुगप्पहाणे समणे अणगारे गच्छाहिवई अहेसि, णो णं समणी ।

से भयवं ! ता कयरेणं कम्मविवागेणं तेणं गच्छाहिवइणा होऊणं पुणो इत्थित्तं समज्जियन्ति ? गोयमा ! मायापच्चएणं ।

से भयवं ! कयरे णं से मायापच्चए जेणं पयणूकयसंसारेवि सयलपावाययणा विबुहजणणिंदिए सुरहिबहुदव्व-घयखंडचुण्णसुसंकरियसमभाव-पमाणपागनिप्फन्नमोयगमल्लगे इव सव्वस्स भक्खे, सयलदुक्ख-केसाणमालए, सयलसुहसाहणस्स परमपवित्तुत्तमस्स णं अहिंसालक्खणधम्मस्स विग्घे, सग्गग्गला-निरयदारभूये, सयलअयसअकित्ती-कलंककलिकलहवेराइपावनिहाणे, निम्मलकुलस्स णं दुद्धरिसअकज्जकज्जलकण्हमसीखंपणे तेणं गच्छाहिवइणा इत्थीभावे णिव्वत्तिएत्ति ? गोयमा ! णो तेणं गच्छाहिवइत्ते ठिएणं अणुमवि माया कया । से णं तया पुहइवई चक्कहरे भवित्ताणं परलोगभीरुए णिविन्न-कामभोगे तणमिव परिचेच्चाणं तं तारिसं चोदसरयण-नव-नीहीतो चोसट्ठी सहस्से वरजुवईणं, बत्तीसं साहस्सीओ^१ अणादिवरनरिंद, छन्नउई गामकोडीओ जाव णं छक्खंड-भरहवासस्स णं देविंदोवमं^२ महारायलच्छिन्तीयं बहुपुन्नचोइए णीसंगे पव्वइए अथोवकालेणं सयलगुणोहधारी महातवस्सी सुयहरे जाए, जोग्गे णाऊणं सुगुरुहिं गच्छाहिवई समणुण्णाए । तहिं च गोयमा ! तेणं सुदिट्ठसुग्गइपहेण जहोवइडुं समणधम्मं समणुट्ठेमाणेणं उग्गाभिग्गहविहारत्ताए घोरपरीसहोवसग्गाहियासणेणं रागदोस-कसायविवज्जणेणं आगमाणुसारेणं तु विहीए गणपरिवालणेणं आजम्मं

१. 'अणावइविवर-इत्यादि पाठान्तरमस्ति तथापि पदार्थसांगत्यार्थ 'आणाइत्तवरनरिंद' इति पाठः संभाव्यते तथा चाज्ञाधारिण इति । २. इयं महाराज लक्ष्मीति ।

समणीकप्पपरिभोगवज्जणेणं छक्कायसमारंभविवज्जणेणं ईसिंपि दिव्वोराणियमेहुणपरिणामविप्पमुक्केणं इहपरलोगासंसाइणियाण-मायाइसल्लविप्पमुक्केणं णीसल्लालोयणनिंदणगरहणे णं जहोवइड्ड-पायच्छित्तकरणेणं सव्वत्थापडिबद्धत्तेणं सव्वपमाया-लंबणविप्पमुक्केणं य णिदइड्डअवसेसीकए अणेग-भवसंचिए कम्मरासी । अण्णभवे तेणं माया कया तप्पच्चइएणं गोयमा ! एस विवागो ।

से भयवं ! कयरा उण अन्नभवे तेणं महाणुभागेणं माया कया जीए णं एरिसो दारुणो विवागो ? गोयमा ! तस्स णं महाणुभागस्स गच्छाहिवइणो जीवे अणूणाहिए लक्खइमे भवग्गहणे सामन्नरिदस्स णं इत्थीत्ताए धूया अहेसि । अन्नया परिणीयाणंतंरं मओ भत्ता, तओ नरवइणा भणिया-जहा भदे ! एते तुज्झ पंचसए ^१सगामाणं, देसु जहिच्छाए अंधाणं विगलाणं अयंगमाणं अणाहाणं बहुवाहिवेयणापरिगयसरीराणं सव्वलोयपरिभूयाणं दारिदुक्खदोहग्ग-कलंकियाणं जम्मदारिद्दाणं समणाणं माहणाणं ^२विहलियाणं च संबंधिबंधवाणं जं जस्स इड्डं भत्तं वा पाणं वा अच्छायणं वा जाव णं धणधन्नसुवन्नहिरणं वा, कुणसु य सयलसोक्खदायगं संपुण्णं जीवदयंति, जेणं भवंतरेसुं पि ण होसि ^३सयलजणसुहप्पियागारिया सव्वपरिभूया गंधमल्लतंबोलसमालहणाइ जहिच्छिय-भोगोवभोगवज्जिया हयासा दुज्जम्मजाया ^४णिदइड्डणामिया रंडा । ताहे गोयमा ! सा तहत्ति पडिवज्जिऊण पगलंतलोयणंसुजलणिद्धोयकवोलदेसा ^५ऊसरसुभ-सुमण्णु-घग्घरसरा भणिउमाढत्ता-जहा णं ण याणिमोऽहं पभूयमालवित्ताणं णिगच्छावेह लहुं कट्ठे रएह महइं चियं णिदहेमि अत्ताणगं, ण किंचि मए जीवमाणीए पावाए, माऽहं कहिंचि कम्मपरिणइवसेणं महापावित्थी चवलसहावत्ताए एतस्स तुज्झं

१. सुगामाणं पा० । २. विहलितानामिति । ३. सकलजनसुखप्रियाऽकारिकेति ।

४. असुगृहीतनामिकेति । ५. उत्तरदतीवशुभमन्युधर्धरस्वरेति ।

असरिसणामस्स णिम्मलजसकितीभरियभुवणोयरस्स णं कुलस्स खंपणं काहं जेण मलिणी भवेज्जा सव्वमवि कुलं अम्हाणंति ।

तओ गोयमा ! चिंतियं तेण णरवइणा जहा णं अहो धन्नोऽहं जस्स अपुत्तस्सावि य एरिसा धूया । अहो विवेगं बालियाए अहो बुद्धी अहो पन्ना अहो वेरगं अहो कुलकलंकभीरुयत्तणं अहो खणे खणे वंदणीया एसा जीए एमहत्ते गुणे । ता जाव णं मज्झं गेहे परिवसे एसा ताव णं महामहंते मम सेए, अहो दिट्ठाए संभरियाए संलावियाए चेव सुज्झीयए इमाए, ता अपुत्तस्स णं मज्झं एसा चेव पुत्ततुल्लत्ति चिंतिकुणं भणिया गोयमा ! सा तेण नरवइणा-जहा णं न एसो कुलक्कमो अम्हाणं वच्छे ! जं कट्ठारोहणं कीरइत्ति, ता तुमं सीलचारित्तं परिवालेमाणी दाणं देसु जहिच्छाए कुणसु य पोसहोववासाइं विसेसेणं तु जीवदयं, एयं रज्जं तुज्झंति । ता णं गोयमा ! जणगेणं एवं भणिया ठिया सा सम्मप्पिया य कंचुईणं अंतेउरक्खपालाणं, एवं च वच्चंतेणं कालसमाएणं तओ णं कालगए से नरिंदे । अन्नया संजुञ्जिकुणं महामईहिं णं मंतीहिं कओ तीए बालाए रायाभिसेओ । एवं च गोयमा ! दियहे दियहे देइ ^१अत्थाणं । अहऽन्नया तत्थं णं बहुवंद-चट्ठभट्ट-तडिग-कप्पडिगचउरवियक्खण - मंतिमहंतगाइपुरिससयसंकुलअत्थाणमंडव-मज्झंमि सीहासणो-वविट्ठाए कम्मपरिणइवसेणं सरागाहिलासाए चक्खूए ^२निट्ठाए तीए सव्वुत्तमरुवजोव्वणलावण्णसिरीसंपओववेए भावियजीवाइपयत्थे एगे कुमारवरे ।

मुणियं च तेणं गोयमा ! कुमारेणं जहा णं हा हा ममं पेच्छिय गया एसा वराई घोरंधयारमणंत-दुक्खदायगं पायालं, ता अहन्नोऽहं जस्स णं एरिसे पोग्गलसमुदाए तणू ^३रागजंते, किं मए जीविणं ? दे सिग्घं केरेमि अहं इमस्स णं पावसरीरस्स ^४संधारं, अब्भुट्ठेमि णं सुदुक्करं

१. आस्थानं सभायामुपविशतीति । २. दृष्ट इति । ३. रागोत्पादकयन्त्रमिति । ४. विनाशमिति ।

पच्छित्तं, जाव णं काऊण सयलसंगपरिद्यायं समणुट्टेमि णं
 सयलपावनिहलणे अणगारधम्म, सिढिलीकरेमि णं अणेगभवंतरविइन्ने
 सुदुव्विमोक्खे पावबंधण-संघाए । धिद्धिद्धी अव्वत्थियस्स णं
 जीवलोगस्स जस्स णं एरिसे अणप्पवसे इंदियगामे । अहो
 अदिट्ठपरलोगपच्चवायया, लोगस्स अहो एक्कजम्माभिणिविट्ठचित्तया, अहो
 अविण्णायकज्जाकज्जाया, अहो निम्मेरया, अहो 'निरप्परिहासया अहो
 परिचत्तलज्जाया । हा हा हा न जुत्तमम्हाणं खणमवि विलंबिउं एत्थं
 एरिसे सुदुन्निवारे असज्झपावागमे^२ देसे । हा हा हा ^३धट्ठारिए !
 अहन्नेणं कम्मट्ठरासी जं सुईरियं एईए रायकुलबालियाए इमेणं
 कुट्टपावसरीररुवपरिदंसणेणं णयणेसुं रागाहिलासे । परिचिद्याणं इमे
 विसए तओ गेण्हामि पव्वज्जंति चिंतिऊणं भणियं गोयमा ! तेणं
 कुमारवरेणं, जहा णं ^४खंतमरिसियं णीसल्लं तिविहं तिविहेणं
 तिगरणसुद्धीए सव्वस्स अत्थाण-मंडवरायउलपुरजणस्सेति भणिऊणं
 विणिग्गओ रायउलाओ, पत्तो य निययावासं । तत्थ णं गहियं
 पत्थयणं, दोखंडीकाऊणं च ^५सियफेणावलीतरंगमउयं सुकुमालवत्थं ।
 परिहिण्णं अद्धफलगे गहिण्णं दाहिण-हत्थेणं सुयणजणहियए इव
^६'सरलवित्तलयखंडे, तओ काऊणं तिहुयणेक्कगुरुणं अरहंताणं भगवंताणं
 जगप्पवराणं धम्मतित्थं-काराणं ^७जहुत्तविहिणाऽभिसंथवणवंदणं, से णं
 चलचवलगई पत्ते णं गोयमा ! दूरं देसंतरं से कुमारे जाव णं
 हिरण्णुकुरडी णामरायहाणी ।

तीए रायहाणीए धम्मायरियाण गुणविसिट्ठाणं पउत्तिं अन्नेसमाणे
 चिंतिउं पयत्ते से कुमारे-जहा णं जाव णं ण केइ गुणविसिट्ठे
 धम्मायरिए मए समुवलद्धे ताविहइं चेव महिं^९ विचिट्ठियव्वं ता गयाणिं
 कइवयाणि दियहाणि, भयामि णं एस बहुदेसविक्खायकित्ती णरवरिदे,

१. छत्रा रिरंसेति । २. असाध्यपापागमो यत्र स तथा तस्मिन्निति । ३. निर्लज्जार्या प्रति
 सम्बोधनमिति । ४. मिच्छामिदुक्कडमित्यर्थः । ५. सरलवेत्रलताखण्ड इति ।

६. 'भिसंथवभावबंधणं' पाठान्तरमिति । ७. मए विचिट्ठियव्वं । पाठान्तरमिति ।

* 'सियं' पाठान्तरमिति

एवं च मंतिऊणं जाव णं दिट्ठो राया, कयं च कायव्वं सम्माणो य णरणाहेणं, पडिच्छिया सेवा ।

अन्नया लब्धावसरेणं पुट्ठो सो कुमारो गोयमा ! तेणं नरवइणा-जहा णं भो भो महासत्ता ! कस्स नामालंकिए णं एस तुज्झं हत्थंमि विरायए मुद्दारयणे ? को वा ते सेविओ एवइयं कालं ?, के वा अवमाणए कए तुह सामिणत्ति ? कुमारेणं भणियं-जहा णं जस्स नामालंकिए णं इमे मुद्दारयणे से णं मए सेविए एवइयं कालं, जे णं मे सेविए एवइयं कालं तस्स नामालंकिए णं इमे मुद्दारयणे । तओ नरवइणा भणियं-जहा णं किं तस्स सद्वकरणंति ? कुमारेणं भणियं-नाहं अजिमिएणं तस्स चक्खुकुसीलाहमस्स णं सद्वकरणं समुच्चारेमि । तओ रण्णा भणियं-जहा णं भो भो महासत्ता । केरिसो पुण सो चक्खुकुसीलो भण्णे ? किं वा णं अजिमिएहिं तस्स सद्वकरणं नो समुच्चारियए ? कुमारेण भणियं-जहा णं चक्खुकुसीलो तिसड्डिए थाणंतरेहिंतो जइ 'कहाइ इह तं दिट्ठपच्चयं होही तो पुण वीसत्थो साहीहामि । जं पुण तस्स अजिमिएहिं सद्वकरणं एतेणं ण समुच्चारीए, जहा णं जइ 'कहाइ अजिमिएहिं चेव तस्स चक्खुकुसीलाहम्मस्स णामग्गहणं कीरए ता णं णत्थि तंमि दियहे संपत्ती पाणभोयणस्सत्ति ।

ताहे गोयमा ! परमविम्हिणं रत्ता कोउहल्लेण लहुं हक्काराविया रसवई, उवविट्ठो भोयण-मंडवे राया सह कुमारेणं असेसपरियणेणं च, आणावियं अट्टारसखंड-खज्जयवियप्पं णाणाविहमाहारं । एयावसरंमि भणियं नरवइणा-जहा णं भो भो महासत्त ! भणसु णीसंको तुमं संपयं तस्स णं चक्खुकुसीलस्स णं सद्वकरणं । कुमारेणं भणियं-जहा णं नरनाह ! भणिहामि भुत्तुत्तरकालेणं । णरवइणा भणियं जहा णं भो महासत्त ! दाहिणकरधरिएणं कवलेणं संपयं चेव भणसु जे णं खु जइ ।

एयाए कोडीए संठियाणं केई विग्घे हवेज्जा ता णमम्हवि सुदिट्ठपच्चए
 संतेपुरपुरस्सरे तुज्झाणत्तीए अत्तहियं समणुचिट्ठामो । तओ णं गोयमा !
 भणियं तेण कुमारेणं जहा णं एयं अमुगं सदकरणं तस्स
 चक्खुकुसीलाहम्मस्स णं दुरंतपंतलक्खणअदट्ठव्वदुज्जायजम्मस्सत्ति । ता
 गोयमा ! जाव णं चेवइयं समुल्लवे से णं कुमारवरे ताव णं
 १अणोहियपवित्तिएणेव समयद्धसियं तक्खणा परचक्केणं तं रायहाणी,
 समुद्धाइए णं सन्नद्धबद्धुद्धए णिसियकरवालकुंत-
 विप्फुरंतचक्काइपंहरणाडोववग्गपाणी हणहणहणरावभीसणा
 बहुसमरसंघट्टादिण्णपिट्ठी २जीयंतकरे अउलबलपरक्कमे णं महाबले
 परबले जोहे । एयावसरम्मिय कुमारस्स चलणेसु निवडिऊण दिट्ठपच्चए
 मरणभयाउलत्ताए अगणिय कुलक्कमपुरिसयारं विप्पणासे
 दिसिमेक्कमासाइत्ताणं सपरिगरे पणट्ठे से णं नरवरिंदे । एत्थंतरंमि
 चित्तियं गोयमा ! तेणं कुमारेणं जहा णं न ३मेरिसं कुलक्कमेऽम्हाणं जं
 पट्ठिं दाविज्जइ, णो णं तु पहरियव्वं मए कस्सावि णं
 अहिंसालक्खणधम्मं वियाणमाणेणं कयपाणाइवायपच्चक्खाणेणं च, ता
 किं करेमि णं ? सागारे भत्तपाणाईणं पच्चक्खाणे अहवा णं करेमि ?
 जओ दिट्ठे णं ताव मए दिट्ठीमित्तकुसीलस्स णामग्गहणेणावि एमहंते
 संविहाणगे ।

ता संपयं सीलस्सावि णं एत्थं परिक्खं करेमिति चित्तिऊणं
 भणिउमाढत्ते णं गोयमा ! से कुमारे-जहा णं जइ अहयं
 वायामित्तेणावि कुसीलो ता णं मा णीहरेज्जा हु अक्खयतणू खेमेणं
 एयाए रायहाणीए । अहा णं मणोवइकायतिएणं सव्वपयारेहिं णं
 सीलकलिओ ता मा वहेज्जा ममोवरिं इमे सुनिसिए दारुणे जीयंतकरे
 पहरणे णिहए । णमो णमो अरहंताणं ति भणिऊणं जाव णं

१. अनवहितप्रवृत्तिकेनेति । २. जीवान्तकरमिति । ३. मः अलाक्षणिकस्तथा च नेदशः
 कुलक्रम इति ।

पवरतोरणदुवारेणं चलचवलगई जाउमारद्धो, जाव णं परिक्रमे थेवं
 भूमिभागं ताव णं ^१हल्लावियं, कप्पडिगवेसेणं गच्छइ एस
 नरवइत्तिकाऊणं सरहसं हण हण मर मरत्ति
 भणमाणुक्खित्तकरवालादिपरहणेहिं परबलजोहेहिं, जाव णं समुद्धाइए
 अच्चंतं भीसणे जीयंतकरे परबलजोहे ताव णं अविसण्ण-
 अणुदुयाऽभीय-^२अतत्थ-अदीणमाणसेणं गोयमा ! भणियं कुमारेणं
 जहा णं भो भो दुडुपुरिसा ! ममोवरिं चेह एरिसेणं घोर-तामसभावेण
^३अन्निए, असइंपि सुहज्झवसायसंचियपुण्णपट्भारे एस अहं से तुम्ह
 पडिसत्तू अमुगो णरवती, मा पुणो भणिज्जासु जहा णं ^४णिलुक्को
 अम्हाणं भएणं, ता पहेरज्जासु जइ अत्थि वीरियंति, जावेत्तियं भणे
 ताव णं तक्खणं चेव थंभिए ते सव्वे गोयमा ! परबलजोहे
^५“सीलाहिट्ठियाए ^६तियसाणांपि अलंघणिज्जाए तस्स भारतीए, जाए य
 निच्चलदेहे, तओ य णं धसत्ति मुच्छिऊणं णिच्चिदे णिवडिए धरणिवडे
 से कुमारे ।

एयावसरम्ही उ गोयमा ! तेण णरिंदाहमेणं गुढहिययमायाविणा
 वुत्ते धीरे सव्वत्थावी समत्थे, सव्वलोय^७भमंते धीरे भीरु वियक्खणे
 मुखे सूरे कायरे चउरे चाणक्के बहुपवंचभरिए संधिविग्गहिए निउत्ते
 छइल्ले पुरिसे जहा णं भो ! भो ! तुरियं रायहाणीए
 वज्झिंदनीलससिसूरकंतादीए पवरमणिरयणरासीए हेमज्जुण-तवणीय-
 जंबूणय-सुवन्नभारलक्खाणं, किं बहुणा ? विसुद्धबहुजच्च-मोत्तीय-
 विहुमखारिलक्खपडिपुन्नस्स णं कोसस्स चाउरंगस्स य बलस्स,
 विसेसओ णं तस्स सुगहियनामगहणस्स पुरिससीहस्स सीलसुद्धस्स
 कुमारवरस्सेति पउत्तिमाणेह जेणाहं णिव्वुओ भवेज्जा । ताहे नरवइणो

१. उद्धुष्टं तथा ‘हेल्लावियं’ इति पाठान्तरमाश्रित्याऽऽह्वयितमिति । ३. अत्रस्त इति ।

४. अन्विता तामसभावेनेति । ५. निलीन इति । ६. शीलाधिष्ठितयेति ।

७. त्रिदशानामपीति । ७. ‘समंत’ पाठान्तरमिति ।

पणामं काऊणं गोयमा ! गए ते निउत्तपुरिसे जाव णं तुरियं
^१चलचवलजडणकमपवणवेगेहिं णं आरुहिऊणं जच्चतुरंगमेहिं
 निउंजगिरिकंदरुद्देसपइरिक्काओ खणेण पत्ते रायहाणिं, दिट्ठो य तेहिं
 वामदाहिणभुजापल्लवेहिं ^२वयणसिरोरुहे विलुंमपाणो कुमारो, तस्स य
 पुरओ सुवन्नाभरणणेवत्था दसदिसासु उज्जोयमाणी
 जयजयसद्धमंगलमुहला रयहरणवावडोभयकरकमल-विरइयंजली देवया,
 तं च दट्ठुण विम्हियभूयमणे लिप्पकम्मणिम्मविण्णं । एयावसरम्मि उ गोयमा !
 सहरिसरोमंचकंचुपुलइयसरीराए णमो अरहंताणंति समुच्चारिऊण भणिरे
 गयणट्ठियाए पवयणदेवयाए से कुमारे-तं जहा-

जो दलइ मुट्ठिपेहरेहिं मंदरं धरइ करयले वसुहं ।

सव्वोदहीण वि जलं ^३आयरिसइ एकघोद्वेणं ॥१३॥

टाले सग्गाउ हरिं कुणइ सिवं तिहुयणस्सवि खणेणं ।

अक्खंडियसीलाणं कुद्धोऽवि ण सो पहुण्पेज्जा ॥१४॥

अहवा सोच्चिय जाओ गणिज्जए, तिहुयणस्सवि स वंदो ।

पुरिसो व महिलिया ^४वा कुलुग्गओ जो न खंडए सीलं ॥१५॥

परमपवित्तं सप्पुरिससेवियं सयलपावनिम्महणं ।

सव्वुत्तम सोक्खनिहिं सत्तरसविहं जयइ सीलं ॥१६॥

ति भाणिऊणं गोयमा ! झत्ति मुक्का कुमारस्सोवरिं कुसुमवुट्ठिं
 पवयणदेवयाए, पुणोऽवि भणिउमाढत्ता देवया तं जहा-

देवस्स देति दोसे पवंचिया अत्तणो सकम्मेहिं ।

ण गुणेषु ^५ठवित्तंऽप्यं ^६सुहाइं मुद्धा य जोएति ॥१७॥

१. गतिविशेषवत्क्रमेषु जात्यतुरङ्गमेषु पवनवेगेष्वारुह्येति । १अ. कुलोद्गतः कुलीन इति ।

२. केशश्मश्रु विलुञ्चयन्निति । ३. आकृषति पिबतीति । ४. जातो जन्मवानिति ।

५. आत्मानं स्थापयन्तीति । ६. परेषां सुखानि यदिवा 'मुहाइं' 'मुद्धाए' च पाठान्तरमाश्रित्य मुखानि मुग्धा मुग्धा वा पश्यन्तीति ।

मज्झत्थभाववत्ती समदरिसी सव्वलोय-वीसासो ।

निक्खेवयपरियत्तं^१ दिव्वो न करेइ तं ढोइ ॥१८॥

ता बुज्झिऊण सव्वुत्तमं जणा सीलगुणमहिड्ढीयं ।

तामसभावं चिच्चा कुमारपयपंकयं णमह ॥१९॥

त्ति भणिऊणं अदंसणं गया देवया इति, ते छइल्लपुरिसे लहुं च गंतूणं साहियं तेहिं नरवइणो ।

तओ आगओ बहुविकप्पकल्लोलमालाहिं णं
आऊरिज्जमाणहिययसागरो हरिसविसायवसेहिं^२ भीउड्डयाऽतत्थ-
चकिरहियओ सणियं गुज्झसुरंग^३ खडक्कियादारेणं कंपंत-सव्वगतो महया
कोउहल्लेणं कुमारदंसणुक्कंठिओ य तमुद्देसं । दिट्ठो य तेणं सो
सुगहियणामधेज्जो महायसो महासत्तो महाणुभावो कुमारमहरिसी,
अपडिवाइ^४ महोहीपच्चए णं साहेमाणो संखाइयाइ-भवाणुहूयं दुक्खसुहं
सम्भत्ताइलंभं संसारसहावं कम्मबंधड्ढित्तीविमोक्खमहिंसा-
लक्खणमणगारावयरबंधं णरादीणं सुहणिसन्नो सोहम्माहिवइ-^५ धरिओ-
वरिपंडरायवत्तो । ताहे यं तमदिट्ठपुव्वमच्छेरगं दड्ढूणं पडिबुद्धो
सपरिग्गहो पव्वइओ य गोयमा ! सो राया परचक्काहिवईवि । एत्थंतरंमि
पहयसुस्सरगंभीर-गहीरदुंदुभिनिग्घोस-पुव्वेणं समुग्घुट्ठं चउव्विहदेव-
निकाएणं- तं जहा-

कम्मड्ढगंठिमुसुमूरण, जय-जय परमेड्ढिमहायस ।

जय जय जयाहि चारित्तदंसणणाणसमण्णिय ! ॥२०॥

सच्चिय जणणी जगे एक्का, वंदणीया खणे खणे ।

जीसे मंदरगिरीगरुओ, उयरे वुच्छो तुमं महामुणित्ति* ॥२१॥

१. यन्निक्षेपपरिवर्तं दिव्यं-भाग्यं देवो वा न करोति तं मध्यस्थभाववर्ती
दौकत इति । २. भीनाशादन्नस्तश्चमत्कृतचेतश्चेति ३. लघुद्वाररुपा भाषायां
खिडकीति ४. महाऽवधिज्ञानप्रत्ययेनेति । ५. धृतोपरिपाण्डुरातपत्र इति ।

* 'तुममामुणित्ति' पाठान्तरमिति ।

भणिऊणं विमुंचमाणे सुरभिकुसुमवुडिं भत्तिभरनिब्भरे
विरइयकरकमलंजलीउत्ति निवडिए ^१ससुरासुरे देवसंधे गोयमा !
कुमारस्स णं चलणारविदे, पणच्चियाओ देवसुंदरीओ, पुणो
पुणोऽभिसंथुणिय णमंसिय चिरं पञ्जुवासिऊणं सत्थाणेसु गए
देवनिवहे ।२।

से भयवं ! कहं पुण एरिसे सुलभवोही जाए महायसे
सुगहियणामधेज्जे से णं कुमारमहरिसी ? गोयमा ! तेणं
समणभावट्टिएणं अन्नजम्ममि वायादंडे पउत्ते अहेसि तं निमित्तेणं
जावज्जीवं मूणव्वए गुरुवएसेणं ^३साधारिए, अन्नं च - तिन्नि
महापावट्टाणे संजयाणं तंजहा-आऊ तेऊ मेहुणे, एते य सव्वोवाएहिं
परिवज्जिए, तेणं तु से एरिसे सुलभवोही जाए ।

अहऽन्नया णं गोयमा ! बहुसीसगणपरिवरिए से णं
कुमारमहरिसी पत्थिए सम्मेयसेलसिहरे देहच्छाथिनिमित्तेणं, कालक्कमेणं
तीए चेव वत्तणीए जत्थ णं से रायकुलबालिया णरिंदे चक्खुकुसीले,
जाणावियं च रायउले, आगओ य वंदणवत्तियाए सो इत्थीनरिंदो
उज्जाणवरंमि, कुमारमहरिसिणो पणामपुव्वं च उवविट्ठो स ^३पुरिस्सरो
जहोइए भूमिभागे, मुणिणावि पबंद्धेणं कया देसणा, तं च सोऊणं
धम्मकहावसाणे उवट्ठिओ सपरिवग्गो णीसंगत्ताए, पव्वइओ गोयमा !
सो इत्थीनरिंदो ।

एवं च अच्चंतघोरवीरुग्गकट्ठदुक्करत- वसंजमाणुट्टाणकिरियाभिरयाणं
सव्वेसिंपि अपडिकम्मसरीराणं अपडिबद्धविहारत्ताए अच्चंतणिप्पिहाणं^४
संसारिएसुं चक्करसुरिंदाइइड्ढि- समुदय-सरीरसोक्खेसुं गोयमा ! वच्चइ
कोई कालो जाव णं पत्ते सम्मेयसेलसिहरब्भासं, तओ भणिया गोयमा !
तेण महरिसिणा रायकुलबालियाणरिंदसमणी-जहा णं दुक्करकारिगे !

१. 'ससुरीसरे' पा० तथाच ससुरेश्वरो देवसङ्घ इति । २. मौनव्रतं संवृतमिति । ३. पुन्यं
ईश्वरस्तथा 'पुरस्सरो' पाठान्तरमाश्रित्य गतार्थ इति । ४. निस्पृहाणामिति ।

सिग्धं अणुद्धुयमाणसा सव्वभावभावंतरेहिं णं सुविसुद्धं पयच्छाहि णं
णीसल्लमालोयणं आढवेयव्वा य संपयं सव्वेहिं अम्हेहिं
देहद्यायकरणेक्कबद्ध-लक्खेहिं णीसल्लालोइयनिंदियगरहिय जहुत्तसुद्धासय-
जहोवइड्डकयपच्छित्तुद्धियसल्लेहिं च णं कुसलदिट्ठा संलेहणत्ति । तओ णं
जहुत्तविहीए सव्वमालोइयं तीए रायकुलबालियाणरिंदसमणीए जाव णं
संभारिया तेणं महामुणिणा जहा णं जमहं तया रायत्थाणमुवविट्ठाए
तए गारत्थ-भावमि सरागाहिलासाए ^१संविक्खिओ अहेसि तमालोएह
दुक्करकारिए ! जेणं तुम्हं सव्वुत्तमविसोही हवइ ।

तओ णं तीए मणसा परितप्पिऊणं
अइचवलासयनियडीनिकेयपावित्थीसभावत्ताए मा णं चक्खुकुसीलत्ति
अमुगस्स धूया समणीणमंतो परिवसमाणी भन्निहामित्ति चिंतिऊणं
गोयमा ! भणीयं तीए अभागधिज्जाए-जहा णं भगवं ! ण मे तुमं
एरिसेणं अट्ठेणं सरागाए दिट्ठीए ^२निज्झाइओ जओ णं अहयं ते
अहिलसेज्जा, किंतु जारिसे णं तुब्भे सव्वुत्तमरुवतारुण्णजोव्वण-
लावन्न-कंत्ति-सोहग्ग-कलाकलाव-विण्णाणणाणाइगुणोह-विच्छड्डुमंडिए
होत्था विसएसु निरहिलासे ^३सुव्विरे ता किमेयं तहत्ति किं वा णो णं
तहत्तित्ति तुज्झं पमाणपरितोलणत्थं सरागाहिलासं चक्खुं पउत्ता, णो णं
चाभिलसिउकामाए, अहवा इणमेत्थ चेवालोइयं भवउ किमित्थ
दोसंति, मज्झमवि ^४गुणावहेयं भवेज्जा, किं तित्थं गंतूण मायाकवडेणं ?
सुवण्णसयं केइ पयच्छे ।

ताहे य णं अच्चंतगरुयसंवेंगमावन्नेणं विदिट्ठसंसारचलित्थी-
सभावस्स णं ति चिंतिऊणं भणियं मुणिवरेणं जहा णं धिद्धिद्धिरत्थु
पावित्थी चलस्स भावस्स जेणं तु पेच्छ पेच्छ एदहमेत्ताणुकालसमाणं

१ संवीक्षित इति । २. दृष्ट इति । ३. श्रूयसे इति । ४. गुणावहेतद्
भवेदिति ।

केरिसा नियडी पउत्तति ? अहो खलीत्थीणं चलचवल-
चडुलचंचलासंडी^१एगढमाणसाण खणमेगमवि दुज्जमजायाणं अहो
^२सयलाकज्ज-भंडेहलियाणं अहो सयलायसकित्तीवुडिडकराणं अहो
पावकम्मा-भिणिविद्वज्जवसायाणं, अहो अभीयाणं परलोगगमणंधयार-
घोरदारुण-दुक्खकंडूकडाह-सामलि- कुंभीपागाइदुरहियासाणं । एवं च
बहुं मणसा परितप्पिऊण अणुयत्तणाविरहियं, धम्मिकरसियसुपसंत-
वयणेहिं णं पसंतमहुरक्खरेहिं णं धम्मदेसणापुव्वगेणं भणिया कुमारेणं
रायकुलबालिया नरिंदसमणी गोयमा ! तेणं मुणिवरेणं जहा णं
दुक्करकारिए ! मा एरिसेणं मायापवंचेणं अच्चंतघोरवीरुग्गकडु-
सुदुक्करतवसंजमसज्जायज्जाणाइहिं समज्जिए निरणुबंधिपुण्ण- पब्भारे
णिप्फले कुणसु, ण किं चि एरिसेणं मायाडंभेणं अणंतसंसारदायगेणं
पओयणं, नीसंकमालोइत्ताणं णीसल्लमत्ताणं कुरु, अहवा
अंधयारणट्टिगाणइं* धवियसुवण्णमिव^३ एक्काए ^४फुक्काए जहा तहा
णिरत्थयं होही तुज्जेयं वालुप्पाडण भिक्खा भूमीसेज्जा
बावीसपरीसहोवसग्गाहियासणाइए कायकिलेसेत्ति । तओ भणियं तीए
भग्गलक्खणाए जहा भगवं ! किं तुम्हे हिं सद्धिं “छम्मेणं उल्लविज्जइ ?
विसेसेणं आलोयणं दाउमाणेहिं णीसंकं ^५पत्तिया, णो णं मए तुमं
तक्कालं अभिलसिउकामाए सरागाहिलासाए चक्खूए निज्जाइउत्ति, किंतु
तुज्ज परिमाणतोलणत्थं निज्जाइओत्ति भणमाणी चेव निहणं गया,
कम्मपरिणइवसेणं समज्जित्ताणं बद्धपुट्टनिकाइयं उक्कोसड्डिइं इत्थीवेयं
कम्मं गोयमा ! सा रायकुल-बालियानरिन्दसमणित्ति । तओ ससीसगणे
गोयमा ! से णं महच्छेरगभूए णं सयंबुद्धकुमारमहरिसीए विहीए
संलिहिऊणं अत्ताणगं मासं पाओवगमणेणं सम्मेयसेलसिहरंमि अंतगओ

१. एकार्थाऽसंस्थितमानसानामिति । २. सकलाऽकार्य-भाण्डविक्रयिणीनामिति ।
३. ध्यातसुवर्णमिवेति— ४. फूत्कारेणेति । ५. छद्मना-माययोल्लाप्यत इति ।
६. प्रतीहि-प्रतीतिविषयं नयेति । * ‘नट्टमिव’ पाठान्तरमिति ।

केवलित्ताए सीसगणसमण्णिए परिनिव्वुडेत्ति । ३ ।

सा उण रायकुलबालियाणरिंदसमणी गोयमा ! तेण मायासल्ल-भावदोसेणं उववन्ना विज्जुकुमारीणं व्राहणत्ताए नउलीरुवेणं किंकरीदेवेसुं । तओ चुया समाणी पुणो पुणो उववज्जंती वावज्जंती आहिंडिया माणुसतिरिच्छेसुं सयलदोहग्गदुक्खदारिदपरिगया सव्वलोयपरिभूया सकम्मफलमणुभवमाणी गोयमा ! जाव णं कहकहवि कम्माणं खओवसमेणं बहुभवंतरेसु तं आयरियपयं पाविऊण निरइयारसामन्नपरिपालणेणं सव्वत्थामेसुं च सव्वपमायालंबणविप्पमुक्केणं तु उज्जमिऊणं निदड्ढावसेसीकयभवंकुरे तहावि गोयमा ! जा सा सरागा चक्खू णालोइया तया तक्कम्मदोसेणं माहणित्थीत्ताए, परिनिव्वुडे णं से रायकुलबालियाणरिंदसमणीजीवे । ४ ।

से भयवं ! जे णं केई सामण्णमब्भुट्टेज्जा से णं एक्काइ जाव णं सत्तट्ठभवंतरेसु नियमेण सिज्झिज्जा ता किमेयं अणूणाहियं लक्खभवंतरपरियडणंति ? गोयमा ! जे णं केई निरइयारे सामन्ने निव्वाहेज्जा से णं नियमेणं एक्काइ जाव णं अट्ठभवंतरेसु सिज्झे, जे उण सुहुमे बायरे वा केई मायासल्ले वा आउकायपरिभोगे वा तेउकायपरिभोगे वा मेहुणकज्जे वा अन्नयरे वा केई आणा-भंगे काऊणं सामण्णमइयरेज्जा से णं जं लक्खेण भवग्गहणेणं सिज्झे तं महइ लभे, जओ णं सामन्नमइयरित्ता बोहिंपि लभेज्जा दुक्खेणं । एसा सा गोयमा ! तेणं माहणीजीवेणं माया कया जीए य एद्वहमेत्ताएवि एरिसे पावे दारुणे विवागिति । ५ ।

से भयवं ! किं तीए महयरीए तेहिं से तंदुलमल्लगे पयच्छिए त्ति ? किं वा णं सावि य महयरी तत्थेव तेसिं समं असेसकम्मक्खयं काऊण परिनिव्वुडा हवेज्जति ? गोयमा ! तीए महयरीए तस्स णं तंदुल मल्लगस्सऽट्ठाए तीए माहणीए धूयत्ति काऊणं गच्छमाणी अवंतराले चेव

अवहरिया सा सुजसिरी, जहा णं मज्झं गोरसं परिभोत्तूणं ^१कहं गच्छसि
^२संपयन्ति ? आह वच्चामो गोउलं अण्णं च जइ तुमं मज्झं विणीया
हवेज्जा ता ^३अहयं तुज्झं जहिच्छाए तेकालियं बहुगुलघएणं अणुदियहं
पायसं पयच्छिहामि ।

जाव णं एयं भणिया ताव णं गया सा सुजसिरी तीए महयरीए
सद्धिं, तेहिंपि परलोगाणुद्वाणेकसुहज्जवसायक्खित्तमाणसेहिं न संभरिया
ता गोविंदमाहणाईहिं । एवं तु जहा भणियं महयरीए तहा चेव तस्स
घयगूलपायसं पयच्छे ।

अहऽन्नया कालक्रमेण गोयमा ! वोच्छिन्ने णं दुवालससंवच्छरिए
महारोरेवे दारुणे दुब्भिकखे, जाए य णं रिद्धित्थिमियसमिद्धे सव्वेऽवि
जणवए । अहऽन्नया ^४पुण वीसं अणग्घेयाणं पवरससिसूरकंताईणं
मणिरयणाणं घेत्तूणं सदेसगमणनिमित्तेणं दीहद्वाण-परिखिन्न-अंगयट्ठी
पहपडिवन्ने णं तत्थेव गोउले भवियव्वयानियोगेणं आगए
अणुच्चरियनामधेज्जे पावमती सुजसिवे । दिट्ठा य तेणं सा कन्नगा जाव
णं परितुलियसयलतिहुयणणरणारीरुवकंतिलावण्णा, तं सुजसिरिं
पासिय चवलत्ताए इंदियाणं रम्मयाए किंपागफलोवमाणं
अणंतदुक्खदायगाणं विसयाणं विणिज्जियासेसतिहुयणस्स णं गोयरगाएणं
मयरकेउणो, भणिया णं गोयमा ! सुजसिरी तेणं महापावकम्मेणं
सुजसिवेणं जहा णं हे हे कन्नगे जइणं इमे तुज्झ सन्तिए जणीणीजणगे
समणुमन्नंति ता णं तु अहयं तं परिणेमि, अन्नं च करेमि सव्वंपि ते
बंधुवग्गमदरिदं ति, तुज्झमवि घडावेमि पलसयमणूणगं सुवन्नस्स, ता
गच्छ अइरेणेव साहसु मायावित्ताणं ।

तओ गोयमा ! जाव णं पहट्टुट्ठा सा सुजसिरी तीए महयरीए

१. 'कहिं' पाठान्तरमिति । २. साम्प्रतमिति । ३. 'अहियं' पाठान्तरमिति ।
४. 'पणुवीसं' पाठान्तरमिति ।

एयवइयरं पकहेइ ताव णं तक्खणमागंतूण भणिओ सो महयरीए-जहा भो भो पयंसेहि णं जं ते मज्झ धूयाए सुवण्णपलसए सुंकिए । ताहे गोयमा ! पयंसिए तेण पवरमणी । तओ भणियं महयरीए-जहा तं सुवन्नसयं दाएहि, किमेएहिं डिंभरमणगेहिं ^१पंचिद्वगेहिं ? ताहे भणियं सुज्जसिवेणं जहा णं एहि वच्चाओ णगरं दंसेमि णं अहं तुज्झमिमाणं पंचिद्वगाणं माहप्पं । तओ पभाए गंतूण नगरं पयंसियं ससिसूरकंतपवरमणीजुवलगं तेणं नरवइणो, णरवइणावि सद्दाविरुणं भणिए पारिक्खी - जहा इमाणं परममणीणं करेह मुल्लं । तोल्लंतेहिं तु न सक्किरे तेसिं मुल्लं काउणं । ताहे भणिया नरवइणा जहा णं भो भो माणिक्खंडिया ! णत्थि केइ इत्थ जे णं एएसिं मुल्लं करेज्ज । तो गिण्हसु णं दस कोडीओ दविणजायस्स । सुज्जसिवेणं भणियं जं महाराओ पसायं करेति, णवरं इणमो आसण्णपव्वयसन्निहिए अम्हाणं गोउले तत्थ एगं च जोयणं जाव गोणीणं गोयरभूमी तं अकरभरं विमुंचसु त्ति, तओ नरवइणा भणियं जहा एवं भवउत्ति ।

एवं च गोयमा ! सव्वमदरिद्वमकरभरे गोउले काऊणं तेणं अणुच्चरियनामधेज्जेण परिणीया सा निययधूया सुज्जसिरी सुज्जसिवेणं । जाया परोप्परं तेसिं पीई, जाव णं नेहाणुरागरंजियमाणसे गमिति कालं किंचि ताव णं ददूणं गिहागए साहुणो पडिनियत्ते । हाहाकंदं करेमाणी पुढा सुज्जसिवेण सुज्जसिरी-जहा पिए ! एयं अदिद्वपुव्वं भिक्खायरजुयलयं ददूणं किमेयावत्थं गया सि ? तओ तीए भणियं-जहा णणु मज्झ सामिणी एएसिं, महया भक्खन्नपाणेणं पत्तभरणं करियं, तओ पहद्वतुट्टमाणसा उत्तमंगेणं चलणग्गे पणमयंती, ता मए अज्ज एएसि परिदंसणेणं सा संभारियत्ति । ताहे पुणोवि पुढा सा पावा तेणं जहा णं पिए ! का उ तुज्झं सामिणी अहेसि ? तओ गोयमा ! णं ददं ^२ऊसुरुसुभंतीए समणुगग्घरविसंथुलंसुगगिराए साहियं

१. पञ्चभिरिष्टकशकलैरिति । २. उत्तररुदन्त्या कण्ठगुरुतयेति ।

सर्वंपि णिययवुत्तंतं तस्सेति । ताहे विण्णायं तेणं महापावकम्मेणं जहा णं निच्छयं एसा सा ^१ममंगया सुज्जसिरी, ण अण्णा य महिलाए एरिसा रुवकंतीदितीलावण्ण-सोहग्गसमुदयसिरी भवेज्जत्ति चिंतिऊणं भणिउमाढत्तो तं जहा-

एरिसकम्मरयाणं जं न पडे घडहडितयं वज्जं ।

तं णूणं तं इमे ^२चिंतिय सोवि जहित्थीविउ मे कत्थ सुज्जिस्सं ? ॥२२॥

ति भाणिऊणं चिंतिउं पयत्तो सो महापावयारी जहा णं-किं छिंदामि अहयं सहत्थेहिं तिलं तिलं सगत्तं ? किं वा णं तुंगगिरियडाओ पक्खिविउं दढं संचुन्नेमि इणमो अणंतपावसंघायसमुदयं ? दड्ढं^३ किं वा णं गंतूणं लोहयारसालाए सुतत्तलोहखंडमिव घणखंडाहिं चुन्नावेमि सुइरमत्ताणगं ? किं वा णं फालावेऊण मज्झोमज्झीए तिक्खकरवत्तेहिं अत्ताणगं पुणो ^४संभरावेमि अंतो सुकढियतउय-तंब-कंस-लोहलोणूससज्जिया-खारस्स ? किं वा णं सहत्थेणं छिंदामि उत्तमंगं ? किं वा णं पविसामि ^५मयरहरं ? किं वा णं उभयरुक्खेसु अहोमुहं विणिबंधाविऊणमत्ताणगं हेट्ठा पज्जलावेमि जलणं ? किं बहुणा ? णिद्धहेमि कट्ठेहिं अत्ताणगंति चिंतिऊणं जाव णं मसाणभूमीए गोयमा ! विरइया महती चिई । ताहे सयलजणसन्निज्झं सुइरं निंदिऊणं अत्ताणगं साहियं च सव्वलोगस्स जहा णं मए एरिसं एरिसं कम्मं समायरियं ति भणिऊणं आरुढो ^६चिइयाए, जाव णं भवियव्वयाए निओगेणं तारिसदव्वचुन्नजोगाणुसंसट्ठे ते सव्वेवि दारुत्ति काऊणं फूइज्जमाणेवि अणेगपयारेहिं तहावि णं ण पयलिए सिही ।

१. ममाङ्गजेति । २. 'चिंते' इत्यादि पाठान्तरमाश्रित्य चिन्तयति च यथास्त्रीविद् यदिवा 'जह अच्छि वि उ' पाठान्तरमाश्रित्य अक्षिणी अपि तु मे कुत्र शोत्स्यतः अथवा यथास्थितिविदहं कुत्र शोत्स्ये यद्वा यथा अस्पृश्य इवाहमित्यादीति ३. दणुं पाठान्तरमाश्रित्य दैत्यमिति । ४. प्रक्षेपयामीति ५. मकरधरं समुद्रमिति । ६. चित्तिकायामिति ।

तओ य णं धिद्धिकारेणोवहओ सयललोगवयणेहिं जहा भो भो पिच्छ
पिच्छ हुयासणंपि ण पज्जले पावकम्मकारिस्सत्ति भणिऊणं निद्धाडिए ते
बेऽवि गोउलाओ ।

एयावसरंमि उ अण्णासन्नसन्निवेसाओ आगए णं भत्तपाणं गहाय
तेणेव मग्गेण उज्जाणाभिमुहे मुणीण संघाडगे । तं च दद्धूणं अणुमग्गेणं
गए ऐ ते बेऽवि पाविट्ठे । पत्ते य उज्जाणं जाव णं पेच्छंति
सयलगुणोहधारिं चउनाणसमन्नियं बहुसीसगणपरिकिन्नं देविंदनरिंद-
वंदिज्जमाणपायारविंदं सुगहियनामधिज्जं जगाणंदं नाम अणगारं । तं च
दद्धूण चित्तियं तेहिं - जहा णं दे मग्गामि विसोहिपयं एस महायसेत्ति
चित्तिऊणं तओ पणामपुव्वगेणं उवविट्ठे ते जहोइए भूमिभागे पुरओ
गणहरस्स । भणिओ य सुज्जसिवो तेण गणहारिणा जहा णं भो भो
देवानुप्पिया ! णीसल्लमालोएत्ताणं लहुं करेसु सिग्घं
असेसपाविट्ठकम्मनिट्ठवणं पायच्छित्तं । एसा उण आवन्नसत्ता । एयाए
पायच्छित्तं णत्थि जाव णं णो पसूया । ताहे गोयमा !
सुमहच्चंतपरममहासंवेगगए से णं सुज्जसिवे, आजम्माओ नीसल्लालोयणं
पयच्छिऊणं जहोवइट्ठं घोरं सुदुक्करं महंतं पायच्छित्तं अणुचरित्ताणं तओ
अच्चंतविसुद्धपरिणामो सामण्णमब्भुट्ठिऊणं छव्वीसं संवच्छरे तेरस य
राइंदिए अच्चंतघोरवीरुग्गकट्ठदुक्करतवसंजमं समणुचरिऊणं जाव णं
एगदुत्तिचउपंचळम्मासिएहिं खमणेहिं खवेऊणं निप्पडिकम्मसरीरत्ताए
अपमाययाए सव्वत्थामेसु अणवरय- महन्निसाणुसमयं सययं
सज्झायज्झाणाईसु णं णिद्धिऊणं सेसकम्ममलं अउव्वकरणेण
खवगसेढीए अंतगडकेवली जाए सिद्धे य । ६।

से भयवं ! तं तारिसं महापावकम्मं समायरिऊणं तहावि कहं
एरिसे णं से सुज्जसिवे लहुं थेवेणं कालेणं परिनिव्वुडे त्ति ? गोयमा !
तेणं जारिसभावट्ठिएणं आलोयणं विइन्नं, जारिससंवेगगएणं तं तारिसं
घोरदुक्करं महंतं पायच्छित्तं समणुट्ठिअं, जारिसं सुविसुद्धसुहज्जवसाएणं

तं तारिसं अच्चंतघोरवीरुग्गकड्ड-सुदुक्करतवसंजमकिरियाए वट्टमाणेणं
अखंडिय-अविराहिये मूलुत्तरगुणे परिवालयंतेणं णिरइयारं सामन्नं
णिव्वाहियं, जारिसेणं रोद्धट्टज्झाणविप्पमुक्केणं णिट्ठियरागदोसमोह-
मिच्छत्तमय-भयगारवेणं मज्झत्थ-भावेणं अदीणमाणसेणं दुवालस वासे
संलेहणं पाओवगममणसणं पडिवन्नं तारिसेणं एगंतसुहज्झवसाएणं ण
केवलं से एगे सिज्झेज्जा, जइ णं कयाई परकयकम्मसंकमं भवेज्जा ता
णं सव्वेसिंपि भवसत्ताणं असेस-कम्मक्खयं काऊणं सिज्झेज्जा, णवरं
परकयकम्मं ण कयादी कस्सई संकमेज्जा, जं जेण समज्जियं तं तेणं
समणुभवियव्वंति, गोयमा ! जया णं निरुद्धे जोगे हवेज्जा तया णं
असेसं पि कम्मट्ठरासिं अणुकालविभागेणैव णिट्ठवेज्जा,
सुसंवुडासेसासवदारे । जोगनिरोहेणं तु कम्मक्खए दिट्ठे, ण उण
कालसंखाए, जओ णं -

कालेणं तु खवे कम्मं, कालेणं तु पबंधए ।

एगं बंधे खवे एगं, गोयम ! कालमणंतं ॥२३॥

णिरुद्धेहिं तु जोगेहिं वेए कम्मं ण बंधए ।

पोराणं तु पहीएज्जा, णवगस्साभावमेव उ ॥२४॥

एवं कम्मक्खयं ^१विंदा णो णं एत्थं कालमुद्दिसे ।

अणाइकाले जीवे य, तहवि कम्मं ण ^२णिट्ठए ॥२५॥

खओवसमेण कम्माणं, जया विरीयं समुच्छले ।

कालं खेतं भवं भावं, दव्वं संपप्प जीवे तया ॥२६॥

अप्पमादी खवे कम्मं, जे जीवे तं ^३कोडिं चडे ।

जो पमादी पुणोऽणंतं, कालं कम्मं णिबंधिया ॥२७॥

णिवसेज्जा चउगईए उ, सव्वत्थाऽच्चंतदुक्खिए । तम्हा कालं खेतं
भवं, भावं संपप्प गोयमा ! मइमं अइरा कम्मं खयं करे ॥२८॥

से भयवं ! सा सुज्जसिरी कहिं समुववन्ना ? गोयमा ! छट्ठीए णरगपुढवीए । से भयवं ! केणं अट्ठेणं ? गोयमा ! तीए पडिपुन्नाणं साइरेगाणं णवण्हं मासाणं गयाणं इणमो विचिंतियं जहा णं पच्चूसे गब्भं पडावेमिति । एवमज्झवसमाणी चेव बालयं पसूया । पसूयमेत्ता य तक्खणं निहणं गया । एतेणं अट्ठेणं गोयमा ! सा सुज्जसिरी छट्ठियं गयत्ति ।

से भयवं ! जं तं बालगं पसविऊणं मया सा सुज्जसिरी तं जीवियं कि वा ण वत्ति ? गोयमा ! जीवियं । से भयवं ! कहं ? गोयमा ! पसूयमेत्तं तं बालगं तारिसेहिं जराजरजलुसजंबालपूइरुहिरखार-दुगंधासुईहिं विलित्तमणाहं विलवमाणं दट्ठूणं कुलालचक्कस्सोवरिकाऊणं साणेणं समुदिसिउमारद्धं, ताव णं दिट्ठं कुलाणेणं । ताहे धाइओ सघरणिओ कुलालो, अविणासियबालतणू णट्ठो साणो । तओ कारुण्हियएणं अपुत्तस्स णं पुत्तो एस मज्झं होहिति वियप्पिऊणं कुलाणेणं समप्पिओ णं से बालगो गोयमा ! ^१सदइयाए । तीए य सव्भावणेहेणं परिवालिऊणं माणुसीकए से बालगे, कयं च नामं कुलालेण लोगाणुवित्तीए ^२सज्जणगाहिहाणेणं जहा णं सुसट्ठो ।

अन्नया कालकमेणं गोयमा ! सुसाहुसंजोगदेसणापुव्वेणं पडिबुद्धेणं सुसट्ठे पव्वइए य, जाव णं परमसद्धासंवेगवेरग्गए अच्चंतघोरवीरुग्ग-कट्ठसुदुक्करं महाकायकेसं करेइ, संजमजयणं ण याणेइ । अजयणादोसेणं तु सव्वत्थ असंजमपएसु णं अवरज्झे । तओ तस्स गरुहिं भणियं जहा भो भो महासत्त ! तए, अन्नाणदोसओ संजमजयणं अयाणमाणेणं महंते कायकेसे समाढत्ते, णवरं जइ निच्चालोयणं दाऊणं पायच्छित्तं ण काहिसि ता सव्वमेयं निष्फलं होही । ता जाव णं गुरुहिं चोइए ताव णं से अणवरयालोयणं पयच्छे । से ऽवि णं गुरु तस्स तहा पायच्छित्ते पयाइ जहा णं संजमजयणं ^३भूयगं । तेणेव अहन्निसाणुसमयं रोहट्ठज्झाणाइविप्पमुक्के सुहज्झवसाये निरंतरं पविहरेज्जा ।

अहऽन्नया णं गोयमा ! से पावमती जे केइ छट्टुम-
दसमदुवालसद्धमास-मास जाव णं छम्मासखवणाइए अन्नयरे वा सुमहं
कायकेसाणुगए पच्छित्ते से णं तहत्ति समणुद्धे । जे उ उण एगंत-
संजमकिरियाणं जयणाणुगए मणोवइकायजोगे सयलासवनिरोहे
सज्झायज्झाणावस्सगाइए असेसपावकम्मरासिनिद्वहणे पायच्छित्ते से णं
पमाए अवमन्ने अवहेले असद्वहे सिद्धिले जाव णं किल किमित्थ दुक्करंति
काऊणं न तहा समणुद्धे ।

अन्नया णं गोयमा ! अहाउयं परिवालेऊणं से सुसढे मरिऊणं
सोहम्मे कप्पे इंदसामाणिणं महिड्ढी देवे समुप्पन्ने । तओवि चविऊणं
इहइं वासुदेवो होऊणं सत्तम पुढवीए समुप्पन्ने । तओ उव्वट्ठे समाणे
महाकाए हत्थी होऊणं मेहुणाऽऽसत्तमाणसे मरिऊणं अणंतवणस्सतीए
गयत्ति । एस णं गोयमा ! से सुसढे जे णं आलोइयनिंदियगरहिणं णं
कयपायच्छित्तेवि भवित्ताणं ! जयणं अयाणमाणे भमिही सुइरं तु
संसारे ॥२९॥

से भयवं कयरा उण तेणं जयणा ण विन्नाया जओ णं तं तारिसं
दुक्करं कायकेसं काऊणंपि तहावि णं भमिहिइ सुइरं तु संसारे ? गोयमा !
जयणा णाम अट्टारसण्हं सीलंगसहस्साणं संपुन्नाणं अखंडि-
यऽविराहियाणं जावज्जीवमहन्निसाणुसमयं धारणं कसिणसंजमकिरियं
अणुमन्नंति, तं च तेण न विन्नायं ति, तेणं तु से अहन्ने भमिहिइ सुइरं
तु संसारे ।

से भयवं ! केणं अट्ठेणं तं च तेणं ण विन्नायं ति ? गोयमा !
तेणं जावइए कायकेसे कए तावइयस्स 'अट्ठभागेणेव जइ से
बाहिरपाणगं विवज्जेन्तो ता सिद्धीए मणुवयंतो, णवरं तु तेण
बाहिरपाणगे परिभुत्ते । बाहिरपाणगपरिभोइस्स णं गोयमा ! बहुएवि

कायकेसे णिरत्थगे हवेज्जा, जओ णं गोयमा ! आऊ तेऊ मेहुणे एए तओऽवि महापावट्ठाणे अबोहिदायगे एगंतेणं विवज्जियच्चे एगंतेणं ण समायरियच्चे सुंसंजएहिंति, एतेणं अट्ठेणं तं च तेणं ण विण्णायं ति ।

से भयवं ! केणं अट्ठेणं आऊतेऊमेहुणे ति अबोहिदायगे समक्खाए ? गोयमा ! सव्वमवि छक्कायसमारंभे महापावट्ठाणे, किं तु आउतेउकायसमारंभेण अणंतसत्तोवधाए, मेहुणासेवणेणं तु संखेज्जासंखेज्जसत्तोवधाए घणरागदोसमोहाणुगए एगंत अप्पसत्थज्झ-वसायत्तमेव । जम्हा एवं तम्हा उ गोयमा ! एतेसिं समारंभासेवणपरिभोगादिसु वट्ठमाणे पाणी पढममहव्वयमेव ण धारेज्जा, तयभावे अवसेसमहव्वयसंजमाणुट्ठाणस्स अभावमेव । जम्हा एवं तम्हा सव्वहा विराहिए सामण्णे । जओ एवं तओ णं पवत्तियसम्मग्गपणासित्तेणेव गोयमा ! तं किं किंपि कम्मं निबंधिज्जा जेणं तु नरयतिरियकुमाणुसेसु अणंतखुत्तो पुणो पुणो धम्मोत्ति अक्खराइं सिमिणेऽवि णं अलभमाणे परिभमेज्जा । एएणं अट्ठेणं आऊतेऊमेहुणे अबोहिदायगे गोयमा ! समक्खायत्ति ।

से भयवं ! किं छट्ठट्ठमदसमदुवालसद्धमासमासे जाव णं छम्मासखवणाईणं अच्चंतघोरवीरुग्गकट्ठसुदुक्करे संजमजयणावियले सुमहंतेऽवि उ कायकेसे कए णिरत्थगे हवेज्जा ? गोयमा ! णं णिरत्थगे हवेज्जा । से भयवं ! केणं अट्ठेणं ? गोयमा ! जओ णं खरुट्ठमहिसगोणादओऽवि संजम-जयणा-वियले अकामनिज्जराए सोहम्मकप्पादिसु वयंति, तओऽवि भोगखएणं चुए समाणे तिरियादिसु संसारमणुसरेज्जा । तहा य दुग्गंधामिज्झ-चिलीण-खार-पित्तोज्झ-सिंभ-पडहत्थे वसा-जलुस-पूइदुद्धिणिचिलिविले^१ रुहिरचिक्खल्ले दुद्धंसणिज्जवीभच्छतिमि-संधयारए गंतुव्वियणिज्जगब्भपवेसजम्मजरा-

१. 'विलिचिल्ले' इति पाठः संभाव्यते तथा चार्द्र इति ।

मरणाई - अणेगसारीरमणो-समुत्थसुघोरदारुणदुक्खाणमेव भायणं भवन्ति ।
ण उण संजमजयणाए विणा जम्मजरामरणाइएहिं घोरपयंडमहा-
रुद्धदारुणदुक्खाणं णिड्डवणमेगंतियमच्चंतियं भवेज्जा । ^१एतेणं
संजमजयणावियले सुमहंतेऽवि कायकेसे पकए गोयमा ! निरत्थगे
भवेज्जा ।

से भयवं ! किं संजमजयणं समुपेहमाणे समणुपालेमाणे
समणुठेमाणे अइरेणं जम्मजरामरणादीणं विमुच्चेज्जा ? गोयमा ! अत्थेगे
जे णं णो अइरेणं विमुच्चेज्जा । से भयवं ! केणं अट्ठेणं एवं वुच्चइ- जहा
णं अत्थेगे जे णं णो अइरेणं विमुच्चेज्जा, अत्थेगे जे णं अइरेणं
विमुच्चेज्जा ? गोयमा ! अत्थेगे जे णं किंचि उ ईसि मणगं अत्ताणगं
अणोवलक्खेमाणे सरागससल्ले संजमजयणं समणुठे जे णं एवंविहे से
णं चिरेणं जम्मजरामरणाइअणेगसंसारियदुक्खाणं विमुच्चेज्जा, अत्थेगे जे
णं णिम्मूलुद्धियसव्वसल्ले निरारंभपरिग्गहे निम्ममे निरहंकारे
ववगयरागदोसमोहमिच्छत्तकसायमलकलंके सव्वभाव-भावंतरेहिं णं
सुविसुद्धासए अदीणमाणसे एगंतेणं निज्जरापेही परमसद्धासंवगेवरेग्गए
विमुक्कासेसमयभयगारवविचित्ताणेगपमायालंबणे जाव णं निज्जियघोर-
परीसहोवसग्गे ववगयरोद्धट्ठज्जाणे असेस कम्मकखयट्ठाए जहुत्तसंजम-
जयणं समणुपेहिज्जा पालेज्जा अणुपालेज्जा समणुपालेज्जा जाव णं
समणुठेज्जा जे णं एवंविहे से णं अइरेणं जम्मजरामरणाइ-
अणेगसंसारियसुदुब्बिमोक्खदुक्खजालस्स णं विमुच्चेज्जा, एतेणं अट्ठेणं
एवं वुच्चइ- जहा णं गोयमा ! अत्थेगे जे णं णो अइरेणं विमुच्चेज्जा
अत्थेगे जे य णं अइरेणेव विमुच्चेज्जा ।

से भयवं ! जम्मजरामरणाइ अणेगसंसारिय-दुक्खजालविमुक्के
समाणे ^२जन्नं कहिं परिवसेज्जा ? गोयमा ! जत्थ णं न जरा न मच्चू न

१. 'एतेणं अट्ठेणं' क्वचित् पाठान्तरमिति । २. 'जंतु' पाठान्तरमिति ।

वाहिओ णो अयसऽब्भक्खाणसंतावुव्वेगकलिकलहदरिदंदपरिकेसं ण
इट्ठविओगो, किं बहुणा ?, एगंतेणं अक्खयधुवसासयनिरुवम-
अणंतसोक्खं मोक्खं परिवसेज्जत्ति बेमि ।७।

महानिशीहस्स विइया चूलिया ॥अ. ८॥

समत्तं महानिशीहसुयक्खंधं ॥

ॐ नमो चउवीसाए तित्थंकराणं ॐ नमो तित्थस्स ॐ नमो
सुयदेवयाए भगवतीए ॐ नमो सुयकेवलीणं, ॐ नमो सव्वसाहूणं, ॐ
नमो सव्वसिद्धाणं नमो भगवओ अरहओ सिज्झउ मे भगवई महइ
महाविज्जा ।

वइइए महअअवइइए जयवइइए सएणवइइए वद्धअम्अ-
अणवइइए ^१वइम्अअणवइइए जयए वइजयए जयअनूतए
अपरअअज्जए सव्वअअहअअ ।

उपचारो चउत्थ-भत्तेणं साहिज्जइ एसा विज्जा । सव्वगओ
णइत्थअअरग्अप्आरग्अओ होइ, उवट्ठअअवणूअअ गणस्स वा
अणूउणूआए एसा सत्त वारा परिजवेयव्वा, णित्थारगपारगो होइ,
जेण कप्पसमत्तीए विज्जा अभिमंतिऊणं विग्घविणाइगा आराहंति, सूरै
संगामे पविसंतो अपराजिओ होइ, जिणकप्पसमत्तीए विज्जा
अभिमंतिऊणं खेमवहणी मंगलवहणी भवइ ।८।

‘चत्तारि सहस्साइं पंच सयाओ तहेव चत्तारि ।

सिलोगाविय महानिशीहंमि पाएण ॥३०॥



- प्रशस्ति -

श्रीमद्वीर जिनेशस्य श्रीसुधर्मा गणाधिपः ।
 तपागच्छतरोर्मूलं श्रीगणिपिटकस्य च ॥१॥
 तस्य परम्पराऽऽयातः प्रवचनप्रभावकः ।
 श्रीमद्विजयसिंहाख्यः सिंहो दुर्वादिकुम्भिषु ॥२॥
 तस्य पट्टाम्बरे सूर्यः शैथिल्यध्वान्तशोषणः ।
 श्रीसत्यविजयोऽभूच्च सत्यनिष्ठशिरोमणिः ॥३॥
 पट्टे तदीयके श्रीमान् कर्पूरविजयाभिधः ।
 अभवदतिकर्पूरः प्रसरच्छीलसौरभः ॥४॥
 तत्पट्टाभ्रनिशानाथः सनाथः सौम्यभावतः ।
 क्षमाभृतां पुरोगामीश्रीक्षमाविजयोऽभवत् ॥५॥
 जिनोत्तम-पद्म-रूप-कीर्ति-कस्तूरपूर्वकाः ।
 विजयान्ताः क्रमाऽऽयाताः वित्त्वकवित्वधीधनाः ॥६॥
 तत्पट्टेस्वतपस्तेजस्तिरस्कृतनभोमणिः ।
 श्रीमणिविजयश्चिन्तामणिरीप्सितदोऽभवत् ॥७॥
 तस्य शिष्योऽभवद्बुद्ध्या विनिर्जितबृहस्पतिः ।
 श्रीबुद्धिविजयः सेव्यो बुधैर्बुद्धिगुणान्वितः ॥८॥
 तत्पट्टे आद्य आचार्यः, नाम्नाऽऽत्मारामजी अभूत् ।
 ख्यातः श्री विजयानन्दो जगदानन्ददायकः ॥९॥
 स्मारको जिनकल्पस्य स्वचारित्रेण साम्प्रतम् ।
 श्रीमान् कमलसूरीशः पट्टेऽभूत्तस्य कर्मठः ॥१०॥

शिष्यः श्रीविजयानन्दसूरेर्बभूवसिद्धवाक् ।

कर्मविदारणवीरः श्रीवीरविजय वाचकः ॥११॥

विजयदानसूरीशः शिष्यस्तस्य बुधाग्रणीः ।

श्रुतदाने सदासक्तः सक्तः सुसाधुसर्जने ॥१२॥

तत्कालधीश्च सज्योतिःसर्वागमरहस्यवित् ।

श्रीमत्कमलसूरीशपट्टप्रभावकोऽभवत् ॥१३॥ ॥युग्मम्॥

तस्याऽभूदभिजः प्रशस्तचरणः शिष्यः समेषां मतः,

सेव्यः सार्धचतुःशताधिकमुनिव्रातेन वात्सल्यभूः ।

स्रष्टा बन्धविधान-कर्मविवृतेः सिद्धान्तपारङ्गतः,

कर्मव्रातविदारणैकसुभटः श्री प्रेमसूरीश्वरः ॥१४॥

(शार्दूलविक्रीडितम्) ॥

तस्यैव शिष्यलेशेन श्री मित्रानन्दसूरिभिः ।

सम्पादितां प्रतिं दृष्ट्वा, कुलचन्द्रमुमुक्षुणा ॥१५॥

भुवनभानुपट्टेश - जयघोषेरितेन हि ।

विहितं टिप्पणं स्फुटं, पुनः शोध्यं बहुश्रुतैः ॥१६॥ ॥युग्मम्॥

ग्रन्थसंशोधक-टिप्पणकारजनकेन

राजस्थानप्रान्तान्तर्गतश्री

पिण्डवाडानगरवास्तव्येन

श्रीऋषभदासश्रेष्ठिनाऽऽत्मश्रेयोर्थ-स्वद्रव्य-

व्ययेनाऽऽलेखितो ग्रन्थोऽयं लेखकश्रीजगदीशदासेन ।

॥ शिवमस्तु सर्वजगतः ॥

પૂજ્ય આચાર્યદેવ શ્રી વિજય ભુવનભાનુસૂરીશ્વરજી મહારાજ
આલેખિત સાહિત્ય

૧. પરમતેજ ભાગ-૧ આવૃત્તિ-૩	૩. ૭૦-૦૦
૨. શ્રી ભગવતીસૂત્ર વિવેચન - ભાગ-૧	૨૨-૦૦
૩. યોગદૃષ્ટિ સમુચ્ચય - ભાગ-૨	૩૦-૦૦
૪. નવપદ પ્રકાશ - અરિહંતપદ	૧૦-૦૦
૫. નવપદ પ્રકાશ - સિદ્ધપદ	૨૦-૦૦
૬. નવપદ પ્રકાશ - આચાર્યપદ	૮-૦૦
૭. સીતાજીના પગલે પગલે - ભાગ-૧	૭-૫૦
૮. સીતાજીના પગલે પગલે - ભાગ-૨	૭-૫૦
૯. મનના મિનારેથી મુક્તિના કિનારે - ભાગ-૧	૧૫-૦૦
૧૦. મનના મિનારેથી મુક્તિના કિનારે - ભાગ-૨	૧૫-૦૦
૧૧. જોજે ડુબી જાય ના	૪-૦૦
૧૨. યશોધર ચરિત્ર - ભાગ-૧	૧૨-૦૦
૧૩. યશોધર ચરિત્ર - ભાગ-૨	૮-૦૦
૧૪. પ્રિતમ કેરો પંથ નિહાળો	૧૦-૦૦
૧૫. તિમિર ગયું ને જ્યોતિ પ્રકાશી	૫-૦૦
૧૬. તાપ હરે તન-મનનાં	૧૦-૦૦
૧૭. ગણધરવાદ - આવૃત્તિ ૩	૧૦-૦૦
૧૮. કડવા ફળ છે ક્રોધના	૨૦-૦૦
૧૯. માનવ જાતિને જેન ધર્મની બક્ષીસ	૮-૦૦
૨૦. ભેદી આકાશવાણી (કુવલયમાલા-૧)	૨૫-૦૦
૨૧. માનવ તું માનવ બન	૨૦-૦૦
૨૨. માનવ જીવન મેં ધ્યાન કા મહત્વ	૨૦-૦૦
૨૩. સમરાદિત્ય ચરિત્ર - ભવ ૧-૨	૩૦-૦૦

પ્રાપ્તિસ્થાન

દિવ્યદર્શન ટ્રસ્ટ

૦૦. કુમારપાળ વિ. શાહ

૩૬, કલિકુંડ સોસાયટી

ધોળકા - ૩૮૭૮૧૦

ભરતકુમાર ચતુરદાસ શાહ

૮૬૮, કાળુશીની પોળ

કાળુપુર, અમદાવાદ-૩૮૦૦૦૧

પૂજ્ય આચાર્યદેવ શ્રી વિજય ભુવનભાનુસૂરીશ્વરજી મહારાજ
આલેખિત સાહિત્ય

૧. પરમતેજ ભાગ-૧ આવૃત્તિ-૩	રૂ. ૭૦-૦૦
૨. શ્રી ભગવતીસૂત્ર વિવેચન - ભાગ-૧	૨૨-૦૦
૩. યોગદષ્ટિ સમુચ્ચય - ભાગ-૨	૩૦-૦૦
૪. નવપદ પ્રકાશ - અરિહંતપદ	૧૦-૦૦
૫. નવપદ પ્રકાશ - સિદ્ધપદ	૨૦-૦૦
૬. નવપદ પ્રકાશ - આચાર્યપદ	૮-૦૦
૭. સીતાજીના પગલે પગલે - ભાગ-૧	૭-૫૦
૮. સીતાજીના પગલે પગલે - ભાગ-૨	૭-૫૦
૯. મનના મિનારેથી મુક્તિના કિનારે - ભાગ-૧	૧૫-૦૦
૧૦. મનના મિનારેથી મુક્તિના કિનારે - ભાગ-૨	૧૫-૦૦
૧૧. જોજે ડુબી જાય ના	૪-૦૦
૧૨. યશોધર ચરિત્ર - ભાગ-૧	૧૨-૦૦
૧૩. યશોધર ચરિત્ર - ભાગ-૨	૯-૦૦
૧૪. પ્રિતમ કેરો પંથ નિહાળો	૧૦-૦૦
૧૫. તિમિર ગયું ને જ્યોતિ પ્રકાશી	૫-૦૦
૧૬. તાપ હરે તન-મનનાં	૧૦-૦૦
૧૭. ગણધરવાદ - આવૃત્તિ ૩	૧૦-૦૦
૧૮. ફડવા ફળ છો કોધના	૨૦-૦૦
૧૯. માનવ જાતિને જૈન ધર્મની બક્ષીસ	૮-૦૦
૨૦. મેદી આકાશવાણી (કુવલયમાલા-૧)	૨૫-૦૦
૨૧. માનવ તું માનવ બન	૨૦-૦૦
૨૨. માનવ જીવન મેં ધ્યાન કા મહત્વ	૨૦-૦૦
૨૩. સમસાદિત્ય ચરિત્ર - ભવ ૧-૨	૩૦-૦૦

પ્રાપ્તિસ્થાન

દિવ્યદર્શન ટ્રસ્ટ

C/o. કુમારપાળ વિ. શાહ ભરતકુમાર ચતુરદાસ શાહ
૩૬, કલિકુંડ સોસાયટી ૮૬૮, કાળુશીની પોળ
ધોળકા - ૩૮૭૮૧૦ કાળુપુર, અમદાવાદ-૩૮૦૦૦૧